

Inatsisissatut siunnersuummut oqaaseqaatit

Nalinginnaasumik oqaaseqaatit**1. Aallaqqaasiut:****a) Inatsisissatut siunnersuutip imarisai pingaarnertit**

Inatsisissatut siunnersuut kapitalinut 13-inut immikkoortitigaavoq.

Kapitali 1: Ilinniarnertuunngorniarluni siunertaa

Kapitali 2: Neqerooruteqarneq, inissanik aqutsineq, ilinniartunngorsinnaaneq ilinniartunngortitsinerlu

Kapitali 3: Ilinniakkap aaqqissugaanera imarisaalu

Kapitali 4: Naliliineq uppersaasiinerlu

Kapitali 5: Pinngitsoorani takkuttussaaneq aamma suleqataalluarluni peqataanissaq il.il.

Kapitali 6: Ilinniartitsisut

Kapitali 7: Rektori

Kapitali 8: Siunnersuisutut ingerlataqartut

Kapitali 9: Nakkutilliineq, pitsaassutsimik inerisaaneq naammagittaalliornerlu

Kapitali 10: Tapersiissutaasumik sammisassat

Kapitali 11: Aningaasalersuineq atuisullu akiliutaat

Kapitali 12: Misileraalluni inerisaallunilu suliat

Kapitali 13: Atuuttuulersitsinermi ikaarsaariarnermilu aalajangersakkat

Inatsisissatut siunnersuusiortermi eqqunniarneqarpoq ilinniarnertuunngorniarluni ilinniagaq ataasiusoq, "ilinniarnertuunngorniarluni ilinniarneq", tamatumallu taarsissavai maannakkut atuuttut ilinniarnertuunngorniarluni ilinniartitaaneq (GU), nunatsinni niuernikkut qaffasinnerusumik soraarummeerniarluni ilinniagaq (Hhx) aamma nunatsinni teknikkikkut qaffasinnerusumik soraarummeerniarluni ilinniagaq (Htx).

Siunnersuutip kapitaliani 1-imi aalajangersarneqarput ilinniakkap siunertaa, ilinniakkap sivilissusaa aamma kikkut ilinniartunngorsinnaanersut.

Siunnersuut tunngavigalugu ilinniarnertuunngorniarneq ukiunik pingasunik sivilissuseqassaaq ukiullu affaatut sivilissusilimmik ataatsimoorussamik ingerlatsiviussaaq (ilinniartitsinermi immikkoortoq siulleq) ukiullu pingajuata affaanik sivilissusilimmik ilinniartitsinermik malitseqartinneqartoq (ilinniartitsinermi immikkoortut aappaanniit arfernannut) tamatumani ilinniartut ilinniagassatut ingerlatassaminnik ilinniartitsissutinik arlalinnik assigiinngitsunik sammisamikkut imaqartitanik toqqartuissapput tamakkulu saniatigut immikkut ilinniagaqarnissamut toqqartugassartaqassaaq.

Siunnersuummi ilinniarnertuunngorniarnermi ilassutitut atuartitsissutissanik pikkorissarfigineqarsinnaasunik pilersitsiortortussaataanermik pisussaaffeqartitsineq ingerlateqqinneqarpoq annertuumillu, ilinniartut ataasiakkaat piginnaassusaat pisariaqartitaallu aallaavigalugit, immikkut ingerlataqarsinnaanermut immikkullu aaqqissukkanik ilinniartitsisinnaanermut periarfissiisoqarpoq.

Siunnersuummi ilinniarnertuunngorniarni siunertaani ilinniagaqalernissamut piareersarfiunera aamma nalinginnaasumik peroriartuutaasumik ilinniarnertuunngorniarni, Kalaallillu Nunaanni, Danmarkimi aamma nunani allani annertuumik ilinnialissutaasinnaanera, ingerlateqqinneqarput. Nutaatut Kalaallit Nunaanni Danmarkimilu ingerlaqqiffiusumik ilinniakkani sivikinnerusuni akunnattumillu sivisussusilinni ilinnialissutaasinnaasunik, ilinniarnertuunngorniarni ingerlatsinernik immikkut ittunik pilersitsinissamut maleruagassiorsinnaanermut, Naalakkersuisut periarfissiipput.

Siunnersuummi erseqqissarneqarput pingaarnerusut anguniagaasut suunersut (ilinniagaqalernissamut piareersartitaaneq aamma nalinginnaasumik peroriartuutaasumik ingerlatsineq) aamma erseqqissarneqarput ilinniartitsinerup imarisaanut aaqqissugaaneranullu piumasaqaataasut suunersut.

Siunnersuutip kapitaliata aappaani aalajangersarneqarput suliffeqarfiit sorliit ilinniarnertuunngorniarni ilinniartitsinernik neqerooruteqarsinnaanersut. Tamatuma saniatigut inissanik pissarsiniarnersut inissanillu aqutsinerup maleruagassiuunneqarnissaasa eqqanaarneqarnissaat aalajangersaavigineqarput.

Kapitalimi nutaatut qinnuteqartunut inatsisitigut aalajangersagaasunik tunngaveqartumik ilinniarnertuunngorniarni ilinnialernissamut akuerineqarsinnaaneq aalajangersaaffigineqarpoq, ilinniarnertuunngorniarni ilinnialersussaq ilinniarnertuunngorniarnimut akuerineqarnini ukiunik marlunnik sioqqullugu meeqqat atuarfianni atuarinneqarnerminik nammassinnissimappat imaluunniit meeqqat atuarfianni atuartitsinermut nalinginnaasumik sanilluunneqarsinnaasumik atuarinneqarsimappat. Tamatuma saniatigut aamma piumasarineqarpoq ilinniartitsissutissani pisinnaasat inatsisitigut aalajangersagaasunik minnerpaaffeqarnissaat. Piumasaqaatinut tamakkununga tunngassuteqartumik immikkut akuersisoqarsinnaatitaavoq. Qinnuteqartut piumasaqaatit minnerpaaffiini piviusunngortitsinngitsut, ilinniartunngorumasinnaapput misilitsinneq Naalakkersuisunit ingerlanneqarlunilu nalilerneqartoq aqutugalugu. Inissaqartitsineq pissutigalugu qinnuteqartut misilitsinnermi angusigaluartut immikkulluunniit akuerisaagaluartut ilaasa ilinniartunngunngitsoornerat nalaanneqarsinnaammat, taakku akornanni qanoq toqqartuisoqarsinnaanera pillugu malittarisassaliortoqarpoq.

Tamakkua saniatigut aamma, ilinniartunut rektori isumaqatigiissuteqarfigalugu ilinniakkamik unitsitsigallarsimasunut, ilinniaqqilersinnaanermut aalajangersakkanik pilersitsisoqarpoq.

Ilinniartussat ilinniarfinnut sorlernut ilinniartunngorsinnaanerannut aalajangersagaliortoqarpoq. Aallaavittut ilinniartut qinnuteqarfimmik nalaani kommunerisamik (kommune angerlarsimaffik) ilinniarnertuunngorniarfiani ilinnialertussaapput. Naalakkersuisut aamma aalajangissallugu periarfissinneqarput, qinnuteqartut kommunerinngisaasa ilinniarnertuunngortarfiannut ilinniartunngortitsisinnaanermik, inissanik imaluunniit atuartitsissutissat pillugit immikkut ittunik inuttulluunniit pissutsinik tunngassuteqartunik pequtissaqartoqarpat. Pinngortitaq imaluunniit niuerneq aallaavigalugit ilinniarnertuunngorniarfinni neqerooruteqartunut ilinniartunngortinneqassapput tamakkununga ilinniartunngorumallutik qinnuteqarsimasut. Tamatuma saniatigut Naalakkersuisut, aalajangersimasumik sammiveqarluni ilinniarnertuunngorniarfinnut, qinnuteqartut ilinniartunngortissinnaanerannut aalajangersagaliornissamut periarfissinneqarput.

Ilanngullugu, illoqarfimmi ilinniarnertuunngorniarfimmi angerlarsimaffeqanngitsunut najugaqartinneqarsinnaanermut aamma nerisaqarsinnaanermut imaluunniit nerisassaqartinneqarnissamut aalajangersimasumut allamut peqataatinneqarsinnaanermut aalajangersagaliortoqarpoq.

Siunnersuutip kapitaliisa pingajuanni ilinniarnep aaqqissuussaananeranut imarisaanullu aalajangersagaliortoqarpoq.

Nutaatut, piffissap ilinniartunut ilinniartitsiviusussap sivisussusissaa ukiumut aalajangersimasumik sivisussusilerlugu minutsinullu 60-ikkaartunngorlugu, aalajangersarneqarpoq. Tamatuma saniatigut aalajangersarneqarput ilinniartitaanermi piffissaq, tunngaviusumik aammalu immikkut sammiveqarluni ilinniartinneqarnerup nalaani, ilinniartinneqarfiusussa. Aammattaaq aalajangersaavigineqarput ilinniartinneqarnerup ukiuini ingerlasussat, sapaatip-akunneri ilinniartitsiviusussat aamma atuanngiffeqarnissamut pilersaarummut tunngassuteqartut.

Tunngaviusumik ilinniartitsinermi aamma immikkut sammiveqarluni ingerlatsinermi aalajangersaaffigineqarput siunertat, ilinniarnissamut piffissaq aamma atuartitsissutissat assigiinngitsut.

Immikkut sammiveqarluni ingerlanissaq eqqarsaatigalugu aalajangersaavigineqarput ilinniartut sammivinnut aalajangersimasunut ilinniartussatut akuerineqartarneri.

Tunngaviusumik ilinniartut ingerlavigissallugu ilinniarfigissallugulu ilinniarnertuunngorfigiومانeruseraminut ilinniartunngortinneqartarnissaa aalajangersaaffigineqarpoq. Aallaaviuvoq ilinniartut sammivimmi ilinniarfimmilu salliutitaminni ilinniartunngortarnissaat. Tamatumunnga tunngatillugu immikkut iliuuseqartoqarsinnaananeramik aalajangersagaliortoqarpoq.

Siunnersuummi ilinniarnertuunngorniarfiit, piffissaq Naalakkersuisunit aalajangersagaq nallertinnagu, atuartitsinermi sammivinnik sorlernik neqeroorteqarnissaminnik aalajangersaanissamut piumaffigineqarput. Naalakkersuisut peqqutissat aalajangersimasut peqqutigalugit, ilinniarnertuunngorniarfinni ataasiakkaani atuartitsinermi sammivinnik ataasiakkaanik ingerlatsinissamut, itigartitsisinaanissamut periarfissinneqarput. Tamatuma saniatigut Naalakkersuisut, ilinniarnertuunngorniarfinni sammivinnik ingerlatsinissamut sinaakkusersuillutillu malittarisassiorsinnaapput, tamatumunnga ilanngullugit sammivinnik aalajangersimasunik neqeroortussaataitaneq (pinngitsoorani ilinniartitsiviusussat).

Ilinniarnertuunngorniarfinni ilinniartut piumassusaat tunngavigalugit toqqagassatut ilinniartitsisinaanermut aalajangersakkanik pilersitsisoqarpoq aamma aalajangersagaliortoqarpoq ilinniartuunngorniat ilinniarnertuunngorniarfinni illutaasunik ilinniakkerivittut tamatumalluunniit assigisaanik atuisinaanerannik periarfissiisunik taamaaliornikkut nukittorsarniarneqarlutik ilinniarnermi avatangiisit pilersinniarneqarlutillu ilinniartut tamarmik ilinniakkaminnik pissarsilluarsinnaanerunissaannut periarfissat.

Siunnersuummittaag ilinniartitsinermi oqaatsit aalajangersaavigineqarsimapput tamatumanilu aalajangerneqarput kalaallit oqaasii aamma qallunaat oqaasii ilinniartitsissutitut oqaasiussasut aamma tuluit oqaasii allamiullu oqaasii allat aamma ilinniartitsinermi oqaasiusinnaanngortinneqarsimapput. Tamatuma saniatigut nutaatut aalajangersarneqarpoq ilinniartitsissutini tamani, taamaallaat kalaallit oqaasiini ilitsoqqussaralugu oqaatsit A-tut ajornassusilittut ingerlanneqartut eqqarsaatiginagit, ilinniartitsineq allamiut oqaasiinut ilinniartitsinertut ilusilersugaalluni isigineqarlunilu aaqqissuunneqassasoq taamaaliornikkut ilinniartut oqaatsiminnik ineriartortitsisinnaaqqullugit ilinniartitsissutillu imarisaannik pissarsisinnaaneroqqullugit.

Siunnersuummi suleriaasissat perorsaaneramilu tunngavissat aalajangersarneqarput ilaatigullu aalajangersarneqarput ilinniartitsineq ilinniartitaanerup tamarmiusup ingerlanerani ilinniartitsissutinilu tamani atuinissamut sammisuussasoq atuagarsornerlu pingaartinneqassasoq ilinniartitsinerlu ilinniartunut tamaginnut unamminartoqartumik aaqqissuunneqassasoq ilinniartullu ilinniartitsiviusuni tamani nikerartunik itisilerisumillu unammisassaqaartinneqassasut taamaaliornikkut ilinniartitsissutissat aqputigalugit ilinniartut ilinniagassaminnut imatut nalunngisaqalissasut ilinniartitsinerup, ilinniartitsissutini ataasiakkaani ataatsimullu, siunertai ilinniartunut naammassineqarsinnaanngortillugit.

Nutaatut aalajangersaaffigineqarput ilinniartitsisoqatigiit klassimi ilikkariartornermi avatangiisinik toqqissisimanartunik ilinniartullu ataasiakkaat peqqissutut misiginerannik pilersitsiniartussat taamaaliornikkut ilinniakkamut sammisaqarneq inerisarneqarniarpoq ikerinnakkullu ilinniakkamik unitsitsisarneq pinaveersaartinniarneqarluni.

Aalajangersarneqarput ilinniarnertuunngorniarfiup ilinniartut ataasiakkaarlugit ikorfartuinissamik, siunnersuineramik aamma ilinniakkatigut sammivimmik toqqaaniarneranni,

ilinniartitsisutit toqqagassat toqqarniarneranni, ilinniakkap naammassinissaa pillugu aamma ilinniakkamik inuutissarsiummillu toqqaaniarneranni ilitsersorneqarnissaannik neqeroorfigissagai. Tamatuma saniatigut aalajangersarneqarput ilinniartut, ilinniakkatigut periutsitigullu ilinniartitsissutini ataasiakkaani, ilitsersorneqarnissaat aamma aalajangersarneqarpoq ilinniartitsissutit imminnut ataqatigiinnerat pillugu ilitsersorneqarnissaat aalajangersarneqarportaaq klassit ilinniartulluunniit ataasiakkaat pillugit pissutsit oqallisigineqartarnissaat.

Tamakkua saniatigut immikkut ingerlatsinerit pillugit aalajangersaasoqarpoq tamakkunanilu pineqarput ilinniarnermik sivikillisaasinnaanermut periarfissat, tamatumani pineqarluni immikkut ilinniarnertuunngorniarnermi ukiuni pingasuni ingerlanneqartartumit sivikinnerusumik ingerlatsisinnaaneq aamma ilinniarnertuunngorniarnermik, inuttut ilinniagarlu pillugit pissutsinik tunngaveqartumik, sivitsuisinnaaneq aammalu ilinniartunut tamatuminnga pisariaqartitsisunut perorsaaneq pillugu immikkut ikorfartuisinnaanermik ingerlatsisinnaanerit

Siunnersuutip kapitaliata sisamaanni aalajangersarneqarput ingerlaavartumik inaarutaasumillu nalilersuisarnerit. Naliliisarnerup siunertai aalajangersarneqarput aamma aalajangersarneqarput angajoqqaat ilinniartup ilinniartitsineri pissarsiaqarnera pillugu ilinniarnertuunngorniarniup isumaannik ilisimatinneqartarnissaat.

Inaarutaasumik naliliisarneq (ilinniarnertuutut soraarummeerneq) pillugu aalajangersakkani aalajangersarneqarput naliliisarnermi siunertarineqartut aamma aalajangerarneqarput soraarummeerneq qanoq ingerlanneqartassanersoq (tamakkiisumik soraarummeerneq imaluunniit atuartitsissutissani ataasiakkaani soraarummeerneq) aamma aalajangerarneqarput ilinniarnertuunngorniarniup soraarummeernermi suut misilitsiffigineqartassanersut.

Uppernarsaanissaq pillugu aalajangersakkani aalajangerarneqarput soraarummeernermit uppernarsaat sunik imaqqassanersoq aamma rektorip, ilinniartunut ilinniarnertuunngunngitsoorlutik naammassisunut immikkut uppernarsaanissamut, pisussaaffeqarnera.

Tamatuma saniatigut naliliisarnissamut periusissat pillugit aamma ilinniarnermi immikkoortumut tulluuttumut ingerlaqqissinnaaneq pillugu aalajangersagaqarpoq.

Siunnersuutip kapitaliata tallimaani imaritinneqarput ilinniartitsinermit takkuttussaataitaaneq pillugu aamma ilinniartitsinermit suleqataalluarluni peqataasussaataitaanermut aalajangersakkat tamatumunnga ilanngullugit ilinniarnertuunngorniarniup ilinniarnermut ileqqorissaarnissamullu aalajangersakkat tamakkuninngalu malinnittussaataitaaneq.

Siunnersuummi kapitalit arfernanni ilinniartitsisut pillugit aalajangersagaliortoqarpoq. Tamatumani ilinniartitsisut tunngaviummik ilinniartunut ataasiakkaanut ataqatigiinnullu

pisussaaffilerneqarput. Tamatuma saniatigut ilinniartitsisut ilinniarnertuunngorniarfinni ilinniartitsisuusinnaajumallutik sunik piginnaasaqarnissaat aalajangersarneqarput. Tamatumani ersersinneqarpoq ilinniartitsinermik piginnaasaqarnerup imarigai ilinniartitsissutitigut perorsaanikkullu piginnaanaqarneq. Piginnaasaqarnernut ataasiakkaanut piunasaqaataasut erseqqinnerusut aalajangersarneqarput. Tamatuma saniatigut kapitalimi aalajangersaasoqarpoq ilinniartitsisut ilisimatusarnermik tunngaveqartunik ilinniaqqinnissamik neqeroorutit peqataaffiginissaat pisinnaatitaaffigalugillu pisussaaffigigaat.

Siunnersuutip kapitaliata arfineq-aappaanni rektori pillugu aalajangersaasoqarpoq. Tamatumani pineqarput rektorip akisussaaffiitut suliasaanut aamma rektorinngorsinnaanermi piginnaasassanut aalajangersakkat. Ilanngullugulu aalajangersarneqarpoq rektorip ilisimatusarnermik tunngaveqartunik ilinniaqqinnissamik neqeroorutit peqataaffiginissaannut pisinnaatitaaffeqarnera pisussaaffeqarneralu.

Siunnersuutip kapitaliisa arfineq-pingajuanni nutaatut siunnersuisutut ingerlataqartut pillugit aalajangersaasoqarpoq. Tamatumani pineqarput ilinniartut ilinniartitsisullu siunnersuisartoqatigiivi. Siunnersuisartoqatigiit taakku marluusut pisinnaatitaaffii, katiterneqarneri sulinissaallu aalajangersarneqarput.

Siunnersuutip kapitaliisa qulingiluanni aalajangersarneqarput nakkutilliinermut, pitsaassutsimik inerisaanermut naammagittaalliortarnerlu pillugit maleruagassat. Tamakkunani ilaatigut ersersinneqarput Naalakkersuisut ilinniartitsineq, misilitsinnerit soraarummeernerillu inatsit naapertorlugu ingerlanneqartut qullersaaffigalugit akisussaaffigaat nakkutigisaralugillu. Ilanngullugu aamma erserpoq Naalakkersuisut paasissutissat pisariaqartut tamaasa ilinniarnertuunngorniarfinniit piniarsinnaagaat aamma Naalakkersuisut ilinniarnertuunngorniarfiit Naalakkersuisullu akornanni elektroniskiusumik attaveqatigiinneq pillugu malittarisassanik aalajangersaasinnaasut. Kiisalu aalajangersarneqarpoq ilinniartut rektorip aalajangigaanik naalakkersuisunut maalaaruteqarsinnaatitaanerat.

Siunnersuutip kapitaliisa qulinganni aalajangersarneqarput Naalakkersuisut assigiinngitsutigit tapersiissutaasunik sammisassaat.

Siunnersuutip kapitaliata aqqarnganni aalajangersarneqarput ilinniarnertuunngorniarfinnik aningaasalersuineq atuisullu akiliutaat. Tamatumani erserpoq ilinniarnertuunngorniarfiup sanaartugaataanut, ilinniartitsinermut ingerlatsinermullu aningaasartuutit tamaasa Namminersorlutik Oqartussat pisussaaffigigaat, erseqqissumik inatsisitigut tunngaviligaanngippat, aningaasartuutit tamarmik ilaannaalluunniit kommuninit allanilluunniit pisussaaffigineqartut.

Siunnersuutip kapitaliisa aqqaneq-aappaanni aalajangersarneqarput, Naalakkersuisut immikkut pisoqartillugu inatsimmik sanioqqutsisinnaanerit, tamanna misileraalluni sulinissap perorsaanikkullu inerisaanissap siuarsarnissaanik peqquteqarpat. Tamatuma saniatigut aalajangersarneqarpoq Naalakkersuisut ilinniartunut ataasiakkaanut tunngatillugu, immikkorluinnaq ittunik pissutissaqartillugu, inatsit sanioqqussinnaagaat.

Siunnersuutip kapitaliisa aqqaneq-pingajuanni aalajangersarneqarpoq inatsit qaqugu atulersinneqassanersoq, siunnersuutigineqarporlu tamanna 1. august 2012-imi pissasoq, kisiannili ikaarsaariarnermi aalajangersarneqartut allaaserineqarsimasut naatsorsuutigalugit.

b) Inatsisissatut siunnersuutip tunulequtai pingaarnerit.

Nunatsinni ilinniarnertuunngorniartarnermik nutarterinermit aallartinneqarsimasumut tunngatillugu, takuuk matuma kingorna immikkoortoq c, Namminersornerullutik Oqartussat 2007-imi Undervisningsministeriamut, ilinniarnertuunngorniartarnerup nunatsinnut nuunneqarnissaanut kissaateqarnerminnik, saqqummiussaqaarput.

Folketingip Inatsimmik nr. 1393-imik 27. december 2008-meersumik akuersineranut ilutigitillugu Namminersornerullutik Oqartussanit Nunatsinni ilinniarnertuunngorniartarluni ilinniartitsinermit maleruagassiorneq akisussaanerlu kiisalu ilinniarnertuunngorniartarnermi, Nunatsinni niuernermit qaffasinnerusumik ilinniartitaanermi aamma pinngortitaq pillugu qaffasinnerusumik ilinniartitaanermut soraarummeertarnermi allaffissornikkut aqutsineq tiguaat. Tigusinermit tunngavigineqarput namminersorneruneq pillugu inatsimmi § 5, imm. 1, (Namminersorneruneq pillugu inatsit nr. 577, 29. november 1979-meersoq), tamatuma kingorna naalagaaffimmi qullersat namminersornerusunik isumaqatigiissuteqarnermikkut inatsisiliornikkut namminersornerusunut maleruagassiornermik maleruagassiornerullu ilaanik suliarlu pillugu allaffissornikkut allaffissornerullu ilaanik, inatsimmut ilanngussami taaneqartunik, aqutsinernik tunniussisinaalermata. Ilinniarnertuunngorniartarneq ilinniartitaanerup iluani namminersornerusunit tiguneqartut kingullersaraa.

Taamaattumik nunatsinni ilinniarnertuunngorniartarnerup nutarterneqarneranik ingerlatsilernermit atatillugu siunertaajuaannarsimavoq, Nunatta ilinniarnertuunngorniartarneq pillugu aalajangersakkanik namminersortumik aalajangersaasalernissaa.

Ilinniarnertuunngorniartarnerup killiffii:

Nunatsinni ilinniarnertuunngorniartarneq ullumikkut imaqarpoq ukiuni pingasuni sivisussuseqartumik ilinniarnertuunngorniartarnermik (GU), tamatuma imarisamigut qaffasissutsimigullu qallunaat hf-imi ilinniartarnerat assingilluinnangajappaa, (GU pinngitsoorani ilinniagassanik 2-nik A-mi killiffeqarpoq, hf ataasiinnarmik peqartoq), ilanngullugu taamatuttaq qaffasinnerusumik niuernermit ilinniartitaanermik (Hhx) imaqarpoq aammalu pinngortitaq pillugu qaffasinnerusumik soraarummeertarnermik imaqarluni (Htx). Qallunaat Nunaanni ilinniartitaanernut naleqqiullugit nunatsinni

ilinniartitaanerit taakkua nunatsinni pissutsinut pisariaqartitanullu naleqqussagaapput. Ilaatigut nunatsinni ilinniartitaanerit naleqqussakkanik atuartitsissutissartaqarput, tamatumani pineqarlutik kalaallisut atuartitsineq A-mik qaffasissuseqartoq takornartallu oqaasiinik qallunaat ilinniarnertuunngorniartarnerannut naleqqiullugit ikinnerusunik qinigassaqartitaaneq. Ilinniartitsissutissat ilaatigut sivisussutsimikkut, imarisamikkut ilinniartitsissutissanilu anguniagassaatitat ilaasigut naleqqussagaapput.

Nunatsinni ilinniarnertuunngorniarluni atuarfiit pingasut GU-mi ilinniarsinnaanermik neqeroortarput (Nuuk, Aasiaat aamma Qaqortoq), ilinniagaqarfik ataaseq Hhx-imi ilinniarsinnaanermik neqerooruteqartarpoq (Qaqortumi Niuernermik Ilinniarfik), ilinniagaqarfilla ataaseq Htx-imi ilinniagaqarsinnaanermik neqerooruteqartarluni (Sisimiuni Sanaartornermik Ilinniarfik). Kingulleq ukiumi atuarfiusumi 2010-2011-mi inissaqarniarneq peqqutigalugu aamma nalinginnaasumik ilinniarnertuunngorniarluni (GU) atuaqatigiiaanik marluusunik pilersitsisimavoq.

Nalinginnaavoq nunatsinni inuusuttut pingajorarterutaasa missaannik amerlassusillit ilinniarnertuunngorniartutik atualertarnerat. Atuartitsinermi ukiumut ilinniartunik 300-unik nutaanik tiguisinnaasoqartarpoq. Taamaattoq ukiumi atuarfiusumi 2010/2011-mi ilinniartut nutaat 575-it tiguneqarput. Taakkunannga GU-mi 455-it, Htx-imi 75-it aamma Hhx-imi 45-it atualerput.

Nunatsinniit ilinniarfinni qaffasinnerusuni ilinniarsinnaasut amerlanerusinnaanerat eqqanaarniarlugu Nunatsinni Qallunaallu Nunaanni ilinniartitaanermut oqartussaasut immikkut isumaqatigiissuteqarsimapput taamaalilluni nunatsinniit qinnuteqartut Danmarkimi ilinniaqqiffiusunut ilinnialersinneqarsinnaallutik. Tunngaviusumik nunatsinniit qinnuteqartut ilinnialersinneqartussaapput, amerlassutsimik aalajangersagaareersut akimorlugit, qinnuteqartup ilinniarnissamut akuerineqarnissaminut piumasaqaataasut aamma Namminersorlutik Oqartussat piumasaqaataat immikkut ittut naammassisimappagit aammalu Namminersorlutik Oqartussanit ilinniagaqarnerisuteqarsinnaatitaappat.

Universititini ilinniaqqissinnaanermut maleruagassani (Bekendtgørelse nr. 233 af 24. marts 2011 om adgang m.v. ved bachelor- og kandidatuddannelser ved universiteter) Undervisningsministeriallu ilinniaqqiffiusunut isersinnaanermut malittarisassiaani (bekendtgørelse nr. 87 af 7. februar 2011 om adgang til erhvervsakademiuddannelser og professionsbacheloruddannelser) Nunatsinni ilinniarnertuunngorniartarfiit qallunaat taamatut ilinniartitsiviini ilinniarnernut naligiissinneqarput. Naligiissitsinermut pissutaapput ilinniartitsinermut, soraarummeernissamut, nakkutiginninnissamut, ilinniartitsisut piginnaassusissaannut, ilinniartitsissutininut ataasiakkaanut tamakkunungalugu qaffasissusiliussat ilinniartitsissutissallu anguniagassartaannut maleruagassiat Namminersornerullutik Oqartussat ilinniarnertuunngorniartarnermik tiguisinerata tungaanut ilinniartitaanermut ministerimit aalajangersarneqarsimammata, taamaaliornermilu

taamatut aalajangersaasut ilinniartitaanerup aaqqissugaaneraniq pitsaassusissaanullu akisussaasuummata. Namminersorlutik Oqartussat maanna assingusumik akisussaaffeqarput.

Nunarput nunat avannarliit ilinniarnertuunngorniarneq pillugu isumaqatigiissutaannik akuersaarnikuuvoq (overenskomst af 3. november 2004 om nordisk uddannelsesfællesskab på det gymnasiale niveau (det almene gymnasium og erhvervsskolerne), tamatumanilu nunat avannarliit akunnerminni inatsisiliornermikkut nalinginnaasumik suliffeqalersinnaanermillu piginnaatitsiviusunut ilinniarnertuunngorniarnarfimminnut, nammineq innuttaasumittut periarfissiinikkut, atuartussanik isaatitsinissamut neriorsueqatigiinnikuupput. Nunat avannarliit ilinniarnertuunngorniarneq pillugu isumaqatigiissutaanni aamma eqqanaarneqarpoq nunat akunnerminni ilinniartunik paarlaasseqatigiissinnaanermi akiliinissamut piumasqaateqartannginnissaat taamaaliornermi nunat avannarliit akornanni ilinniarnertuunngorniarnat killilersorneqanngitsumik nikerarsinnaanerit ingalassimatinneqarsinnaammat.

Nunatsinni ilinniarnertuunngorniarnarnerup ineriartornerata oqaluttuassartaa:

1953-imi Inatsit Tunngaviusoq allanngortinneqarmat Nunarpullu Danmark-imut ilagitinneqalermat 1954-imi Nuummi realskolimiit atuartut marluk periarfissinneqarput Danmarkimi ilinniarnertuunngorniarnarlutik atualersinnaanerminnut.

Piffissami 1954-imiit 1977-imut Ministeriet for Grønland ikorfartuisarpoq kalaallit inuusuttut Danmarkimi ilinniarnertuunngorniarnarannut. Taamatut aaqqissuussinermi inuusuttut aalajangersimasumik amerlassusillit qallunaallu oqaasiinik pikkorissuseqartut periarfissinneqartarput ilinniarnertuunngorniarnissaminnut.

1975-imiit 1977-imut ilinniartitsisunngorniarnarnermik nutarterinermut ilutigitillugu innersuussutigineqarpoq ilinniartitsisunngorniarnarnermi qallunaat HF-ianni ilinniarsimaneq isissutaasinnaanngortinneqassasoq. Tamatuma kingunerisaanik Ilinniarnarfissuarmi 1977-imi HF-imi ilinniartitsineq aallartinneqarpoq ilinniartitsissutissaq kalaallit ilitsoqqussaralugu oqaatsit ilinniartitsissutissanut ilanngullugu. 1983-imi HF aammattaq Aasianni aallartinneqarpoq. 1986-imi ilinniartitaaneq ukiunik pingasunik sivilissusilerneqarpoq ilanngullugulu ilinniartitsissutissat pillugit ilanngussani allannguutit arlallit eqqunneqarlutik. Tamatuma saniatigut ilinniartitsinerup taaguutaa allanngortinneqarpoq Kalaallit Nunaanni Ilinniarnertuunngorniarnarnermut (GU), ilinniagarlu Aasianni Qaqortumilu neqeroorutigineqartalerluni.

1. marts 1992 atuutilerpoq Peqqussut nr. 108, 17. februar 1992-imeersoq ilinniarnertuunngorniarnarnerup Kalaallit Nunaanni atuutilersinneqarnerat il.il. aamma Qaffasinnerusunut Piareersarfittut pikkorissartarneq pillugu inatsit aamma inersimasunut atuartitsissutissani ataasiakkaani ilinniaqqissinnaanermut piareersaatitut pikkorissartarneq il.il. atuutilertinneqarput (Kalaallit Nunaanni ilinniarnertuunngorniarnarnermut ilinniartitsineq pillugu Peqqussut).

1996-imi GU-mi ilinniartitaanerup nutarterneqarnera naammassineqarpoq, tamatumani Danmarkimi ilinniarnertuunngorniartarnerup imarisaasa ilaat ilanngussuunneqarput, ilaatigut ukiup sisamararterutikkaartumik misilitsittarnerit eqqunneqarlutik, ilinniartitsissutit soraarummeerfiussat ikilisarneqarlutik aammalu ilinniartitsissutissani qaffasissumik ilinniartitsinernut peqataasinnaaneq periarfissanngortinneqarluni.

2000-imi ukiunik pingasunik sivisussusilimmik atuarfiussamik Sisimiuni Sanaartornermi Ilinniarfimmi Htx-imut ilinniartitaaneq eqqunneqarpoq, 2002-milu taamatuttaaq ukiuni pingasuni atuarfiussaaq Hhx-imut ilinniartitaaneq Qaqortumi Niuernermik Ilinniarfimmi aallartinneqarpoq. Inuutissarsiutinut ilinniarnertuunngorniartarfiit marluk tamarmik pilersinneqarput Peqqussut nr. 1127, 29. december 1999-imeersoq, inuutissarsiutinut ilinniarnertuunngorniartarnerit aamma qaffasinnerusumik niuernermit ilinniartitaanerit aamma qaffasinnerusumik pinngortitamut tunngassuteqartunik ilinniarnertuunngorniartarnerit Kalaallit Nunaannut atulersinneqarnerat, tunngavigalugu, ilinniartitaanerillu taakku tamarmik qallunaat ilinniartitaanerisut aaqqissuunneqarput kalaallit oqaasii ilinniagassatut ilassutigalugit.

2006-imi Nunatsinni ilinniarnertuunngorniartarfiit pingasuusut naleqqussarneqarput Danmarkimi 2005-imi aaqqissuusseqqinnerup kingunerisaanik. Naleqqussaanerit kalaallit qallunaallu ilinniarnertuuisa Danmarkimi ilisimatusarfinnut isersinnaanissaasa naligiisinneqarnissaannik siunertaqarput.

2006-imi iluarsinerit ilagaat atuartitsissutit qitiusuni ilikkagassatut pilersaarutit assigiissaarneqarnerat tassa GU-ni, Htx-imi, Hhx-imi atuartitsissutissani kalaallit oqaasiini, qallunaat oqaasiini, tuluit oqaasiini aamma matematikkimi aamma atuartitsissutissat uumasulerineq, nunalerineq aamma akuutissalerineq GU-mi ilinniarnertuunngorniartarnermi eqqunneqarput.

Iluarsiinerni tunngavigineqarput Nalunaarut nr. 748, 29. juni 2006-meersoq Nunatsinni Ilinniarnertuunngorniartarneq aamma ilinniarnissamut piareersarluni ilinniartitsissutissani ataasiakkaani ilinniartitaaneq (GU pillugu nalunaarut), Peqqussut nr. 787, 20. juni 2006-meersoq inuutissarsiutit pillugit ilinniarnertuunngorniartarnerup aamma qaffasinnerusumik niuernermit ilinniartitsinerup aammalu pinngortitamut tunngassuteqartunik soraarummeertarnerup inatsisaanik Kalaallit Nunaannut atulersitsineq (Kalaallit Nunaannut Inuutissarsiutit pillugit ilinniarnertuunngorniartarnerit Peqqussut), Nalunaarut nr. 803, 13. juli 2006-imeersoq Kalaallit Nunaanni inuutissarsiutinut ilinniarnertuunngorniartarneq, Nalunaarut nr. 805, 13. juli 2006-meersoq, Kalaallit Nunaanni inuutissarsiutinut ilinniarnertuunngorniartarnermi pinngortitaq pillugu qaffasinnerusumik soraarummeertarneq (Htx pillugu nalunaarutit) aamma Nalunaarut nr. 806, Kalaallit Nunaanni inuutissarsiutinut ilinniarnertuunngorniartarnermi niuernermit qaffasinnerusumik ilinniartitaaneq (Hhx pillugu nalunaarut).

Tamatuma kingorna GU pillugu nalunaarut allangortinneqarpoq Nalunaarut nr. 764, 11. juli 2008-meersukkut. Tamatumani pineqarput nalunaaquttap-akunneri atuartitsiviusussat pinngortitaq pillugu ilinniartitsinermi fysik C –mi aamma fysik B-mi kiisalu matematik C, B aamma A-mi ilinniartitsissutissatut pilersaarutit allannguuteqartinneqarneranni.

Htx pillugu nalunaarut aamma Hhx pillugu nalunaarutit aamma allangortinneqarput 2008-mi Nalunaarut nr. 766, 11. juli 2008-meersukkut. Nalunaarutini marlunni pineqarput matematik B aamma A-mi ilinniartitsissutissat pillugit pilersaarutit allangortinneqarneri.

Siuliani taaneqareersut maleruagassiat saniatigut GU inuutissarsiutinullu ilinniarnertuunngorniarfiit maleruagassaqartinneqarput ilinniartunngortitsisarneq, sivikillisaasarneq, soraarummeertarneq, karakterilersuineq aamma nalilersuisarneq, atuartitsissutissani ataasiakkaani ilinniartitsineq, napparsimasunik ilinniartitsineq aamma ilinniartitsisunut piginnaasaqarnissaq pillugit nalunaarutitigut.

GU-mut aamma inuutissarsiutinut ilinniarnertuunngorniarnermut ilinniartussanik tigooraanermik ingerlatsisarneq aqunneqarpoq Nalunaarutikkut nr. 153, 6. marts 2000-imeersukkut, Kalaallit Nunaanni ilinniarnertuunngorniarfinnut ilinniartunngortitsissarneq aamma ilinniagaqarniarnermut piareersaatitut ilinniartitsissutissani ataasiakkaani ilinniartitsineq pillugit nalunaarutikkut, tamannalu allangortitaavoq nalunaarutikkut nr. 74-ikkut, 12. februar 2008-meersukkut.

Sivikillisaasarneq aqunneqarpoq Nalunaarutikkut nr. 539, 19. juni 1996-immersukkut, ilinniartitsissutissat ilaanni sivikillisaasinnaanikkut.

GU-mi soraarummeertarneq aqunneqarpoq Nalunaarut nr. 747, 29. juni 2006-meersumit, Kalaallit Nunaanni ilinniarnertuunngorniarnermi soraarummeertarneq (GU-mi soraarummeerneq pillugu nalunaarut) allangortinneqartoq Nalunaarutikkut nr. 352, 15. maj 2008-meersukkut (13 skalamiit 7 skalamut ikaarsaariarneq aamma A-mut tapiutit pillugit). Inuutissarsiutinut ilinniarnertuunngorniarfinni atuupput Nalunaarut nr. 804, 13. juli 2006-imeersoq, Kalaallit Nunaanni inuutissarsiutinut ilinniarnertuunngorniarnermi misilitsinneq soraarummeernerlu pillugit, allangortinneqartoq Nalunaarummi nr. 353, 15. maj 2008-meersumi (13 skalamiit 7 skalamut ikaarsaariarneq aamma A-mut tapiutit pillugit).

Nalilersuisarneq karakterilersuisarnerlu pillugit suliat aqunneqarput Karakterit aamma naliliisarnerit allat pillugit nalunaarummi nr. 262-imi, 20. marts 2007-imeersumi,.

GU-mi ilinniartitsissutini ataasiakkaani ilinniartitsineq aqunneqarpoq Namminersornerullutik Oqartussat nalunaarutaanni nr. 21-imi, 5. august 1992-imeersumi Kalaallit Nunaanni ilinniarnertuunngorniarlutik ilinniartut-ni allangortinneqartoq Namminersornerullutik Oqartussaasat nalunaarutaanni nr. 28-imi, 27. juni 1994-imeersumi.

Napparsimasunik iliniartitsineq aqunneqarpoq Nalunaarummi nr. 715-imi, 18. august 1992-imeersumi, Kalaallit Nunaanni ilinniarnertuunngorniartarnerup iliniartitsineq aamma ilinniarnertuunngorniartarnerup iliniartitsissutissani ataasiakkaani pikkorissartitsineq. GU-mi iliniartitsisinnaaneq aqunneqarpoq nalunaarutikkut nr. 765, 4. juli 2006-imeersukkut, Kalaallit Nunaanni ilinniarnertuunngorniartarnerup (GU) iliniartitsisinnaaneq il.il. pillugit (Kalaallit Nunaanni Pædagogikum pillugu nalunaarut)

Tamakkua saniatigut Namminersornerullutik Oqartussanit iliniartitsisut ataatsimiittartui, iliniartut ataatsimiittartui, ataatsimoorussamillu ataatsimiititaliaq pillugit aalajangersagaqarpoq (nr. 13, 19. august 1992-imeersoq), nakkutilliisutut aamma qarasaasianik nakkutilliisutut (nr. 14, 19. august 1992-imeersoq), atuatigigiiat suleqatigiiat (nr. 6, 19. maj 1994-imeersoq) aamma atuarfiup ilinniarnertuunngorniartarnerup atassuteqatigiinnerat pillugu ataatsimiittamut maleruagassiaq (nr. 3, 10. april 2000-imeersoq).

Oqaatigineqareersutut folketingip, Kalaallit Nunaanni ilinniarnertuunngorniartarnerup pillugu, inatsimmik nr. 1393-imi 27. december 2008-imeersumi, akuersineratigut Namminersornerullutik Oqartussanit tiguneqarpoq maleruagassiornissaq aamma Kalaallit Nunaanni ilinniarnertuunngorniartarnerup (GU) ulluinnarni ingerlanneqarnera ilanngullugit Kalaallit Nunaanni niuernerup pillugu ilinniarnertuunngorniartarnerup aamma pinngortitaq pillugu qaffasinnerusumik soraarummeertarnerit. Inatsimmi siunertarineqarpoq Namminersornerullutik Oqartussat tamakkuninnga tigusiumallutik maannamullu annertunerusumik nunatsinni pisariaqartitat kulturilu tunngavigalugit ilinniarnertuunngorniartarnerup aqqissorneqarnissaannut kissaataat naammassineqarsinnaaqullugu.

Inatsimmi aalajangersaavigineqarput

- ilinniagaqalersinnaanerit,
- iliniartitsinerup akeqannginnissaa,
- iliniartitsinerup nalinginnaasumik atuarfimmi atuareernerup kingornatigut nangitsiviunissaa nalinginnaasumillu ukiunik pingasunik sivilisussuseqarnissaa,
- iliniartitsinerit ilinniaqqinnissamut piareersarfiussasut aammalu nalinginnaasumik peroriartuutaassasut,
- iliniartut Nunatsinni, Danmarkimi aamma nunani allani ilinniaqqissinnaanissaminnut piginnaasassanik pissarsiaqassasut kisianni aamma Namminersornerullutik Oqartussat aamma ilinniarnertuunngorniartarnerup imatut malittarisassiorsinnaassasut, taamaallaat Nunatsinni aamma Danmarkimi sivilisutut akunnattumilluunniit sivilisussusilinnut iliniartarnerup ilinniarnissamut isissutaatinneqarsinnaasussanik,

- ilinniarnertuunngorniartarfinni ilinniartitsisut ilinniartitsissutini arlalinni ilinniartitsisinnaanikkut perorsaaanerlu pillugu ingerlatsisinnaanikkut piginnaasaqassasut, kiannili periarfissaqassasoq Namminersornerullutik Oqartussat, inuit ilinniartitsinermik piginnaasaqanngitsut ilinniarnertuunngorniartarfinni piffissami aalajangersimasumi ilinniartitsisinnaanissaminnut periarfissinneqarnissaannik, aalajangersaasinnaanissaannut,
- Danmarkimi ilinniaqqiffinnut ilinniartunngortitsinermi nunatsinni ilinniarnertuunngorsimasut aamma Danmarkimi ilinniarnertuunngorsimasut assigiinneqarnissaat ilinniagaasimasup pitsaassusaanut piumasaqaatit aalajangersimasut naammassineqarsimappata.
- ilinniartut naligiissinneqarnerat taaneqartoq aalajangersarneqassaaq nunatsinni kulturimut, ilinniartitaanermut, ilisimatusarnermut ilageeqarnermullu naalackersuisoqarfiup (KIIN) aamma Undervisningsministeriap (UVM) akornanni suleqatigiinnikkut.

Inatsisip akuerineqarneranut ilutigitillugu naalackersuisoqarfik aamma UVM suleqatigiinnissamut isumaqatigiissuteqarput. Isumaqatigiissuteqarnermi siunertarineqarput ilinniartitaanermut naalackersuisoqarfiup aamma UVM-ip akornanni ilinniarnertuunngorniartarnerit pillugit ilaatigut suleqatigiinnerup ingerlanissaanik sinaakkusersuimaneq ilaatigullu eqqanaarumaneqarpoq kalaallit danskillu ilinniarnertuunngorniartarfiisa Danmarkimi ilinniaqqinnissamut ingerlaqqissutaasinnaanerisa naligiimmik eqqanaarneqarnissaat.

Inatsimmitaaq aalajangersarneqarpoq Peqqussut nr. 108, 17. februar 1992-imeersoq ilinniarnertuunngorniartarnerup Kalaallit Nunaanni atuutilersinneqarnerat il.il. aamma Qaffasinnerusunut Piareersarfittut pikkorissartarneq pillugu inatsit aamma inersimasunut atuartitsissutissani ataasiakkaani ilinniaqqissinnaanermut piareersaatitut pikkorissartarneq il.il. aamma Peqqussut nr. 787, 20. juni 2006-meersoq inuutissarsiutit pillugit ilinniarnertuunngorniartarnerup aamma qaffasinnerusumik niuernermit ilinniartitsinerup aammalu pinngortitamut tunngassuteqartunik soraarummeertarnerup inatsisaanik Kalaallit Nunaannut atulersitsineq atuukkallassasut Inatsisartut peqqussutaannit Namminersornerullutik Oqartussanit pilersinneqartumit atorunnaarsinneqarnissamik tungaannut. Tamatuma saniatigut inatsimmi aalajangersarneqarpoq nalunaarutit peqqussutinik taaneqartunik tunngaveqarluni pilersinneqartut atuukkallassasut, Namminersornerullutik Oqartussat aalajangersagaannit atorunnaarsinneqarnissamik tungaannut.

Inatsisip nr. 473, 12. juni 2009-meersup, Kalaallit Nunaanni Namminersorneq pillugu (Namminersornerunermut inatsit) aamma inatsisip nr. 474, 12. juni 2009-meersup, Kalaallit Nunaanni Namminersornermut atatillugu pissutsit assigiinngitsut (inatsisip malittaa) Inatsit nr. 1393, 27. december 2008-meersoq, Kalaallit Nunaanni ilinniarnertuunngorniartarneq pillugu, 21. juni 2009-miit atorunnaarsinneqarpoq. Tamanna isumaqarpoq Namminersorlutik

Oqartussat, Inatsisip nr. 1393-ip sinaakkusiussaani qilersorsimajunnaarmata. Kisiannili inatsimmi assigiisitsinermit aallaaviusuaannartussaavoq, namminersorlutik oqartussat maleruagassiornermini eqqanaartariaqaraat, ilinniarnertuunngorniartarnerit imatut pitsaassuseqassasut, kalaallit ilinniartut Danmarkimi ilinniaqqiffinnut ingerlaqqissinnaajuassallutik.

c) Maleruagassiornermut piareersarnermi tunaartarisat, tamatumunnga ilanngullugit ataatsimiititaliami sulineq, inassuteqaatit aamma pisortanit aamma kattuffinnit allanillu innersuussutit.

Ilinniarnertuunngorniartarnerup nutarterneqarnerani suliat.

2003-mi nunatsinni ilinniarnertuunngorniarnermik ilinniartitsinerit nutarterneqarnissaat pillugu ataatsimiinnerit siullit ingerlanneqarput ilaatigut taamanikkut ilinniartitaanikkut qullersaqarfimmiit aamma nunatsinni ilinniarnertuunngorniarnarfinit tallimaasunit peqataaffigineqartumik. 2005-imi taamanikkut ilinniartitaanermut qullersaqarfimmi nutarterinermi suliassanik aalajangersaasoqarpoq. Aqutsisussat aamma sulisussat augustimi 2005-imi pilersinneqarput taakkulu suliassarilerpaat ilinniarnertuunngorniartarnermut nutarsaanissamut pisariaqartitsinerup qulaajarneqarnissaa. Tamatuma kingornagut 2006-imi julimi ilinniarnertuunngorniarnarup nutarterneqarnissaanut suliamut ataqatigiisaarisussamik atorfinititsisoqarpoq. Suliami ataqatigiisaarisussaq inissinneqarpoq taamanikkut ilinniartitaanermut pisortaqarfimmi (maannakkut naalakkersuisoqarfimmi). Suliamut ataqatigiisaarisup suliassarilerpai nutarterinissamut piareersarneq, ataqatigiisaarineq piviusunngortiterinerlu.

Septemberip 30-iani 2008-mi taamanikkut ilinniartitaanermut naalakkersuisup aalajangersarpaa Kalaallit Nunaanni ilinniarnertuunngorniartarnermik nutarterinermi suliap ingerlateqqinneqarnissaanut maleruagassiaq. Suliamut maleruagassiamut siullermut naleqqiullugu siunertaq allanngortinneqarpoq. Allanngortitsinermi allanngortinneqarpoq suleqatigiissitat ataasinnaaneranniit ukiuni tulluittuni marlunni tallimannngortinneqarnissaat.

Sulinermit maleruagassiami nutarterinissamut pisariaqartitsineq ilaatigut oqaatigineqarpoq:
” Ilinniarnertuunngorniarnarluni ilinniartitsineq tamatigut ineriartornermut naleqqussartussaavoq taamaattutullu naleqqussartussaalluni inuiaqatigiinni avatangiisimini allannguutitut ingammilli allannguutitut ilinniartitaanermut tunngassuteqartunut. Atuarfiup nutarsarneqarnerata kinguneraa tunngaviummik atuarfiup imarisamigut, ilutsimigut, aqqissorneqarnermigut, perorsaariaatsimigut aamma nalilersueriaatsimigut annertuutigit allanngortinneqarsimanera taamaattumillu Kalaallit Nunaanni ilinniarnertuunngorniarnarluni ilinniartitsineq naleqqussarnissaminut pisariaqartitsilersimavoq”

Naalakkersuinikkut takorluukkat pillugit allattoqarpoq:

”Naalakkersuisut takorloorpaat Kalaallit Nunaanni ilinniarnertuunngorniartarneq inerisarneqassasoq ilinniarnertuunngorniartut suminngaanneersuunertik, suaassusertik

aamma ukioqassusertik apeqqutaatinnagit piginnaasutsiminnik aamma ineriartorsinnaasutsiminnik annertusaasinnaasunngortillugit aamma ineriartortitsisinnaasunngortillugit ilinniartullu suleqatigalugit namminersornikkut allanillu suleqateqarnikkut tamanut inooqatigiinnikkut, kulturikkut oqaatsitigullu tunulequtaat apeqqutaatinnagit, iluatsinnissamut tunngaviliinikkut.”

Iluarsaaqqiinerup anguniagai pillugit allattoqarpoq:

”Ilinniarnertuunngorniarniit pitsaanerpaamik amerlanerpaat Nunatsinni, Danmarkimi nunanilu allani ilinniaqqinnissamut periarfississavai aamma kalaallit kulturianut, kalaallinut inuiaqatigiinnut nunarsuarmilu inuiaqatigiinnut nalinginnaasumik peroriartuutaassapput. Ilinniarnertuunngorniartarnerit suleqatigiissitaliat pilersinneqarnerisigut eqqanaarneqassapput. Siunertarineqarpoq ilinniarnertuunngorniarniit Nunatsinni Naalagaaffeqatigiinnerullu iluani ilinniartitaanerup iluani naatsorsuutigineqarsinnaasumik suleqataasutut ersersinneqarnissaat.

Suleqatigiissitaliat Naalakkersuisunut maleruagassiassanut siunnersuusiussapput makkua pillugit

1. kulturimik tunngaveqartumik ilikkagassatut pilersaarusiornissaq tamatumunngalu ilutigitillugu
2. ilinniartitsissutissani pisariaqartuni nunatsinnut tunngassuteqartunik aallaaveqartitanik ilinniartitsissutissanik kalaallisuunik- aamma qallunaatuunik pisariaqartitsinerup matuneqarnissaa,
3. atuartitsissutissat pillugit siunnersuineq,
4. ilinniarnertuunngorniarniit siunissami ilinniartitsissanik pisariaqartitsinerup aaqqiivigineqarnissaa,
5. ilinniarnertuunngorniarniit ilinniartitsisut ilinniaqqinnissaminnut - aamma ilinniagaqaqqinnissaminnut periarfissiuunneqarnissaat,
6. perorsaaneq pillugu ilisimatusarnej inerisaanerlu ilinniartitaanerullu ingerlanerani ingerlaavartumik inaarutaasumillu ilinniartitaanerup iluani avataaniillu ilikkagaqassutsimik nalilersuisarnej,
7. Naalakkersuisoqarfiup ilinniarnertuunngorniarniit allaffissornikkut aningaasaqarnikkullu aqunneqarnerinik aqutsinissaa aamma atuarfimmi pisut pillugit nalunaarusiortarnej.

Suleqatigiissitat sulissapput kalaallit inuiaqatigiit aamma ilinniartitaanermi aqqissuussinerit ataatsimut isigalugit aamma suleqatigiissitat siunnersuusiussapput ilinniarnertuunngorniartarnerup pitsaanerusumik atuarfimmut, inuutissarsiutitigut ilinniartitaanernut aammalu Nunatsinni Naalagaaffeqatigiinnerullu iluani ilinniaqqiffinnut atassuteqaasiinissamik siunertaqartumik. Aammattaq suleqatigiissitat siunnersuusiussapput qanoq iliornikkut ilinniarfimmiit ilinniarfimmut tullermut ikaarsaariarnermi ajornartorsiutaasartut anigorneqarsinnaanerit pillugu.

Tamatuma saniatigut suleqatigiissitat, qanoq iliornikkut qanorlu annertutigisumik ilinniarnertuunngorniartarnerup tamatumaluunniit ilaata sumiiffik qimannagu ilinniarnertuunngorniartunut neqeroorutigineqartarnissaa pillugu, siunnersuusiussapput, aammalu suleqatigiissitat, qanoq iliornikkut qanorlu annertutigisumik ilinniarnertuunngorniarluni ilinniartitsinerit inersimasunut neqeroorutigineqartarnissaat pillugu, siunnersuusiussapput. Suleqatigiissitat perorsaaneq pillugu inerisaanerit pillugit siunnersuusiussapput taamaaliornikkut atuartut assigiinngitsut tamarmik pitsaanerpaamik ilinniarnissaminut aamma ilinniartinneqarnissaminut ilinniarnissamullu piginnaasaqalernissaminut kaammattorneqarsinnaaqqullugit.”

Suliassat suunerinik aalajangersaanerup aallartinneqarani allattoqarpoq:

”Suleqatigiissitat siunissami ilinniarnertuunngorniartarneq pillugu siunnersuusiussapput naalakkersuinikkut, ilinniartitaaneq nukittorsagaq aamma qaffasinnerusumik ilinniagaqarneq, Kalaallit Nunaat Namminersortoq piusunillu nungusaasuunngitsumik ineriartorneq anguniakkatut kissaatigineqartut aallaavigalugit.

Ingerlatsineq tamakkiisooqqullugu suleqatigiissitalu maleruagassiassatut siunnersuusiaannut ilalersuiumaarnissaq annertunerusoq eqqanaarniarlugu ikinnerpaamik tallimanik suleqatigiissitaliortoqassaaq tamakkerlugillu suliarineqassapput ilinniarnertuunngorniartarnerup aaqqissuuteqqinneqarnerani imarisaa, ilusaa, naliliisarneq, ilinniartitsissutissat pillugit ilanngussugassat aamma ilinniartitsinermut ilitsersuusiassat kiisalu ilinniagaqaaqqittarneq ilinniaqqittarnerlu. Suleqatigiissitat ilinniartitsisunit, ilinniartunit aamma pisortanit inuttalerneqassapput.”

Tamatuma kingorna allaatigineqarput suleqatigiissitat ataasiakkaat sulinerminni tunaartassaat. Tamatumunnga atatillugu naggataarutaasumillu nalunaarneqarsimavoq suleqatigiissitat tamarmik qulequttanik suliaqarsinnaasut ilinniarnertuunngorniarnermik aaqqissuusseqqinnermi ineriartuutissatut piviusunngortiterinermilu pisariaqarsorisaminnik tamakkualu suleqatigiissitat allat suliassaannut ilaatinneqanngippata.

Imarisaa pillugu suleqatigiissitaq aaqqissuusseqqinnermi imarisassat pillugit oqaasertalersuinissamut suliassinneqarpoq tamatumunnga ilanngullugit imarisassaasa assigiinngitsut pingaassuseqartinneqarnissaat qanorlu annertussuseqarnissaat taamaaliornikkut eqqanaarniarlugit ilinniarnissamut piginnaasaqarnissaaq aammalu ilinniarnissap nalinginnaasumik peroriartuutaanissaa, ilinniartut ullutsinni siunissamilu inuunermi assigiinngitsutigut naapittagaat aallaavigalugit ilinniartitsinermi oqaatsit assigiinngitsut suut atorneqarnissaat eqqarsaatersuutigeqquneqarpoq, perorsaaneq pillugu tunngavissat aqutsisuusussat suussanersut aamma ilinniartitsinermi sulinermilu periusissat suusinnaanersut siunnersuusiortifigeqquneqarput tamakkunatigut aaqqissuueqqinnerup siunertai imarisaalu pitsaanerpaamik anguneqarsinnaaqqullugit tamatumani aallaavigalugit ilinniartut assigiinngiiaartumik pissusillit peqataatitsinikkut ilinniartinneqarnermi kaammattorneqarnissaat siunertaralugu ilinniartullu itinerusumik eqqarsarsinnaalernissaat

paasinnissinnaalernissaallu unamminartuutinniarlugu. Tamatuma saniatigut perorsaaneq pillugu periaatsit aqutsisuusut ilisimatusarnermik tunngaveqartinneqartussaapput perosaanerlu pillugu tunngavissanik eqqarsaatersuuteqarnermi aamma ungasissumut ilinniartitsinerup qanoq atorineqarsinnaanissaa eqqarsaatersuuteqarfigeqquneqarpoq.

Ilinniartitsinerup ilusissaa aamma ilinniartitaanermut iserniarnermi piumasaqaataasut pillugit suleqatigiissitaq suliasinneqarpoq nalinginnaasumik ilinniarnertuunngorniartarnerup, Htx-ip aamma Hhx-ip nunami sumiinnissaannik eqqarsaatersuuteqaqqullugu, tamatumunnga ilanngullugit ilusiliinerit atuartut amerlanerpaat atuartitsissutissanik toqqarumasaminnik toqqaasinnaangorlugit periarfissinneqarnissaat aamma taamatut ilinniartitsissutit qaffasinnerusumik inissitat, taamaaliornikkullu eqqanaarniarneqarpoq inuusuttut inersimasullu illoqarfinni nunaqarfinniluunniit sumiiffik qimanngikkaluarlugu ilinniarnertuunngorniartutik tamakkiisumik ilaannakortumilluunniit ilinniagaqarsinnaalernissaat.

Tamatuma saniatigut suleqatigiit ilinniarnertuunngorniartut pingasut akornanni nuunnermi piffissamik ilinniarfissamik sivikillisaasoqarsinnaaneranut periarfissat isummerfigisussaassavaat, tamatumunnga ilanngullugu ilinniartunik ilinniarnertuunngorniartarnerup siornatigut ingerlaneratalu nalaani siunnersuisarnissaq qanoq pitsaanerpaamik eqqanaarneqarsinnaanersoq.

Ilanngullugu suleqatigiit isummerfigisavaat nutarterinermi malittarisassioorneq allanngortittariaqarnersoq assersuutigalugu pinngitsoorani ilinniartarnerup nalaani najuuttussaataitaanermut tunngassuteqartuni aamma atuaqatigiinnut tullernut qaffasinnerusunut ingerlaqqissinnaanermut maleruagassiat, atuarfimmuut peqqussutip nutaap malitsigisaanik nutaasunik ilinniarnertuunngorniartarnermi isersinnaanermut piumasaqaateqartoqassanersoq tamatumunnga ilanngullugit aamma qinnuteqartussat qanoq iliornikkut ilinniarnertuunngornialinnginnerminni ilinniartitaanerminnut iserniarlutik qanoq pikkorissarsinnaanersut aamma siunnersuusiortussaapput qanoq iliornikkut ilinniarnertuunngorniartutik ilinniartut inaanni najugaqartut ilinniartarnerminni najugaqarnerminnilu avatangiisimikkut aammalu ikorfartorneqarnermikkut siunnersorneqarnermikkullu pitsaasumik atugassaqartinneqarsinnaanissaat.

Ilinniartitaanerup nalilersorneqarnissaa pillugu suleqatigiissitap siunnersuutigissavai qanoq iliornikkut ilinniartut ilikkagaqassusaat ilinniartitsinermilu pissarsiaat nalilersorneqarsinnaanersut aamma qanoq iliornikkut inaarutaasumik ilinniartut ilikkagaqassusaannik ilinniartitsinermilu pissarsiaannik ingerlaavartumik ilinniartitup iluani aamma ilinniartitup avataaniit nalilersorneqarsinnaanerinut iliuusissat. Nalilersuinermi ilutsit naatsorsuutigalugit eqqanaartussaassavaat GU-p Nunani Avannarlerni ilinniarnertuunngorniartarnermi nallersuussinnaanissaa, aammali nalilersuinerit imaqartinneqartariaqarput nalilersueriaatsinik inooqatigiinnikkut, kulturikkut aamma eqqarsartaatsikkut ineriartornermut tunngassuteqartunik aamma ineriartuutaasinnaasunik.

Siulersuinermi sulisoqarnermilu iluarsagassat pillugit suleqatigiissitaq iluarsaqqiinermi siulersuinermi sulisoqarnermilu aaqqissugassanut isummersoqquneqarpoq aamma siunnersuusioqquneqarpoq tamakkunani ajornartorsiutaasinnaasut aaqqitassaasinnaasullu qanoq iliornikkut iluarsartuunneqarsinnaanersut. Tamatuma saniatigut suleqatigiit eqqartuissapput periutsinillu inerisaallutik, qanoq iliornikkut ilinniartitsisunik naammattunik piginnaassusilinnik atorfimmiiginnartitsisoqarsinnaanersoq aamma/imaluunniit atorfininnissamut kajungilersitsisoqarsinnaanersoq kiisalu inerisaasoqarsinnaanersoq ilanngullugulu siunnersuusiusapput siunissami nunatsinni ilinniartitsisunik qaffasinnerusuni ilinniartitsisinnaanermut soraarummeertoqarsinnaanersoq tamatumani ilanngullugit ilinniagassatigut ilinniartitsisinnaassutsikkullu ataqatigiissumik piginnaasassat. Nunatsinni ilinniartitsisunik qaffasinnerusuni ilinniartitsisinnaanermut soraarummeernerup ilusilersornerani aamma eqqarsaatigineqassaaq perorsaaneq pillugu ineriartortitsinissaq.

Ilinniartitsissutissanut ilanngussassat aamma ilinniartitsinermut ilitsersuutit pillugit suleqatigiissitaq eqqarsaatigisussaavai ilinniartitsissutissanut ilanngussat killiffii aammalu siunnersuusioqarsinnaapput ilinniartitsissutissanut ilanngussassanik aamma ilinniartitsinermut ilitsersuutissanik tamakkulu ilusilersorneqartariaqarput siunissami ilinniarnertuunngorniarfiit pillugit maleruagassanut ilusissanullu siunnersuutit tunngavigalugit.

Siulersuinermi sulisoqarnermilu iluarsagassat pillugit suleqatigiissitaq saniatigut suleqatigiissitaq inuttalerneqarput:
GU-mi ilinniartitsisut sinniisaannik ataatsimik
Htx/Hhx-ini ilinniartitsisut sinniisaannik ataatsimik
Ilinniartut sinniisaannik ataatsimik
Ilisimatusarfiup sinniisaannik ataatsimik

Siulersuinermi sulisoqarnermilu iluarsagassat pillugit suleqatigiissitaq inuttaqartinneqarpoq GU-ni rektorinit aamma GU-mi inuutissarsiuutillu pillugit ilinniarnertuunngorniarfinni pisortanit inerisaavimmilu pisortamit.

Suleqatigiissitani allatsitut atuuppoq iluarsaqqiinermi ingerlatanut ataqatigiissaarisoq.

Tamatuma saniatigut aqutsisussanik pilersitsisoqarpoq taakkualu inuttaqartinneqarput Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfimmi aqutsisoqaatigiinnik aamma inerisaaviup pisortaanik. Aqutsisut sulinnissamut malitassarititaq tunngavigalugu ingerlaavartumik ilisimatinneqartartussaapput ataatsimiigialuqquneqartassallutillu suleqatigiissitanit annertunerusutigut tunngaviumillu apeqqutinik saqqummiiffigineqartussaaleraangamik taamaattunillu aalajangersagassaqaaleraangamik. Aqutsisut suleqatigiissitaq tamarmiusut ataatsimiinnerminni imaqaarniliaannik nassinneqartartussaapput, qaammammoortumik killiffik pillugu

nalunaarusiamik aamma iluarsaqqiinnermut tunngassuteqartunik paasissutissiissutinik nassissorneqartartussaallutik.

Ilinniarnertuunngorniarneq pillugu iluarsaqqiinnerup atualinngitsunut-, atuartunut- aamma ilinniaqqiffinnut sulianut ataqatigiissinneqarnissaa eqqanaarniarlugu aamma suliamut aqutsisuutitaq suliat pillugu ikorfartorniarnarlugu Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup iluani suliamik ingerlatsisussatut suleqatigiissitaliortoqarpoq.

Imarisaq, iluseq aamma ilinniartunngorsinnaanermut piumasaqaatit pillugit aamma siulersuinermi aamma sulisoqarnermi suleqatigiissitat aprilip 30-iani 2009 nalunaarusiamikkut innersuussuteqarput. Ilinniartitaanerup nalilersorneqarnissaa pillugu suleqatigiissitaq innersuussuteqarpoq aamma ilinniartitsissutissanut ilanngussassat aamma ilinniartitsinermit ilitsersuutit pillugit suleqatigiissitaq innersuussuteqarpoq.

Imarisaq, iluseq aamma ilinniartunngorsinnaanermut piumasaqaatit pillugit suleqatigiissitap nalunaarusiaa aallaavigalugu ilinniarnertuunngorniarnarfiit rektorii Kultureqarnermut, Ilinniartitaanermut, Ilisimasusarnermut Ilageeqarnermullu Naalackersuisoqarfimmi iluarsaqqiinnermi suleqataasut peqatigiillutik januarimi 2010-mi, ilinniarnertuunngorniarnarfinni ilinniartitsissutissat nalunaaquttallu akunneri ilinniartitsinermit atugassat qanoq agguartariaqarnerinut siunnersuusiorput (ilusissatut siunnersuut). Ilusissatut siunnersuut Nunatsinni ilinniarnertuunngorniarnarfinni ilinniarsimasunik amerlanerusunik pitsaanerusumillu ilinniartinneqarsimasunik ilinniarnertuunngortitsinissamik kissaateqarnermik tunngaveqarpoq. Siunnersuummi anguniarneqarlunilu siunertarineqarpoq ilinniarnertuunngorniarnarnerup eqaannerusumik ilusilersorneqarnissaa taamaaliornermi ilinniartut ilinniakkaminnik nikititsinerminni "matunik matoqqasunik" naapitsinnginnissaat imaluunniit piffissami susaqarani utaqqiffiusunik pilersitsisoqannginnissaa. Taamatut iliorniarneq anguniarnarlugu siunnersuutigineqarpoq ilinniarnertuunngorniarnarfinni tamani ataatsimoorussamik aallaqqaataasumik ilinniartitsisoqartalernissaa tamatumalu kingorna ilinniartut ajornartorsiuutitaqanngitsumik "ilinniakkaminnillu annasaqaratik" ilinniarnarfiit akornanni ilinniakkamilu allami ingerlaqqissinnaalersussaassapput. Iluarsaqqiinnermi aqutsisut aamma Undervisningsministeria martsimi 2010-mi ilusissatut siunnersuummut akuersaarput tamatumunngalu atatillugu iluarsaqqiinnermi aqutsisuniit aalajangerneqarpoq tamanna tunaartaralugu aallaavigalugulu inatsisissamut siunnersuusiortoqassasoq.

Iluarsaqqiinnerup ingerlanerani ilinniarnertuunngorniarnarfiit ingerlaavartumik suliamut ilaatinneqarsimapput. Suleqatigiissitat innersuussutaat 2009-mi ukiakkut isummersoqatigiinnermi ilinniarnertuunngorniarnarfinni ilinniartitsisunit oqallisigineqarsimapput. Augustimi 2010-mi aammaartumik ilinniarnertuunngorniarnarfiit ilinniartitsisui isummersoqatigiissinneqarput. Tamatumani ilikkagassatut pilersaarutinut nalunaarutissatut siunnersuut naammassisaq saqqummiunneqarpoq ilinniartitsissutissanilu assigiinngitsuni ilikkagassatut pilersaarutit nutaat oqallisigineqarlutik. Tamatuma saniatigut

Nunatsinni ilinniarnertuunngorniartfinni ilinniartitsisunik iluarsaqqiinnermut tunngatitanik ilinniartitseqqittarnernut aallarniutitut oqaatsit aappaattut oqaaserisanik ilinniartitsinermi ilinniartitseriaatsit ilisarititsinikkut ilinniartitsissutigineqarput.

1. januar 2009 aallarnerfigalugu kalaallit oqaasiinut siunnersortimik atorfinitsitsisoqarpoq taamaaliornermilu kalaallit oqaasiinik ilinniartitsinerup inerisarneqarnissaa pisariaqartinneqaisoq aallartinneqarpoq. 2009-mi ilaatigut siunnersorti ilinniartitsissutissamut tunngassuteqartut ilinniartitsissutissanik katersuillunilu nassiussuivoq aamma kalaallit oqaasiinut allamiut oqaasiitut 1., 2. aamma 3.g-mi ilinniartitsissutissanik aaqqissuussillunilu saqqummersitsivoq tamatumalu saniatigut isummersoqatigiinnerit nalaanni ilinniartitsisussanik ilinniartitsisut akornanni agguaassilluni. Novemberimi 2009-mi Nunatsinni qallunaat oqaasii pillugit siunnersortimik atorfinitsitsisoqarpoq. Taanna 2010-mi ilinniarnertuunngorniartarnerup iluarsaqqinneqarnerinnaa pillugu sulinermut taamaallaat peqataasimavoq.

2010-mi upernaakkut ilinniartooq qitiutillugu ilinniartitseriaatsinut misileraaneq ilinniartinnit tallimaasunit sisamani aallartinneqarpoq. Misileraalluni ilinniartitsineq naliliinnermut nalunaarusiaagallartumik naammassineqarpoq nalunaarutaagallartorlu 2010-mi aasalernerani ilinniartinnut nassiussuunneqarpoq.

Ilikkagassatut pilersaarutit pillugit aamma naliliisarneq pillugu suleqatigiissitat innersuussutaat tunngavigalugit Kultureqarnermut, Ilinniartitaanermut, Iisimatusarnermut Ilageeqarnermullu Naalakkersuisoqarfimmiit ukiakkut 2010-mi ilikkagassatut pilersaarusiornivik aallartinneqarpoq. Ilinniarnertuunngorniartfinni ilinniartitsissutissanut tamanut tunngassuteqartunik rektorit inassuteqarnerat aallaavigalugu suleqatigiissitaliortoqarpoq ilinniarnertuunngorniartfiit ilinniartitsisuinik ilaasortaqaartinneqartunik tamakkulu 2010-p naanerani ilikkagassatut pilersaarutissanut nutaanut siunnersuusiatic tunniuttussaavaat. Undervisningsministeriap ilinniartitsissutissat pillugit siunnersortai ilikkagassatut pilersaarusiornierup ingerlanneqarnerani peqataapput, ilikkagassatigut qaffasissusissap qularnaarnissaa siunertaralugu. Naatsorsuutigineqarpoq 2011-ip ilikkagassatut pilersaarutit aaqqissoqqissaareerlutik naammassineqarsinnaassasut. Tamatumunnga ilutigitillugu suleqatigiissitat ilikkagassatut pilersaarutininut nutaanut ilinniartitsinermi ilitsersuutininik allagaqarlutik aallartippat taamaaliornermi iluarsaqqiinnerup piviusunngortinneqarluni aallartinnissaanut augustimut 2012-imut ilinniartitsisunut naammasseriikkanik ilinniartitsissutit imaat pillugit ilitsersuuteqarsinnaaqullugu qanorlu iliorluni periutsit nutaat atorlugit ilinniartitsinerup ingerlanneqarnissaanut siunnersuutininik piareersimasoqarsinnaaqullugu.

Aamma 2011-mi ilinniartitsisunik ilinniartitseqqittarnissamut pilersaarusiarnik inerisaaneq aallartinneqassaaq taamatullu ingerlanneqareersoq iluarsaqqiinnermut naleqqussakkanik ilinniartitsissutissanik sanaartorneq ingerlatiinnarneqassaaq.

Ilinniarnertuunngorniartarnermik Namminersorlutik Oqartussat tigusinermikkut ilinniarnertuunngorniartarnermi ilinniartitsisut naammassereernikut ilinniarteqqinneqartarnissaanut pisussaaffimmik tigussipput. Kalaallisut nunatsinni ilimmarfinni qaffasinnerusuni ilinniartitsisinnaanermut soraarummeertoqarsinnaaneranik inerisaaneq 2011-imi pimoorunneqalissaaq. Aallarniutaasumik inerisaaneq rektorit iluarsaqqiinnermilu Ilinniartitaaneq aamma Ilisimatusarneq pillugit Naalakkersuisoqarfimmiit suleqataasut suleqatigiillutik ingerlappaat.

Ingerlaavartumik iluarsaqqiineq pillugu ilisimatitsisoqartarpoq. Tamanna ilaatigut pisarpoq Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup nuna tamakkerlugu aviisini saqqummersartuni atuagassiatut ilannguttaga aqputigalugu. Tamatuma saniatigut illoqarfinni ilinniarnertuunngorniartarfiusartuni tallimani innuttaasunik ataatsimiititsisoqartarsimavoq ilinniarnertuunngorniartarnerullu iluarsaqqinneqarnera pillugu aviisini naqitani radiukkullu paasisutissiisoqartarpoq.

2. Siunnersuutip pingaarnersai

2.1. Siunnersuut nalinginnaasumik

Nunatsinni ilinniarnertuunngorniarterup iluarsaqqinneqarnera tungaveqarpoq Naalakkersuisut kissaatigimmassuk Nunatsinni ilinniarnertuunngorniartarnerup inerisarneqarnissaa ingammik siunertarineqarpoq inuusuttut amerlanerusut ilinniarnertuunngorniartarnermik naammassinnittarlernissaat, ilanngullugu ilinniartitsissutissat nukittorsarniarneqarput nunanilu allani ilinniaqqissinnaanissaq atatiinnarniarneqarpoq.

Kalaallinik inuiaqatigiinnik ataatsimut isiginninneq aallaavigalugu aamma ataqatigiissumik ilinniagaqartitsisinnaaneq takorluugaralugu iluarsaqqiisoqarpoq sulii atualinngitsut - aamma atuartut eqqarsaatigalugit. Ilinniarnertuunngorniarneq pillugu iluarsaqqiineq iliuutsinut tamakkununga ilassutitut isigineqassaaq. Ilinniarnertuunngorniartarnerup iluarsaqqinneqarnerani piviusunngortinneqassaaq kalaallinut ilinniarnertuunngorniartarneq eqaannerusooq atuartullu atuarnermik ataatsimoorussamik ingerlatsereernermikkut ilinniartissanut assigiinngitsunut ingerlaqqissinnaassapput tamatumani ilinniartut ataasiakkaat piginnaasusaat soqutigisaallu aallaaviussallutik. Ilinniarnertuunngorniartarnermik iluarsaqqiinnermi annertunerusumik ilinniartut assigiinngisitaartut piumassusaat ilikkagaqarnerallu nukittorsarneqassaaq.

Ilinniarnertuunngorniartarnermik iluarsaqqiinnermi qitiutitat ilagaat perorsaarnermik ingerlatsinerup inerisarneqarnissaa taamaaliornikkut inuusuttut piginnaasaminnik misilittakkaminnillu, ilinniarnertuunngorniartarnermik nassataminnik, tungavilimmik tapersorsorneqarsinnaaniassammata. Suleqatigiissitat qitiusunik iliuusissanik arlalinnik oqaasertalersuisimapput tamakkualu ilinniarnertuunngorniartarnerup iluarsaqqinneqarnerani imarisaasunut sunniuteqartussat. Matuma kingorna tulleriiiakkatut eqiterneqarsinnaapput:

- ilinniartooq qitiutillugu perorsaaneq pillugu ingerlatsineq
- ilikkagaqarneq Kalaallit Nunaannut attuumassuteqartoq
- atuartitsissutissani tamani oqaatsit aappaannik ilinniartitseriaatsit ilaatinneqarnerat
- suleqatigiiaanik ilinniartitsisoqartitsinermik aqqissuussineq
- ilinniartitsissutissat akimorlugit suleqatigiinneq annertusagaq

Tamatumunnga ilanngullugu ilisimatusarnerit nutaanerpaat tikkuarpaat ilinniartut akornanni aamma ilinniartut ilinniartitsisullu akornanni ataqatigiissutsit ilinniartut toqqissisimanissaannut tamatumuunalu ilikkagaqarnissamut piuumassuseqarnerannut pingaaruteqartorujussuusut. Taamaattumik ilinniartut atuarfimmi aammali minnerunngitsumik najugaqarfimminni toqqissisimanissaat suliassat annertuut ilagaat.

Siunnersuutip ingerlateqqippai atualinngitsuni, atuarfimmi ilinniartitaanernilu allani iluarsaaqqinerit tamatumani meeraq/ilinniartooq iliuusissani assigiinngitsuni qitiutinneqarmat.

Siunnersuummut tunngaviussaaq ilinniarnertuunngorniarnep kalaallit kulturianit aamma kalaallit naleqartitaannit sunnigaasimanissaa. Atuartitsissutit imarisaani sammineqartut ilinniartitsissutigineqartullu ilaat nunat tamat akornanni paasinnittaatsinik imaqaraluartulluunniit sammisat inuiaqatigiit oqaluttuarisaanerannut, inuiaqatigiit aningaasarsiornerannut, inuiaqatigiit ilusiligaanerannut, kulturianut assigisaannullu tunngassuteqartorpasut nunatsinni pissutsinit allaanerusarput. Assersuutigalugu aningaasarsiornermut tunngassuteqartut nunatsinni aalisarnermut attuumassuteqartorujussuupput Danmarkimili nunalerineq ukiorpassuarni aningaasarsiornermut pingaaruteqarsimalluni. Sammineqartut nunasiaqarneq, nunasiaqarsimaneq, namminersoneq nammineernerlu nunatsinni inuiaqatigiit oqaluttuarisaanerannut inuiaqatigiillu oqallinnerannut tunngassuteqartorujussuupput.

Tamatuma saniatigut kulturimiit kulturimut assigiinngissuteqartoqartarpoq assersuutigalugu inuiaqatigiinni oqaatiginneriaatsinut tunngassuteqartut tamatumunnga ilanngullugit inoroorsaariaatsit, mitatseriaatsillu allallu. Pissutsit allaat aamma soorlu misigittassuseq, inooqatigiinnermi aqqissuusseriaatsit aamma iliuuseqarumassutsit eqqarsaatersornermi ilanngussassaapput ilikkarluarfiusunik avatangiiseqartitsiniaraanni.

Siunnersuummi ilinniartunik qitiutitsinermik isiginninnikkut anguniarneqarpoq ilinniartitsisup ilinniartumik ilinniartitsinermi ingerlaavartumik atassuteqatigiinnikkut iliuuseqatigiinnikkullu ikiorsiisarnissaa. Taamaattumik ilinniartitsisup ilinniartitami angerlarsimaffiat inuiaqatigiillu avatangiisai nalujunnaartariaqarpai paasisariaqarpaalu qanoq iliorsinnikut sumiiffimmi nalunngisat ilikkartitsiniarnerminut ikiortigisinnaallugit.

Ilinniarnertuunngorniarnermut piusumut naleqqiullugu siunnersuut nutaatut arlalinnik imaqarpoq. Matuma kingorna erseqqinnerusumik tamakku eqqartorneqassapput

nalunaallinissaalli anguniarlugu aallaqqaataasumik oqaatsitigut ilisarnaasersorneqarsinnaaneri imatut tulleriiaarneqassapput.

1. Ilinniarnertuunngorniarnermik ataasiusumik ilinniartitsissutissanilli immikkut ilinniartiusinnaasunik pilersitsineq
2. Ilinniartitaanerup siunertaanik itinerusumik allaatiginninneq
3. Ilinniartunngorsinnaanermut maleruagassat nalorninaatsut
4. Ilusilersuineq nutaaq ataatsimoorussamik ingerlatsinertalik aamma ilinniarniakkanut assigiinngitsunut ingerlaqqissinnaaneq
5. Ilinniartitsissutissat nutaat
6. Ukiumut aalajangersimasumik piffissaqartitaanermik eqqussineq
7. Piumassuseq tunngavigalugu ilinniartinneqarsinnaanermut neqerooruteqarneq
8. Ilinniartitaaneq allamiut oqaasiittut ingerlanneqartutut perorsaaneq pillugu tunngaveqartitaq
9. Suleriaatsinik perorsaanerlu pillugu tunngavigisanik itisilerinikkut nalunaarsuineq
10. Ilinniartitsisut suleqatigiiaarnerinik eqqussineq
11. Ilinniartitup siunnersuinerlut pisussaaffinik nukittorsaaneq
12. Immikkut aqqissukkamik ingerlatsisinnaanerup nukittorsarneqarnera
13. Angajoqqaanut atassuteqarnissamik piunasaqaateqarneq aamma ingerlaavartumik nalilersuisarnermik erseqqissititsineq
14. Ilinniartitsut rektorillu piginnaasassaannik akisussaaffiinillu erseqqissaaneq
15. Siunnersuisoqatigeeqarnermut maleruagassiorneq (ilinniartitsisut aamma ilinniartut siunnersuisoqatigiivi)
16. Ilinniarnertuunngorniartarfinni tamani pitsaassutsimik inerisaanermik aamma angusanik nalilersuisarnermik eqqanaarinninneq

2.3. Ilinniarnertuunngorniarnermik ataasiusumik ilinniartitsissutissanilli immikkut ilinniartiusinnaasunik pilersitsineq. Siunnersuummi ataasiusumik ilinniarnertuunngorniartarfinnik pilersitsinissaq siunnersuutigineqarpoq taannalu taaneqarpoq "ilinniarnertuunngorniartarneq". Tamanna isumaqarpoq ilinniarnertuunngorniartarneq ataasiusoq manna tikillugu nalinginnaasumik ilinniarnertuunngorniartarfeqaraluarluni (GU) marlunnillu inuutissarsiutinut atatitanik ilinniarnertuunngorfeqarsimagaluarluni (Htx aamma Hhx). Ilinniartitaaneq ukiunik pingasunik sivisussuseqarpoq piffissanullu ilinniartitsiviusunut arfinilinnut immikkoortiterneqarsimavoq.

Ilinniarnertuunngorniartarneq suliffeqarfinit, Naalakkersuisunit taamaattussat pilersitaasunit imaluunniit akuerisaasunit. Ilinniartit ilinniarnertuunngorniartarluni ilinniakkamik neqeroornissaq siunertaralugu pilersinneqartut taaneqarput ilinniarnertuunngorniartarfiit, ilinniartit ilinniarnertuunngorniartarnermik neqerooruteqarsinnaanermut akuerisaasut taaneqarput ilinniartit akuerisaasut. Ilinniartit itaatsimut isigalugit taaneqarput ilinniarnertuunngorniartarfiit.

2.4. Ilinniartitaanerup siunertaanik itinerusumik allaatiginninneq.

Siunnersuusiami ilinniartitaanerup siunertaa erseqqissarlugu itisilerlugulu allaaserineqarpoq.

Siunnersuutip §-iani 1-imi aalajangersarneqarpoq ilinniarnertuunngorniarluni ilinniartitsinerup siunertaa. Tamatumani erserpoq ilinniartitaanerup ilinniaqqinnissamut piareersaataanera aamma nalinginnaasumik peroriartuutaanissaa. Tamatumani ingerlateqqinneqarput GU-mi, Htx-imi aamma Hhx-imi siunertarineqartut naak aalajangersagaq atuuttoq allatut oqaasertaqartinneqaraluartoq.

Ilinniartitaanerup siunertai erseqqissumik siunnersuutip §-iani 2-mi allaaserineqarput (ilinniaqqinnissamut tunngassuteqarnera) aamma § 3-mi (nalinginnaasumik peroriartuutaasussatut pissuseqarnera).

Aalajangiinneqarpoq ilinniartitaanerup siunertaatigut ilinniartut ilinniarfinni qaffasinnerusuni ilinniaqqinnissaannut piareersarneqassasut. Aalajangersakkami nutaatut erseqqissarneqarpoq qanoq iliornikkut ilinniartuq ilinniarfinni qaffasinnerusuni ilinniaqqinnissamut piareersarneqassanersoq. Tamanna eqqaassanngikkaanni pingaarnertut siunertaasut ilinniarnertuunngorniarfinni piusuni ullumikkumut atuuttumut siunertaasumut naapertuupput.

Ilinniartitaanerup nalinginnaasumik peroriartuutaanissaanut allaaserisaqarnermi pingaartinneqarpoq ilinniartut inuttut nammineersinnaassuseqarnerminnik ineriartortitsinissaat aamma inuiaqatigiinni kiffaanngissuseqarfiusuni inuinnaallu akornanni oqartussaaqataaffiusuni ilinniartut oqartussaaqataanissamut, akisussaaqataanissamut, pisinnaatitaaffeqarnissamut aamma pisussaaqataanissamut piareersarneqarnissaat. Tamatuma saniatigut immikkut erseqqissarneqarpoq ilinniartut ilinniartinneqarnermikkut paasisaqalissasut nalunngisaqalerlutillu Nunatsinni oqaluttuarisaanermik aamma nalunngisaqalissasut nunatta kulturikkut, inooqatigiinnikkut, teknikkikkut aamma aningaasarsiornikkut ineriartorsimaneranik.

Nutaatut siunnersuummi aamma nalunaarneqarpoq ilinniartitaaneq kikkunnut saaffiginnittuunersoq. Tamatumunnga tunngasuni nalunaarneqarpoq inuit nalunngisassanut, itisilerinermut, nalilersuinermet aamma eqqarsaatersornermet soqutigisaqartut saaffigineqartut. Taamaattumik tamatumani eqqartorneqanngilaq ilinniartitsinerup immikkut inuusuttunut saaffiginnittuunera naak maannamutulli ilinniartunngortussat amerlanersaasa inuusuttuunissaat naatsorsuutigineqaraluartoq.

2.5. Ilinniartunngorsinnaanermut maleruagassat nalorninaatsut.

Siunnersuummi aalajangersarneqarpoq, ilinniarnertuunngorniarluni ilinniagaq kikkunnut tamanut Kalaallit Nunaanni najugaqavissunut aamma qinnuteqartunut nunarsuaq tamakkerlugu isumaqatigiissutaasut Kalaallit Nunaannut atuuttut naapertorlugit qinnuteqartut Kalaallit Nunaanneersut assigalugit ilinniartunngorsinnaasunut ammasoq.

Qinnuteqartut inatsimmi § 8, imm. 1-mi aalajangersakkanik piviusunnngortitsisut ilinniartun ngornissaminnut pisinnaatitaapput. Taamaalilluni ilinniartunngornissamut malittarisassanut maanna atuuttunut, ilinniartullu atuarfianiit piukkunnassutsimik oqaaseqaateqartornissaanik toqqammaveqartunut naleqqiullugu, ilinniartunngornissamut malittarisassat nalorninaaallisarneqarput.

§ 8, imm. 1-mi piumasaqaataasut ilaatigut ilinniartunngorsinnaanerup atuarfimmiit atuarunnaarnermut tamatumaluunniit kinguninnguagut (ukiut marluk iluanni) imaluunniit atuarfimmi atuartitsinermit nallersuussinnaasumik atuartinneqarnerup kingornatigut pinissaanut pituttorneqarsimapput ilaatigullu minnerpaaffissalikkamik karakterinik angusaqarsimanissamut pituttorneqarput. § 8, imm. 2-mi, rektori maleruagassani minnerpaamik karakteritigut angusaqarsimasussaannermit piumasaqaatinik naatsorsuutiginninnani ilinniartunngortitsinermi immikkut akuersisinnaatitaanermik pisinnaatinneqarpoq.

Qinnuteqartut Greenland Grading System malillugu minnerpaamik E-m ik karaktereqarnissaanik piumasaqaammut pissutaavoq, qinnuteqartup ilinniarnertuunngorniarnermi aallartinnerani ilisimasassatigut naammaginatsumik killiffeqarnissaa siunniunneqarmat, tamannalu pisariaqarsorineqarmat ilinniarneq malinnaavigineqarsinnaassappat. Greenland Grading System naapertorlugi nalilersuineq tassaavoq karakterilersueriaaseq meeqqat atuarfianni inaarutaasimik naliliinermi atorneqartoq, tak. Meeqqat atuarfianni inaarutaasumik naliliineq pillugu Namminersornerullutik Oqartussat nalunaarutaat nr. 3, 9. januar 2009-meersoq. E karakteriliunneqartarpoq angusaasumut naammginartumut, ilinniakkap anguniagaasa minnerpaaffissaanik angusisimanermik takutitsisoq.

Meeqqat atuarfianni inaarutaasumik naliliinernut ilaapput oqaaseqaatit aamma killiffimmi karakterit, atuartup nammineq naliliinera misilitsinnerillu, taakkununga ilaalluni aalajangersimasumik qulequtsiilluni suliaq. Greenlandic Grading System-skala (GGs-skala) atorneqartarpoq killiffimmi karakteriliinermi aamma misilitsinnerit aalajangersimasumillu qulequtsiilluni suliap nalilneranni. Taamaammat siunertamut naapertuuttutut isigineqarpoq, karakterimik aalajangersimasumik piumasaqaat inarutaasumik naliliinermi immikkoortunut pingasunut tamanut GGS-skala malillugu nalineqartartunut attuumatinneqarpat.

§ 8 najoqqutaralugu ilinniartunngorsinnaanermit pisinnaatitaaffeqarnermit tapiutitut § 9, imm. 1-imi aalajangersarneqarpoq qinnuteqartut § 8, imm. 1-imi piumasaqaataasunik naammassinnissimangitsut, ilinniartunngorniarniluni misilitsinnikkut ilinniartunngorniarsinnaasut. Misilitsinnerup siunertaraa qinnuteqartup takutissagaa imatut ilinniagassat pillugit nalunngisaqartiginini ilinniartitsinermit naammaginatsumik malinnaasinnaassalluni aamma ilinniartitaanermik naammassinnissinnaassalluni. Qinnuteqartut ilinniartunngornissamut misilitsinnermi angisisut aamma immikkut akuerlugit ilinniartunngortikkumasat tamaasa ilinniartunngortinnissaannut nammattumik

inissaqartitsinissaq qularnaarneqarsinnaanngimmat, § 9, imm. 2-mi aalajangersarneqarpoq qin nuteqartut akornanni qanoq tulleriiaarisogarsinnaanersoq.

Ilinniartunngorsinnaanermut piumasaqaatinut ilassutitut siunnersuummi § 10-mi ilinniartuunermik unitsitsisimanerup kingornatigut ilinniarnermik nangitseqqissinnaanermut maleruagassiorpoq.

Maleruagassat atuuttut naapertorlugit (Nalunaarut nr. 153, 6. marts 2000-imeersoq, ilinniartunngorniarnermut ilinniartunngorsinnaaneq aamma Kalaallit Nunaanni ilinniarnissamat piareersarnermi ilinniartitsissutini ataasiakkaani ilinniartinneqarneq pillugu nalunaarummit 12. februar 2008-meersumit allannguuteqartinneqartumi), atuarfiup kinguninnguatigut ilinniarnertuunngorniarnermut ilinniartunngorsinnaaneq, atuarfigisamiit piginnaassuseqarnermut uppersaammik peqarnissamik, piumasaqaatitaqarpoq. Tamatumuuna atuarfiup nalilertussaavaa ilinniartup ilinniartitsinermit naammaginatumik malinnaasinnaanera aamma ilinniartitaanermi ilinniarnissamat piffissanik aalajangersimasunik piumasaqaataasunik eqqortitsisinnaanera.

Qinnuteqartunut allanut atuuppoq, qinnuteqartup inuttut ilinniakkamullu tunngassuseqartunik piginnaasaqarnermigut ataatsimut nalilerneqarenerata kingornatigut ilinniartunngorsinnaanera, aamma nalilerneqarpat ilinniartitsinermit naammaginatumik malinnaasinnaanera aamma ilinniartitaanermi ilinniarnissamat piffissanik aalajangersimasunik piumasaqaataasunik eqqortitsisinnaanera nalilerneqarpat.

Inuutissarsiutinut ilinniarnertuunngorniarnermut qinnuteqartut maleruagassat atuuttut malillugit, itigartinneqarsinnaasarpur ilinniarnissamat inissaqartitsisoqartinnagu. Tamatumunnga taarsiullugu GU-mi ilinniartunngorsinnaanermut neqeroorfigineqartussaapput.

Maleruagassat atuuttut malillugit qinnuteqartut, Nunatsinni inuutissarsiutitigut ilinniartitaanermik tamakkiisumik ilaannakortumilluunniit naammassinnissimasut, inuutissarsiutinut ilinniarnertuunngorniarnermut ukiuisa siulliata kingornanut ilinniartunngorsinnaatitaappur atuarfiup qinnuteqartup inuttut ilinniagassallu pillugit piginnaasai ataatsimut nalilerpagit imaattuusut qinnuteqartup ilinniartitsineq naammaginatumik malinnaaffigisinnaallugu aamma ilinniarneq naammassisinnaallugu.

2.6. Ilusilersuineq nutaaq ataatsimoorussamik ingerlatsinertalik aamma ilinniarniakkanut assigiinngitsunut ingerlaqqissinnaaneq.

Ilinniarnertuunngorniarnermi tamani piffissaq ilinniartinneqarfiusoq siulleq assigiimmik ilinniartinneqarfiuvoq tamatumu kingorna ilinniartut nammineq toqqakkaminnik ingerlavissanut assigiinngitsunut atulersarpur. Taamatut toqqaaneq tunngaveqartarpoq ilinniartup soqutigisaannik, piginnaaneqarfigisaanik angujumasaannillu. Taamatut ilusilersuinerup ilinniartut ingerlavinnut allanut nuussinnaanerat eqaannerulersinneqarpoq nuunnermilu killiffimmikkut naligiinnerusinnaalerput. Pissutsit taamaannerisa

ilinniartitsissutissani ilinniagassat siunertamut samminerulersippaat tamannalu ilinniartunut iluaqutaavoq. Taamaaliorneq imminut pitsaassutsimigut annertusarneqartarpoq tamatumalu kingunerisaanik ilinniartitsissutissat qaffasinnerusumik imaqtartineqarlersarput ilinniartunut tamanut iluaqutaasumik.

Maleruagassat assigiinngitsut naapertorlugit GU-mi Htx-imi aamma Hhx-imi ingerlatsinerit assigiinngitsuupput. Maleruagassani atuuttuni ataatsimoorussanik ingerlatsisinnaaneq maleruagassiuunneqarsimannngilaq ilinniarnerrullu nalaani ilinniagassat aalajangersimasunut sammitinneqartut ingerlaffigineqarsinnaanngillat. Inuutissarsiutinut tunngatitanik ilinniarnertuunngorniaaraanni Hhx imaluunniit Htx toqqartariaqartarpoq. Hhx-imi aamma Htx-imi ilinniartitaanerit imaqrput aallaqqaataasumik, imatut aaqqissorneqarsimasumik, ilinniartut ukioq ataaseq ilinniartooreernermi kingorna Nunatsinni inuutissarsiutitigut ilinniartitaanerni ilinniakkaminnik nangitsisinnaallutik.

2.7. Ilinniartitsissutissat nutaat

Ataatsimoorussamik ingerlatassami (tunngaviusumik ingerlatsinermi) ilinniartitsissutit nutaat pingasut eqqunneqarput – ”Kulturi”, ”Ilisimatusarneq” aamma ”Ilinniariaatsit”.

Ilinniartitsissutissaq ”Kulturi” ilinniartitsissutaavoq ilinniartitsisut ilinniartullu imminnut oqaatsiminnut, kulturiminnut, inuiaqatigiit avatangiisimik oqaasiinut kulturiannullu, kulturinut arlalinnut oqaatsinullu arlalinnut inooqatigiiffiusunut (kulturit akimorlugit) tamakkulu ataqatigiinneri pillugit samminnisinnaalersitsisussat. Oqaatsit kulturilu ulluinnarni takussaajuarpit inuunermilu ilaajuarlutik tamakkuninngalu paasinnissinnaanerup tunngavilerparpai qulequttat sammineqartut pillugit eqqarsaatersinnaaneq aammali kingunerisarlugu ilinniartitsissutissani ataasiakkaani paasisassanik eqqarsaatiginnissinnaalerneq. Taamaattumik tamatumani pissarsiat ilinniartunit ilinniarnerp ingleranerani kingornatigullu ilinniaqqinnermi iluaqutigineqarsinnaalersarput. Ilinniartitsissummi sammineqartussaapput kulturi qanoq paasineqartariaqarneris, pilersinneqartarneris, ingerlateqqinneqartarneris aamma qanoq allanngoriartortarneris. Ilinniartitsissutip aamma nukittorsartussaavaa ilinniartup kulturikkut kinaassutsiminik ilisimaarinninnera taamaaliornerullu ingleranerani eqqarsartaatsikkut tunngavilersuutit imarisallu ilikkarneqartarput tamakkualu tunngavigalugit ilinniartut kulturit akimorlugit paasinaasinnaanngorlutillu assersuussisinnaalersarput.

Ilinniartitsissutissami ”Science”-mi (pinngortitamik ilisimatusarneq) siunertarineqarpoq, manna tikillugu ilinniartitsissutip atuuttup, ilinniartitsissutit akimorlugit pinngortitalerinerup, ilinniartitsissummik nutaamik taarserneqarnissaa, ataatsimullu isiginninnikkut tunaartaqartumillu pinngortitalerinnermut nalunngisassanik tunngaviliiniartussaavoq tamatumunngalu tunngavilerniarneqarpoq ilinniartitsissutissani immikkuullarissuni uumasulerinermi, nunalerinermi akuutissalerinermilu nalunngisassatut tunngaviusussat. Ilinniartitsissutip qitiutippaa atorneqarsinnaanini ilinniartullu sunngiusartussaavai paasissutissanik katersineq pinngortitarlu pillugu ilinniariaatsit. Tamatumunnga ilutigitillugu

ilinniartitsissutip ilinniartut pinngortitamut ilisimatusarnej pillugu taaguutaasunik paasinnilersinniartussaavai aamma pinngortitaq pillugu eqqarsartaatsinik tunngaviusunik iluseqartitsinernillu aalajangersimasunik.

Ilinniartitsissut "Ilinniariaatsit" taamatut taaneqarpoq qallunaat ilinniarnertuunngorniarfiini nalinginnaasumik ilinniarnermik paasinninnermut paarlaanneqaqqunagu, ilinniartitsissutillu ineriartortinniartussaavaa ilinniartup ilisimatusarnermut tunngaviusumik eqqarsartaaseqalersinnaalernissaa.

Ilinniariaatsini ilinniartitsissummi eqqarsaatigineqarpoq ilinniartut ilinniarnertuunngorniarfinni ilinniartitsissutinut namminersortumik isumatuumillu isiginnissinnaalernissaat. Ilinniartitsissummi ilinniartut ilinniartinneqassapput ilinniariaatsinut pisariaqartunut suleriaatsinullu pisariaqartitanut, ilinniarnertuunngorniarnermi sinnerani iluaqutigisinnaasaminnut aamma siunissami ilinniaqqiffigisassaminni atorsinnaasaminnut. Ilinniartitsissutissaq taamaattoq pisariaqartinneqarsimavoq, ilinniartut maannakkut ilinniarnertuunngorniarfinni ilinniartuusut amerlasuut suleriaatsinik siunertamut naapertuuttunik suleriaasitaarneq ajormata aamma ilinniarnissamut naleqquttunik piginnaassuseqalernerq ajormata, taamaaliorniarnermi aaqqissuulluakkamik nakkuttarialinnillu taamaaliornissamut ilinniartitsisoqarneq ajormat.

2.8. Ukiumut aalajangersimasumik piffissaqartitaanermik eqqussineq.

Maleruagassani maannamut atuuttuni ilinniartut ilinniartinneqartarput sapaatip-akunnerini piffissami aalajangersimasumi minutsinik 45-kkaartunik agguarneqarsimasuni. Pissutsit taamaattuunerisa kingunerisarpaat ilinniartitsivissat pikkorissarneq, napparsimanerluunniit pissutigalugit ingerlatinngitsuukkat sapaatillu akunnerani tassanerpiaq taarsersinnaanngisat annaaneqartarmata.

Siunnersuummi ilinniartitsinermit piffissarititaasup ukiumoortunngortinneqarnissaa anguniarneqarpoq taamaaliornermi ilinniartitsisut ukiumut ilivitsumut piareersaateqarsinnaalersinneqarput. Ilinniartitsinerup sapaatip akunnikkaartumiit aaqqissorneqartarnerata ukiumoortunngortinneqarneratigut eqqanaaginnassanngilaa, ilinniartitsisut pisariaqartitat naapertorlugit piareersaateqartarsinnaanerata. Tamatuma eqqanaartussaavaa ilinniartut piffissami ilinniartinneqartussaaffimminni ilinniartinneqarsinnaanerata.

2.9. Piumassuseq tunngavigalugu ilinniartinneqarsinnaanermut neqerooruteqarneq.

Piumassutsimik ilinniartinneqarneq ilaatigut ilinniartitsissutaareersut pillugit ilinniartitsinerusinnaavoq. Ilinniartut ilinniartitsissutigineqartumik paasinnikkuminaatsitsisinnaasut periarfissinneqarsinnaapput eqqartorneqartumik uteqqiisinnaanerminnik.

Piumassutsimik ilinniartinneqarneq aamma nalinginnaasumik ilinniartitsinerup avataatigut ilinniartitsissutinik ilinniartitsinerusinnaavoq. Neqeroorut ilinniartitsinerup avataatigut

ilinniartitsinertut isigineqarsinnaavoq tamatuma ilinniartut ilinniartitsissummut artorsartut ilinniartinneqaqqissinnaapput aammali ilinniartut allat ilinniartitsissutit assigiinngitsut allatut isigalugit misilitsinnissarlu siunertarinnigikkaluarlugu ilinniartinneqarnissaminnik toqqartuisinnaapput.

Ilinniartitsineq ukioqatigiiaat, klassit, holdit atuartitsissutillu akimorlugit neqeroorutaammat, taama ilinniartitsinermut peqataanermi ilinniartut allat klassiinnarmit ilisarismanngisat naapinnissaat aamma periarfissaqassaaq, taamaalilluni tamanna ilinniartup ilinniarfimmi inuttut toqqissisimaneranut aammattaaq peqataassaaq.

Ilinniartut rektorimiit akuersissuteqarnikkut ilinniartitsinerup avataatigut ilinniarfimmiisinnaatitaassapput ilinniartinneqarniarlutik ilaatigut ilinniartunit namminersortumik aaqqissuussani, ilinniagasseriffinni assigisaanniluunniit. Taamaaliornermikkut ilinniartut ilinniartoqatitik allat peqatigalugit sulisinnaapput ilinniartitsissutini pitsaanerpaamik angusaqarsinnaanertik anguniarlugu.

2.10. Ilinniartitaaneq allamiut oqaasiittut ingerlanneqartut perorsaaneq pillugu tunngaveqartitaq.

Qallunaat oqaasii ilinniartitaanerni qaffasinnerusuni aamma nunatsinni ilinniarnertuunngorniarfinni pingaarnertut ilinniartitsinermi atorneqartarsimapput. Taamatut oqaatsinik atuineq kalaallinut ilinniartunut artorsaataasarsimallunilu suli artorsaataasarpoq tassami oqaatsit aappaattut imaluunniit allamiut oqaasiit oqaaserisatik atorlugit ilitsoqqussaralugu oqaatsit atorneqartunik ilinniartinneqartaramik. Pissutsit taamaanneranni arlallit maanaanaq atuarunnaartarput, ilinniarnermi ajornartorsiuteqalersarput ilinniartitsinermilu naammaginannigsumik pissarsiaqartarlutik. Taamaattumik pisariaqarpoq ilinniarnertuunngorniarfinni kalaallit oqaasiisa ilinniartitsinermi oqaatsit eqqukkiartuaarnissaat.

Ilinniartitsinermi atortussat amerlanersaasa qallunaatut piunerat nassuerutigalugu ilinniartitsinermi qallunaat oqaasii atorneqartuartariaqarput. Ilinniartitsinerli ilitsoqqussaralugu oqaatsit tunngavigalugit ilinniartitsinermiit oqaatsit aappaat tunngavigalugit ilinniartitsinermut ikaarsaariartortinneqartariaqarpoq. Taamaaliornermi ilinniartut pisariaqartitaat aamma ilinniartitsissutini oqaatsinilu ilikkarnissamullu periarfissarisat naaperiarneqarsinnaapput.

Isumaavoq ilinniartitsinerup marlunnik oqaaseqarfiusutut ingerlanneqarnissaa, kisiannili pisariaqartitsineq, periarfissat aamma siunertaq tunngavigalugu naleqqussarneqarsinnaasariaqarluni. Tamanna isumaqarpoq oqaatsit aappaasa ikorfartuutitut oqaaserineqarnerinik taamaaliornerullu kingunerissavaa ilikkariaatsit nutaat periaatsillu nutaat assersuutigalugu allagaqaataasut marluinnik oqaasertallit, suliassanut oqaasertalersuutit marluusunik oqaasertallit aammalu ilinniartut ilinniarnermi sulinerminni oqallitarnerminnilu kalaallit/qallunaat oqaasiinik ataatsikkut atuisinnaanerat.

Ilinniartitsissutini tamani ilinniartitsineq oqaatsit aappaattut oqaaserisat tunngavigalugit ilinniartitseriaaseqarnikkut tunngavilersorneqassaaq, tamatuma kingunerisussaavaa ilinniartitsissutinik pissarsiaqarneruneq oqaatsitigullu ineriartorneq. Tamatumani pineqanngilaq ilinniartitsissutissaq "kalaallit oqaasii A-mik ajornassusillit", tamatumanimi ilinniartut ilitsoqqussaralugu oqaatsiminnik ilinniartinneqartartussaapput.

Ilinniarnertuunngorniarfinni ilinniartitsisutit amerlanersaat ilinniartut ilitsoqqussaralugu oqaasii tunngaviginagit ilinniartitsissutigineqartarput. Pissutsit taamaannerisa ilinniartitsisup ilinniartitsissummi tamatumunnga oqaatsitigut eqqummaarissuseqarnissaa pisariaqartippaat. Tamanna kinguneqarpoq ilinniarnertuunngorniarfinni ilinniartitsisut tamarmik annikinnerusumik annertunerusumilluunniit oqaatsinik ilinniartitsisuunerat aamma inuiaqatigiilerinerni pinngortitarlu pillugu ilinniartitsinerni. Tamatuma pisariaqartippaa ilinniarnertuunngorniarfinni ilinniartitsisut aappaattut oqaaserisat pillugit perorsaanermt tunngassuteqartuni eqqummaarittariaqarnerat ilinniartitsinermilu atuisariaqarnerat, ilinniartitsinermilu ilinniartitsissutinut tunngassuteqartut tamarmik aamma oqaatsitigut suliarineqartariaqartassapput. Assersuutigalugu ilinniartitsisup akuersaartariaqarvaa ilinniartut qallunaatut oqalunnerminni eqqarsarfissaqartittariaqartarnissaat aammalu annertuumik ilinniartut akornanni ilitsoqqussaralugu oqaatsit atorlugit ilinniartitsissutissaq pillugu oqallittoqartariaqartarnissaa. Tamatuma saniatigut ilinniarnertuunngorniarfinni ilinniartitsisut ilinniartut qallunaatut oqaatsiminnik amerlisaanissaannut erseqqissumik sulissuteqartariaqarput aammalu ilinniartitsisut assiliortukkanut tunniussortakkaminnut ilinniagassiissutiminnullu annertunerusunik nalunaarsuuteqartarnissaat.

Ilimagineqanngilaq oqaatsit aappaat aallaavigalugit atuartitseriaaseqarluni ilinniartitsinerup nassatarissagaa, tamatuma kingorna ilinniartut oqaatsit aappaat aallaaviginagit atuartitseriaaseqarluni ilinniartitsineq malinnaavigisinnaajunnaassagaa. Ilimagisariaqarporlu ilikkagassatut pilersaarutini annertusiartortumik nikikkiartornissaq piumasarineqassasoq, ilinniartup ilinniarnertuutut soraarummeernermi kingorna oqaatsit aappaat aallaavigalugit atuartitseriaaseqarluni ilinniartitsinerunngitsumik malinnaasinnaanissaa anguniarneqarluni, tamanna Danmarkimi ingerlaqqiffiusumik ilinniarnermi piumasaqaataassamat.

2.11. Suleriaatsinik perorsaanerlu pillugu tunngavigisanik itisilerinikkut nalunaarsuineq. Siunnersuummi erseqqissarneqarpoq ilinniartitaanermi piffissami tamarmiusumi ilinniartitsissutissani tamani ilinniartitsineq ingerlanneqassasoq atorneqarsinnaanissaa aamma tunngaviusumik eqqarsaataasunik pissarsiviusinnaanissaa eqqarsaatigalugu anguniarlugulu.

Taamaattumik ilinniartut taamaallaat ilinniartitsissutissat imarisaannik pissarsiaqartussaangillat piginnaassutsinillu aalajangersimasunik pissarsiaqarlutik. Ilikkiartorneq iliuuseqarnermut tunngatinneqassaaq taamaattumik ilinniartut maannakkut aamma ilinniarsinnaassutsimik piginnaasaqalissapput tamatumaniilu eqqarsaatinik

tungaviusunik, nalinginnaasunik, inuuttut inooqatigiinnermilu piginnaassuseqarneq ilanngullugit.

Tamatuma saniatigut siunnersuummi aalajangersarneqarput ilinniartitsineq ilinniartitaaneq tamakkerlugu imatut aaqqissuunneqassasut ilinniartunut tamanut unamminartuussalluni iliuuseqarfiussallunilu aamma ilinniartut ilinniartitsissutissani tamani suleriaatsinik allanngorartunik ilinniartitsissutissamullu tungassuteqartunik oqaatsinik oqariartaatsinillu ajornarsiartuaartunik naapitaqartinneqartartussaapput aammalu ilinniartitsissutini ataasiakkaani anguniagaasut taamaaliornikkut angutinniarneqartartussaapput.

Pissutsit taamaannerisa rektori ilinniartitseriaatsinut assigiinngitsunut ammaasuusariaqartippaat ilinniarnertuunngorniarfinnilu ilinniartitsinermi aalajangersimasunik pissuseqannginnissamut ilioriaaseqannginnissamullu eqqummaarissuutittariaqartillugu. Taamaattumik rektorip eqqanaartariaqarjaa ilinniartitsisut ilinniartitseriaatsiminnik nikerartitsisuunissaat ilinniartitsinerni piffissani tamani aammalu assigiinngitsunik ajornassusilersukkanik ilinniartitseriaaseqarnissaat. Imaappoq ilinniartisinerussiaaq ilinniartut ataasiakkaat pisariaqartitaannik kulturikkullu tungavigisaannik aallaaveqartinneqartoq. Ilinniartut tamarmik ataasiinnaanngitsumik assigiinngissuseqartumillu suleriaaseqarput taamaattumillu ilinniartitsiviusuni piffissani tamani ilikkartitsiniarneq nikerartitaq pisariaqartinneqarpoq.

Suleriaatsini nikerartunik ajornarsiartuaarunillu piumasaqaateqarnerup eqqanaarniartussaavaat, ilinniartut tamarmik ilinniakkamut aallaavigisatigut tungavigalugit unamminartunik aallutaqarnissaat. Nikerartitsineq assersuutigalugu pisinnaavoq atuaqatigiiaani ilinniartitsinerni aammalu ilinniartut sungiusaatiminni suliaminnik saqqummiisarnerisigut.

Ilinniartitsissutini tamani oqaatsitigut oqariartaatsitigullu ajornarsiartuaartunik ilikkagaqarnissamut piumasaqaataasoq isigineqassaaq, ilinniartitsinermi tamarmi ineriartornissamut qitiutitsinertut, piumasaqaallu taamaattoq, ilinniartitsinerup ataatsimut isigalugu anguniagaanik aamma ilinniartitsissutini ataasiakkaani anguniagaasunik naammassinninnissamut, piumasaqaammut atassuteqarluinnartutut isigineqartariaqarpoq.

2.12. Ilinniartitsisut suleqatigiiaarnerinik eqqussineq.

Nutaatut siunnersuummi eqqunneqarput ilinniartitsisoqatigiiaat rektorimit ilinniartitsinermi tungaviusumik ilinniartitsinermi aamma ilinniartitsinerni assigiingiaartuni, katiterneqartussaasut. Ilinniartitsisoqatigiiaat ataasiakkaat marlunnik amerlanerusunilluunniit ilinniartitsisortaqartartussaapput.

Ilinniartitsisoqatigiiaanik pilersitsinerup siunertaraa atuaqatigiiaani toqqissisimasunik avatangiiseqarluni ineriartorsinnaanissaq tamatumanilu ilinniartut ataasiakkaat toqqissisimasinnaanerat tamatumuunalu ilinniartitsissutini ineriartorsinnaanerat aamma

maanaannakkut ilinniakkamik unitsitsinaveersaartitsisinnaasunut pissutaaqataasusaaq. Ilinniartitsisoqatigiiaat ataasiakkaat inimi ilinniartitsivimmi periutsinik ataqatigiinnermillu pilersitsissapput, ikorfartuutaasunik perorsaaneq pillugu ilinniartitsissutinilu ingerlatsissallutik ilinniartitsisoqatigiiaallu anguniagassaat pillugit allaffissornikkut suliaassanik aallutsisussaallutik. Atuaqatigiiaanut siunnersortaasumik suleqatiginnissapput aamma ilinniartunut ikorfartuutitigalutik malittarinnittussanik pilersitsiortortussaallutik.

2.13. Ilinniarfiup siunnersuinerlut pisussaaffiit nukittorsaaneq

Siunnersuummi aalajangersakkat ilinniarnertuunngorniarfinni ilinniartunut ataasiakkaanut tapersersuinerlut, siunnersuinerlut, ilinniakkap sammivissaanut, toqqakkatut ilinniagassanik, ilinniakkamut naammassinnissamut aamma ilinniagaqarnissamut- aamma suliffissamik toqqaanissamut ilitsersuinerlut pisussaaffilersuipput. Tamatuma saniatigut ilinniartitsissutissani ataasiakkaani ilinniartitsissutissaq aamma periutsit pillugit ilitsersuisoqassaaq ilanngullugu ilinniartitsissutissat ataqatigiinnerat. Tamatuma saniatigut aamma rektori piumaffigineqarpoq ilinniartitsiviusut immikkoortuini tamani ataqatigiiaat ilinniartulluunniit ataasiakkaat pillugit ilinniartitsisunik ataasiakkaanik ilinniartitsisoqatigiiaanilluunniit oqaloqateqartarnissamut. Taamaaliornermi eqqanaarniarneqarpoq rektorip ataqatigiiaat imaluunniit ilinniartut ataasiakkaat nukittoqutaannik sanngeequtaannilluunniit nalunngisaqalernissaa taamatut nalunngisaqarnini tunngavigalugit iliuuseqartarsinnaaniassammat.

Ilinniartut ilinniartitaanermi ukiuisa siulliata aallartinnerani sukkaasumik ilikkagaqarfiusumillu aallartinnissaminnik eqqanaarissunneqassapput tamatumanilu ilinniartitaanerup ilinniagassatigut imarisaa piumasaqaataasullu saqqummiussorneqassapput ilaatigullu ilinniartut inuttut ilinniarfimmut isertinneqarluarsinnaanissaat eqqanaarniarneqarpoq assersuutigalugu ilinniartut 2. G-meersut imaluunniit 3.G-meersut 1. G-meersunut ilitsersuisutut oqaloqatiginnittartutullu atornerarnerisigut. Ilinniartitsinerup immikkoortuisa siulliannik nammassinninnermi ilinniartut ilinniakkamik ingerlatassaminnik toqqaasussaapput. Taamaattumik pingaaruteqarluinnarpoq ilinniartut ilinniartitsissutissani pitsaasumik siunnersorneqarnissaat aallaqqaataaniit eqqortumik toqqaasinnaanissaat anguniarlugu.

Ilinniakkamut naammassinninnissamut tapersersuineq, siunnersuineq ilitsersuinerlu ingerlanneqassaaq paasissutissiinikkut, ilinniartitsinikkut inunnillu ataasiakkaanik oqaloqatiginninnikkut, oqaloqatiginninneq ilinniartut siunnersuisut ilitsersuisulluunniit akornanni. Taamaaliornermi ilinniartut ilinniarnertuunngorniarfimiinnermi nalaani periarfissinneqartassapput ilinniartitsissutissat, inooqatigiinneq imaluunniit inuttut ajornartorsiutaasinnaasut pillugit oqaloqatiginninnissamut. Ilinniarnertuunngorniarfiit ilinniartitsisui ilinniarnertu pillugu ilitsersuisui ilitsersuinermi siuttuusussaapput, kisianni suleqatigineqartussaapput assersuutigalugu atuarfinni siunnersortit avataani siunnersortaasinnaasut allat aamma ilinniaqqiffinni siunnersuisut attavigineqartarnerat pitsanngorsarneqartariaqarpoq, ilinniartoq pitsaanerpaamik pissarsiaqaqqullugu.

Ikorfartuineq, siunnersuineq aamma ilitsersuineq atuarnerup avataani pisarsinnaavoq. Ilitsersuineq siunnersuinerluunniit pitsaasoq aqquitasinnaavoq ilinniarnermik maangaannaq unitsitsisarnerup ilinniakkamilluunniit allangortitsisarnerup ingalassimaniarneqarneranut imaluunniit annikillisarneqarneranut.

Ilinniarnertuunngorniartarfinni malittarisassat atuuttut naapertorlugit ilinniartut ataatsimoorlutik ataasiakkaarlutillu ilinniarnissamik inuutissarsiutitaarnissamillu ilitsersorneqassapput. Ilinniarnertuunngorniartarneq pillugu nalunnaarummut ilinniartitsissutitut tapertaliussami tamanna pillugu immikkuualuttutigit aalajangersagaqarpoq. Inuutissarsiutinik ilinniarnertuunngorniartarfinnut malittarisassani atuuttuni, ilinniarnissaq inuutissarsiutitaarnissarlu pillugit ilitsersuinissaq pillugu malittarisassanik aalajangersagaqanngilaq.

2.14. Immikkut aqqissukkamik ingerlatsisinnaanerup nukittorsarneqarnera

Siunnersuummi ingerlateqqinneqarput annertusarneqarlutillu ilinniakkamik sivikillisaasinnaanermut periarfissat. Rektori periarfissinneqarpoq ilinniartunut sivikillisaaffigineqarsinnaatitanut immikkut ilinniarnermik ingerlatsisinnaanermut aqqissuussisinnanermut taamaaliornermilu ilinniarnertuunngorniartarluni ilinniarneq nalinginnaasumik sivisussuseqarnerminiit sivikinnerutinneqarsinnaavoq.

Malittarisassani atuttutuni piumasaavoq ilinniartuq sivikillisaanneqassaguni minnerpaamik 6 karaktererissagaa. Piumasaqaat tamanna ingerlateqqinneqanngilaq. Aammattaaq siusinnerusukkut misilitsissimanernit karakterit ilinniartup ataatsimut misilitsinnissaanut ilanngunneqannginnissaanik aalajangersagaq ilanngunneqanngilaq. Kiisalu ilinniartitsissutini annerpaamik pingasuni sivikilliliisoqarsinnaaneranik aalajangersagaq ingerlateqqinneqanngilaq. Taamaattoq Naalakkersuisut § 40, imm. 5 tunngavigalugu sivikilliliisarneq pillugu malittarisassanik ersarinnerusunik aalajangersaasinnaassapput.

Ilinniarnertuunngorniartarfinni ilinniarneq pillugu malittarisassani atuuttuni aalajangersagaqarpoq, tassani aalajangersarneqarluni ilinniartuq ilinniartitsissummi misilitsinnissamut naammattunik pisinnaasaqarpat ilinniartitsissummi ilinniartup peqataannginnissaanik atuarfiup akuerisinnaagaa. Aammattaaq aalajangersarneqarpoq ilinniartuq nammineq ilinniartittutut misilitsippat taamatut pisoqarnerani ilinniartitsissummi ukiumoortumik karakterilerneqassanngitsoq. Aammattaaq § 40, imm. 4-mi aalajangersakkap assinganik aalajangersagaqarpoq. Taamatut pisoqartillugu ilinniartup nammineq ilinniartittutut misilitsinnissaa pillugu aalajangersagaq ingerlateqqinneqanngilaq. Naalakkersuisulli § 40, imm. 5 malillugu pisinnaatitsissut naapertorlugu ilinniarnermi sivikillisaanissamut annertunerusunik malittarisassiorsinnaapput.

Tamatuma saniatigit Naalakkersuisut periarfissinneqarput, inunntu ilinniarnertuunngorniarnermik ukiumuk pingasunik sivikinnerusumik naammassinnikkumasunut, immikkut ingerlatassanik aalajangersagaliorsinnaanermut.

Aalajangersakkani atuuttuni inuit ilinniarnertuunngorniarfinni ukiunit pingasunit sivikinnerusumik ilinniartut pillugit immikkut aalajangersagaqanngilaq. Taamatut ilinniagaqarneq misiliummik ingerlanneqarnikuvoq.

Aammattaaq periarfissaqartitsisoqarpoq ilinniarnertuunngorniarnep sivitsorneqarsinnaaneranik ilinniartunut ilinniartitsissutit pillugit, napparsimaneq pillugu, innarluuteqarnerluunniit pillugu ilinniartitsinermut nalinginnaasumut malinnaaniarnermikkut ajornartorsiutilinnut. Ilinniartut arlallit annertuumik napparsimasimagaluarlutik imaluunniit innarluuteqaraluarlutik ilinniarnertuunngorniartarput piffissaq aalajangersimasoq atorneqartussat. Aammattaaq ilinniartut ilaat nappaateqarnertik imaluunniit innarluuteqarnertik pissutigalugit ilinniartitaanermik nalinginnaasumik ingerlatsisinnaaneq ajorput. Eqqartorneqartuni tamakkunani ilinniartut pineqartut neqeroorfigineqartussaapput nappaateqarnerminnut imaluunniit innarluuteqarnerminnut naleqqussakkamik ilinniarnertuunngorninarnermik ingerlatsisinnaanermut.

Tamatumunnga ilaapput napparsimasunik ilinniartitsisinnaanermut maleruagassiat ilinniartunullu pisariaqartitsisunut perorsaaneq pillugu ikorfartuutaasutut aaqqissukkanik ilinniartitsinernik ingerlatsisinnaanerit.

Ilinniarnertuunngorniarfinni ilinniarnep sivitsorneqarsinnaanera timersornermillu ilinniartitsinermi peqataangissinnaaneq pillugit malittarisassani attuutuni aalajangersagaqanngilaq. Napparsimanermi ilinniartinneqarnermik tamannalu pillugu malittarisassiorsinnaanermik GU pillugu malittarisassani aalajangersagaqarpoq.

Nalinginnaasumik maleruagassiat siunertaqarput ilinniartut amerlanerit ilinniarnertuunngorniarnermik naammassinnissinnaanissaannik.

2.15. Angajoqqaatut oqartussaassusilinnut atassuteqarnissamik piumasaqateqarneq aamma ingerlaavartumik nalilersuisarnermik erseqqissititsineq.

Siunnersuummi ilinniarnertuunngorniarnep ingerlaavartumik angajoqqaatut oqartussaassusilinnut ilinniartut ilinniartitaanerminni pissarsiaat pillugit kalerriisarnissamut pisussaatinneqarput.

Ilinniarnertuunngorniartut inuusussiartuinnartillugit, meeqqat atuarfianni atuarnerup ukiunut qulinut allangortinneqarnerata kingunerisaanik, annertunerujartuinnartumik pisariaqartinneqalersussaavoq, ilinniartut ulluinnarni ikiorserneqartarnissaat. Ilinniartut arlaqartut 15-iinnarnik ukioqartarput angerlarsimaffimminnik qimatsillutik ilinniarnertuunngorniarnep illoqarfiinut nuunnerminni. Ilinniarnertuunngorniarnep ilinniartuinut angerlarsimaffiinullu pitsaanerpaamik atugassaqartitsiniarnermi pisariaqarpoq ilinniarnertuunngorniarnep angajoqqaatut oqartussaassuseqartunik qanimut suleqateqarnissaat. GU pillugu malittarisassat atuuttut malillugit 1. aamma 2. G-mi ilinniarnermi ukiup

atuarfiusup naammassinerani ilinniartut ataasiakkaat klassimut tullermut nuussinnaanerat imalunniit klassimi uteqqiinnissaat imaluunniit atuarnerup taamaatiinnarnissaa pillugit atuarfik ilinniartunut taakkulu angajoqqaavinut siunnersuissaaq. Inuusutissarsiutinut ilinniarnertuunngorniarfiit pillugit malittarisassat atuuttut malillugit ilinniartut ataasiakkaat inissisimanerat ilinniartitsissutinilu ataasiakkaani ilinniarnermilu tamarmi pissarsiaat pillugit ilinniartut taakkulu angajoqqaavi angajoqqaatut oqartussaaffeqartut akuttunngitsumik minnerpaamillu ukiumut marloriarlutik ilisimatinneqartassapput.

Ilinniarnertuunngorniarfiit pillugit nalunaarummut ilanngussami aamma aalajangersarneqarpoq atuarfik (ilinniartut katissimannngitsut 18-it ataallugit ukiullit pillugit) ingerlaavartumik nalilersuinermi ilinniartup angusai ernumanartoqarpata angerlarsimaffimmut nalunaaruteqartassasut, taamaalilluni atuarfik angerlarsimaffillu suleqatigiillutik ilinniartup ajornartorsiutaanik aaqqiiniasinnaaniassammata. Aammattaaq aalajangersarneqarpoq atuarfiup angerlarsimaffiullu akornanni attaveqartarnek angajoqqaanik ataatsimiititsinikkut, angusat pillugit karaterinik ukiumoortumillu karakterinik nalunaaruteqartarnikkut immaqalu ilinniartitsisoqatigiit siunnersuinerisigut pisassasoq, ataatsimiinnernilu taakkunani ingerlaavartumik nalilersuinermi angusat pillugit angajoqqaat ilisimatinneqartassasut.

Siunertamut naapertuuttut isigineqarpoq erseqqissassallugu nalunaartarnek angajoqqaatut oqartussaassuseqartunut pisassasoq, angajoqqaanut paarlaallugu, tassami angajoqqaatut oqartussaassuseqartut tamanna pillugu malittarisassat atuuttut (Namminersorsinnaanermik inatsisip Kalaallit Nunaannut atortuulersinneqarnissaanik peqqussut nr. 306, 14. maaji 1993-imeersoq) naapertorlugit angajoqqaatut oqartussaasut meeraq isumagisussaavaat, meeqqamullu inuttut tunngasut meeqqap soqutigisai pisariaqartitaalu aallaavigalugit aalajangersinnaallugit.

Manna tikillugu ingerlanneqartut ingerlaavartumik nalilersuisoqartartussaavoq. Siunnersuummili erseqqissarneqarpoq suut nalilersorneqartussaannersut nalilersuisarnermilu suut siunertarineqarnerseq. Tamatumunnga tunngatillugu aalajangerneqarpoq, ilinniartut ataasiakkaat ilinniartitaanermi pissarsiaat nalilersorneqartassasut nalilersuinermilu siulliutinneqarlunilu pingaarnertinneqartassasoq ilinniartunik ilitsersuinissamut ilinniartullu ilinniaqqinnissaannut ineriartoqqinnissaannullu, tamatumunnga ilanngullugit ilinniarnermi ingerlavissanik, ilinniartitsissutissanik toqqaanissanut ajornassutsinillu toqqartuisarnissanut pilersaarusiornissamut tunngavissiornissaq.

Taamatumani naliliisarnek siumut isiginninniarnermi sakkussatut paasineqassaaq ilinniartummi ilikkarniarnerat ilinniartitsissutinilu pissarsiaasa iliuuseqarnikkut anguniagassarlu siunertaralugu nalilersuinikkut pitsanngorsarneqarniarnerat tamatumani eqqarsaatigineqarput. Maleruagassat atuuttut malillugit ilinniartut nalilersorneqartarput pigissaassutsiminnik taamaaliornermi angusarisaat nalilersorneqartarlutik. Siunnersuutikkut siunertarineqarpoq ilinniartut angusamikkut aammali ilinniartitsinermit pissarsiarisaminnik

nalilersorneqartarnissaat. Taamaattumik nalilersueriaaseq taamaattoq ilinniartumut ilinniarnermi nammineq annertunerusutigut akisussaannerminik tigumminninnissaanik piumasaqaateqartoqarpoq. Ilinniartut angusassanik piviusorsiortunik angusassiornissamut ikiorserneqassaaq nalilersuinerlu sakuussaaq anguniagassatut pilersinneqartut anguneqarsinnaassusaannik nalilersuutissatut imaluunniit anguniagassat tamatumani angusanut naleqqiullugit iluarsartuuttariaqarsinnaanerintut sakkussaassaaq.

2.16. Ilinniartitsisut rektorillu piginnaasassaannik akisussaaffinillu erseqqissaaneq Siunnersuummi ingerlateqqinneqarput ilinniartitsisunut aamma rektorinut piginnaasassatut piumasaqaataasut taakkuninngali itisilerillutik tamatumalu saniatigut rektorip ilinniartitsisullu akisussaaffinik suliassaanillu aalajangersaallutik. Tamatuma saniatigut aalajangersaasoqarpoq, rektori aamma ilinniartitsisut, ilisimatusarneq tunngavigalugu inerisakkanik ilinniaqqinnissamut neqeroorutinik atuinissamut piginnaatitaaffeqarlutillu pisussaataitaaffeqarnerinik.

Ilinniartitsisut piginnaasaqarnissaannik piumasaqaatit eqqarsaatigalugit erseqqissarneqarpoq, ilinniartitsisinnaanermik piginnaasaqarneq imaqartoq suliassat pillugit aamma perorsaaneq pillugu piginnaasaqassusermik allaatigineqarporlu piginnaassuseq taamaattoq qanoq piginnaassuseqarfigilerneqarsinnaanersoq.

Siunnersuummi aalajangersarneqarpoq, ilinniartitsisut ilinniartut ataasiakkaat atuaqatigiiaallu ilinniartitsinermi pissarsiaqartussaannerannut akisussaaffeqarnerat aamma atuaqatigiiaat toqqissisimasumik ingerlanissaannut ilinniartitsisutaaq pisussaaffigaat toqqissisimanartumik sunnertinnartumillu ilinniartut avatangiiseqarnissaat ilinniartut ataasiakkaat kulturikkut inooqatigiinnikkullu tunulequtaat ataqqillugit innimigalugillu.

Siunnersuummi rektorip akisussaaffiini suliassaanilu aalajangersarneqarpoq, rektori ilinniarnertuunngorniarfiup ulluinnarni pisortarigaa rektorillu perorsaaneq allaffissornerlu pillugit suliassat ilinniarfimmil sulisut akornanni aquataagassarigai. Ilanngullugu ersersinneqarpoq rektori Naalakkersuisunut akisussaasuusoq ilinniarnertuunngorniarfimmil ilinniartitsissutinut, perorsaaneq pillugu aamma allaffissornermi suliassanut, ilinniartitsinermut, misilitsinnernut aamma soraarummeernut.

Rektorip piginnaasassai pillugit aalajangersagaqarpoq. Taamaattumik ersersinneqarpoq rektori aqutsinermi piginnaasaqartuussasoq ilinniarnertuunngorniarfimmil ilinniartitsissutini minnerpaamik ataatsimi ilinniartitsinermut piginnaasaqartuussasoq tamatumalu saniatigut perorsaanikkut piginnaasaqartuussasoq. Piginnaassuseqarnissamut piumasaqaatit maleruagassanut atuuttunut sanilliullugit nutaajupput taamaallaat ilinniartitsisinnaanermut piumasaqaatitoqaasoq pinnani.

GU pillugu malittarisassani atuuttuni aalajangersarneqarpoq ilinniartitaanermut ilisimatusarnermullu ministeri ilinniartitsinermi pisinnaasanik akuersisartuusoq, taakku

ilinniagaqarnermi tunuliaqutit pillugit piumasaqaatinik malinnippata aammalu perorsaanermi atuagarsornikkut piviusunilu misilitsinnermi ilinniartitaanermut ilisimatusarnermullu ministerimit aqqissuunneqartumi angusisimanissaq ilinniartitsinermilu perorsaanermi pikkorissarnermi peqataanissaq piumasaqaataallutik.

Ilinniarnertuunngorniarfinni ilinniarneq pillugu malittarisassani atuuttuni aalajangersarneqarpoq inuussutissarsiutinut ilinniarnertuunngorniarfinni ilinniartitsissusut ilinniakkami pingaarnermi kandidatitullu ilinniarsimassasut, tassunga ilanngullugit handelshøjskolemi, universitetimi ingeniøritullu ilinniarneq. Aammattaaq aalajangersarneqarpoq ilinniartitsisut ilinniartitsisutini aalajangersimasuni minnerpaamik saniatigut ilinniagaqarsimassasut. Aammattaaq piumasaqaataavoq ilinniartitsisut nalinginnaasumik minnerpaamik ukiuni marlunni inuussutissarsiutini naleqquttumik attuumassuteqartumillu sulisimassasut atorfininnerullu kingorna kingusinnerpaamik ukiut marluk qaangiunneranni qallunaat inuussutissarsiutinut ilinniarnertuunngorniarfiini perorsaanermik ilinniarnermi ilinniartitsisunut piumasaqaatit annertoqataannik perorsaanermik imaluunniit ilinniartitsinermi perorsaanermik ilinniarsimassasut. Tassunga ilanngunneqassaaq ilinniartitsissutini ataasiakkaani ilinniartitsinermi pisinnaasat A-mik qaffasissusillit pillugit piumasaqaataasinnaasoq ilinniartitsisup ilinniartitsissummi immikkut akuerisaasumik pikkorissarsimanissaa imaluunniit taassuma assinginik pisinnaasaqarnissaa. Naggasiullugu aalajangersarneqarpoq inuussutissarsiutinut ilinniartitsissutini ilinniartitsisut Kalaallit Nunaanni inuussutissarsiutinut ilinniartitsinerne ilinniartitsisut pisinnaasassaannik piumasaqaatit eqqortissagaat.

GU pillugu malittarisassat atuuttut malillugit GU-mi ilinniartitsinermi adjunktitut lektoritulluunniit imaluunniit rektoritut atorfininnissamat piumasaqaataavoq GU-mi ilinniartitsissutini pineqartuni kandidatitut imaluunniit magisterkonferensitut universitetimi imaluunniit qitiusumik universitetimi soraarummeernermi angusisimanissaq.

Ilinniarnertuunngorniarfinni ilinniartitsinerne ilinniartitsisut pisinnaasassaat § 54-mut oqaaseqaatini allaaserineqarput.

2.17. Siunnersuisoqatigeeqarnermut maleruagassiorneq (ilinniartitsisut aamma ilinniartut siunnersuisoqatigiivi)

Siunnersuummi aalajangersarneqarput ilinniartitsisoqatigiit ilinniartullu siunnersuisoqatigiivi pillugit maleruagassat. Maleruagassiani aalajangersarneqarpoq ilinniartitsisut ilinniartullu tamarmik immikkut siunnersuisoqatigiinnik pilersitsissasut siunnersuisoqatigiillu tamakku rektorimut siunnersuisuussasut.

Siunnersuummi taamatut aalajangersaanermi siunertarineqarpoq pingaartinneqarmat siunnersuisoqatigiit taammaattut pilersinneqarnissaat siunertarineqarporlu siunnersuisoqatigiit taamaattut sulinissaannut sinaakkusersuinissaq.

Ilinniarnertuunngorniartarneq pillugu malittarisassani atuuttuni aalajangersaqqavoq
Ilinniartitaanermut Ilisimatusarnermullu ministeri ilinniartitsisut ataatsimoorfii pillugit
malittarisassanik aalajangersaasinnaasoq, aamma Namminersornerullutik Oqartussat
ilinniartitsisut ilinniartullu siunnersuisartoqatigiivit pillugit malittarisassanik
aalajangersaasinnaasut.

Ilinniartitsisut ataatsimoorfii pillugit aalajangeqqavoq, rektori minnerpaamik semetserimut
ataasiarluni ilinniartitsisunik aggersaasassasoq, pissutsit ilinniartunut tunngasut
oqallisinissaat siunertaralugu, tamannalu ilinniartitsisut ataatsimoorfiannik
taaneqartassasoq. Aammattaaq allaqqavoq ilinniartitsisut ataatsimoortut ilinniartitsissut
ataasiakkaanik ilinniartitsinermut atatillugu holdit ataatsimoortut imaluunniit ilinniartut
ataasiakkaat ajornartorsiutaat eqqartortassagaat. Kiisalu eqqaaneqarpoq, ilinniartitsisut
ataatsimoortut tassaasut holdip imaluunniit ilinniartut pineqartut ilinniartitsisui tamarmik,
rektorimit aqutarineqartut, aamma ilinniartitsisut ilinniartitsisut ataatsimoorfiini
ataatsimiinnernut peqataasussaataasut.

Ilinniartitsisut siunnersuisartoqatigiiviit aamma ilinniartut siunnersuisartoqatigiivi pillugit
Namminersornerullutik Oqartussat kaajallaasitaanni (nr. 13/92-imi) aalajangersagaqarpoq.
Tassani aalajangersarneqarpoq ilinniarnertuunngorniartarneq tamani ilinniartitsisut ilinniartullu
siunnersuisartoqatigeeqassasut aamma ataatsimut ataatsimiititaliaqassasoq.
Aalajangerneqarpoq ilinniartitsisut siunnersuisartoqatigiivii tassaasut rektori ilinniartitsisut
ilinniartitsisut tamarmik, ilinniartut siunn ersuisoqatigiivisa aqqissugaanerit ilinniartunit
aalajangerneqassasoq, ataatsimoortumillu ataatsimiititaliaq tassaasoq rektori – siulittaasut,
ilinniartitsisut siunnersuisartoqatigiivini siulittaasooq (rektoriusinnaangitsoq), ilinniartut
siunnersuisartoqatigiivini siulittaasooq, ilinniartitsisut marluk ilinniartitsisut
siunnersuisartoqatigiivinit toqqakkat aamma ilinniartut marluk ilinniartut
siunnersuisartoqatigiivinit toqqakkat aamma teknikkikkut allaffissornikkut suliaqartut
peqataatitaat ataaseq.

Kaajallaasitami aammattaaq ilinniartitsisut ilinniartullu siunnersuisartoqatigiivisa
ataatsimoorullugulu ataatsimiititaliap pisinnaatitaaffii aalajangersarneqarput. Tassani ersippoq
ilinniartitsisut ilinniartullu siunnersuisartoqatigiivii rektorimut ilitsersuisartuusut,
ataatsimoorlunilu ataatsimiititaliap suliaqartigai illuatungeriilluni ilisimateqatigiinneq
isumaqatigiinniarnerrillu aqutugalugit ilinniartitsisut suliaqatigiinnermik siuarsaanissaq.
Aammattaaq allaaserineqarpoq pineqartut pingasut nalinginnaasumiki suna
ilitsersuussutigisassaneraat, peqataaffigisassaneraat sunalu oqaaseqqaateqarfigisinnaagaat.

Inuutissarsiutinik ilinniarnertuunngorniartarneq malittarisassat atuuttut ilinniartitsisut
ataatsimoorfii, siunnersuisartoqatigiivi, ilinniartut siunnersuisartoqatigiivi ataatsimoorlunilu
ataatsimiititaliap pillugit malittarisassanik aalajangersagqanngilaq.

2.18. Ilinniarnertuunngorniartarfinni tamani pitsaassutsimik inerisaanermik aamma angusanik nalilersuisarnermik eqqanaarinnineq

Siunnersuummi nutaatut Naalackersuisut pisussaaffilerneqarput eqqanaassagaat, ilinniarnertuunngorniartarfinni tamani pitsaassutsimik ineriartortitsisoqartuaannarnissaa ilinniartitaanermilu aamma ilinniartitsinermi angusanik nalilersuisoqartuarnissaa Naalackersuisullu suliaasat tamakkua eqqanaarniarlugit piginnaatinneqarput avataaniit naliliisarnernik pilersitsinissamut.

3. Pisortanut aningaasatigut allaffissornikkullu kingunerisassai:

Kalaallit Nunaanni ilinniarnertuunngorniartarnerit pillugit Inatsit nr. 1393 aqutigalugu ilinniarnertuunngorniartarnerup tiguneqarneratigut Kalaallit Nunaata 1. januar 2009-miit ilinniarnertuunngorniartarnerit atatillugu inerisaanissamut, inatsisiliornissamut, ingerlatsinissamut pitsaassusermullu, soraarummeertarnerit ilinniakkanillu nakkutilliinissamut akisussaaffik tamaat tiguaa. Inissaqassutsip aalajangernissaanut, illuutitut, ingerlatsinermit aningaasalersuinermit aamma pisortanik ilinniartitsisunillu atorfinitsitsinermit akisussaaffik Namminersornerullutik Oqartussaneereerpoq, ataatsimoortumik tapit ukiumut 2,7 mio. kr-inik qaffannerisigut (2009-mi akit akissarsiallu killiffii aallaavigalugit).

Siunnersuutip akuerinerata pisariaqartilissavaa maannamut ilinniarnertuunngorniartarnerit naleqqiullugu suliniutinik nutaanik arlalinnik aallartitsisoqarnissaa, allatigullu maannamut ingerlassaareersut annertusisariaqassallutik. Tamatumani ilaatigut siunertaavoq ilinniartut amerlanerit naammassitinnissaat ilaatigullu ilinniakkap ilinniagassatigut annertunerusumik pissarsiffiunissaa, tamatumunnga ilanngullugu ilinniakkamik pisinnaatitsilerfiusumik ilinnialernissamut naammassinissamullu tunngavigissaarnerulernissaq. Ikerinnakkut unittartut ikilinerisigut inuillu pisinnaatitsilerfiusumik ilinniagaqartut amerlinerisigut ikiuinikkut aningaasartuutit ikilinerat nassatarissavaat, piffissallu ingerlanerani akileraarutitigut isertitat amerlisissallugit inuiqatigiillu ataatsimut isigalugit naleqartut annertunerulersissallugit.

Suliniutit misilinneqartut arlaqartut misiliutitut imaluunniit aningaasaliissutaagallartut atorlugit ingerlanneqarnikuupput. Ilinniarfiit suliniutit sunniuteqarluarneri misilittagaqarfignersimammattigut, taakku maanna aalajangersimasumik ingerlatsinerup ilaatut sapinngisamik piviusunngortikkumaneqarput, iluarsartuusseqqinnerup pingaarnerusumik anguniagaanut tapersiutitut, tamatumunnga assersuutitut ilanngullugu ilinniartut ataasiakkaat ilisimasamikkut qaffannissaannik kissaateqarneq, aamma ilinniartut tamarmik naammassinissamut periarfissaannik pitsanngorsaannissaq.

Annertusisamik ingerlassat pisarput ingerlatsisoqareertillugu, kisiannili annertunerusumik pisariaqartitsisoqarneranik naliliisoqartillugu, assersuutigalugu ilinniartut assigiinnginnerunerisa kingunerisaannik tamatumalu nassataanik ilinniartut ataasiakkaat aallaavigalugit ilinniartitsinissaq ilinniartullu ataasiakkaarlugit ilitersuinissaq pisariaqalertinneqartillugu.

Tamatuma saniatigut aammattaaq ilinniartut ilinniakkatut sammivissaminnik toqqaaniarneranni annertusisamik ilitsersuinissaq pisariaqartinneqarpoq, taamaaliornikkut ilusiliinerup nutaap ilinniakkamut atatillugu ataatsimoorfiit pilersinnissaannut periarfissat annertuseqqullugit, assigiiassuseq annertunerusoq tassuunakkut pilersinneqarsinnaaqqullugu tassuunakkullu ilinniakkatigut ineriartornermut toqqammavissat pitsanngorsarneqaaqqullugit.

Ingerlassat arlallit ilinniarnertuunngorniartarnerup Kalaallit nunaannut naleqqussarnissaanut pisariaqartutut nalilerneqarput, tamatumani assersuutigalugu pineqarlutik oqaatsinut tunngasut, taamaammallu ilinniusiornermik, ilinniartitseriaatsinik ilinniartitseqqinnernillu inerisaanissaq iluarsartuusseqqinnerup anguniagaasa pingaarnerit angunissaannut pingaaruteqarluinnarlutik.

Nutaatut inooqatigiissutsikkut avatangiisit pitsanngorsarnissaat ilanngunneqarpoq. Tamatumunnga ilaavoq ilinniarnernerup ilinniartunullu inissianiinnerup imminnut qanimut ataqatigiinnerat, nalinginnaasumik peroriartuutaasumik ilinniartitsinerumut ilinniarnissamullu piareersaataasumik aamma ilikkagassatigut ilinniartitsinernut atatillugu.

Ingerlassanut ilaatinneqarput perorsaanikkut, allaffissornikkut inooqatigiissutsikkullu iliuutsit, ilaatigut ingerlaavartumik naliliisarnermik pitsanngorsaasussat ilinniartullu ataasiakkaat pisariaqartitaannik ineriartornerannillu nukittorsaasussat, taamaaliornikkut naammassisartut amerlisinnaaqqullugit ilinniartullu matunik ammasunik naammattuugaqaqqullugit.

Ilinniartitsisunik, pisortanik sulisunillu allanik ilinniartitseqqinnerit pingaartinneqarput, tassami ilinniarnertuunngorniartarfinni sulisut iluarsartuusseqqinnerup iluatsinnissaanut sunniuteqarluarnissaanullu pingaaruteqarluinnartutut nalilerneqarput.

Aammattaaq nalilerneqarpoq ilinniarnertuunngorniartarneq pillugu ilisimasanik inerisaaneq naliliinerillu nalinginnaasumik pitsaasumik ineriartornerup ilikkakkatigut qaffasissumik killiffeqartup inerisartuarnissaanut tunngaviusut.

Ilinniarnertuunngorniartarneq pillugu iluarsaqqineq ilinniarnertuunngorniartarfinni ilinnialerumasut amerlinissaanik kinguneqartussatut naatsorsuutigineqarpoq. Ilinniartussanik ilinniartunngortitsisarneq marloqiusatut pisussatut ingerlasussaavoq. Ilaatigut ilinniartunngortinneqartassapput qinnguteqartut siunnersuummi § 8, imm. 1-imi (maleruagassat malillugit ilinniartunngortut) piumasaqaataasunik naammassinnissimasut, ilaatigullu qinnuteqartut ilaat ilinniartunngortinneqartassapput misilitsinnermik angusinnermi kingunerisaanik (misilitsinneq tunngavigalugu ilinniartunngortitaaneq) aamma qinnuteqartut immikkut akuerisaallutik ilinniartunngortut.

Qinnuteqartut maleruagassat malillugit ilinniartunngortinneqartut ilinniartuupput ilinniarnertuunngorniartarfinni ilinnialernissamut naleqqiullugu (ukiut kingulliit marluk

ingerlaneranni) meeqqat atuarfianni naammassisut imaluunniit meeqqat atuarfianni atuartitsinermut nalinginnaasumik piunasaqaataasunut nallersuussinnaasumik atuartinneqarsimasut. § 8, imm. 1-imi piunasaqaataasut eqqanaartussaavaat qinnuteqartut ilinniarnertuunngorniartut atualernermi aallartinnerani ilinniagassatigut piginnaasaasa naammattumik qaffasissuseqarnisaat. Piunasaqaataasut aalajangersarneqarsimapput imatut, ilinniartut Greenlandic Grading System-skala naapertorlugu minnerpaamik karakteri E aalajangersimasumik qulequtsiilluni suliassami aamma inaarutaasumik pinngitsoorani misilitsiffiusussani tamani anguneqarsimappat aamma 10. klassimi killiffimmi karakterini tamani E anguneqarsimappat. Karakteri E tunniunneqartarpoq naammattumik suliaqartoqarsimagaangat ilinniartitsissummi anguniarneqartut piunasarineqartut anguneqarnissaasa akuersarneqarsinnaasut minnerpaaffissaannik angusaqartoqaraangat. Tamanna 13-inik kisitsisitalinni naliliisarnermi 6-imut aamma 02-mut 7-inik kisitsisitalimmi naliliisarnermut naapertuuppoq.

Ilimagineqarpoq ilinniartunngortitsinissamik inatsisitigut piunasaqaatip nassatarissagaa inuusuttut ukioqatigiiaat ilinniartunngortartut ullormerniit amerlanerulernerat. Amerleriaat ilimagineqartoq tamanna 2020-p tungaanut inuusuttut ukioqatigiiaat ikileriarnerannik illuatungilerneqassasoq ilimagineqarpoq.

Misilitsinnikkut ilinniarnertuunngorniarnermut ilinnialertartuusussaapput atuarfimmi atuarfiup kingornatigut ilinnialersinnaanermut piunasaqaataasunut naammassinnissinnaangitsut aamma § 8, imm. 1-imi, ilinniartitsissutissat pillugit piginnaassuseqarnissamik, naammassinnissimanngitsut. Taamatut ilinniartunngortartussat amerlassuserisinnaasaat nalileruminaappoq. Ilinniartunngorsinnaanermut misilitsinnissap siunertarimmagu qinnuteqartup ilinniartitsissutissani nalunngisaminik takkorliuussinissaa qinnuteqartullu ilinniarnertuunngorniartuluni ilinniartitsinermut malinnaasinnaanera naammassinnissinnaanerallu nalilerneqartusaammat, naatsorsuutigineqarpoq taamaaliornikkut qinnuteqartut, § 8 imm.1 naapertorlugu piunasaqaatinik naammassinnissimanngitsut, ikittuinnaat ilinniartunngortarsinnaasassasut. Misilitsinnikkut ilinniartunngortartut amerlanersaat ilinniartunngortartussaapput, qinnuteqartut meeqqat atuarfianniit ingerlaannartumik ilinnialersuunngitsut (imaappoq kingusinnerpaamik ukiut marluk qaangiutinnginneratigut).

Siunnersuummi § 5, imm. 1, pkt. 1 malillugu ilinniarnertuunngorniartuluni ilinniartullu inaanni imatut inissaqartigissasoq Naalakkersuisut qulakkiissavaat qinnuteqartut tamarmik § 8, imm. 1-imi piunasaqaatinik eqqortitsisut ilinniarnermik aallartitsisinnaanngorlugit. § 5, imm. 1 pkt kingulleq malillugu Naalakkersuisut aamma anguniassavaat ilinniarnertuunngorniartuluni ilinniartullu inaanni imatut inissaqartigissasoq qinnuteqartut tamarmik ilinniartunngornissamut misilitsinnermi angusisut qinnuteqartullu immikkut akuerineqartut ilinniartunngorusuttut ilinniartunngorsinnaanngortillugit ilinniarnermillu naammassinnissinnaanngorlugit. Aammattaaq § 9, imm. 2-mi ersippoq inissat pissutigalugit qinnuteqartut ilinniartunngornissamut misilitsinnermi angusisut imaluunniit immikkut

akuerineqarlutik ilinniartunngornissamut qinnuteqartut tamarmik ilinniartunngorsinnaanngippata ilinniarnertuunngorniarfimmi qinnuteqartup ilinniartunngornissamik qinnuteqarfigisaani rektori aalaajangiisinnaasoq qinnuteqartut sorliit ilinniartunngorsinnaanersut. Qinnuteqartut ilinniartunngunngitsut inissaqarpat ilinniarnertuunngorniarfimmi allami ilinniartunngornissamut neqeroorfigineqassaaq. Qulliunerusumik tamanna isumaqarpoq ilinniartunngortut amerlassusaannut qaqugukkulluunniit inissat amerlassusaat apeqqutaasoq. Inatsisip atuutilernerani ilinniartunngortunut tunngatillugu tamanna isumaqarpoq maannakkutut amerlatigisut ilinniartunngornissaat iliamagineqartoq.

Ilinniarnertuunngorniarfinni ilinniartullu inaanni inissat ukiuni aggersuni amerlisarnissaat iliamagineqarpoq, taamaalilluni ukioq manna ilinniartunngortut amerlassusaannut inissat naapertuutissallutik.

Taamaammatt aningaasartuutissat ilimagisat naatsorsorneranni aallaaviuvoq ilinniartunngortinneqartartut amerlassusaat ullumikkumut naleqqiullugu nikissanngitsoq.

Aningaasatigut sinaakkutit killeqartut pissutigalugit siunnersuutip tusarniaassutigereernerani siunnersuutip akuerineqarnissaata kingunerisaanik ingerlatassat nutaat annertusisallu Naalakkersuisut nalilersorluartariaqalernikuuat. Tamassuma kinguneraa aningaasartuutissat missingiussat appartinnerat, taassumalu kinguneranik aningaasaliinissamut pisariaqartitat appartinnerat. Tamanna pivoq nutarterinermi qulliunerusumik anguniakkat aammalu ilinniarnertuunngorniarfinni ilinniarnertitsinerni maannakkut unammilligassagut tunngavigalugit immikkoortut pisariaqartitsinerpaat sorliunersut sukumiisumik isumaliutiginerat tunngavigalugu. Ilinniarnertuunngorniarfinni ilinniarnernut maannakkut aningaasaliissutaasuni pisariillisaataasinnaasut isumaliutiginerat uani aamma ilaavoq.

Aningaasartuutissat missingiussat taamaalillutik 2012-imi 26,97 mio. kr.-iniit 14,7 mio. kr.-inut appartinneqarput aammalu 2013-imi 2014-imilu 37,18 mio.kr.-iniit aamma 37,02 mio.kr.-iniit 21,1 mio.kr.-inut aamma 22,4 mio.kr.-inut appartinneqarput. Aningaasartuutissat missingiussat tabelimi ataaniittumi takuneqasinnaapput.

Aningaasartuutissat missingiussat appartinneqarnerisa kinguneraa kalaallisut perorsaanerup peerneqarnera. Tamassumunnga tunngaviuvoq maannakkut periuseq atorneqarmat, tassani qallunaat perorsaariaasiat atorneqarluni. Tassani naliliisoqarpoq ingerlatsineq aningaasaliissutaareersunut ilanngunneqarsinnaasoq, kalaallisuinnarlu perorsaanerup ineriartortinneqarnera naalaakkersuisoqarfiup iluani suliasat tulleriissaarnerat aqutugalugu pisinnaasoq. Taamaalilluni kalaallisut perorsaariaatsip ineriartortinnissaa ingerlannissaalu sulikissaatigineqarpoq, nalilerneqarporli tamanna sinaakkutit pioreersut iluanni piffissami sivilunerusumi ingerlanneqarsinnaassasoq, taamaammallu nutaamik annertusisamillu ingerlatsinertut isigineqassanani.

Aammattaaq perorsaariaatsimik ilisimatusarnermut ineriartortitsinermullu aningaasartuutissat missingiussat peerneqarput. Ingerlataq taanna tulleriissaarnermi salliutinneqarnikuvoq, tassa taanna piffissami sivisunerusumi ilinniarnertuunngorniarfinni ilinniartitsinermik savituumik qaffasissumillu ineriartortitsinermi sakkuummat. Aningaasatigut sinaakkutit killeqartut pissutigalugit nalilerneqarpoq sakkoq taanna Phd-stipendiat atuutereersut ilinniarnertuunngorniarfinnilu ilinniartitsinermik ilisimatusarluni ilinniaqqinnerit atorlugit ineriartortinneqartariaqartoq.

Aningaasatigut sinaakkutit killeqartut aamma kinguneraat immikkoortuni ukunani aningaasartuutissat missingiussat appartinneqarnerat: Aaqqissusseqqinnermik ingerlaavartumik nalilersuisarneq, ungasianiit ilinniartitsineq, naalackersuisoqarfiup nakkutilliinera, kajumissuseq tunngavigalugu ilinniartitsineq, ilinniarnermut ilitsersuineq il.il., ilinniarnarit immikkut aaqqissuussat, ilinniarnarup aaqqissuussaana nutaaq/ilinniartitsisut tiimii amerlanerit, naammassinnittartut amerlisarnerat (taamaatiinnartarnermik akiuiniarneq) – tassunga ilanngullugit ilinniartunik ilitsersuisarneq ilinniartullu inaanni inuit attaveqatigiittarneranni ingerlatat, sanaqqineq (illut), nerisaqarnermik aaqqissuussineq aammalu immikkut ikorfartuilluni perorsaanermi ingerlatat.

Aningaasartuutissat ilimagisat:

Ingerlassap nr-a.	Ingerlassaq pingaarneq	Ingerlassaq	2012 i mio. kr.	2013 i mio.kr.	2014 i mio.kr.
1	Ilinniartitsisoqatigiiaat	Ilinniaqqinneq	0,8	0,25	0,25
		Ingerlatsineq	0,55	1,1	1,1
2	Perorsaanikkut Nakkutilliisoq	Ilinniaqqinneq	0,085	-	0,085
		Ingerlatsineq	0,5	1	1
3	Rektorit ilinniaqqinnerat	Ingerlatsineq	0,15	0,15	0,15
4	Ilinniartitsisut ilinniaqqinnerat	Ilinniartitseriaatsit	0,85	-	0,85
		Kulturimut tunngasut	0,27	-	0,27
		Science	0,27	-	0,27
		Kalaallisut AD	0,5	0,5	0,5
		Kalaallisut/Danskisut ilinniartitsinermi akimuineq	0,07	-	0,07
		Ilinniartitsisut nutaat perorsaanikkut piukkunnarsartuarnerat	-	0,2	-
		Ilinniartoq qitiutillugu inerisaaneq	0,3	-	-
		Oqaatsit aappaannik ilinniartitsineq	0,3	-	-
		Ilinniartunik immikkut pisariaqartitsisunik ilinniartitsineq attaveqarnerlu	0,3	-	-
5	Kalaallisut ilinniusiat	Ukiunut 2	0,6	0,6	0,6
6	Ilinniartitsinermut isaariaq elektroniskiusoq	Inerisaaneq ataavartitsinerlu	0,05	0,05	0,05
7	Meeqqat atuarfiannut paasissutissaliorneq	Inerisaaneq	0,04	0,04	0,04
8	Iluarsartusseqqinnerup nalilersortuarnera	Malinnaatitat	0,25	0,5	0,5
9	Ungasianiit ilinniartitsineq	Programmi, atorlut inerisaanerlu	0,5	1	1
10	Naalackersuisoqarfiup nakkutilliinera	Inerisaaneq piviusunngoertitsinermillu qulamaarineq	0,45	0,45	0,45
11	Namineq piumassutsimik immikkut	Holdinut ataasiakkaanullunniit	0,185	0,37	0,37

	ilinniarneq				
12	Ikorfartuineq, ilitsersuineq siunnersuinerlu	Ilinniarnermi ilitsersorneqarnissamik pisariaqartitsineruneq	1	2	2,4
		Psykologimit siunnersorneqarnissamat neqeroorutit annertusinerat	0,37	0,75	0,75
		Ilinniartut inaanni attaveqaateqartitsineq	1,275	2,55	2,55
13	Ingerlatsinerit immikkut aaqqissuussat	Ilinniarnep aallartinnerani ilinniagassatigut pitsanngorsaaneq	0,085	0,17	0,17
		Ataatsikkaarluni ingerlatat	0,19	0,38	0,38
14	Ilinniarnep ilusaa nutaq/ilinniartitsisut tiimisa amerlinerat	A-mi B-milu ilinniartut amerlinerisigut anigaasartuuteqarneruneq	0,165	0,325	0,325
15	IIN-imi allaffissornikkut sulisut	Ataqatigiissaarinerit, nakkutilliinerit allaffissornikkullu suliat annertusinerat	0,22	0,45	0,45
16	Naamassititsiniarluni suliniutit (ikerinnakkut unitsitsinaveersaaneq)	Ilinniakkanik ikiorserneqarnissamik pisariaqartitsineruneq	0,3	0,6	0,6
		Semesterit 2-ata aallartinnerani ilisaritsineq	-	0,35	0,35
		Ilinniartunik coacheqarnerneq (sunnigiffik pilarsaarusernerlu)	0,56	1,12	1,12
		Atuarfinni sulisitat (meeqqat atuarfiannit ikaarsaariarneq)	0,17	0,34	0,34
		Ilaqtariit pulaartakkat	0,05	0,1	0,1
		Ikorfartuisoqartitsineq	0,12	0,24	0,24
		Alkolog	0,02	0,04	0,04
		Ilinniartut inaanni sammisaqaatit	0,44	0,88	0,88
17	Ininik allannguineq (uumaatsulerinerneq inissat)	Ini science-mik ilinniartitsiffik	0,5	-	-
18	Nerisaqartitsineq	Ikorsiinissamik imaluunniit ”nerisassiorqartitsinerneq” neqeroorut	1,5	3	3
19	Immikkut tapersiisumik perorsaannikkut ilinniartitsineq	Tiimit ikorsiiffiit, ilinniarnermut anigaasaliussat atortullu ikorsiissutaasut	0,25	0,5	0,5
20	Ilinniakkatigut nakkutilliineq inerisaanerlu	Ilinniartitsissutitut siunnersortit 3	0,3	0,6	0,6
21	Ilinniagassatut sammiviup toqqarnerani anigaasartuutaanerussat	Angalanernut nuunnernullu anigaasartuutit	-	0,35	0,35
22	Ilinnialernissamat misilitsineq	Inerisaaneq, ingerlatsineq naliliinerlu	0,13	0,13	0,13
Katillugit			14,7	21,1	22,4

4. Inuutissarsiutinik ingerlatsivinnut assigisaannullu anigaasartuutitigut allaffissornikkullu kingunerisassaa:

Inuutissarsiutitigut ingerlatsivinnut siunnersuut anigaasatigut allaffissornikkullu kinguneqartussaangilaq.

5. Avatangiisinut- aamma pinngortitamut kingunerisassaa:

Siunnersuut avatangiisinut imaluunniit pinngortitamut kinguneqartussaangilaq.

6. Innuttaasunut allaffissornikkut kingunerisassai:

Siunnersuut innuttaasunut allaffissornikkut kinguneqartussaangilaq.

7. Kingunerusinnaasut allat annertuut

8. Naalagaaffeqatigiinnermi aamma Namminersorlutik Oqartussaanermut tunngasut

9. Oqartussaasunut kattuffinnullu il.il. tusarniaaneq:

Siunnersuut piffissami 25. maj – 29. juni 2011 makkununga tusarniaassutigineqarpoq:

Naalackersuisut siulittaasuata Naalackersuisoqarfia

Ineqarnermut, Attaveqarnermut Angallanermullu Naalackersuisoqarfik

Aningaasaqarnermut Naalackersuisoqarfik

Aalisarnermut, Piniarnermut Nunalerinermullu Naalackersuisoqarfik

Inuussutissarsiornermut Suliffeqarnermullu Naalackersuisoqarfik

Ilaqutariinnermut, Kultureqarnermut, Ilageeqarnermut Naligiissitaanermullu

Naalackersuisoqarfik

Peqqissutsimut Naalackersuisoqarfik

Nunamut namminermut, Pinngortitamut Avatangiisinullu Naalackersuisoqarfik

Aatsitassanut Ikummatissanullu Pisortaqaarfik

Nunanut Allanut Pisortaqaarfik

Nunatsinni Nakorsaaneqarfik

Avalak

KIK

Kisaq

Kalaallit Nunaanni Sulisitsisut Peqatigiiffiat (GA)

NUSUKA

SIK

IMAK

ASG (Akademikernes Sammenslutning i Grønland/ Ilinniagartuut Kattuffiat)

KANUKOKA

GU-Aasiaat

HTX, Sisimiut

GU-Nuuk

GU-Qaqortoq

HHX, Qaqortoq

Ilisimatusarfik

Perorsaanermik Ilinniarfik

Sprogcenteret (Oqaatsinik Pikkorissarfik)

Upernaviarsummi Nunalerinermik Siunnersorteqaarfik

Aalisarnermik Piniarnermillu Ilinniarfik

Eqqumiitsuliornermik Ilinniarfik

Saviminilerinermik Ilinniarfik

Sanaartornermik Ilinniarfik

INUILI

Imarsiornermik Ilinniarfik

NI-Nuuk
NI-Qaqortoq
Peqqissaanermik Ilinniarfik
Knud Rasmussenip Højskolia
Sulisartut Højskoliat
Danmarkimi Ilinniartitaanermut Ministeeriaqarfik

Tusarniaaffigisanit tusarniaanermi akissutit uku tiguneqarput.

Aningaasaqarnermut Naalakkersuisoqarfik, Inuussutissarsiornermut Suliffeqarnermullu Naalakkersuisoqarfik, Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik, Peqqissutsimut Naalakkersuisoqarfik, Kalaallit Nunaanni Sulisitsisut Peqatigiiffiat, IMAK, ASG, GU-Aasiaat, GU-Nuuk, GU-Qaqortoq, Hhx-Qaqortoq, Peqqinnissaqarfimmumut Qitiusumik Ingerlatsivik, Danmarkimi Ilinniartitaanermut Ministereqarfik Uddannelsesstyrelsen og Kvalitets- og Tilsynsstyrelsen aqputigalugu.

Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik aamma Peqqinnissaqarfimmumut Qitiusumik Ingerlatsivik siunnersuummut oqaaseqaatissaqanngillat.

Tusarniaanermi akissutini oqaaseqaatit oqaaseqaateqarfigineqartariaqartut ataani nassuiarneqarput. Oqaaseqaatit siunnersuummi immikkoortunik aalajangersimasunik ilaliisut oqaaseqaateqarfigineqassanngillat.

Aningaasaqarnermut Naalakkersuisoqarfik (AN):

AN allappoq nuannersuusooq nunani avannarlerni ilinniarnertuunngorniarfiit pillugit isumaqatigiissummut Kalaallit Nunaat ilanngummat, tassungalu tunngatillugu apequtigalugu ilanngunneq Namminersorlutik Oqartussanut aningaasatigut kinguneqassanersoq. Tassunga oqaatigineqassaaq ilinniarnertuunngorniarfiit pillugit isumaqatigiissummut ilanngunneq siunnersuutip saqqummiunneqarneranut atanngitsoq, taamaammallu siunnersuutip aningaasatigut kingunissaasa allaaserineqarneranut tunngassuteqarani.

AN-ip oqaatigaa United World College pillugu isumaqatigiisut inuusuttunut minnerunngitsumillu Namminersorlutik Oqartussanut pingaaruteqartorujussuusooq, ilinniarnertuunngorniarfinnilu ilinniartut amerlanerusut nunanut allamukarnissaminut periarfissinneqarnissaat sulissutigineqartariaqartoq. Tassunga oqaatigineqassaaq immikkut aqqissuussinermit Naalakkersuisut akuerisaannut tunngatillugu ilinniarnep ilaata nunani allani ilinniarfinni ingerlanneqarsinnaanera siunnersuutikkut periarfissinneqartoq, tassungalu United World Collegemiiinneq assersuutissaasoq. Aammattaaq United World Collegemi inissat amerlinissaat Naalakkersuisut suliniutigaat.

Ilinniartunngortarnek pillugu malittarisassani immikkut akuerineqarnissammut periarfissiinnermut tunngatillugu AN-ip aamma apequtigaa tamanna ilinniarnertuunngorniarfinni qaffasissutsimut sunniuteqarnersoq aammalu ilinniartitaaneq pillugu politikip nukittorsarneqarnissaanut politikkikkut kissaatigineqartumut naapertuunnersoq. Tassunga oqaatigineqassaaq immikkut akuersisinnaaneq siunnersuutigineqartoq ilinniartut ilinniakkat ataasiakkaat pinnagit ilinniakkani tamani karakterit pillugit piumasaqaatinik taaneqartunik eqqortitsisut ilinniartunngorsinnaanerit periarfissaqartinniarlugu. Rektori immikkut akuerineqarnissamik qinnuteqaatinik taamaattunik nalilersuinermini pissutsit atatsimut isigalugit nalilersuissaaq, tassani rektorip nalilersussallugu qinnuteqartup pisinnaasai ataatsimut isigalugit ilinniartunngornissamut ilinniarnertuunngorniarfimmilu ilinniarnermik naammassinninnissamut naammannersut. Naalakkersuisut taamaammat isumaqarput immikkut akuersinissamut periarfissaq tamanna ilinniarnertuunngorniarfinni ilinniarnerep qaffasissusaanut sunniuteqanngitsoq.

Aningaasatigut kingunissaasa allaaserineqarnerisa erseqqissarneqarnissaat AN-ip aamma qinnuteqaatigaa, tassunga ilanngullugit amerlanerusut ilinniartunngornissaat ilimagineqarnersoq taassumalu kinguneranik aningaasatigut kingunissai. Tamanna aningaasatigut kingunissaasa allaaserineranni erseqqissarniarneqarpoq.

Naggasiullugu AN-ip uparuarppaa Ilinniartitaanermut Ilisimatusarnermullu Naalakkersuisoqarfiup GU-mik aaqqissuusseqqinnerup aningaasalersorneqarnissaanut tunngatillugu ilinniartitaanermut amerlanerusunik aningaasaliinissamik kissaataa itigartinneqarnikuusooq, aammalu 2012-imut ukiunullu missingersersuiffiusunut aningaasanut inatsisissatut siunnersuummi amerlanerusunik aningaasaliinissaq ilanngunneqanngitsoq. Taamaammat AN-ip qinnuteqaatigaa nassuiarneqassasoq inatsimmik atuutilersitsineq sunik kinguneqassanersoq inatsisissatullu siunnersuummik piviusunngortitsineq nammineq sinaakkutit iluanni ingerlanneqarsinnaanersoq, tassani oqaatigineqarluni aningaasat aningaasanut inatsimmi atugassanngortinneqanngippata tamanna kingunerisussaagaa. Tassunga oqaatigineqassaaq 2012-imut aningaasanut inatsisissatut siunnersuutip aappasaaneerneqarnerani siunnersuutip aningaasaliiffiginissaa pillugu allannguutissatut Naalakkersuisut siunnersuummik saqqummiiniartut. Aammattaaq siunnersuutip aningaasatigut allaffissornikkullu kingunissai pillugit allaaserisaq innersuussutigineqarpoq.

Inuussutissarsiornermut Suliffeqarnermullu Naalakkersuisoqarfik (ISIIN):

ISIIN-ip uparuarppaa inuk FA-mi soraarummerneq (meeqqat atuarfianni atuartunut angajullernut qaffasissutsimik misilitsinneq) tunngavigalugu ilinniarnertuunngorniarfimmi ilinniartunngornissamut qinnuteqartoq siunnersuummi § 8, imm. 1-imi ilinniartunngornissamut piumasaqaatit eqqortinnaviangikkai, tassa naammattunik karakteriliisoqarneq ajormat. Taamaammat ISIIN-ip pisariaqartutut isigaa erseqqissarneqassasoq inunnut ”meeqqat atuarfianni atuartitsinnermut nalinginnaasumik piumasaqaataasunut nallersuussinnaasumik atuartinneqarsimasut” aammalu siunnersuummi § 8, imm. 4-mi ilaangitsunut ilinniartunngornissamut qinnuteqartunut atatillugu najoqqutassat

suut atuunnersut. Tassunga oqaatigineqassaaq ilinniartut taakku ilinniartunngornissamut misilitsinneq aqputigalugu ilinniartunngornissamut qinnuteqarsinnaasut. Tamanna siunnersuummi uani § 9, imm. 1-imut oqaaseqaatini erseqqissarneqarpoq.

ISIIN-ip aammattaaq uparuarpa illoqarfinni arlalini taamaallaat qaffasissuseq taaneqartartoq Inuussutissarsiutinut Ilinniarnissamut Ilisarititsineq Akuerisaasoq (AEU) neqeroortigineqartartoq, tassanilu ilinniarnermi taamaallaat ilinniakkat aalajangersimasut ilinniartitsissutigineqartartoq, ilinniakkallu qaffasissusaat FA-mi ilinniarnermi appasinnerusoq. Aammattaaq uparuarneqarpoq Piareersarfinni utaqquisut allattorsimaffiata takisoorujussuup inisaaleqinerullu kingunerannik inuk assersuutigalugu Qaanaameersoq Ilulissani Aasianniluunniit ilinniartunngorsinnaanngitsoq. FA-mi atuarsinnaanermi killiliinerit taakku pissutigalugit ISIIN isumaqarpoq ilimanartoq inunnit taakkunanga amerlasoorpassuit ilinniarnertuunngorniarfinni ilinniartunngornissamut qinnuteqarniartut AEU-mi ilinniarsimassasut, taamaammallu inuit taakku qanoq siunissami pineqarnissaasa ilinniartunngornissamut militsinnissat taaneqartut suliarineqarneranni isumaliutigineqarnissaa naleqqutissasoq. Tassunga oqaatigineqassaaq inunnit taakkununga ilinniartunngornissamut misilitsinneq aqputigalugu qinnuteqartussatut ilimagineqartunut naleqqussarnissaa ilinniartunngornissamut misilitsinnerit suliarineqarneranni eqqumaffigineqassasoq. Tassungali peqatigitillugu oqaatigineqassaaq qinnuteqartup ilinniartitsinerup naammaginartumik malinnaaviginissaanut ilinniarnertuunngornissamut naammassinissaanut ilinniakkani naammattunik ilisimasaqarnerata uppersarnerneqarnissaa misilitsinnermi siunertaasoq. Ilinniartunngornissamut misilitsinnermi piumasaqaatit annertunerusut nalunaarusiornikkut aalajangersarneqassapput.

Peqqissutsimut Naalackersuisoqarfiup erseqqissarpaa pingaartuusoq Kalaallit Nunaanni ilinniarnertuunngorniarfinni ilinniarnermi nangitseqqilluni Danmarkimi ilinniarnissamut qinnuteqartut qinnuteqartunit allanit ajornerusumik inissisimalissanngitsut. Siunnersuummi taamatut aamma pisoqanngilaq, taamaammallu oqaaseqaat siunnersuummik allannguinernik kinguneqanngilaq.

Kalaallit Nunaanni Danmarkimilu sivikitsumik akunnattumillu sivilissusilimmik ilinniagaqarnissamut periarfissiisumik ilinniarnertuunngorniarfinni immikkut ilinniagaqarnissaq pillugu malittarisassiornissamut periarfissaqarnera Peqqissutsimut Naalackersuisoqarfiup aamma nuannaarutigalugu oqaatigaa, tassa inuit peqqissaanermik ilinniagaqalertussaannikkaluartut taamatut ilinniarnissaat ammaaffigineqarmat. Tassunga peqatigitillugu Naalackersuisoqarfiup erseqqissarpaa ilinniarnertuunngorniarfinni taamatut immikkut ilinniagaqarnerup ilinniarnermi pisinnaasaqarfiulersussatut eqqarsaatigineqartut qaffasissusaat sunnissanngikkaat. Taamatut aamma pisoqanngilaq, taamaammallu oqaaseqaat siunnersuummi allannguinernik kinguneqanngilaq.

Kalaallit Nunaanni Sulisitsisut Peqatigiiffiat (GA):

GA-p aallaqqaasiullugu naqinnerliugaq uparuarpa. Tamanna iluarsineqarpoq. GA-p aammattaaq § 49-p aamma § 66, imm. 5-ip oqaasertaasa allanngortinnissaat siunnersuutigaa. Allannguutit siunnersuummi uani malinneqarput.

GA-p aammattaaq uparuarpa ilinniarnertuunngorniarfinni ilinniakkat marluk A-mik qaffasissuseqartut – qallunaatut aamma kalaallisut – ilinniakkallu sinneri C-mik qaffasissuseqartut nangitseqqilluni ilinniarnerni ikitsuinnarni ilinniartunnguutaasinnaasut, tamassumalu kingunerissagaa ilinniartut ilinniaqqinnermi ukioq ataaseq atoqqissagaat. Taamaammat oqaatigineqarpoq ilinniakkani A-mik qaffasissusillit pingasut piomasqaataasariaqarnerat isumaliutigineqartariaqartoq, tassungalu taarsiunneqarsinnaallu ilinniarnertuunngorniarfimmi ilinniarnerni angusissagaanni ilinniakkat A-mik qaffasissusillit marluk ilinniakkallu B-mik qaffasissusillit marluk. Tassunga oqaatigineqassaaq minnerpaamik piomasqaataasooq ilinniakkat minnerpaamik marluk A-mik qaffasissuseqassasut, ilimagineqartorlu ilinniakkat amerlanerit A-mik qaffasissusilinnik amerlanernik tunngaveqassasut. Tamanna siunnersuummi uani § 25-mut oqaaseqaatini erseqqissarneqarpoq.

GA-p aammattaaq oqaatigaa ilinniartut nunanit allanit nuuttut ilinniarnertuunngorniarfinni ilinniartunngorsinnaanerit qulakkeerneqartariaqartoq, nunamullu nuutsinnatik ilinniarnertuunngorniarfinni ilinniarnernup ilaa ingerlassimappassuk ilinniarnerni sivikillisaaffigineqarsinnaasariaqartut, taamaammallu ilinniarnermik sivikillisaaffigineqarnissaq pillugu annertunerusunik malittarisassiornissamut pisinnaatitsissutip ilanngunneqarnissaa isumaliutigineqartariaqartoq. Tassunga oqaatigineqassaaq qinnuteqartut nunanit allanneersut § 8, imm. 1-imi piomasqaatinit immikkut akuerineqarnissaat pillugu malittarisassiornissamut Naalakkersuisut periarfissaqarnerannik siunnersuummi § 8, imm. 4 imaqartoq. Aammattaaq siunnersuummi § 40-mi ilinniarnermik sivikillisaaffigineqarnissaq pillugu aalajangersagaqarpoq. Naalakkersuisut isumaqarput aalajangersakkat taakku ajornartorsiummut taaneqartumut tunngatillugu naammaginartut.

GA-p uparuarpa siunnersuummi §§ 62-imi aamma 63-imi aalajangersakkat inuussutissarsiutinut ilinniarnernit pillugit Inatsisartut inatsisaannut naapertuutinningsut, tassa brancheskolit pisortat sulisoqarfiulernikummatigit namminersortut. Taamaammat inassuteqaatigineqarpoq brancheskolenut ilinniarnertuunngorniarfinni ilinniarit pillugit sulisoqarnermut immikkut malittarisassanik aalajangersaasoqassasooq, tassa atuarfinni taakkunani sulisut pillugit Naalakkersuisut pisinnaatitaaffeqqanngimmata, siulersuisut taamatut pisinnaatinneqarmata. Aammattaaq uparuarneqarpoq allassimasariaqartoq brancheskolit forständerimit aqunneqartut rektorimit aqunneqaratik. Aammattaaq oqaatigineqarpoq forständerimut tunngatillugu ilinniartitsissuummi minnerpaamik ataatsimi pisinnaasaqartariaqartoq, tassunga taarsiunneqarsinnaalluni ilinniarnertuunngorniarfinni forständeri imaluunniit inspektøri ilinniartitsinermik perorsaanermillu pisinnaasaqassasut. Inuussutissarsiutinut ilinniarnernit pikkorissarnerillu pillugit Inatsisartut inatsisaannut

(Inatsisartut inatsisaat nr. 10, 19. maj 2010-meersoq) siunnersuutip tunnganera pillugu ajornartorsiummut pineqartumut oqaatigineqassaaq siunnersuummi uani maannakkut aalajangersagaqartoq taassuminnga killilersuisumik. Tamanna pillugu siunnersuummi §§ 4, 57, 62, 63, 77 aamma 78 innersuussutigineqarput.

GA-p naggasiullugu uparuarpa § 65, imm. 4 aamma 5 akerleriittut, tassa oqaatigineqarmat ilinniartitsisut piffissami ilinniartitsiviusumi akissarsiaqartut, ilinniartitsisullu siunnersuisoqatigiivini ataatsimiinneq ilinniartitsisut piffissaq ilinniartitsiviisa ilaattut isigineqartariaqarmat, ilinniartitsisut ataatsimiinerini peqataanermut atatillugu aamma akissarsiaqartartut, taamaammallu akissarsiaqaataanngitsutut allassimasinnaanngitsoq. Tamanna eqqorpoq, taassumalu kinguneranik siusinnerusukkat imm. 5-iusoq siunnersuummi uani peerneqarpoq, taassumalu kinguneranik imm. 6 nutaatut imm. 5-iulerpoq.

IMAK:

IMAK-ip aallaqqaasiullugu oqaatigaa siulersuisut isumaqartut inatsisissatut siunnersuut oqaaseqaatit ilanngullugit ilinniartitsineq pillugu aalajangersagaasut/oqaaseqaataasut arlallit, ilinniarnertuunngorniarfinnilu ilinniartitsinerup pitsaasuunissaata qulakkeerneqarnissaanut aallaavissaarluartut. Ilinniartitseriaaseq pillugu 2.11-mi oqaaseqaatini tamanna minnerunngitsumik atuuppoq. Tassunga uiggiullugu oqaatigineqarpoq oqaaseqaatit/aalajangersakkat taakku assingi meeqqat atuarfiat pillugu inatsimmik nutarterinermi ilanngunneqartariaqartut. Tamanna tusaatissatut tiguneqarpoq.

IMAK-ip aamma oqaatigaa oqaatsit aappaattut perorsaaneq, ilinniartitsissutit akornanni suleqatigiinneq ilinniartitsissutillu pillugit aalajangersakkat eqqortumik alloriarnerusut, tassungali peqatigitillugu oqaatigalugu meeqqat atuarfianni misilitakkanut uigiullugu sakkortuumik mianersuutigineqartariaqartoq inatsimmik piviusunngortitsinissamut tunngavissat pigineqanngippata inatsisip sunniuteqarnissaa iliamagineqarsinnaanngitsoq. Tassunga uigiullugu oqaatigineqarpoq meeqqat atuarfianni ilinniartitsissutit nutaat ilinniartitsinermi pisinnaasat atortullu pigineqartinnagit atuutilersinneranni misilittakkat erseqqarissumik takutikkaat anguniagaqarluni suliniutit/isumalluutit annertunerujussuit pigineqartariaqartut. Ilinniartitsisut oqaatsit aappaattut perorsaaneq aallaavigalugu ilinniartitsinermi pisariaqartunik pisinnaasaqartut amigaataanerisa aammalu ilinniarnertuunngorniarfinni ilinniartitsisut kalaallisut oqaasillit amigaataanerisa kinguneraa immikkoortumut tassunga isumalluutinik inatsisissatut siunnersuummi oqaaseqaatini allassimasuniit annertunerujussuarnik immikkoortitsisoqartariaqartoq. Isumalluutit tassaasut aningaasat piffissarlu. Aammattaaq nalilersorluarneqartariaqarpoq Ilinniarnermut Institutti suliasat taakku suliarinissaannut pisariaqartunik isumalluuteqarnerisigut pisinnaasaqarfiunersorlu. Tassunga oqaatigineqassaaq piviusunngortitsinermi suliniutit arlallit pilersaarutaasut missingersuutiniillutillu, taakkulu siunnersuutip aningaasatigut allaffissornikkullu kingunissai pillugit allaaserisami nassuiarneqarput. Naalakkersuisut naliliipput suliniutit taakku naammattut, tamassumalu aningaasatigut kingunissai pitsaassuseqartumik tunngaveqarluni naatsorsorneqartut. Ilinniarnermut Institutti pillugu

oqaaseqaatit eqqarsaatigalugit oqaatigineqassaaq suliassat ataasiakkaat kikkut suliarissaneraat inatsisitigut aalajangersarneqanuunngitsaq.

IMAK-ip ingerlaqqilluni oqaatigaa isumaliutigineqartariaqartoq – minnerunngitsumik ilinniartitsisut kalaallisut oqaasillit amigaataaneri tunngavigalugu – kalaallisut oqaaseqanngitsut qaffasissutsimi A-mi kalaallisut ilinniarnissaannut isumalluutinik atuisoqassanersoq. Tassunga oqaatigineqassaaq rektoreqatigiit tamarmiusut sukumiisumik oqallinnerat aalajangiinerallu tunngavigalugu ilinniartitsissutit suut pinngitsoorani ilinniarneqassanersut aalajangerneqarnikuusoq. Tamannaannaq tunngavigalugu Naalakkersuisut isumaqarput aalajangersakkap allanngortinnissaa pissusissamisuunngitsaq.

IMAK-ip aamma oqaatigaa ilinniartitsissutini minnerpaamik E-mik angusinissaq pillugu piumasaqaatip kalaallisut oqaaseqanngitsut ilinniarnertuunngorniarfinni ilinniartuulernissaat ajornakusoortittorujussuussagaa. Tamassuma kingunerisinnaavaa inuit taakku qallunaat ilinniarnertuunngorniarfiinut ”qimarrannerat”. Tamanna kingusinnerusukkut Kalaallit Nunaannut utinnginnissaannik kinguneqarsinnaavoq, taamaalillunilu Kalaallit Nunaat pillugu ilisimasaat Kalaallit Nunaata iluaqutiginnitsuussallugit. Tassunga oqaatigineqassaaq Naalakkersuisut pingaartutut isigigaat ilinniarnertuunngorniarfinni ilinniartut kalaallisut naammagineqartumik aamma pisinnaasaqassasut. Piumasaqaatip kinguneranik kalaallisut oqaaseqanngitsut ilinniartunngorsinnaanerisa ajornartorujussuusinnanera pillugu isumakuluut Naalakkersuisut aamma isumaqatiginngilaat. Tamanna ilaatigut tunngaveqarpoq minnerpaamik E-mik piumasaqaat piumasaqaataasoq anguneqarsinnaasoq, taassumalu saniatigut ilinniartitsissutit ilaanni ikitsuni E ataallugu karaktereqarsinnaaneq immikkut akuersinikkut periarfissaavoq.

IMAK-ip ingerlaqqilluni oqaatigaa ilinniartut sapaatip akunneranik tunngaveqaratik ukiunik tunngaveqarnissaat pitsaasuusoq, siulersuisulli isumaat malillugu ilinniartitsisut piffissaq suliffissaasa naatsorsorneqarnissaat (oqaaseqaatini toqqaannanngitsumik oqaatigineqarpoq) kiisalu suliap ataatsip akissarsiaqaataannginnissaa inatsisiliuuttariaqanngitsut. Oqaatigineqarpoq tamanna isumaqatigiissutitut ilaasoq, taamaammallu inatsisiliuunneqassappat isumaqatigiinniarsinnaanermut akuliunnerulluni. Tassunga oqaatigineqassaaq ilinniartitsisut piffissaq suliffissaasa naatsorsorneqarnissaat pillugu inatsisiliornissaq siunertaanikuunngitsaq, Naalakkersuisullu aamma isumaqartut oqaaseqaatini oqaasertalersuineq taamatut takutitsinngitsaq. Suliat akissarsiaqarfiunngitsut oqaatigineqartut pillugit ilisimatitsissutigineqarsinnaavoq § 64, imm. 4-mi aamma 5-imi aalajangersakkat allanngortinneqartut, taamaalilluni § 64, imm. 4-mi maannakkut allaqqalerpoq ilinniartitsisut siunnersuisoqatigiivini peqataaneq piffissap ilinniartitsiviusup ilaatut isigineqartoq.

IMAK-p aammattaaq oqaatigaa, aqutsisutut pisinnaatitaaffik qanoq ingerlanneqassanersoq pillugu inatsisiliortoqassanngitsaq, tassami taamaammatt rektorip ilinniartitsisoqatigiinnik allannguisinnaaneranut periarfissamut tunngatillugu. Tassunga ilanngullugu

oqaatigineqarpoq, rektorip aqutsisutut pisinnaatitaaffiata nassatarigaa, rektori taamaalorsinnaammat suliassat ingerlanneqartarnerannik inatsimmi suliassamut peqataasup tusarniaavigineqartarnera pillugu malittarisassat naapertorlugit, ataasiakkaat sulineranni pissutsit tamanna pisariaqartilerpasuk, taamatuttaaq rektori taamaalorsinnaavoq ilinniartitsisut suliassaannut allanut naleqqiullugu. Tassunga tunngatillugu oqaatigineqassaaq oqaaseqaatit tusaatissatut tiguneqarmata, § 38, imm. 5-imilu aalajangersagaq tamanna naapertorlugu allanngortinneqarmat.

IMAK-ip aamma oqaatigaa inatsisissatut siunnersuummi anguniakkat annertussusiannut tunngatillugu aningaasatigut naatsorsuinerit pikkorissarnernut, atortunik ineriartortitsinermut, ilinniartitsissutini nutaani ininut ilinniartitsivinnut, ineriartortitsinermut aammalu ilinniartunngornissamut misilitsinnernut tunngatillugu appasippallaatut isikkoqartut. Tassunga oqaatigineqassaaq tusarniaanermi akissummi ersinngitsoq nalilersuineq tamanna sumik tunngaveqartinneqarnersoq. Qulaani oqaatigineqartutut Naalakkersuisut isumaqarput pitsaassuseqartumik tunngaveqarluni naatsorsuisoqartoq.

§§ 18, 19 aamma 20 pillugit IMAK-ip oqaatigaa ilinniartitsissutit tiimillu ilai tunngaviusumik ilinniarnep sivisussusianut sanilliullugit qaffasippallaartutut isikkoqartut, tamannalu isumaqartoq ilinniartut ataasiakkaat angerlarsimaffinni suliassat suliassallu saniatigut sapaatip akunneranut ilinniartitsinerit 32-t sinnerlugit malinnaavigissagaat. Tunngaviusumik ilinniagaqarnermi tiimit amerlassusaat pillugu aalajangersagaq annertunerusumik nalilersuereernikkut 425 tiiminut allanngortinneqarpoq. Tamanna pillugu siunnersuummi § 19-imut annertunerusumik oqaaseqaatit innersuussutigineqarput.

§ 31, imm. 2 pillugu IMAK-ip oqaatigaa oqaaseq oqaasilerinermi oqariaatsit ilinniartitsinernut tamanut tunnganani oqaatsinik ilinniartitsinermut tunngasoq, taamaammallu taamaallaat ataatsimut taaguutit allassimasariaqartut. Tassunga oqaatigineqassaaq oqaasilerinermi oqariaatsini ataatsimut taaguutitut atornerqarnerisa erseqqissarnissaa pissusissamisoortoq Naalakkersuisut isumaqartut, tassa tamanna kalaallisut, danskisut tuluttullu oqaatsinik ilinniartitsinerit akornanni erseqqarissumik ataqatigiissitsinermut pingaaruteqarmat. Tamassuma ilinniartitsineq ataatsimut isigalugu ataatsimut tamanut tunngasunik taaguuteqarnissaanik suliniuteqarnissaq sukkulluunniit ajornartinngilaa.

ASG:

ASG-ip aallaqqaasiullugu oqaatigaa malugalugu suleqatigiissitaliat arlallit peqataatinneqareernerisigut siunnersuut suliarineqartoq, tasanilu ilinniartitsisut peqataatitaqartut. Tassunga uiggiullugu oqaatigineqarpoq siunnersuummi immikkoortut arlallit nutaamik suliniuteqarnermik kinguneqartut, kisiannili siunnersuutip aningaasatigut kingunissai pillugit oqaaseqaatini tikkuarneqartoq taakku aningaasartuuteqarnermik kinguneqassasut. Aammattaaq oqaatigineqarpoq aningaasartuutaanerusussanut eqqorluartunut ilaatigut tamanna pillugu taassuma kingorna sulinermi isumaqatigiissutissat apeqqutaassasut.

Eqqorpoq siunnersuutip akuerineqarneranut uiggiullugu piffissaq suliffissaq pillugu isumaqatigiissutissaq isumaqatigiinniutigineqassasoq.

Suleqatigiinnik malinnaasussanik aaqqissusseqqinnermik malinnaasussanik pilersitsinissaq ASG-ip aamma tigulluarpaa. Tamanna tusaatissatut tiguneqarpoq.

ASG-ip aamma oqaatigaa ilinniartitaaneq pillugu politikip imaanut tunngatillugu aalajangersakkani tusarniaanermi akissummi oqaaseqaatit oqaaseqaateqarfigineqanngitsullu Danmarkimi tassunga assingusumik aaqqissusseqqineq tunngavigalugu aalajangersakkat tusaatissatut tiguneqarnerannut takutitsisut. Tassunga uiggiullugu oqaatigineqarpoq imaanngitsoq aalajangersakkat oqaaseqaateqarfigineqanngitsut naammassiuminaatsuunngitsut, kisiannili aalajangersakkat nutaat sulinerunermik kinguneqassappata isumaqatigiissutit piffissallu suliffissap isumaqatigiinniutigineqarnissaannut ilaasut. Tamanna paasissutissatut tusaatissatut tiguneqarpoq.

§ 6 pillugu oqaatigineqarpoq allanngorartumik ilinniartitsinissamik piumasaqaammik ilallugu tiimini tamani perorsaanerup allanngorartuunissaa pillugu piumasaqaat piumasaqaataasooq pitsaasooq, kisiannili klassini atuartut amerlavallaanngippata aatsaat piviusunngortinneqarsinnaasooq. § 37 pillugu taamatut aamma oqaaseqaateqartoqarpoq. Tassunga oqaatigineqassaaq klassini atuartut amerlassusaasa qaffanneqarnissaat siunnersuut piareersarlugu sulinermi ilaanikuunngitsoq.

§ 8, imm. 1-imi ilinniartunngornissaq pillugu malittarisassat pillugit ASG-ip oqaatigaa pinngitsoorani misilitsinnerni tamani karaterip E-p anguneqarnissaa pillugu piumasaqaat kinguneqassasooq junip naanerani meeqqat atuarfianni misilitsinnerit naammassereerpata ilinniartunngortussat akuerineqarsinnaasut agguuallugillu. Tassunga uiggiullugu oqaatigineqarpoq piumasaqaat iluaqutaasumik aaqqiivigineqarsinnaasooq, taaamaalilluni meeqqat atuarfianni killiffimmi karakterit tunngavigalugit ilinniartunngortitsisoqarsinnaalluni, piumasaqaatigigaluguli inaarutaasumik misilitsinnermi karakteri minnerpaamik E anguneqassasooq. Tassunga oqaatigineqassaaq ilinniarnertuunngorniarfiit piumasaqaateqarlutik ilinniartunngortitsisinnaanerat siunnersuummi ajornaquteqanngitsoq, inaarutaasumilli misilitsereernerup kingorna aatsaat ilinniartunngortitsisarnissaq Naalakkersuisut aamma allaffissornikkut annertunerusumik ajornartorsiutissaqartinngilaat. Ilinniarnertuunngorniarfiit § 8, imm. 1-imi piumasaqaatit eqqortinneqarpata ilinniartut kikkut ilinniartunngortussatut ilimagisatik piffissami siusissumi paasisaqarfigisinnaavaat, tassunga ilanngullugu kikkut immikkut akuersissuteqarnikkut ilinniartunngorsinnaanersut. Aammattaaq ilinniartunngornissamut misilitsinnerit upernaap ingerlanerani ingerlanneqarnissaat ilimagineqarpoq, taamaammallu ilinniartut kikkut ilinniartunngornissamut misilitsinnermi angusinersut piffissami siusissumi paasineqarsinnaalluni.

§ 8, imm. 2 pillugu ASG-ip oqaatigaa isumaliutigineqarsinnaasoq ilinniartitsissummi ilinniarnermi ilinniagassatut sammivimmi toqqarneqartumi ilaanngitsumi aatsaat karakteri E angusimagaanni ilinniartunngornissamat misilitsinnissaq pillugu piumasaqaatitaqanngitsumik rektorip immikkut akuersinissamat periarfissaa atuutissasoq. Tassunga oqaatigineqassaaq ilinniagassatut sammivimmik toqqaaneq aatsaat tunngaviusumik ilinniareernerme pisartoq, taamaammallu piffissami ilinnialerfimmi ilisimaneqarneq ajortoq ilinniartitsissutit suut ilinniagassatut sammivimmi ilinniartut ataasiakkaat piumaneraat. Aammattaaq taamatut killiliinissaq pissusissamisoortutut isikkoqanngilaq.

§ 17 pillugu ASG-ip oqaatigaa ukioq atuarfiusoq pillugu aalajangersakkami ullut 200-niit 240-nngortinnissaat piviusorsiuunngitsaq, ullullu 240-t qaffasinnerpaaviusussat ikilisinneqarsinnaasariaqartut. Annertunerunerusumik nalilersuereernikkut aalajangersagaq allanngortinneqarpoq, taamaalilluni ukiumi ilinniarfiusumi ullut 180-iniit 220-nngortinneqarlutik. Tamanna pillugu annertunerusumik oqaaseqaatit pillugit siunnersuummi § 17 innersuussutigineqarpoq.

§ 19 pillugu ASG-ip oqaatigaa tunngaviusumik ilinniarnermi piffissap ilinniarfiusup 480 tiiminik sivilissuseqarnera pillugu aalajangersakkap kingunerigaa ilinniartut sapaatit akunneri tamaasa 45 minutsinik sivilissuseqartunik tiimini 35-ni atuartassasut. Tamanna pillugu IMAK-imit tusarniaanermi akissummut oqaaseqaat taassuma assinga aamma siunnersuummi § 19-imut oqaaseqaatit innersuussutigineqarput.

§ 20 pillugu ASG-ip oqaatigaa ilinniartitsissutit nutaat illersorneqarsinnaasumik qaffasissuseqartumik naammassinissaannut ilinniartitsineq siulleq aallartitsinnagu ilinniartitsisut ilinniaqqillutik pikkorissarnissaasa aallartinneqarnissaa pisariaqartoq. Tassunga oqaatigineqassaaq tamanna aamma pissasoq, tassungalu aningaasartuutissat missingersuusiorneqarnikuusut.

Ilinniartitsissutini tamani kalaallisoorneq pinnagu oqaatsit aappaattut perorsaanerup atorneqarnera pillugu § 31 pillugu ASG-ip oqaatigaa ilinniartitsisut piumasaqaatip atuutilinnginnerani pisariaqartumik ilinniaqqinnissamik neqeroorfigineqarnissaat pisariaqartoq. Tassunga oqaatigineqassaaq ilinniartitsisut tamarmik 2010-mi workshopimut atatillugu pikkorissartinneqareersut. Pilersaarutaavoq pikkorissarnerit siunissami ingerlatsinermik ilisimatusarnertut ingerlanneqartassasut. Tamanna aallartinneqassaaq kisiannili aqqissuusseqqinneq atuutilerpat naammassisimassanani.

§ 35 pillugu ASG-ip oqaatigaa isumaliutigineqartariaqartoq ilinniartitsinerup tamarmiusup ilaa qanoq annertutigisoq ilinniartunut ilinniakkamik tamarmiusumik ingerlatsisunut ungasianiik ilinniartitsinertut aqqissuunneqarsinnaanersoq. Tassunga atatillugu tikkuarneqarpoq ilinniartut amerlanersaat inuusuttuusut, atuarnermullu atatillugu inunnut attaveqalersinnaaneq klassimilu inuit akornanni peqatigiinneq ilinniarnermi taakkununnga pingaaruteqartoq. Kingullertut taaneqartoq Naalakkersuisut isumaqatigaat, isumaqarlutilli

inatsimmi qaffasinnerpaaliinissaq pissusissamisuumngitsoq. Ungasianiit ilinniartitsinerup assigiinngiaartumik ingerlanneqarsinnaanera tamassumunnga pissutaavoq, tassunga ilanngullugu ilinniartitseriaatsip klassi aallaavigalugu pisarnera. Taamaammat inatsit tamatigoortuunngippallaarpat killiliivallaassappallu pissusissamisuusannqilaq. Siunnersuummi § 35, imm. 3-mi pisinnaatitsissut atorlugu ungasianiit ilinniartitsineq pillugu annertunerusunik malittarisassiortoqassasoq aammattaaq ilimagineqarpoq.

§ 35 pillugu ASG-ip aamma oqaatigaa eqqumaffigineqassasoq Danmarmiki aaqqissuusseqqinnginnermi ilinniarnertuunngorniarfinnik periarfissat tunngavigalugit ilinniartitsiviusuni misileraanerit takutikkaat periarfissat tunngavigalugit ilinniartitsineq ilinniakkami pisariaqartumik pissarsiviussappat ilinniartitsisut annertunerusumik piareersartariaqartartut. Tamanna tusaatissatut tiguneqarpoq.

§ 38-mut tunngatillugu ASG-ip ilisimatitsissutigaa danskit ilinniarnertuunngorniarfinnik aaqqissuusseqqinneranni misilittakkat takutikkaat, aaqqissuussaanermi sinaakkutit qanoq ittueneri pillugit atuarfinni ataasiakkaani ilinniartitsisut aqutsisullu oqalliseqarnissaat pingaartuusoq, taamaalilluni suliasani suleqatigiit suliasaanni anguniakkat nassuiarneqarluarsimaniassammata, takkattussaataaernerullu annertusinera ataasiakkaanut isumaqarluartumik ilisimatitsissutigineqarluni aammalu aqutsisut suliasaannik suleqatigiinnut agguaneq suliamik kajumilersitsiniarnermut sakuusinnaasoq, tassani allaffissornermi suliasat amerlanerannik kinguneqannginnissaa pisariaqarluni. Tamanna tusaatissatut tiguneqarpoq.

§ 46 pillugu ASG-ip oqaatigaa misilitsinnerit amerlassusaat Naalakkersuisunit aalajangerneqaratik inatsimmi aalajangersarneqartariaqartut, soorlu Danmarkimi taamatut pisoqartoq. Tamanna pillugu tunngavilersuisoqanngilaq. Tamassuma inatsisikkut aalajangersarneqannginnissaa Naalakkersuisut naleqqututut isigaat, tassa ilinniakkatut sammivinni ataasiakkaani misilitsinnerit assigiinngitsunik amerlassuseqarnissaat kissaatiginarsinnaammat. Aammattaaq misilitsinnerit amerlassusaasa ingerlaavartumik allanngortittarnissaat naleqqussinnaavoq. Taamaammat siunnersuummi § 50-imi pisinnaatitsissut atorlugu nalunaarusiornikkut malittarisassiortoqarnissaa naleqqututut Naalakkersuisut isigaat.

§§ 54 aamma 55 pillugit ASG oqaaseqarpoq hf-imi sannavimmi ilinniartitsineq, ilinniagassanik ilinniarnermi café aamma allattariarsorluni sannaviit Danmarkimi pitsaasumik misilittagaqarfigineqartut, isumalluutillu tassunga atorneqartut taamaatiinnartarnerup annikillisinnaasanut pitsaasumik siunniuteqarsinnaasut.

§§ 57-59 pillugit ASG-ip oqaatigaa ilinniarnertuunngorniarfinni ilinniarnertit pillugit Namminersornerullutik Oqartussat tigusinissaat pillugu inatsisip akuersissutigineqarnissaa sioqqullugu tusarniaanermi tikkuarsimallugu ilinniartitsinerumut pisinnasaqarani ilinniartitsisinnaanermut periarfissaq killeqartariaqartoq – nalinginnaasumik ukiumi ataatsimi.

Tassunga uiggiullugu § 57, imm. 2-mi aalajangersagaq mianersoqqussutigineqarpoq, taanna GU pillugu maannamut aalajangersagaasunit ingerlaqqinnerummat, tassani maannamut allaqqanikummat ataavartumik ilinniartitsinerumt pisinnaasaqarnissamut imm. 1-imi piunasaqaatit maannamut saneqqunneqarsinnaaneranni piunasaqaatigineqartoq ilinniartitsisup naammattumik ilinniakkamik naammassisaqarsimanissaa. Aammattaaq oqaatigineqarpoq imm. 2-mi Naalakkersuisut malittarisassiarisinnaasaannut sinaakkutit erseqqissarneqanngitsut. Tassunga uiggiullugu oqaatigineqarpoq ilinniartitsinerup qaffasissusaanut– taamaalillunilu ilinniartut ingerlaqqillutik Danmarkimi ilinniagaqarnermik naammassinninnissamut periarfissaannut – pingaaruteqartoq ilinniartitsisut ilinniartitsisinnaanissaat ulluinnarnilu ilinniartitsinerumt tunngatillugu allattariarsorlunilu suliassanut annertunerusunut tunngatillugu ilinniartunik ilitsersuisinnaanissaat. Ingerlaqqilluni oqaatigineqarpoq ilinniarnertuunngorniarfinni ilinniartitsinerup aaqquissuunnissaanut piunasaqaateqartoq, ilinniartitsisorlu qaffasissusermut specialamik allalluni kandidatitut soraarummeersimaguni taamaallaat pitsaassusilimmik taassuminnga malinnissinnaasoq. Ilinniartitsinermi perorsaanermilu imm. 1-imi piunasaqaatinik ilinniartitsisunik malinnissinnaanngitsunik annertuumik atuisoqarpat ilinniartitsinerup qaffasissusia appartinneqassaaq, tamassumalu kingunerissagaa Danmarkimi ingerlaqqilluni ilinniarnerni ilinniartunngorsinnaanermik qallunaat ilinniartitaanermut ministeriaqarfiata akuersisinnaannginnera. Tassunga oqaatigineqassaaq tunngavilersuutit allassimasut Naalakkersuisut isumaqatigigaat. Ilinniartitsisut rektorillu perorsaanermi ilinniartitsinermilu pisinnaasaat pillugit piunasaqaatit siunnersuummi erseqqinnerulersinneqarnerannut tamanna aamma tunngaviuvoq. Tamanna oqaatigereerlugu Naalakkersuisut pingaartutut aamma isigaat immikkoortumi ilaatigut tamatigoortuunissaq atuarfiit ingerlatsinerannut piunasaqaataasoq. Malittarisassalli atuuttut sakkukillisinneqarnissaat siumut siunertaanngilaq. Danmarkimi ingerlaqqilluni ilinniarnerni ilinniartut ilinniartunngorsinnaaneratt pillugu isumakuluummatt oqaatigineqartumut tunngatillugu aamma oqaatigineqassaaq aalajangersakkat taakku pillugit oqaaseqaatinik Ilinniartitaanermut Ministeriaqarfimmit tigusaqartoqarnikuunngitsooq. Aammattaaq ilisimatitsissutigineqassaaq malittarisassat annertunerusut perorsaanermik ilinniarneq pillugu nalunaarummi aalajangersaneqarumaartut, taannalu aamma Ilinniartitaanermut Ministeriaqarfimmut tusarniutigineqassasoq.

§ 59, imm. 3 pillugu ASG-ip oqaatigaa perorsaanermik ilinniarnernup atorfeqarnermi ukiut pingajuannat kinguartinneqarsinnaanera pilersaarummi allaqqammatt ajornartorsiutaasoq. Taanna pillugu oqaatigineqarpoq ilinniartunik ilinniartitsineq eqqarsaatigalugu aammalu ilinniartitsisut piunasarineqartutut ilinniartitsisinnaaneratt qulakkeerniarlugu perorsaanermik ilinniagaqarsimanissaaq pillugu piunasaqaateqartoqassasoq. Aammattaaq oqaatigineqarpoq perorsaanermik ilinniarneq ukiumi siullermi aallartinneqanngippat ilaatigut pingaaruteqartoq tamassuma qanoq ingerlanneqarnissaa pillugu ilinniartitsinerumt pilersaarusiortoqarnissaa ilaatigullu ilinniartitsisunut nutaanut arlaatigut tapersiinissamik atuarfiup aallartitsinissaa, tassani atuarfimmi ilinniartitsinermi sinaakkutinik ilisaritsinissaaq qulakkeerneqassalluni aammalu perorsaanermi apeqqutit pillugit tapersiisartoqarluni immaqa ilitsersuilluni tapersersuisoqartarluni. Tassunga oqaatigineqassaaq perorsaanermik ilinniarneq pillugu

isummat allassimasut Naalakkersuisut isumaqatigigaat. Perorsaanermik ilinniarnissamik atorfeqarnermi ukiut pingajuannut kinguartitsinissamik siunnersuummi periarfissiisoqarneranut siullermik pissutaavoq ilinniartitsisut amerlasuut perorsaanermik piffissami ataatsimi ilinniarpata atuarfinnut nanertuutaasinnaanerujussua. Tassunga tunngatillugu eqqarsaatigineqartariaqarpoq Kalaallit Nunaanni ilinniarnertuunngorniarfiit Danmarkimi ilinniarnertuunngorniarfinnut sanilliullugu mikinerujussuugajunnerat, taamaammallu nanertuut annertunerusinnaalluni. Tassunga ilanngunneqassaaq ukiut pingajuannut kinguartitsineq ilinniartitsisut piffissami sivisunerusumi sulisorineqarnissaannik kissaateqarnermik tunngaveqarmat.

§§ 61amma 64 pillugit ASG-ip oqaatigaa ilinniartitsisut ataasiakkaat atuarfimmilu ilinniartitsisut tamarmik pisinnaasaannik ineriartortitsisoqarnissaannik pilersaarusiortoqarnissaa pingaartuusoq, pilersaarummilu taamaattumi perorsaanermik pisinnaasanik aalajangersimasumik ineriartortitsinissamik atuarfiup kissaataa, ilinniartitsisut pisinnaasaminnik nutarterinissaat, pisinnaasanik ineriartortitsinerup ingerlatiinnarnissaa kiisalu ilinniartitsisut namminneq pisiannaasaminnik annertusaanissamik kissaateqarnerat, tassunga ilanngullugu assersuusitgalugu (siumut) pisortatut ilinniarneq, isiginiarneqartariaqartut. Tamanna pillugu oqaaseqaatit Naalakkersuisut tussaatisatut tiguaat, aamma oqaatigineqassalluni rektorip aqutsinermi pisinnaasai pissusissamisoorumik ilanngunneqartariaqartutut isikkoqartut.

§ 65 pillugu ASG-ip oqaatigaa ataatsimut ataatsimiititaliaq pillugu malittarisassat ingerlateqqinneqannginnerat tunngavigalugu ilinniartut siunnersuisoqatigiivisa ilinniartitsisut siunnersoqatigiivisa ataatsimiinneranni peqataatitaqarnissaat periarfissaqartariaqartoq, taamatullu tamanna kissaatigineqarpat ilinniartut siunnersuisoqatigiivisa ataatsimiinneranni ilinniartitsisut siunnersuisoqatigiivi peqataatitaqartassasut. Tamanna siunnersuummut uunga ilanngunneqarpoq.

§ 65, imm. 5 pillugu ASG-ip oqaatigaa imm. 5-imut oqaaseqaat ”ilinniartitsisut siunnersuisoqatigiiffianni sulineru ilinniartitsisut peqataanissamik kissaateqartut” aammalu imm. 4-mut ilinniartitsisut siunnersuisoqatigiiffiat ilinniartitsisut namminneq kissaateqarnerannik tunngaveqartoq, tassa ilinniartitsisut siunnersuisoqatigiiffiata ataatsimiinnerani siunnersuisoqatigiinnilu peqataaneq sulinerup ilagerpiarimmagu, tamannalu aqutsisunik oqaloqateqartarneqmi atuuttoq atuarfiup soqutigisarissaa. Tassunga oqaatigineqassaaq oqaaseqaatit aSG-ip oqaaseqaataa naapertorlugu aqqinneqartut.

GU-Aasiaat:

GU-Aasiaat oqaatigaa ataatsimut siunnersuisoqatigeeqarnerup maannakkut atuuttup amigaataaneratut isikkoqartoq, tassani ilinniartitsisut, sulisut allat ilinniartullu ataatsimut isummatik oqaloqatigiissutigisarpaat. Tassunga oqaatigineqassaaq ataatsimut siunnersuisoqatigiit maannakkutut atuutsillugit suleqatigiiffittut Naalakkersuisut isigigaat, sulisullu immikkoortuisa ilinniartullu akornanni suleqatigiiffiit inatsisikkut

aalajangersaavigineqarnissaat naleqqutinngitsut Naalakkersuisut isigigaat. Sumiiffinni kissaatigineqartut pisariaqartitallu malillugit atuarfiit nammineq suleqatigiiffilorsinnaapput. Tassunga peqatigitillugu oqaatigineqassaaq ASG-mit tusarniaanermi akissut tunngavigalugu ilinniartitsisut siunnersuisoqatigiivi aamma ilinniartut siunnersuisoqatigiivi pillugit malittarisassat allanngortinneqartut, tassani ilinniartut siunnersuisoqatigiivi ilinniartitsisut siunnersuisoqatigiivisa ataatsimiinneranni alaatsinaatsutut peqataatitaqarsinnaallutik, akerlianillu.

Nangilluni oqaatigineqarpoq kalaallisut A-p (GSK) aamma allat oqaasii atorlugit perorsaanermik tunngaveqarnera immaqa erseqqissarneqartariaqartoq. Oqaaseqaatini oqaatigineqarpoq ilinniartitsissutini ilinniartitsinerit tamarmik oqaatsit aappaat atorlugu perorsaanermik tunngaveqartut, taakkulu ilinniartut oqaatsitigut ineriartornerat ilinniakkallu imaannik pissarsiaqartarnerat nukittorsartaraat, kisiannili tamanna ilinniartitsissummi ”kalaallisut qaffasissuseq A”-mi atuutinngitsoq, tassa ilinniartut ilitsoqqussatut oqaatsitik atorlugit ilinniartinneqartarmata. Taamaammat Naalakkersuisut isumaqarput oqaaseqaat naammattoq.

§ 8 pillugu GU-Aasiaat oqaatigaa E-mik piumasaqaatip kingunerissagaa ilinniartut aatsaat junip naanerani ilinniartunngortinneqartassasut, taamaammallu siunnersuutigineqarpoq killiffimmi karakterit tunngavigalugit ilinniartinngortitsisoqarsinnaassasooq, kisiannili inaarutaasumik misilitsinnermi aalajangersimasumik karaktereqarnissaq piumasaqaatigalugu. Tamanna pillugu ASG-mit tusarniaanermi akissummi oqaaseqaatinut taassuma assinganut oqaaseqaatit innersuussutigineqassapput.

Nangilluni § 8 pillugu oqaatigineqarpoq ilinniartitsissutinit sisamaasunit pingasuni minnerpaamik C-mik karaktereqarnissaq immaqa eqqarsaatigineqarsinnaasooq: kalaallisut, danskisut, tuluttut aamma matematik, tassani oqaatigineqarpoq karakterit assigiimmik pingaaruteqarnerattut isikkoqanngitsoq. Oqaatigineqarpoq assersuutigalugu peqqissaarnermi karakterit taamatut pingaaruteqartinngitsut. Tassunga oqaatigineqassaaq ilinniartitsissutini tamani E-mik piumasaqaat ilinniarnertuunngorniarfimmi ilinniarnernup aallartinnerani aalajangersimasumik qaffasissuseqartumik qinnuteqartup ilinniartitsissutini pisinnaasaasa qulakkeerneqarnissaanik kissaateqarnermik tunngaveqartoq, tamannalu ilinniartitsinermik malinnaasinnaanermut pisariaqartutut isigineqarpoq. Naalakkersuisut tassunga atatillugu isumaqarput ilinniartitsissutit pingaaruteqassusiisa tulleriinnilersornissaat naleqqutinngitsoq.

Aammattaq oqaatigineqarpoq karakterit agguataarnerannik nalunaarsuineq tunngavigalugu ilimagineqartariaqartoq immikkut akuerineqarnissamik periarfissaq annertuumik atorneqassasooq. Tassunga oqaatigineqassaaq eqqortoq karakterit agguataarnerannik nalunaarsuinnermi kingullermi (2010) atuartunit naammassisunit 849-nit taamaallaat 150-it ilinniartitsissutini tamani E-mik piumasaqaat eqqortissinnaagaat. Ukiut tamaasa atuartut 500-t aallartittarmata tamanna isumaqassaaq ilinniartut ilinniartunngortut sinneri immikkut akuerineqassasut imaluunniit ilinniartunngornissamut misilitsinnermi angusissasut.

Naalakkersuisut isumaqarput tamanna ajornartorsiutaanngitsoq. Tassunga peqatigitillugu ilimagineqartariaqarpoq piumasaqaatit ilisimaneqalerpata meeqqat atuarfianni atuartut amerlanerit karakterinik piumasaqaatit eqqortinniartussanngussagaat, taakkunaanngalu ilinniartunngortartut amerlinissaat ilimagineqartariaqarpoq.

§ 9-mi inaarutaasumik misilitsinneq pillugu oqaatigineqarpoq (tassa ilinniartunngornissamut misilitsinneq, aaq.) ikitsuinnarnut atuutissasoq, qitiusumiillu aaqqissuunneqarnissaa pingaartuusoq, tassa oqaatigineqarluni taamaanngippat ullumikkutut rektorip ilinniartitsisunngortitsisarnera nangiinnarneqarsinnaasoq. Aammattaaq oqaatigineqarpoq qaffasissutsip FA assigissagaa, kisiannili angusinissap aalajangersimasumik qaffasissuseqarnissaa piumasaqaataassasoq, pisinnaasallu nalinginnaasut uku pingaartillugit misilinneqassasut, kalaallisut, matematik, danskisut tuluttullu. Aammattaaq oqaatigineqarpoq maannakkut nunap immikkoortuini tamani ilinniartunngornissamut misilitsinnerit aaqqissuunneqarpata GU-Aasiannut nanertuutaasorujussuussasoq. Tassunga oqaatigineqassaaq inatsisissatut siunnersuutip tusarniutigalugu nassiuereernerata kingorna ilinniartunngortarneq pillugu nalunaarutip suliarineqarnera aallartinneqartoq, ilinniartunngornissamut misilitsinneq tassunga ilanngullugu. Ilinniarnertuunngorniarfinni rektorit tassani peqataapput. Isumaqatigiissutaavoq misilitsinneq qitiusumiit aaqqissuunneqartassasoq nalilersorneqarlunilu. Tamassuma kinguneranik siunnersuummi ilinniartunngornissamut misilitsinneq pillugu § 9-mi aalajangersagaq allanngortinneqarpoq, tassani ersilluni Naalakkersuisunit aaqqissuunneqartassasoq Naalakkersuisunillu nalilersorneqarluni, piviusunilu tamanna isumaqarpoq Ilinniartitaanermut Iisimatusarnermullu Naalakkersuisoqarfimmit ingerlanneqartassasoq. Iisimasat qaffasissusiat eqqarsaatigalugu ilinniartunut ilinniartunngornissamut toqqaannartumik meeqqat atuarfiannit qinnuteqartunut piumasaqaatit assigiissaarnissaat ilimagineqarsinnaavoq. Naalakkersuisut taamaalillutik isumaqarput qaffasissutsip qaffasinnerunissaa tunngavissaqanngitsoq.

§ 13-imi nerisaqartitsisarneq pillugu oqaatigineqarpoq ilinniartut inaanni aalajangersimasuni nerisaqartitsinermik aaqqissuineq periarfissaasariaqartoq ineqartunullu tamanut pinngitsoorani atuutissalluni, tassa oqaatigineqarluni ilaat assersuutigalugu nerisaqarnermik aaqqissuussineq atussanngippassuk ilinniartut inaat ataatsimoorfiusut ingerlassanngitsoq, taamaalaalli akunnittarfimmut assingusumik taamaallaat siniffiusarluni. Tassunga oqaatigineqassaaq Naalakkersuisut isumaqartut pinngitsaaliilluni nerisaqarnermik aaqqissuussinermik tunngaveqarneq pissusissamisuunngitsoq. Nerisaqarnermut sinaakkutit imaluunnit nerisaqarnermi aaqqissuussinerit aaqqissuunneqarnerat imarisaalluunniit aalajangersakkami aalajangersarneqanngillat, tassa naliliisoqarmat sumiiffinni pissutsit pisariaqartitallu tunngavigalugit aaqqissuussinerit assigiinngiiaartumik aaqqissuunnissaannut atuarfiit maannakkutut periarfissaqartut.

§ 17 pillugu oqaatigineqarpoq ullut iinniartitsiviusut 240-t maannakkut 200-nut sanilliullugu annertooujussuartut isikkoqartut. Tamanna pillugu ASG-mit tusarniaanermut akissummut oqaaseqaatit taassuma assingi innersuussutigineqarput.

Ingerlaqqilluni § 17 pillugu oqaatigineqarpoq tassunga atatillugu ullut atuarfiusutut aamma taaneqartariaqanngitsut, tassa piffissaq soraarummeerfissaq aamma ilaammat, taannalu ilinniartitsiviunani. Tassunga oqaatigineqassaaq piffissaq soraarummeerfik ullunut ilinniartitsiviusunut aamma ilaatinneqartoq, taaguutillu allanngortinnissaa aamma pissusimisuunngitsoq.

§ 19 pillugu oqaatigineqarpoq tunngaviusumik ilinniarnermi tiimit amerlasusaat pillugit ilaat oqaaseqartut tamanna nanertuutaassasoq, tiimillu amerlanersaat ilinniarnermi tamarmi modulimi siullermiittut. Tamanna pillugu IMAK-imit tusarniaanermi akissummut oqaaseqaatit taassuma assingi aamma § 19-imut oqaaseqaatit innersuussutigineqarput.

Tunngaviusumik ilinnianermi ilinniartitsissutit pillugit § 20-mut oqaaseqaatit pillugit oqaatigineqarpoq qaffasissutsit B-t saniatigut aamma qaffasissutsit C-t oqaatigineqartariaqartut, aammalu Science ilinniartitsissutini tamani C-mik qaffasissuseqanngitsoq. Tamanna malillugu oqaaseqaatit aqqinneqarput.

Ilinniakkat sammiviini ilinniagaqarnermi ilinniartitsissutit pinngitsoorani peqataaffigisassat pillugit § 25 pillugu apeqqutigineqarpoq sooq inuiaqatigiit pillugit ilinniartitsissutit qaffasissuseq C-tut ilanngunneqassanersut, tassa oqaatigineqarluni ilinniartitsissutit allarpasuit taamatut pisinnaasaqalernermut tarpersiisinnaasut, ilinniakkallu sammiviinik aamma annertunerusumik killilersuissasut. Tassunga oqaatigineqassaaq ilinniartitsissutit suut pinngitsoorani malittaavigineqarnissaannik apeqqut pillugu rektoreqatigiit tamarmiusut tamanna pillugu sukumiisumik oqallinnerat aalajangiinerallu tunngavigalugu aalajangerneqartoq. Tamanna tunngavigiinnarlugu aalajangersakkap allanngortinneqarnissaa Naalakkersuisut naleqquttutut isiginngilaat.

Ilinniartitsissutit toqqarneqarsinnaasut pillugit § 26 pillugu apeqqutigineqarpoq matematiki sooq imm. 2-mi aalajangersagaq assigissannginneraa, tassa oqaatigineqarluni ilinniarnerp ingelateqqinneranut atatillugu taamatut annertutigisumik aamma pisariaqartitsisoqartoq. Tassunga oqaatigineqassaaq ilinniartitsissutit suut qaffasissuserni sorlorniittut ilinnianertuunngorniarni ilinniartitsissutit toqqarneqarsinnaasutut neqeroorutigineqarsinnaanerat pillugu apeqqut rektoreqatigiit tamarmiusut tamanna pillugu sukumiisumik oqallinnerat aalajangiinerallu tunngavigalugu aalajangerneqartoq. Tamanna tunngavigiinnarlugu aalajangersakkap allanngortinneqarnissaa Naalakkersuisut naleqquttutut isiginngilaat.

Ilinniakkat sammivii neqeroorutigineqartut pillugit § 28, imm. 3-4 pillugit apeqqutigineqarpoq ilinniakkap sammivia qaqugukkut ataasiunersoq, tamannalu pillugu kina

aalajangiissanersoq. Tassunga oqaatigineqassaaq ilinniarnertuunngorniarfiit siummersuummi § 29, imm. 1 malillugu Naalakkersuisut ukiut tamaasa nalunaarfigisassagaat ilinniakkat sammavii sorliit neqeroorutiginiissaat kissaatiginerlugu. Siunnersuummi § 29, imm. 2-mi pisinnaatitsissut atorlugu ilinniarnertuunngorniarfiit ilinniakkat sammiviinik aalajangersimasunik neqerooruteqarnissaat immikkut tunngavissaqartillugu Naalakkersuisut itigartitsissutigisinnaavaat. § 29, imm. 3-mi pisinnaatitsissut atorlugu ilinniarnertuunngorniarfiit ilinniakkat sammiviinik pilersitsinissaannut Naalakkersuisut malittarisassanik sinaakkutinillu aamma aalajangersaasinnaapput. Ilimagineqarpoq ilinniarnertuunngorniarfiit ilinniakkat sammiviinik aalajangersimasunik pilersitsinissaannik Naalakkersuisut peqqusissasut, Naalakkersuisullu aamma ilinniakkap sammivia akuersissutigisinnaavaat, ilinniakkamut sammivimmut allami taaguut assigalugu pilersinneqarnissaa piumasqaatigalugu. Tamanna siunnersuummi uani oqaaseqaatini erseqqissarneqarpoq.

Ilinniartitsinermi oqaasilerinermi oqariaatsit ataatsimoorussat atorneqarnissaat pillugu § 31, imm. 2 pillugu apeqqutigineqarpoq ilinniartitsissutit akornanni ataatsimut oqariaatsineq atuinissaq anguniarnaqassannginnersoq, tassa oqaatigineqarluni tassani taamaallaat oqaasilerineq ilanngunneqassanngitsoq, kisiannili aamma assersuutigalugu oqariaatsit nalinginnaasut, soorlu nalilersuineq, nassuiaat, oqallineq aammalu pinngortitanik ilisimatusarnermi oqariaatsit. Tamanna pillugu IMAK-imit tusarniaanermi akissummut oqaaseqaatit taassuma assingi innersuussutigineqarput.

Ungasianiit ilinniartitsinermit nalunaarsimagaluarluni aammalu nunani allani ilinniartitsinermi peqataanninnerup kingunissai pillugit § 35, imm. 2 aamma § 36, imm. 2 pillugit apeqqutigineqarpoq ilinniartup kukkussutigippagu imaluunniit pineqartoq kukkusumik toqqaasimappat kinguneqartinneqassanersoq. Tassunga oqaatigineqassaaq aalajangersakkat taaneqartut taamaallaat takutitsisut pingaartutut isigineqartoq inuusuttup allamik aaqqiissuteqarnissaanik sapinngisamik ikiuiniartoqassasoq. Aammattaaq nalunaarfigisap piviusunngortinnginneranut pissutsit amerlasinnaapput, tassunga ilanngullugit pissutsit inuusuttup nammineq pisuussutiginnngisai.

Inaarutaasumik nalilersuineq pillugu § 46 pillugu oqaatigineqarpoq misilitsinnerit amerlassusaat inatsimmi aalajangersarneqartariaqartut. Tamanna pillugu ASG-mit tusarniaanermi akissummut oqaaseqaatit taassuma assingi innersuussutigineqarput.

Misilitsinnerit sorliit ilinniarnertuunngorniarluni soraarummeernermi ilaassanersut pillugit § 47 pillugu apeqqutigineqarpoq soq ilinniarnermi periutsini, kulturimik ilinniartitsissutini misilitsittoqassanersoq sciencemilu misilitsittoqassanani. Tamanna pillugu oqaatigineqarpoq ilinniartut ilinniartitsissuummi tunngaviusumik ilinniarnep ilarujuusua atortaraat, pinngortitamillu ilisimatusarnermi ilinniartitsisutit sisamat ilaat toqqaraanni misilitsinnissaq peerneqarsinaavoq, soorlu qaffasissutsimiit ilinniartitsissuummut allamut nuukkaanni ullumikkut taamatut pisoqartartoq. Tassunga oqaatigineqassaaq ilinniarnermi periutsini

aamma misilitsittoqassanngitsoq, taamaammallu aalajangersagaq tamanna tunngavigalugu aaqinneqarluni. Aammattaaq oqaatigineqassaaq science taamaallaat tunngaviummik ilinniarnermi ilisarititsissutitut ilinniartitsissutaasoq ilinniartitsisutini ataasiakkaani tunngaviumni qaffasissuseq B-ni biologimi, nunalerinermi, fysikimi kemimilu sulinermut tunngaviumsoq.

Ilinniartut ataasiakkaat ilinniartitsissutini sorlarni misilitsinnissaasa aalajangernissaa pillugu § 47, imm. 3 pillugu apequtigineqarpoq ilinniartitsissutini misilitsinnissaq atuarfinnut pingaartumillu ilinniartunut qaqugukkut nalunaarutigineqartassanersoq, apequtigineqarporlu piffisaliisoqarsinnaannginneroq, tassa oqaatigineqarluni ulloq ilinniartitsiviumsoq kingulleq soraarummeernissamut pilersaarummik ullumikkut nalunaaruteqarfiusartoq. Tassunga oqaatigineqassaaq pissutsit taakku soraarummeertarneq pillugu nalunaarummi siunnersuummi § 50-imi pisinnaatitsissut atorlugu suliarineqartussami aalajangerneqarnissaat ilimagineqartoq.

Soraarummeernermit uppersaasat pillugu § 49, imm. 3 pillugu apequtigineqarpoq allaqqassannginneroq ”assigiinngitsunik naleqartillugit ilanngunneqarsinnaasut”, tassa oqaatigineqarluni karakterit amerlanersaat assigiimmik naleqartut. Tamanna eqqorpoq, taamaammallu aalajangersagaq siunnersuummi uani tamanna naapertorlugu oqaasertalerneqarpoq.

Inunnik ilinniartitsinermi pisinnaasaqanngitsunik piffissami killilimmi atorfinitsitsisarneq pillugu § 58, imm. 5 pillugu oqaatigineqarpoq piffissaq killilik inatsisip oqaasertaani nassuiarneqartariaqartoq, tassa oqaatigineqarluni rektori ullumikkut ukiumut ataatsimut pisinnaasanik akuersisartuumsoq. Inatsimmi piffissamik killilimmik aalajangersaanissaq Naalakkersuisut naapertuuttut isiginngilaat. Siunnersuummi § 58, imm. 6-imi pisinnaatitsissut atorlugu ilimagineqarpoq ilinniartitsinermi pisinnaasat pillugit nalunaarusiortoqassasoq, tassani aamma piffissami killilimmi atorfinitsitsisarnerit aamma ilinniartitsinermi atorfiit pillugit malitarsissat ilaassallutik.

§ 58, imm. 5 pillugu aamma oqaatigineqarpoq ilinniartitsisutut atorfiit ullumikkut qallunaatut allatut isumaqartut, tassa kandidatitut soraarummeernerup kingorna atorfik, tassani perorsaanermik ilinniartoqartarluni, aammalu oqaaseqaatini ersittoq universitetini ilinniartut ilinniarnermik naamassinnilersut pineqartut aammalu tiiminik ikilisaaffigineqarnikkut atuarfimmitt tapersiiffigineqarsinnaasut. Tassunga uiggiullugu oqaatigineqarpoq ilinniartitsinermi atorfik atornagu oqaaseq alla immaqa atorneqarsinnaasoq. Naalakkersuisut isumaqarput taaguut ilinniartitsisutut atorfik naleqqunnerpaajusoq, oqaatigineqartutullu tamassumunnga atatillugu tamanna qanoq paasineqassanersoq oqaaseqaatini allaqqavoq. Taaguutip allannortinnissaa Naalakkersuisut naleqquttut isiginngilaat.

Perorsaanermik ilinnianermut atatillugu pikkorissarnermi misilitsinnernut akisussaneq pillugu § 59, imm. 4 pillugu oqaatigineqarpoq perorsaanermik ilinniarnermut atatillugu

ilinniartitsissutitut ilassutit maannamut atorneqartartut tamannalu Danmarkimi atorunnaaqinnikuusoq. Ilinniartitaanermut Aqutsiveqarfimmit tusarniaanermi akissummi aamma taamatutut oqaaseqartoqarpoq. Taassuma kinguneranik siunnersuummi uani tamanna malillugu aalajangersagaq allanngortinneqarpoq.

Ilisimatusarneq tunngavigalugu ilinniaqqinnissamut neqeroorutini peqataasarneq pillugu § 61 aamma § 64 pillugit apeqqutigineqarpoq tamanna pisariaarussimannginnersoq, tassa oqaatigineqarluni ilinniaqqinnerit tamarmik ilisimatusarnermik tunngaveqarsorinartut, taamaammallu marloqiusamik oqaasertaalluni. Aammattaq oqaatigineqarpoq ilinniaqqinnissamik neqeroorutitut atatillugu aqqissuussamik pilersaaruteqartoqarnissaa aamma pissusissamisussasoq taamaalilluni annikitsuinnarnik iliuuseqartoqassanani. Tassunga oqaatigineqassaaq ilinniaqqinnissamik neqeroorutit ilisimatusarnermik tunngaveqarnissaasa aalajangersarnissaa pissusissamisoortutut isigineqartoq, tamanna aqqutigalugu atuagarsornerit periutsillu akuerisaasut tunngavigalugit neqeroorutini ilinniakkat qaffasissumik qaffasissuseqartuuniissaat qulakkeerseqassalluni. Aqqissuussamik pilersaaruteqarnissamik kissaateqarneq eqqarsaatigalugu ASG-mit tusarniaanermi akissummut oqaaseqaat taassuma assinga rektorip aqutsinermi pisinnaasaanut pissusissamisoortumik ilaasutut isigineqarpoq.

Rektorip akisussaaffii pillugit § 62, imm. 2 pillugu apeqqutigineqarpoq rektorip akisussaaffii annertusarneqartariaqannginnersut, tassa piffissaq aningaasaqarnermut, illunut, ilinniartut inaannut, kantimut nakkutilliinermullu atorneqartarmat. Tassunga oqaatigineqassaaq rektorip akisussaaffiini pissutsit uani taaneqartut isumaqatigiissuteqarnermut ilaasutut isigineqartut.

Ilinniarnermi takusassiornerit, paasisassarsiorluni angalanerit il.il. pillugit § 72, imm. 3 pillugu apeqqutigineqarpoq ilinniartunut akiliinngitsunut iliuutsit suut periarfissaanersut, apeqqutigineqarporlu taamaattoqanngippat ilinniartut sooq akiliissanersut. Tassunga oqaatigineqassaaq ilinniarnermi takusassarssiornerit, paasisassarsiorluni angalanerit il.il. uani pineqartut, tassani peqataasut akiliutaat annikingaatsiarluni, taamaammallu ilinniartut tamarmik peqataanissaat piunasaqaataasariaqarluni, taamaammallu aqqissuussinerit taamaattut takkuttussaatitaaneq pillugu malittarisassanut ilaasut. Peqataaneq takkuttussaatitaaneq pillugu malittarisassanut ilaammat, peqataasut peqataanermi akiliinngitsut peqataaqqunnginneqarsinnaanngillat. Peqataasut amerlasuut peqataanermut akiliinianngippata aqqissuussineq piviusunngortinneqarsinnaagunangilaq, taamaammallu aqqissuussinerit pilersinneri ingerlanneqarnerilu amerlanerpaat akiliinissaannik ilimagisaqarnermik tunngaveqarput, ullumikkullu taamatut pisoqartarpoq.

Ilinniartut ilinniarnermi atortunik pisisarnerat pillugu § 72, imm. 6 pillugu oqaatigineqarpoq akiliinermut malittarisassiorortoqarnissaanik inatsimmi piunasaqartoqarneratut isikkoqartoq. Ingerlaqqilluni oqaatigineqarpoq ilinniartut namminneq regnemaskinanik, ordboginik, mappinik pappiaqqinillu kisiannili ilinniarnermi atortutut isigineqartunik pisinissaat atuarfiup piunasaqaatigisaraa. Tassunga oqaatigineqassaaq § 72, imm. 1-imi aallaaviummik

aalajangersarneqartoq ilinniarnermi atortut ilinniarnermut pisariaqartut ilinniartut akiliisinnagit atuarfiup atugassanngortissagai. Imm. 6-imut innersuussuteqarnikkut oqaatigineqarpoq ilinniartut ilinniarnermi atortunik namminneq killilimmik pissarsinissaat pillugu Naalakkersuisut malittarisassiorsinnaasut, tamannalu taamaalilluni malittarisassamik pingaarnermik atuinnginnertut isigisariaqarpoq. Naalakkersuisut taamaaliornissaannik pisussaaffilerneqanngillat, kisiannili taamatut malittarisassiortoqanngippat ilinniarnermi atortunik tamanik atuarfiup akiliinissaa ilinniartut piumasarisinnaavaat.

GU-Aasiaat naggasiullugu naqinnerliukkat uparuarpai, taakkulu siunnersuummi uani iluarsineqarput.

GU-Nuuk:

Aallaqqaasiullugu oqaatigineqarpoq siunnersuut GU-Nuummi ilinniartitsisoqatigiinnut oqaaseqarfigisassanngorlugu nassiunneqarnikoq, oqaaseqaatillu marluk atuarfiup tusarniaanermi akissutaanut ilanngunneqartut tiguneqarnikut. Aammattaaq oqaatigineqarpoq tusarniaanermi atortut kingusissorujussuakkut nassiunneqartut, tamassumalu kinguneranik tusarniaanermi piffissaq killigititaq naatsuusoq, tamannalu piffissami soraarummeerfiusumi ulapaarfiusorujussuami pisoq, tamannalu aqutsisoqatigiit ikitsuinnarnik oqaaseqaateqarnerannut pissutaannguatsiartoq. Tassunga oqaatigineqassaaq nutserineq pissutigalugu tusarniaanermi atortut siusinnerusukku nassiunneqarsinnaasimanngitsut. Tusarniaanermi piffissaliussaq sapaatit akunneri tallimaapput, tamannalu tusarniaanermi nalinginnarmik piffissaliunneqartarpoq.

Oqaatigineqarpoq ilinniartitsineranut takkuttussaataaneq inatsimmi aalajangersarneqartariaqartoq. Tassunga oqaatigineqassaaq siunnersuummi § 54, imm. 1-imi aalajangersarneqartoq ilinniartut takkuttussaataasut ilinniartitsineramilu peqataavinnissamut pisussaaffeqartut.

Ilinniarnermi siunertat pingaarnert pillugit § 1 pillugu oqaatigineqarpoq ilinniarneq nalinginnaasumik peroriartuutaasumik ilinniarnerusoq siunertami amigaataasutut isikkoqartoq. Tassunga oqaatigineqassaaq § 1, imm. 1-imi allaqqasoq ilinniarnertuunngorniartfinni ilinniarneq ilinniagaqarnissamut piareersaataasooq nalinginnaasumillu peroriartuutaasumik ilinniarnerusoq.

Ilinniarneq nalinginnarmik peroriartuutaasumik siunertaa pillugu § 3 pillugu oqaatigineqarpoq ilinniartut timikkut pisinnaasaat amigaataasutut isikkoqartoq. Suna uani innersuussutigineqarnersoq sunalu tunngavilersuutaanersoq erseqqarissutut isikkoqanngilaq. Aalajangersakkalli oqaasertaata allanngortinnissaanut tunngavissaqanngitsoq Naalakkersuisut isumaqarput.

Ilinniartunngortarneq pillugu § 7 pillugu oqaatigineqarpoq ilinniakkap ammaneranut aalajangiiffinnissaanut piffissaq qinnuteqarfissaq immaqa naleqqutinngitsoq, tassa

qinnuteqartut ilinniarnep aallartinnerani kommunimi najugaqartut uppersaasinnaasut atuarfiup aamma ilinniartunngortikkusuttarmagit. Tassunga oqaatigineqassaaq § 7, imm. 1-mi immikkoortut aappaat innersuussutigalugu oqaatigineqartoq inuit piffissami qinnuteqarfiusumi Kalaallit Nunaanni aalajangersimasumik najugaqanngitsut ilinniartunngorsinnaasut, siusinnerusukut Kalaallit Nunaanni najugaqarsimagunik, Kalaallillu Nunaata avataani najugaqarnerat pilersuermik pissuteqarluni kalaallillu oqartussaasat tassani peqataanikuullutik imaluunniit ilinniagaqarnermi pissutsit pissutaallutik.

Ilinniartunngorsinnaanermut piumasaqaatit pillugit § 8 pillugu oqaatigineqarpoq karakteri E appasippallaartut isikkoqartoq, siunnersuutigineqarporlu karakteri D soraarummeernermi killiffimmilu karakterit ilinniartunngornissami piumasaqaataassasooq, E-millu karakterillit (appasinnerunngitsumik) 0-klassimi piareersarnermut klassitut assingusutut GU-nit tamanit pilersinneqartunut ilinniartunngornissamut qinnuteqarsinnaasut. Tassunga oqaatigineqassaaq E-p piumasaqaataanissaata toqqarneqarnerani ilinniartut meeqqat atuarfianni naammaginatsumik angusaqarlutik naammassit, tamassumunngalu karakteri E takussutissaavoq, ilinniarnertuunngorniarfimmil ilinniarnermi nangitsinissaannut periarfissinneqariaqartut, ilimagineqartariaqarporlu ilisimasat annertussusaasat naammattoq, ilinniartitsissutini tamani naammaginatsumik angusaqarpata.

§ 8, imm. 3-mi kukkusumik innersuussuteqartoqarnera uparuarneqarpoq, taannalu siunnersuummi uani iluarsineqarpoq.

Ilinniartunngornissamut misilitsinneq pillugu § 9 pillugu oqaatigineqarpoq ilinniartunngornissamut misilitsinneq kinaassusersiunnginnissamik tunngaviusunut akerliusutut isikkoqartoq, isumassarsiarlu atuarfiup isumaqatiginngikkaa. Nangilluni oqaatigineqarpoq tamanna akisoorujussuannorsinnaasooq, pingaartumik Danmakimisut atuarfiit ataasiakkaat ilinniartunngornissamut misilitsinnermik suliaqarpata atuarfiullu ilinniartitsisui misissuippata nalilersuillutillu. Tassunga uiggiullugu oqaatigineqarpoq ilinniartunngornissamut misilitsittoqartassappat kinaassusersiorneq assigiinngiaartumillu ilinniartunngornermi qaffasissusiliisoqarnissaa pinngitsoorneqassappata tamanna qitiusumiit ingerlanneqartariaqartoq, qitiusumiit suliarineqarluni qitiusumiillu nalilersuisoqarluni. Tamanna pillugu GU-Aasiaat tusarniaanermi akissutaannut oqaaseqaat taassuma assinga innersuussutigineqarpoq.

Ilinniarunnaarallarnep kingorna ilinniarnermik nangitseqqittarneq pillugu § 10 pillugu oqaatigineqarpoq rektorimit immikkut akuerineqarsinnaaneq ilanngullugu ilinniarnermik unitsitsigallarneq ukioq ataasiinnaasariaqartoq. Siunnersuut annertunerusumik tunngavilersorneqanngilaq, Naalakkersuisullu suli isumaqarput piffissami ukiut marluk angullugit rektorimut isumaqatigiissuteqareerluni unitsitsigallarneq imatut sivikitsigisoq ilinniarnermik nangitseqqinnissamut ilinniakkamut ilinniartup suli pisariaqartumik atassuteqarnissaa suli ilimagineqartariaqartoq.

Ilinniarnertuunngorniarfinni teknikimik niuernermilluunniit sammivinnik neqerooruteqartuni ilinniartunngortarnek pillugu § 11, imm. 3 pillugu oqaatigineqarpoq imm. 4 ilanngussimatillugu pisariaqanngitsutut isikkoqartoq. Tassunga oqaatigineqassaaq aalajangersakkamut tunngavilersuutitut allaqqasuni atuutitinnginnissap ilanngunneqarnissaa pissusissamisoortuusooq oqaaseqaatini allaqqasooq. Imm. 4 taamaallaat pisinnaatitsineq pillugu aalajangersagaavoq, ilinniarnertuunngorniarfinni ilinniakkami aalaajangersimasumik sammivimmik neqerooruteqartuni ilinniartunngortarnek pillugu malittarisassiornissamik periarfissiisoq.

Tunngaviusumik ilinniarneq pillugu § 18 pillugu oqaatigineqarpoq oqaatsip ”paasisaqartillugillu” oqaatsimi imatut aallartittumi ”Tunngaviusumik ilinniakkap ilinniartut ilinniagassanut tunngatillugu ilisimaqalersissavai paasisaqartillugillu” atorneqarnera paasiuminaatsuusooq. Paasisaqartillugillu ilinniakkamik paasinninnermut tunngatillugu isigineqassaaq, taamaammallu nalinginnaasumik paasinninneq malillugu ilinniakkamik paasinninnertut paasineqassalluni. Tamanna aalajangersakkamut oqaaseqaatini erseqqissarneqarpoq.

Ilinniakkatigut sammivinni ilinniarnermi ilinniakkat tamanit malinnaavigineqartussat pillugit § 25 pillugu apeqqutigineqarpoq soq timersorneq aamma nipilersorneq/assilialiorluni eqqumiitsuliorneq ilaatinneqannginersut. Tassunga oqaatigineqassaaq timersorneq aamma nipilersorneq/assilialiorluni eqqumiitsuliorneq ilinniakkatigut sammivini tamani ilaanissaat ilimagineqanngitsooq. Aammattaaq GU-Aasiaat tusarniaanermi § 25 pillugu akissutaa pillugu oqaaseqaatini oqaaseqarfigineqarpoq.

Apeqqutigineqarpoq soq tuluttut A ilinniarnertuunngorniarfinni tamani neqeroorutigineqassanersoq, tassani oqaatigineqarluni tuluttut B-p ilanngunneqarnera paasinarpoq, kisiannili tuluttut A universitetini amma business-schoolsini tuluttut ilinniartitsissutit ikitsuinnaat eqqaassanngikkaanni ilinniarfinni allani piumasaqaataanngitsooq. Tamanna pillugu GU-Aasiaat tusarniaanermi § 26-mut akissutaa pillugu oqaaseqaat innersuussutigineqarpoq.

Ilinniarnertuunngorniarfinni sorlarni ilinniartut ilinniartunngorsinnaanerak pillugu § 28, imm. 4 pillugu oqaatigineqarpoq oqaasertaliussaq isumaqanngitsooq paasiuminaallunilu. Aalajangersagaq siunnersuummi uani erseqqissarniarneqarpoq.

Ilinniartitsinerup aaqqissuunneqarnera pillugu § 37, imm. 1 normu 2 pillugu apeqqutigineqarpoq suleriaatsit qanoq ililluni siuariartorfiutinneqarsinnaanersut, tassa oqaatigineqarluni suleriaatsit allanngorartuunissaat ajunngitsooq taamaaginnartariaqartorlu. Aalajangersakkamut oqaaseqaatini nassuiarneqarpoq suleriaatsit qanoq siuariartorfiunissaat qanoq tunngavilersorneqarnerasoq.

Ilinniartitsisoqatigiit pillugit § 38 pillugu oqaatigineqarpoq akisoorujussuussasoq atuarfimmullu aningaasarpassuarnik pisariaqartitsiviussalluni. Tassunga oqaatigineqassaaq ilinniartitsisoqatigiit pilersinneranni aningaasartuutit missingersuusiorfigineqartut, siunnersuutillu aningaasatigut allaffissornikkullu kingunissaasa allaaserineranni tamanna nassuiarneqartoq.

Ilinniartut innarluutillit ilinniartitsissummi timersornermi peqataanginnissamik akuerineqartarnerat pillugu § 42, imm. 3 pillugu oqaatigineqarpoq ilinniartuq ilinniartitsissummik toqqagassamik tassunga taarsiullugu toqqaassanngitsoq, ilinniartorli ilinniartitsissutip atuagarsornertaani pissarsiaqarniarluni ilinniartitsinermi peqataanani malinnaassasoq. Tassunga oqaatigineqassaaq ilinniartup ilinniartitsinermi peqataanani malinnaanissaa Naalakkersuisut naammaginangitsutut isigigaat, taamaammallu aalajangersagaq allanngortinneqanngilaq.

Ilinniarnertuunngorniarluni misilitsitarneq pillugu § 46, imm. 1 pillugu oqaatigineqarpoq aalaangersagaq imatut oqaasertaqartariaqartoq: "...oqaluttariarsorluni aamma/imaluunniit allattariarsorluni misilitsinnerit arlaqartut". Tassunga oqaatigineqassaaq inatsisiliornermi teknikimi najoqqutassiat malillugit uingasumik titarniliineq atorneqarsinnaanngitsoq, tassa tamanna nalorninermik kinguneqarsinnaammat. Naalakkersuisut aammattaq isumaqarput oqaasertaata allanngortinnissaa tunngavissaqanngitsoq.

§ 46 pillugu aammattaq oqaatigineqarpoq "ilinniarnermi suliassat" tassunga taarsiullugu taaneqartariaqartut "ilinniarnermi suliniutit". Tamanna tunngavilersorluagaasutut isikkoqarpoq, taamaammallu siunnersuummi uani allanngortinneqarluni.

Ilinniarnertuunngorniarluni soraarummeernermi misilitsinnerit suut ilaassanersut pillugit § 47, imm. 1 pillugu oqaatigineqarpoq oqaasertaata siulliup uniffiup kingorna tamarmik pisariaqanngitsut, tassa oqaaseqatigiinni "-sinnaavoq" allaqqareermat, aammalu ilinniartitsissummi timersornermi soraarummeertoqarsinnaanera akuerineqareermat. Naalakkersuisut tamanna isumaqatiginngilaat, tassa ilinniartitsissutit suut soraarummeernermi ilaasinnaanersut taaneqarnissaat pisariaqartut isigineqarmat. Taamaammat aalajangersagaq allanngortinneqanngilaq.

Siunnersuutigineqarpoq ilinniartup klassimut tullermut nuussinnaanerata akuerineqannginnissaa pillugu § 53, imm. 1 allatut oqaasertalerneqassasoq, tassa oqaaseqatigiit imatut oqaasertaqassallutik: "...semesteri imaluunniit ilinniarnernup maannamut ingerlanera...", tassa oqaatigineqarluni ilinniartut 1.g-miit aamma 2.g-miit taakkununnga atasunik karaktereqarpata tamanna aamma atuuttoq. Tamanna tunngavilersorluagaammat siunnersuummi uani taanna malillugu allannguisoqarpoq.

§ 54, imm. 2-mi allannerlugaq uparuarneqarpoq, taannalu siunnersuummi uani aaqinneqarpoq.

Ilinniartitsisut suliassaat pillugit § 56 pillugu oqaatigineqarpoq oqaaseqatigiit ”akaarinninnermik” kingorna naasariaqartoq, tassa assersuutigalugu ilanngunneqarsinnaammata ”upperisarsiornikkut, suaassutsikkut allarpassuatigullu”. Tamanna annertunerusumik tunngavilersorneqanngilaq, tusarniaaffigisallu allat tassunga assingusunik oqaaseqaateqanngimmata aamma oqaasertalersuinerup allanngortinneqarnissaa Naalakkersuisut tunngavissaqartinngimmassuk aalajangersagaq allanngortinnagu ingerlatiinnarneqarpoq.

Ilinniartitsinermi pisinnaasat pillugit Naalakkersuisut annertunerusunik malittarisassiorsinnaanerannik pisinnaatitsissut pillugu § 58, imm. 6 pillugu oqaatigineqarpoq naggataa imatut oqaasertalerneqartariaqartoq: ”piffissami killilimmi atorfinitsitsinerit aamma ilinniartitsisutut atorfiit pillugit”. Aammattaaq oqaatigineqarpoq kikkut ilinniartitsisinnaanerisa killeqartinnginnissaat mianersuutigineqartariaqartoq, erseqqissarneqartariaqartorlu ukiut pingasut kingorna ilinniartut ilinniarnermi pisinnaasaqalersinniarlugit qaffasissuseq aalajangersimasuussasoq. Tassunga oqaatigineqassaaq nutaamik oqaasertalersuinissamut siunnersuut tunngavilersorluagaasutut isikkoqartoq, taamaammallu siunnersuummi uani tamanna malillugu allannguisoqarpoq. Aalajangersagaq pillugu oqaaseqaatit sinneri ilinniartitsinermi pisinnaasat pillugit nalunaarutip suliarineqarnerani ilanngunneqassapput.

Perorsaanermik ilinniarnissap kinguartinneqarnissaanik rektorip akuersinissamut periarfissaa pillugu § 59, imm. 3 immikkoortut aappaat pillugu oqaatigineqarpoq inuttut pissutsit saniatigit kinguartitsinermut allat pissutaasinnaasut, tassunga ilanngullugu atuarfiup ingerlalluarnissaa. Tassunga uiggiullugu oqaatigineqarpoq assersuutigalugu atuarfimmu GR-Nuuttut ittumut ilinniartitsisut pingasunit amerlanerusut semesterimi ataatsimi perorsaanermik ilinniartinneqarnissaat ajornarsinnaasoq. Nangilluni oqaatigineqarpoq allaaserineqartariaqartoq ilinniartitsisut suliame pisinnaasallit kisimik (kandidatitut soraarummeersimasut) perorsaanermik ilinniarsinnaanersut, tassa oqaatigineqarluni tamanna qaammammut 2000 kroninik akissarsiaqartitsiviusartoq. Tassunga oqaatigineqassaaq § 59, imm. 3 immikkoortut aappaanni aalajangersagaq siunnersuummi uani siunnersuutigineqartoq malillugu allanngortinneqartoq. § 59, imm. 1-imut oqaaseqaatini allaqqareerpoq ilinniartitsisut suliame pisinnaasallit kisimik perorsaanermik ilinniarsinnaasut.

Soraarummeernermit uppersaasiortoqartarnera pillugu § 60 pillugu oqaatigineqarpoq uppersaasiortoq tassaasariortoq rektori. Tamanna annertunerusumik tunngavilersorneqanngilaq, tusarniaaffigisallu allat tassunga oqaaseqaateqanngillat. Naalakkersuisut (piviusuni Ilinniartitaanermut Ilisimatusarnermullu Naalakkersuisoqarfiup) uppersaasiortarnissaa Naalakkersuisut suli pissusissamisoortutut isigaat.

Ilinniartitsisut ilisimatusarneq tunngavigalugu ilinniaqqinnermi peqataanissamut pisinnaatitaaffeqarnerat pisussaaffeqarnerallu pillugu § 61 pillugu oqaatigineqarpoq

ilinniartitsisut peqataanissamut pisinnaatitaaffeqarpata akisoorujussuussasoq, tassa oqaatigineqarluni pisinnaatitaaffigamikku killeqanngitsumik aalajangiisinnaasut. Oqaatigineqarpoq isummat tassunga assingusut rektorip ilisimatusarneq tunngavigalugu ilinniaqqinnermi peqataanissamut pisinnaatitaaffeqarnera pisussaaffeqarneralu pillugu § 64-imut aamma atuuttut. Tassunga oqaatigineqassaaq pisinnaatitaaffeqarneq pisussaaffeqarnerlu kisimik aalajangersakkani aalajangersarneqartut, kisiannili ilinniaqqinnerit qanoq annertutigissanersut aalajangersarneqarani.

Ilinniartitsisut siunnersuisoqatigiivi pillugit § 65 pillugu apeqqutigineqarpoq tamanna demokratiussanersoq ilinniartitsisut immikkoortuinit sinniisuffigineqartoq. ASG-ip tusarniaanermi akissutaanut oqaaseqaat taassunga assingisoq innersuussutigineqarpoq.

Peqataasut akiliutaat pillugu § 72 pillugu apeqqutigineqarpoq, tamanna imatut paasineqassanersoq ilinniartut namminneq PC-mik angallattakkamik ilinniartitsinermut nassarnissaat ilinniarnertuunngorniarfiit piunasaqaatigisinnaanngikkaat/ilimagisinnaanngikkaat. Tassunga oqaatigineqassaaq angallattagaq ilinniartitsinermi atortutut isigineqanngitsoq, tamannalu aalajangersakkamut oqaaseqaatini erseqqissarneqarpoq.

GU-Nuuk naggasiullugu oqaatigaa atuarfik ilinniartitsisoqarniarnerminik ajornartorsiulersinnaasooq ilinniartitsissuteqarpat taamaallaat tunngaviusumik ilinniarnermi imaluunniit ilinniagaqarnermi sammivimmi ilinniartitsiviusunik, assersuutigalugu nipilersornermik ilinniartitsisut allanik pisinnaasaqanngitsut. Tassunga oqaatigineqassaaq tamanna ilinniarnertuunngorniarfinni ataasiakkaani pilersaarusiornermut tunngasutut isigineqartoq. Ilinniartitsisut naammattunik tiimeqarsinnaapput, ksiannili pisut ilaanni equngasumik suliaassanik agguaanermik kinguneqarsinnaalluni.

GU-Qaqortoq:

Aallaqqaasiullugu oqaatigineqarpoq ilinniartitsisut siunnersuisoqatigiivisa ulloq 15. juni oqallisereernerisigut oqaaseqaatit saqqummiunneqartut.

Oqaatigineqarpoq meeqqat atuarfiannit ilinniartunngornissamut piunasaqaat E eqqarsarnartoqartorujussuaq, tassa oqaatigineqarluni maannakkut periuseq qasukkarneqartoq. Ingerlaqqilluni oqaatigineqarpoq ilinniartut meeqqat atuarfinni naammassillutik misilitsinnerminni ilinniartitsissutini arlalinni E-mik karakterillit GU-mi soraarummeernermi angusinissamut ilinniakkani naammattumik qaffasissulimmik pisinnaasaqassanngitsut, aammalu karakterip E-p ilinniakkat qaffasissusaat ataatsimut isigalugu appartissagaat. Tassani GU-Nuup tusarniaanermi akissutaanut oqaaseqaat tassunga assingusoq innersuussutigineqarpoq.

Aammattaq oqaatigineqarpoq karakterimik E-mik piunasaqaatip ukiumi tullermi ukiup atuarfiusup pilersaarusiornissaa kinguartissagaa, allaffissornermi immikkoortortaqaqarfiup

aasami sulinnigiffeqarnermi feriarnissamut periarfissatuami sulisariaqarneranik kinguneqartussamik. Ingerlaqqilluni oqaatigineqarpoq ilinniartut ilinniartunngortitsinnagit meeqqat atuarfianni soraarummeernermi karakterit utaqqinissaat ukiup atuarfisup pilersaarusiornissaa eqqarsaatigalugu ajornartorsiutaasoq aammalu ilinniartitsisunik atorfinitsitsinissaq ukiumilu atuarfiusussami pilersaarusiornissaq eqqarsaatigalugit ajornartorsiutaasutut aamma isigineqartoq. Oqaatigineqarpoq atortut ajornartorsiutaaneri, soorlu ullumikkumut sanilliullugu ilinniartunik amerlanerusunik ilinniartunngortitsinermi init, amerlassusaat angissusaallu. Tamanna pillugu ASG-mit tusarniaanermi akissummut oqaaseqaat tassunga assingusoq innersuussutigineqarpoq. Ilanngullugu atortut ajornartorsiutaanerat pillugu oqaatigineqassaaq, atortut annertussusaat ilinniartunngortitsineq sioqqullugu aalajangerneqareersimassasut, aammalu inissanit amerlanerusunit ilinniartunik amerlanerusunik ilinniartunngortitsisoqarnavianngitsoq.

Ullut ilinniartitsivissat amerlassusaat pillugu § 17 pillugu oqaatigineqarpoq inissanit amerlanerusunik ilinniartunngortitsisoqarpat unnukkut tiimit atorneqartarnissaat pisariaqalersinnaasoq, piffissap ilaani ilinniartitsisunik amerlanernik atorfinitsitsinermik kinguneqartussamik. Tassunga oqaatigineqassaaq qulaani taaneqareersutut inissanit amerlanerusunit ilinniartunik amerlanerusunik ilinniartunngortitsisoqarnavianngitsoq.

Aammattaq oqaatigineqarpoq tunngaviusumik ilinniarnerp kingorna toqqaqqissinnaanermik periarfissalerlugu ilinniartut aallaqqaataaniit ilinniagaqarnermi sammivimmik toqqaanissaat Ilinniartitsisut Siunnersuisoqatigiivisa taperseraa, tassa aallaqqaataaniit klassini/atuaqatigiinni eqqortuni ilinniartut sapinngisamik inissinneqarnissaat pingaaruteqartutut isigineqarmat. Tassunga oqaatigineqassaaq ilinniartut toqqaanissaasa ilinniakkamilu sammivimmi naammassinissaasa tunngavilernissaa tunngaviusumik ilinniarnermi ilaatigut siunertaasoq. Ilinniartut ilinniarnertuunngorniarfinni teknikimik niuernermillu ilinniarnermik sammiveqartunik neqerooruteqartuni ilinniartunngornissamut kissaateqartut pillugit aallaaviup taassuma tunngavilersuutinik annertunerusunik allaaserisaqartuni atuutinngilaq. Aammattaq ilimagineqarpoq ilinniarnertuunngorniarfiit tamarmik ilinniartut amerlanerit ingerlaqqivigisassatut kissaataannik ilinniarnermi sammivinnik aalajangersimasunik neqerooruteqassasut, taamaammallu ilinniartut amerlanersaat ilinniakkami sammivimmik toqqaareerunik ilinniarnertuunngorniarfimmi ilinniartunngorfigisamiiginnassasut aamma ilimagineqarpoq.

Ingerlaqqilluni oqaatigineqarpoq tuluttut pisinnaasat eqqarsarnartoqartinneqartut, pingaartumik ilinniartunngornissamut qaffasissuseq E eqqarsaatigalugu, tassa ilinniartut GU-mi aallartikkaangamik oqaatsimik akuttunngitsumik ilinniagaqarsimaneq ajormata. Naalackersuisut isumaqarput tamanna piumasagaatit allanngortinnerannik kinguneqartariaqanngitsoq, kisiannili qaffasissuseq tamanut tunngasumik qaffatsinnissaa siunertaralugu meeqqat atuarfianni annertunerusunik suliniuteqartoqartariaqartoq.

Aammattaaq oqaatigineqarpoq atuarfimmi mikisumi GU-Qaqortutut ittumi Ilinniartitsisut Siunnersoqatigiiffianni ilinniartitsisoqatigiit tamarmik ilaasortaanissaat pingaaruteqartutut isigineqartoq. Ilinniartitsisut siunnersoqatigiivisa qanoq katiterneqarnissaannik ilinniartitsisut aalajangiinissaat siunnersuummi uani periarfissinneqarpoq.

Aammattaaq oqaatigineqarpoq nipilersorneq aamma assilialiorluni eqqumiitsuliorneq - ilinniartitsissutit pilersitsiviusartut – tunngaviusumik ilinniarnermi ilaannginneri ajornartorsiutaasutut isigineqartoq. Tassunga oqaatigineqassaaq ilinniartitsissutit sorliit tunngaviusumik ilinniarnermi pinngitsoorani peqataaffiginissaat pillugu aalajangerneq rektoreqatigiit tamarmiusut tamanna pillugu sukumiisumik oqallisereernerisigut aalajangerneqartoq. Tamannaannaq pissutigalugu aalajangersakkap allangortinnissaa Naalakkersuisut pissusissamisoortutut isiginngilaat.

Aammattaaq oqaatigineqarpoq tiiminik atuinerup annertussusaa semesterit siullianni aappaannilu equngasorujussuusinnaaneri ajornartorsiutaasutut isigineqartoq. Tamanna pillugu IMAK-imit tusarniaarnermi akissummut oqaaseqaat taassuma assinga innersuussutigineqarpoq.

Nangilluni oqaatigineqarpoq ilinniartunngornissamut misilitsinneq ilinniartunngornissamut piunasaqaatit assigiinngitsuunissaat pinngitsooriarlugu qitiusumiit suliarineqartariaqartoq. Tamanna pillugu GU-Aasiannit tusarniaanermi akissummut oqaaseqaat taassuma assinga innersuussutigineqarpoq.

Aammattaaq oqaatigineqarpoq ilinniartitsissutit pingasut nutaat ilinniaqqinnissamik pisariaqartitsiviusorujussuit. Tassunga oqaatigineqassaaq tamanna aamma missingersuusiorfigineqartoq. Tamanna pillugu siunnersuutip aningaasatigut allaffissornikkullu kingunissai pillugit allaaserinninneq innersuussutigineqarpoq.

Aammattaaq oqaatigineqarpoq GU-mi ilinniartitsisut maannakkut pissutsit assigalugit (akissarsiaqarnermi pissutsit assigiinngitsut) Hhx-imi aamma tiimeqassappata ajornartorsiutaasutut isigineqartoq. Tassunga oqaatigineqassaaq akissarsiat atorfeqarnermilu pissutsit pillugit isumaqataassutaareersunut siunnersuummi akuliuttoqanngitsoq. Siunissami ilinniarnertuunngorniarfinni ilinniarneq taamaallaat ataasiussaaq, taamaammallu GU-mi aamma HHX-imi tiimeqartoqarnaviannigilaq.

Aammattaaq oqaatigineqarpoq GU-p aamma Hhx-ip kattunnissaat isumalitigineqartariaqartoq. Tassunga oqaatigineqassaaq GU-Qaqortup aamma Qaqortumi Hhx-ip kattunnissaattut tamanna paasineqartoq. Inatsisissatut siunnersuummi taamatut aalajangersaasoqanngilaq. Brancheskolit maannakkutut ilinniarnertuunngorniarfinni ilinniarnissamik neqerooruteqarnissaat inatsisissatut siunnersuummi periarfissinneqarpoq, taamaammallu kattunnissaq inatsisip pisariaqartilinnigilaa.

Hhx-Qaqortoq:

Kapitalit 1-imut aamma 7-imut tunngatillugu aallaqqaasiullugu apeqqutigineqarpoq ilinniarnertuungorniarniit pisortat sulisoqarfiattut namminersortutut brancheskolet ilagissaneraat, taakkunani ilinniarnertuunngorniarniit inatsisissatut siunnersuummi allaaseqartunit ilitsersuinissamut pisinnaatitaaffiit aamma atorfinitsitsinermut pisinnaatitaaffiit eqqarsaatigalugit malittarisassat allaanerusut atuullutik. Ilinniarnertuunngorniarniit sulit brancheskolenut immikkoortortaassappata sunik ajornartorsiutitaqarnissaat nangilluni nassuiarneqarput. Siunnersuummi uani erseqqissarneqarpoq branchskolet aammalumi ilinniarniit allat (sulisoqarfittut akuerisaasutut taaneqartartut) ilinniarnertuunngorniarniit ilinniarnissamik neqerooruteqarnissamik akuerineqarsinnaasut. Aammattaaq sulisoqarfinni akuerisaasuni rektori sinnerlugu kina suliaqassanersoq, atofinnitsitsisassanersoq soraarsitsisassanersorlu aammalu sulisoqarfinnut akuerisaasunut tunngatillugu Naalackersuisunut akisussaafeqarneq pillugu immikkut malittarisassiortoqarnikuuvoq. Taamaaliornikkut aqutsinermi malittarisassat ilinniarniit allanut atuuttut, tassunga ilanngullugit brancheskolet, isiginiarneqarnissaat tamanut tunngatillugu siunertaavoq.

Ilinniartunngornissamut misilitsinneq pillugu § 9 pillugu oqaatigineqarpoq misilitsinnermut sinaakkutit pillugit immaqa annertunerulaartumik aalajangersaasoqartariaqartoq. Taamaalilluni apeqqutigineqarpoq misilitsinneq qitiusumiit aaqqissuunneqassanersoq imaluunniit misiliutit ilinniarnertuunngorniarniit suliarineqassanersut. Nangilluni oqaatigineqarpoq ilinniartunngornissamut misilitsinnermi ilinniakkat immikkoortui allaaserineqarpata pitsaasuussasoq, tassa suliaqartut qitiusumiit aaqqissuunneqassanngippata, taamaalilluni ilinniarnertuunngorniarniit assigiinngitsut ilinniartunngornissamut misilitsinnermut assigiinngitsunik piumasaaqateqannginnissaat qulakkeerneqarniassamat. Tassunga oqaatigineqassaaq misiliutit qitiusumit suliarineqartarnissaat nalilersorneqartarnissaallu siunnersuummi uani ilanngunneqartoq.

§ 13-imi nerisaqarnermut aaqqissuussinerit pillugit oqaatigineqarpoq, Qaqortumi NI pissutsit maannakkut atuuttut atuutsillugit iliniartunut tamanut nerisaqarnermik aaqqissuussinerimik neqerooruteqarsinnaanngitsoq, tassa oqaatigineqarluni ilinniartut inaat taamatut sanaajunngitsut. Nangilluni oqaatigineqarpoq tamanut nerisaqarnermik aaqqissuussineq kantinamik sananermik pisariaqartitsiviussasoq, taamaammallu inatsisip atuutlerneraniit inatsimmi piumasaaqatit atuarfiup eqqortissinnaanngilai. Tassunga oqaatigineqassaaq nerisaqarnermi aaqqissuussinerimik aalajangersimasunik piumasaaqateqartoqanngitsoq. Taamaammatt ilinniarnertuunngorniarniit ataasiakkaat sumiiffinni pissutsit pisariaqartitallu malillugit aaqqissuussinerimik tulluurtumik namminneq aalajangersaasinnaapput. Naalackersuisut isumaqanngillat nerisaqarnermik aaqqissuussinerimik pilersitsinissamik ilinniartut inaasa qanoq pitsaatiginerat aaqqissuunneqarnerallu pingaaruteqartuusoq.

Ilinniakkami sammivimmi ilinniarniit naammassinerani ilinniakkamik qaffasissutsimik A-mik piumasaaqat pillugu § 24, imm. 2 pillugu oqaatigineqarpoq aaqqissuusseqqinnerup ingerlanneqarnerani tamarmi ilinniartitsisutini A-t minnerpaamik pingasut

eqqartorneqarnikuusut, tassa kalaallisut, qallunaatut ilinniartitsissullu ataaseq, ilinniartitsissutillu A-t marluk annikippallaatut isikkoqartut. Nangilluni oqaatigineqarpoq ilinniakkani sammiviit nangitsilluni ilinniarnernut tamanut ilinniartunnguutaasinnaangitsut pineqarpata tamanna nassuiarneqartariaqartoq assigiinngissusaalu nassuiarneqarlutik, taamaalilluni ilinniartitsissutit A-t marluinnaat atorlugit ilinniakkami sammivimmi sumiluunniit ilinniarnertuunngorsinnaaneq kukkusumik isumaqarfigineqannginniassamat. Aammattaaq oqaatigineqarpoq assersuutigalugu ilinniartitsissutit A-t marluinnaat atorlugit niuernermik ilinniakkami sammivinnik pilersaaruteqartoqanngitsoq. Tamanna pillugu Ilinniartitaanermut Aqutsisoqarfimmiit tusarniaanermi akissummut oqaaseqaat innersuussutigineqarpoq. Aammattaaq Kalaallit Nunaanni Sulisitsisut Peqatatiigiiffianiit tusarniaanermi akissummut oqaaseqaat innersuussutigineqarpoq.

Ilinniartitsisut ilinniartitsineri pisinnaasaat pillugit § 58 pillugu oqaasertap allanngortinnissaa siunnersuutigineqarpoq, taamaalilluni oqaaseqaatigaat imatut oqaasertaqassallutik: ”Ilinniartitsineri pisinnaasaqarnissamut piumasaqaataavoq universitetimi imaluunniit ilinniarfimmi qulliunerusumi kandidatitut soraarummeernerimi angusisimanissaq...”, tassa assersuutigalugu allat oqaasiinik ilinniarnertuunngorniarfinnilu ilinniartitsissutini allani soorlu inuussutissarsiutini aningaasaqarniarneq tuniniaanerlu handelshøjskolemi assersuutigalugu Copenhagen Business School-imi kandidatitut soraarummeertoqarsinnaammat. Siunnersuut tunngavilersorluagaavoq, taamaammallu siunnersuummi uani ilanngunneqarluni.

§ 58 pillugu oqaatigineqarpoq rektoreqatigiit oqallisiginikuugaat perorsaanermik ilinniarneq aatsaat ukiup affaani atorfeqareernerup kingorna aallartinneqartassasoq, taamaammallu § 59, imm. 3-mi ukiut marluk pillugit malittarisassap eqqortinnissaa ajornakusuussaaq. Tassunga oqaatigineqassaaq siunnersuummi § 59, imm. 3. immikkoortumi kingullermi ukiut marluk pillugit malittarissamit immikkut akuersisinaanermut rektori periarfissinneqartoq.

Aammattaaq oqaatigineqarpoq ilinniartitsisut siunnersoqatigiivini pilersitsinissami sinaakkutit immikkuualunnerusariaqartut, tassa tamanna sulineri pissutsinut ilaammat, taamaammallu ilinniarnertuunngorniarfinnut tamanut assigiittuunissaa pissusissamisoornerulluni. Ingerlaqqilluni oqaatigineqarpoq suleriaasissamik minnerpaamik qitiusumiit siunnersuusiortoqartariaqartoq aammalu ilinniartitsisut siunnersuisoqatigiiffiini siulittaasut annikilliiffigineqarnissaat naleqquttuussasoq, assersuutigalugu tatigisaalluni suliat allat assigalugit sapaatip akunneranut tiimimik ataatsimik. Tassunga oqaatigineqassaaq tusarniaaffigineqartut allat taamatut kissaateqarnerisa kinguneranik atuarfimmi ilinniartitsisut siunnersuisoqatigiivisa katitigaanerit pillugu aalajangiinissamut ilinniarnertuunngorniarfinni ataasiakkaani ilinniartitsisut periarfissinneqartut. Naalakkersuisut aamma isumaqarput ilinniartitsisut siunnersuisoqatigiivisa sulinerisa immikkuualunnerunissaa pillugu inatsisikkut malittarisassiornissaaq naleqqutinngitsoq, tamanna isumaqatigiissutinut tunngassuteqartutut isigineqarmat.

Perorsaanermit allaffissornermilu pissutsit pillugit peqqusinissamut Naalakkersuisut periarfissaat pillugu § 67, imm. 3 pillugu naggasiullugu oqaatigineqarpoq aalajangersagaq Inuussutissarsiutinut ilinniarnertit inuussutissarsiutinullu ilinniartitaanermit pikkorissarnerit pillugit Inatsisartut inatsisaannut nr. 10, 19. maj 2010-meersumut akerliusoq, taanna malillugu brancheskolet naalakkersuisoqarfiup ilitsersuinissamut pisinnaatitaaffiisa ataaniinngimmata. Kapitalit 1 aamma 7 pillugit oqaaseqaatinut oqaaseqaatit innersuussutigineqarput.

Ilinniartitaanermit Aqutsisoqarfik:

Ilinniartitaanermit Aqutsisoqarfik oqaasertat arlallit allanngortinnissaat siunnersuutigaa, amerlanerillu aaqqiinermik kinguneqarput.

Klassemi ataatsimi ilinniartut atuaqatigiillu amerlanerpaaffilernissaannik kiisalu ilinniartut amerlassusaat klassimik atuaqatigiinnilluunniit pilersitsinermik kinguneqartitsisut pillugit Naalakkersuisut malittarisassiornissamut periarfissaat pillugu § 6, imm. 2 pillugu Aqutsisoqarfik oqaaseqaateqarpoq tamassuma qitiusumiit aalajangerneqarnissaa imaqa isumatusaarnerunngitsoq. Aalajangersakkamut oqaaseqaatit ilanngullugu oqaatigineqarpoq klassemi atuartut amerlanerpaaffilernerneqarnissaat ilinniartut pisariaqartumiit amerlanerusut atuarfimmi kissaatigineqartumi imaluunniit ilinniakkami sammivimmi kissaatigineqartumi ilinniartunngorsinnaannginnerannik kinguneqassasoq. Aammattaaq ilinniakkami sammivimmi kissaatigineqartumi ilinniartut ilinniartunngorsinnaanerit pillugu § 28-mut oqaatigineqarpoq klassemi ilinniartut amerlanerpaaffilerneratigit tamanna ajornakusoorinneqalissasoq. Naalakkersuisut isumaqarput klassemi ilinniartut amerlanerpaaffilernissaat pingaartuusoq, ilinniartut eqqarsaatigalugit kisiannili aamma ilinniartut qanoq amerlatigisinnaaneri eqqarsaatigalugu. Naalakkersuisut aammattaaq isumaqarput ilinniartunngortartunut tunngatillugu klassini ilinniartut amerlassusaat ajornartorsiutaanngitsoq, tassa pisuni immikkut ittuni immikkut akuersissuteqarsinnaaneq malittarisassani aamma periarfissinneqarmat.

Ilinniakkami sammivimmi tiimit amerlassusaat pillugu § 23 pillugu oqaatigineqarpoq taamatut assigiinngitsoqartigitillugu (tiimit 1800-2300) tiimit minnerpaaffiata annertunerpaaffiatalu akornanni pitsaasutsip assigiinngitsorujussuunissaa pinngitsoorneqarsinnaanngitsoq. Tassunga oqaatigineqassaaq taamatut assigiinngitsoqartiginissaa siunertaanikuusoq. Kisiannili ilinniakkami sammiviit imatut pitsaassuseqartigissapput ilinniagaqaqqinnissamut tunngatillugu ilinniartunnguutasinnaallutik.

§ 24, imm. 2 pillugu oqaatigineqarpoq”danskisut qallunaatullu saniatigit ilinniartitsissutit marluk” pineqanngippata aalajangersagaq § 25, imm. 1, nr. 1-2-mut tunngatillugu pisariaqanngitsutut isigisariaqartoq. Tamassuma kinguneranik siunnersuummi uani § 24, imm. 2 peerneqarpoq.

Ilinniartitsissutit toqqarneqarsinnaasut pillugit § 26 pillugu oqaatigineqarpoq neqeroorutit pilersitsinerlu akuleriisinneqartut. Tamanna siunnersuummi uani aaqqinneqarpoq.

Ilinniakkami sammivimmi aalajangersimasumi qinnuteqartut amerlavallaartillugit rektorip ilinniartunngortitsisarnera pillugu § 28, imm. 6 pillugu oqaatigineqarpoq erseqqarluttoq ”amerlasuut” qanoq amerlatiginersut. Tassunga oqaatigineqassaaq inatsisip oqaasertaani ilaatigut tamatigoortuunissaq siunertaasoq.

Oqaatsit aappaattut perorsaанermik tunngaveqartumik ilinniartitsineq pillugu § 32 pillugu oqaatigineqarpoq ilinniartitsineq Danmarkimi nangitsulluni ilinniarnissamut piareersaatitut ilinniарnerussappat siumukaateqarnissamik piumasaaqateqartoqartariaqartoq, tassani ilinniartut ilinniarnertuutut soraarummeereernermik kingorna oqaatsit aappaattut perorsaaneq tunngavigalugu ilinniartitsinermik malinnaasinnaanissaat anguniarneqassalluni. Aalajangersakkamut oqaaseqaammut oqaaseqaateqarnermut ilanngullugu oqaatigineqarpoq qanoq qulakkeerinnittoqarnissaa inatsimmut oqaaseqaatini ersittariaqartoq. Tassunga oqaatigineqassaaq Naalakkersuisut tamanna ilisimagaat, taamaammallu ilinniartitsinermut pilersaarummut ilanngunneqarnissaa ilimagineqartariaqartoq. Tamanna oqaaseqaatini erseqqissarneqarpoq.

Ilinniartup innarluuteqartup ilinniartitsissummi timersornermi peqataannginnissaanut rektorip akuersinissaanut periarfissaq pillugu § 42, imm. 3 pillugu oqaatigineqarpoq danskit misilittagarigaat peqataannginnissamut akuersineq ilinniарnermi kingusissukkut pippat ilinniartitsissummik taarsiinissamik piumasaaqateqarnissaq ajornartorsiutaalersartoq. Tassunga oqaatigineqassaaq taamaammatt peqataanngissamut akuersinissap sukkанerpaamik paasineqarnissaanik pisariaqartitsineq pingaartuusoq.

Piffissami killilimmi atorfinitsitsisarneq pillugu § 58, imm. 5 pillugu oqaatigineqarpoq eqqumiitsuliornermik ilinniartitsissutini ilinniartitsisut kandidatiunngitsut pisinnaasaannik akuersisinnaaneq ersernerlulartoq, tassani oqaatigineqarluni taamaassappat Danmarkimi imaliinnarlutik pisinnaasanik akuersivigineqarsinnaanngitsut. Tassunga oqaatigineqassaaq § 58, imm. 1 malillugu ilinniartitsinermi pisinaasanik akuersinermi universitetimi imaluunniit ilinniарfimmi qulliunerusumi allami kandidatitut soraarummeernermi angusisimanissaq piumasaaqataasoq. Ilinniartitsisup sumik ilinniartitsinissaa apeqqutaatinnagu tamanna atuuppoq.

Perorsaанermik ilinniарnermut atatillugu pikkorissarnernut misilitsinnernulu akisussaaneq pillugu § 59, imm. 4 pillugu oqaatigineqarpoq saniatigut ilinniartitsissutinik ilasineq Danmarkimi atorunnaarneqartoq, kisiannili soorunami tamassuma Kalaallit Nunaanni atuutiinnartinneqarnissaa akerlilerneqarsinnaanngitsoq. Taamatut pisariaqartitsisoqarneratut isikkoqanngilaq, taamaammallu siunnersuummi uani tamanna naapertorlugu aalajangersagaq allanngortinneqarpoq.

Ilinniарnermi takusassiornermi, paasisassarsiorlui angalanerni il.il. peqataasut akiliutaat pillugu § 72, imm. 3 aamma 4 pillugit oqaatigineqarpoq aningaasat annertussusaat taaneqartut

akit annertussusaat tunngavigalugu aaqiivineqartariaqartassasoq. Naalakkersuisut isumaqarput aningaasat annertussusaata appasinnera eqqarsaatigalugu akit tunngavigalugit aaqiisarnissap ilanngunnissaa tunngavissaqanngitsoq.

Ilinniakkani sammivimmi ilinniartitsissutit pinngitsoorani malinnaavigisassat pillugit § 25-mut oqaaseqaatinut oqaaseqaateqarnermi apeqqutigineqarpoq ilinniakkami sammiviit katitigaanissaat pillugu tamanut tunngasumik piumasaqaateqassanersoq. Tassunga oqaatigineqassaaq, ilinniakkani sammivinni ataasiakkaani ilinniartitsissutit pinngitsoorani malinnaavigineqartussat amerlanerunissaat, ilinniartitsissutinik toqqarneqarsinnaasunik neqerooruteqarnissaaq, ilinniartitsissutit toqqarneqarsinnaasut sumik imaqaassanersut aammalu ilinniartitsissutit toqqarneqarsinnaasut qaffissusissaat sorliit ilinniakkani sammivinni tamani ilanngunneqassanersoqutilinniartitsissutit pinngitsoorani malinnaavigineqartussat ilinniakkani sammivinni tamani ilaasut saniatigut allanik tamanut tunngasunik piumasaqaateqarnissaaq pissusissamisoortutut isikkoqanngitsoq.

Ilinniakkami sammivimmi aalajangersimasumi qinnuteqartut amerlavallaartillugit rektorip ilinniartunngortitsisarnera pillugu § 28, imm. 6 pillugu oqaatigineqarpoq klassemi ilinniartunik ataatsimik-marlunnik ilasinissamik rektori immaqa aamma periarfissinneqarsinnaasoq. Tassunga oqaatigineqassaaq § 28, imm. 6, immikkoortut siulliat malillugu killilimmik amerlanerusunik ilinniartunngortitsisinnaanermut periarfissaaq aqqutigalugu tamanna periarfissaareersoq.

Pitsaassutsimut Nakutilliinermullu Aqutsisoqarfik:

Aqutsisoqarfik isumaqarpoq oqaaseq ”ilinniartitsissutit akimorlugit” militsittarnerit pissusissamisuunngitsoq (assersuutigalugu § 47, imm. 1-imi). Nangilluni oqaatigineqarpoq ilinniartitsissutit imarisaannik danskit imarititaannut assingusunik atuutilersitsinissaaq inatsisissatut siunnersuummi siunertaappat taaguut ”ilinniartitsissutini amerlasuuni” misilitsinneq atorineqartariaqartoq. Siunnersuut tunngavilersorluagaasutut isikkoqarpoq, taamaammallu siunnersuummi uani malinneqarluni.

Inatsisissatut siunnersuummi aalajangersakkanut ataasiakkaanut oqaaseqaatit

Kapitali 1-imut

Nutaatut siunnersuutip kapitaliani 1-imi aalajangersarneqarput ilinniartitaanermi siunertarineqartut pingaarnerusutigullu sinaakkutissat. Aallaqqaataasut § 1-imi tamanna pivoq, ilinniartitaanerup ataatsimoortumik siunertaanik, sivilisussusissaanik, kikkunnut saaffiginninneranik, ilinniaqqinnissamut pingaaruteqassusaanik, ilinniarnertuunngorniarluni

immikkut ilinniaqqittarnerit maleruagassiuunnissaannut tunngavissiuinikkut aamma ilinniarnertuunngorniarnermut ilassutissatut pikkorissartitsisarnerit pilersinneqarsinnaanngormata kiisalu taamatut ingerlatsisinnaanerup nangingneqarsinnaanera pillugu tunngavissanik aalajangersaasinnaanermut piginnaatitsissusiortoqarmat.

Tulliullugit §§ 2-3-mi aalajangersarneqarput ilinniartitaanerup ilinniaqqinnissamut piareersaataaneranut aalajangersakkat tunngassuteqartut aamma nalinginnaasumik peroriartuutaaneranut tunngassuseqartut aalajangersakkat.

Ilinniartitaanerup siunertaasa erseqqissaavigineqarnerisigut anguniarneqarpoq ilinniarnertuunngorniarnarfinni ilinniartitaanerup ingerlanneqartussap qanoq paasineqartariaqarneranut sinaakkusiussat.

§ 1-imut

Aalajangersakkami ilinniartitaanermi annertunerusutigut anguniakkat, sivisussuseq, kikkunnut saaffiginninnera, ilinniaqqinnissamut pingaaruteqassusaa, ilinniartitaanermi qitiutinneqartut, ilinniarnertuunngorniarnarluni immikkut ilinniaqqittarnerit maleruagassiuunnissaannut tunngavissiuinikkut aamma ilinniarnertuunngorniarnermut ilassutissatut pikkorissartitsisarnerit tamakkunungalugu tunngassuteqartunik aalajangersagaliorsinnaanermut piginnaatitsinerit aalajangersarneqarput.

Imm. 1-imut

Imm. 1-imi aalajangersarneqarpoq annertunerusutigut isiginnissagaanni ilinniartitaaneq ataasiusoq. Pissutsit taamaannerat aaqqissuussinitoqqamut sanilliuttariaqarpoq, tassami aaqqissuussinitoqqami ilinniartitaanerit pingasuummata, GU, Hhx aamma Htx.

Imm. 1-imi aalajangersakkami aamma ilinniartitaanermi annertunerusutigut anguniakkat erseqqissarneqarput. Siunnersuutip §§ 2 aamma 3-mi aalajangersarneqarput ilinniaqqinnissamut piareersarnerup aamma nalinginnaasumik peroriartuutaanerani imarisaasut.

Imm. 2-mi aalajangersakkami aalajangerneqarpoq ilinniartitaanerup ukiuni 3-nik sivisussuseqarnissaa. Tamanna ilinniartitaanerit pingasuusut tamarmik ataasiakkaarlutik immikkut sivisussusaannut naapertuuppoq. Aalajangersakkami §§ 40-42-mut innersuussisoqarpoq. Aalajangersakkami taakkunani allaaserineqarput immikkut aaqqissukkanik ingerlatsinerit ilinniarnarnerup sivisussusaanik ukiunik pingasuusunik sivikillisisinnaasut sivitsuisinnaasulluuniit. Tamatumani aalajangersakkat tamatumunnga itisilerinerni innersuussutigineqarput.

Immikkoortumi 3-mi aalajangersarneqarput ilinniartitaanermi ilinniartussat saaffigineqartut kikkunersut. GU, Hhx aamma Htx pillugit aalajangersakkanut atuuttunut

allannguuteqartoqarpoq, tamatumani allanneqanngimmat ilinniartitaanerup inuusuttunut sammitinneqarnera. Ilinniartitaaneq sannamigut pingaartumik inuusuttunut sammitinneqartussaagaluartoq, inuusuttulli immikkut taaneqannginnerinut pissutaavoq inuit nalinginnaasumik peroriartuutaasumik ilinniartitsinermi ilinniagaqaqqinnissamullu ilinniagaqarumasut ilinniartitaanermi aamma saaffigineqarnerat.

Ilinniartitaanerup ataatsimoortuunerani oqaatigineqarpoq ilinniartitaanerup immikkoortitaartunit arlalinnik katitigaanera (tunnngaviumik ingerlatsineq aamma ilinniagassamik immikkut ingerlatsineq), tamakkulu ataqatigiissuupput. Pissutsit taamaannerisa ajornartingilaat maannakkutut ilinniartitsissutissanik ataasiakkaarilluni soraarummeersinnaaneq aamma nammineerluni ilinniarnertup kingorna soraarummeersinnaaneq. Tamatumunnga tunnngassuteqartut takkukkit siunnersuummi § 46, imm. 2 aamma 3. Soraarummeernerup nunami tamarmi assigiinnissaa isumaqarpoq soraarummeerneq ilinniarnertuunngorniarnertuunni assigiinngitsuni ingerlanneqaraluartoq assigiimmik ataasiumik soraarummeernerusoq.

Imm. 2-mut

Aalajangersagaq aalajangersakkanut ullumikkut atuuttunut naapertuuppoq. Oqaasertaliineq ”tamanna pillugu malittarisassat aalajangersarneqartut naapertorlugit” ilanngunneqarpoq ersersikkumallugu, ilinniarnertuunngorniarnertuunni soraarummeernerup avataatigut ilinniakkani aalajangersimasuni ilinniartunngorniarnertuunni immikkut ittunik aalajangersagaqarsinnaammat.

Imm. 3-mut

Aalajangersagaq aalajangersakkanut atuuttunut naleqqiullugu nutaajuvoq, Nunatsinnilu ilinniarnertuunngorniarnertuunni inatsimmi § 5, imm 2-mut naapertuulluni. Aalajangersakkami siunertarineqarpoq immikkut ingerlatamik ilinniarnertuunngorniarnertuunni maleruagassiuunneqarnissaa, tamatumani sivikinnerusunut akunnattumilluunniit ilinniaqqiffinni ilinniartunngorsinnaanissaq aqqutissiuunneqarluni.

Taamatut ingerlatatigut ilinniartut taamatut ingerlatsisimasut, kingusinnerusukkat ilinniartitsissutissani ataasiakkaani soraarummeerfimminnik ilaartuinnermik, nalinginnaasumik ilinniarnertuunngorniarnertuunni soraarummeersimasunut nallersuussinnaanngorsinnaaniassammata.

Imm. 4-mut

Imm. 2-mut oqaaseqaatini taaneqartut ilinniaqqiffissanut assigiinngitsuni ilinniartunngorsinnaanissaq ilinniarnertuutut soraarummeernerup saniatigut piumasaqaatinik allanik ilakutaqarsinnaavoq.

Taamaattumik tamanna iliuuseqarfiginiarlugu maannamut pisarnertut ilinniarnertuunngorniarnertuunni saniatigut ilassutissanik pikkorissarsinnaaneq

periarfissaatinneqarpoq. Aalajangersakkamik pilersitsinikkut inatsisitigut pikkorissarnernik taamaattunik pilersitsinissaq pisussaaffiulerpoq.

Ilinniarnertuunngorniarnermi ilassutitut pikkorissarsinnaanerit neqeroorutitut immikkut ittutut ilinniarnertuunngorniarnernup ilassutaatut isigisariaqarput, taamaattutulli ilinniartitaanermut ilaanngitsutut. Aalajangersakkap maani ilanngunneqarneranut pissutaavoq inatsisitigut pikkorissartitsisarnernik tunngavilersuiumaneq aammali ilassutitut pikkorissartitsisarnernit ilinniarnertuunngorniarnermi ilinniarnissamat piginnaasanik ineriartortitsinermut ilaammata.

Immikkoortup kingulliup ilassutitut pikkorissartitsisarnernit malittarisassiuunnissaannut Naalakkersuisut pisussaattippai. Ilaatigut Naalakkersuisut maleruagassiaminni aalajangersaasinnaapput ilassutitut pikkorissartitsinerit nalinginnaasumik ilinniartitsinermi ilinniaqatigiinnit pikkorissarfiusinnaanerannik imaluunniit assersuutigalugu ilinniarnertuunngorniarni ilaanni immikkut A-tut ajornassusilimmik ilinniartitsissummik pilersitsisinnaanermut. Ilinniarnertuunngorniarniit sorliit ilassutitut pikkorissaataasunik pilersitsisinnaaneri Naalakkersuisut aamma aalajangersarsinnaavaat.

§ 2-mut

Siunnersuummi nutaatut immikkut aalajangersarneqarput ilinniartitaanernup ilinniaqqinnissamat aamma nalinginnaasumik peroriartuutaanissaanut piumasaqaatit, taakkulu ataatsimoorlutik ilinniartitaanernup siunertaatut takussutaasussaammata, tak. tamatumunnga tunngassuteqartumut oqaaseqaat § 1, imm. 1-ip ataani. § 2-mi aalajangersarneqarpoq ilinniaqqinnissamat siunertap imaa.

Imm. 1-imut

Aalajangersakkami erseqqissarneqarpoq ilinniartitaanernup ilinniaqqiffiusussani ilikkagassanut piareersaatitut isigineqarnissaa, taamaattuuneratalu qanoq anguniarneqarnissaa.

Taamaattumik ilinniartut ilinniaqqinnissaminut sakkussanik pissarsiffigisinnaasaminnik ilinniartitsinissamik neqeroorfigineqassapput.

Imm. 2-mut

Ilinniartitsissutissanut nalunngisaqalerneq ilinniartitsissutissanut ataasiakkaanut tunngatitaavoq, ilinniarnermulli piginnaasaqalernissami eqqarsaatigineqarluni ilinniartup qaffasinnerusumik ilinniagaqarnissaminut inuttut piareersimasinnaassusaa, tamannalu aalajangersakkap immikkoortuani kingullermi erseqqinnerusumik allaaserineqarpoq.

§ 3-mut

Aalajangersakkami naqissuserneqarput ilinniartitaanernup nalinginnaasumik peroriartuutaanissaani erseqqinnerusumik anguniagassat.

Imm. 1-mut

Nalinginnaasumik peroriartuutaasutut taasineq tigussaangitsumik oqaasiuvoq, paasineqarsinnaallunilu ilinniartitsissutissaq pillugu aallussinermik pingasoqiusamik tunngavilersugaasoq: Inuit, inuiaqatigiit, pinngortitarlu pillugit ilisimatusaatinut. Paasinneriaatsit pingasuusut ilinniartitsissutissani saqqummiussorneqartartut inuiaqatigiit pisariaqartitaat ilinniagassanullu naatsorsuutiginninnernut naleqqussagaapput pituttorneqarsimallutillu aappaatigullu ilikkarniarnernut ilinniartullu kulturiannut pituttugaallutik. Ilinniartut perungassusermut inuttullu ataqqinassuseqarnermut ilinniarnermik ingerlanerani ilinniartinneqassapput. Tamatuma saniatigut inoqatinut, pinngortitamut inuiaqatigiinnullu nammineq atassuteqarneq pillugu eqqarsarsinnaassusermik inerisaassapput, taamaaliornerlu isiginneriaatsinut pingasunut tunngaviusutut nalilerneqarsinnaavoq. Ilinniarnertuunngorniarfimmi inuttut kinaassutsimik paasinnineq siunnersuummi nukittorsagassanut ilaatinneqarpoq.

Tamatuma saniatigut erseqqissarneqarpoq ilinniartitaanerup nalinginnaasumik peroriartuutaanissaata imarisassaanut ilaatinneqarmata ilinniartut nassaariataallaqqissutsimikkut inerisaasinnaassuseqarnermikkullu ineriartornissaat aamma apeqqusiisinnaassuseqarnissaminnik ineriartortitsinissaat. Tamakkua ilinniartup nalinginnaasumik peroriartornissaanut ilaatinneqaraluartut aamma ilinniartup ilinniarsinnaassutsiminik piginnaasaqalernissaanut ilapittuutaasussaapput.

Imm. 2-mut

Aalajangersakkami imm. 1. aamma 3-mi eqqartorneqarput, ilinniartitaanerup ilinniartunut ineriartortitsinissaa inuiaqatigiinni tamanut oqartussaaqataaffiusuni innuttaaqataanissamut piareersimanissamut piginnaaneqartariaqarnermi. Imm. 2.-mi aalajangersarneqarput ilinniartitaanernut atuarfiullu ulluinnarni inuunermi ingerlaneranut piumasaqaataasut.

Imm. 3-mut

Nalinginnaasumik peroriartuutaanissamik piumasaqaatip ilinniaqqinnissamut tunngaviliinissaani qaninnerpaatut nunatsinni pissutsinut pituttorneqarsinnaanera eqqarsaatigineqarsinnaavoq. Nunatsinni pissutsit nunamut namminermuinnaq pisunut pituttorneqassanngillat aammali qallunaat nunarsuarmiullu allat pissusaannut taputartuunneqartariaqarlutik. Taamaattumik kalaallit kulturiannut pituttuinerup allanik ataqateqarnerit mattutissaanngilai.

Ilinniarnertuunngorniarfimmi ilinniartitsinermi neqeroorutigineqartussaapput nalunngisassat kalaallit kulturiannut, oqaluttuarisaanerannut, inuunermi pingaartitaannut annertunerusutigut tunngavilersuutaasut, taamaaliornermi nammineq inuttut kinaassutsip qanoq ittuuneranik eqqarsaatiginninnissamut ilinniartunut tunngavilersukkamik periarfissiisoqassammat. Kinaassutsimik eqqarsaatiginninnerit ilinniarnertuunngorniat tarnikkut toqqissisimassusaannut ilaalluinnartuusussaapput, taamaattutullu iliuuseqarumassutsimut

tunngavilersuutitut aallaaviusussaallutik. Nammineq kulturimik kinaassutsimillu ilinniartuniit ilisimaarinninnerup tunngavilersussavaa ilisimasassanik misilittagassanillu nutaasunik pissarsiniarsinnaanissaq. Ilinniartuq nunagisami oqaluttuarisaaneramik, kulturikkut pissusaanik, inooqatigiinnikkut pissusaanik, teknologikkullu aamma aningaasarsiornikkut ineriartorneramik nalunnginnilerneratigut silarsuarmut avatangiisaasumut nalilersuisinnaalernissaa aatsaat pilersinneqarsinnaalersarpoq.

Aalajangersakkami tikkuartuutiginiarneqarput kalaallit kulturiani pingaartitaasut ilinniarnertuunngorniarluni ilinniartitaanermi tunngavilersorniarneqarmata, ilinniarnertuunngorniarnarfinnilu ulluinnarni ilinniartitaanermi tamanna annertunerusumik imaritinniarneqartussaavoq. Nunatsinni ilinniarnertuunngorniarnarfik inuiaqatigiinni suliffeqarfiussaaq kulturimik attatsiffiusoq aamma kinaassutsimik nukittorsaasuusoq, kalaallit inuusuttaasa ilinniaqqinnissamut piareersarneqarnerisa saniatigut.

Taamaattumik ilinniartitsissutip sorliulluunniit ilinniartitsissutigineqarnerani kulturi tunngavigalugu ilinniartitsinerami kalaallit inuiaqatigiit sammineqartariaqarput. Taamaattumik ilinniartut namminneq kulturiat ilinniartitsinerami aallaaviusariaqarpoq.

Kapitali 2-mut

Maleruagassanut atuuttunut naleqqiullugit, neqeroorutaasussanut piginnaassuseqarnermullu aqutsineq aalajangersagaapput nutaasut. Maleruagassani pineqarput kikkut ilinniarnertuunngorniarluni ilinniakkamik neqeroorsinnaaneramik apeqqut, ilinniarnertuunngorniarnarfinnik ilinniartunullu inissanik pissarsiniartarneq, amerlanerpaaffissaliinissamut periarfissat aamma ilinniarnertuunngorniarluni ilinniakkami ilinniartitsineq qanoq aaqqissugaassanersoq.

Ilinnialersinnaanermut malittarisassani pineqarput immikkoortukkaartumik inuit kikkut ilinniartunngorumallutik qinnuteqarsinnaanerisa killilersornerat. Ilinniartunngorsinnaaneq sumi najugaqarnissamik piumasaaqatitaqarpoq, taamaattorli Kalaallit Nunaata nunarsuaq tamakkerlugu isumaqatigiissutaasunik akuersinermigut pisussaaffii aamma eqqarsaatigineqarlutik.

Ilinniartunngorsinnaanermut piumasaaqatit pillugit malittarisassanut ilaapput iliniartunngorsinnaanermut piumasaaqatit, ilinniartunngornissamut piumasaaqatinik piviusunngortitsisunik toqqartuineq aamma ilinniartut sumi ilinniartunngorsinnaanerannut maleruagassat. Maleruagassanut atuuttunut sanilliullugit maleruagassat allanngortinneqangaatsiarput aappaatigulli taakkunaniit aallaaveqarlutik.

Maleruagassiat atuuttut naapertorlugit aalajangiineq tunngaviusumik inuttut, ilinniartunngorsinnaasup ilinniarneq naammaginartumik malinnaaffiginnissinnaaneramik ilinniartitaanermillu piffissarititaasup sivisussusissaa atorlugu naammassinnissinnaaneramik,

naliliineruvoq. Tamatuma saniatigut qinnuteqartoq ilinniartunngorsinnaanermut piumasaqaatinik naammassinnissimappat GU-mut ilinniartunngorsinnaasoq maleruagassat periarfissiippat, , inuutissarsiutinulli ilinniarnertuunngorniartarfinni ilinniartunngorsinnaanermut piumasaqaataapput ilinniarnertuunngorniarnermut piumasaqaatinik naammassinnissimanissaq aammalu ilinniarnertuunngorniarnermi inissat naammannissaat. Ilinniartunngorsinnaannginnermut taarsiullugu piginnaatitaatitsisoqarpoq GU-mut ilinniartunngorsinnaaneq. Inuussutissarsiutinut ilinniarnertuunngorniartarfinni ilinniartunngorsinnaaneq aamma allaatigineqartut piumasaqaatinik naammassinnissimanermik tunngaveqartinneqarsinnaavoq.

§ 4-mut

Imm. 1-mut

Sulisoqarfiit ilinniarnertuunngorniarnermik neqerooruteqarsinnaasutut pilersinneqarsimanerat akuerineqarsimaneralluunniit isumaqarpoq, sulisoqarfiusinnaammata ilinniarnertuunngorniarnermik ingerlatsivissatut pilersitaasimasut aamma sulisoqarfiusinnaasut allanik suliaqarnissamik siunertaqartumik pilersitaasimasinnaasut kisiannili aamma ilinniarnertuunngorniarnermik neqerooruteqarnermi atorumaneqalersimasut.

Sulisoqarfiit ilinniarnertuunngorniartarnermik neqerooruteqartussatut pilersinneqartut ilinniarnertuunngorniartarfinnik inatsimmi taaneqarput. Taakku maanna ilinniarnertuunngorniartarfiit assigaat (GU).

Ilinniartarfiit ilinniarnertuunngorniartarnermik neqeroornissamat akuerisaasut ilinniartarfinnik akuerisaasunik inatsimmi taaneqarput. Maanna Qaqortumi Niunermik Ilinniartarfiup Hhx neqeroorutigisarpaa, Sisimiunilu Sanaartornermik Ilinniartarfiup Htx neqeroorutigisarlugu. Ilinniartarfiit taakku tamarmik qitiusumik ilinniartarfiupput inuutissarsiutinik ilinniartarfitsineq inuutissarsiutinillu pikkorissaasarneq pillugu Inatsisartut inatsisaat aqutugalugu inatsisitigut malittarisassaqtartut. Inatsit taanna immikkut piginnaatitsivoq, qitiusumik ilinniartarfiit ilinniarnertuunngorniartarnermik neqerooruteqarsinnaanannut. Ilinniartarfiit allat qitiusumik ilinniartarfiunngikkaluartut aammattaaq ilinniarnertuunngorniartarnermik neqerooruteqarsinnaanerat siunnersuutikkut ammaanneqarpoq.

Ilinniarnertuunngorniartarfiit aamma ilinniartarfiit akuerisaasut immikkoortinnerat aqutsinnermut tunngasunut pingaaruteqarpoq, tassami ilinniarnertuunngorniartarfiit aqunneqarnerat taamaallaat ilinniarnertuunngorniartarneq pillugu inatsimmi malittarisassaqtarpoq, ilinniartarfiilli akuerisaasut inatsisit allat aqutugalugit malittarisassaqtarlutik. Tamanna siunnersuummi eqeersimaarfigineqarpoq, rektorip akisussaaffii suliaasaalu pillugit malittarisassani sallerpaatillugu.

Siunertamut naapertuuttutut isigineqarpoq ilinniartarfiit ilinniarnertuunngorniartarnermik neqerooruteqartartut tamaasa ilinniarnertuunngorniartarfinnik taassallugit.

§ 5-mut

Imm. 1-mut

Nutaatut aalajangersarneqarpoq aamma pisussaaitaanerup imarigaa ilinniartut ilinniarnerminnik naammassinninnissaannut pissutsinik eqqanaarinissaq. Meeqqat atuarfianni naammassisut karakteriisa agguataarnerat pillugu takussutissiat kingulliit naapertorlugit qularineqanngilaq, qinnuteqartut § 8, imm. 1-imi piumasagaatinik piviusunngortitsisut tamarmik maanna inissaqartitsineq aallaavigalugu inissaqartinneqarnissaat.

”Ilinniarnertuunngorniarnermut isersinnaasut - aamma ilinniartut inaasa amerlassusaat” init ilinniartitsiviusut aamma najugaqarfiusussat pigineqartut amerlassusaannik paasineqartariaqarpoq. Aammali isumaqarpoq ilinniartitsisussat, ilinniartitsinermi atortussat allallu ilinniartitsinerup naammassineqarsinnaaneranut pisariaqartitat naammattut pissarsiarisariaqarnerinik.

“Anguniassavaat” oqaasertaliunneratigut ersersinniarneqarpoq Naalakkersuisut inissaqartitsinissaq anguniarlugu suliniuteqartuassasut, kisiannili qinnuteqartut piumasagaatinik piviusunngortitsisut tamaasa ilinniartunngortinnissaannut inissat qaqugukkulluunniit pisariaqartut qularnaarnissaat inatsisitigut pisussaaffiginnikkaat. Aalajangersagaq tusarniaareernerup kingorna ilanngunneqarpoq, nassuerutigalugu siunissami ilinniartunngortarumaartut pillugit nalorninartut amerlangaarmata, qinnuteqartut pineqartut inatsisitigut pinngitsooratik ilinnialernissamut periarfissaannik qularnaarinissaq piumasarineqarsinnaanani.

Imm. 2-mut

Aalajangersagaq nutaajuvoq.

Aalajangersakkami siunertarineqarpoq inissaqartitsinerup tamakkiisumik iluaqutigineqarsinnaanissaa. Taamaaliornermi eqqarsaatigineqarsinnaavoq ilinniarnertuunngorniarnermi ataatsimi ilinniartut ilinniartunillu inissarititaasut amerlassusaasa naligiissaarniarneqarnissaat. Imaassinnaavoq aamma siunertarineqartoq ilinniartut imatut ilinniarninnut agguanneqassasut ilinniarfiit tamarmik naammattunik ilinniartoqarsinnaalersillugit, ilinniartitsinermi pitsaassuseq qaffassissoq pilersikkumallugu aamma ataatsimut aningaasartuutit millisarniarlugit.

§ 6-mut

Imm. 1-mut

Aalajangersagaq nutaajuvoq, maannamulli aalajangersakkanik atuutitsinermi katersuiffiulluni.

Ilinniartitsinerup tamarmiusup atuaqatigiaakkaarinerlut ingerlanneqarnissaa isumaqarpoq ilinniartut ilinniartitaanermi ilinniartunngortinneqartu eqimattakkaanut inississorneqassasut, atuaqatigiiaani taallugit. Ilinniartut atuaqatigiiaani tamakkunani ilinniartinneqassapput tunngaviumik ilinniartitsineq naammassitserlugu, taamaalioreernerup kingornagut toqqakkatut ilinniarfissaminut assigiinngitsunut agguanneqartussaammata. Aalajangersimasumik ilinniartitaanerp aallartinnerani ilinniaqatigiiaani ilinniartut kissaatigisaat naapertorlugit nutaanik aallartitsisoqassaaq.

Imm. 2-mut

Aalajangersagaq § 5-imi piginnaassuseqarnerup aquanneqarnissaanut tunngassuteqartunut sanilliunneqartussaavoq.

Atuaqatigiiaat amerlassusaasa aalajangersarneqarnerini, Naalackersuisut naatsorsuutigisussaavaat init atuartitsiviusut angissusaat, ilinniartitsisussaqaarniarneq aamma ilinniartitaanermi pissarsiaasinnaasut annertunerpaat anguneqarsinnaanerat.

Atuaqatigiiaani pilersitsinermi ilinniartut amerlassusilerneqarnerannut maleruagassiat kinguneriniartussaavaat atuaqatigiiaat amerlanerpaanik ilinniartullit, ilinniartitsinermi pitsaassuseq qaffasinnerpaaq ataatsimullu aningaasartuutit qaffasippallaannginnissaat.

§ 7-imut

Aalajangersakkami aalajangerneqarput ilinniarnertuunngorniarluni ilinniarfinit ilinniartunngorsinnaanermut pingaernerusutigut aalajangersakkat. Ilinniarnermut ilinniartunngorsinnaaneq ilinniartunngorsinnaatitaanermik isumaqartariaqanngilaq. Tamatumunnga tunngasumik aalajangersakkat §§ 8-9-miipput. Ilinniartitaanermut ilinniartunngorsinnaatitaanermut pisinnaatitaaneq sumiiffinniit aalajangersimasuniit ilinniartunngorsinnaatitaanertut paasisariaqarpoq, tassani pineqarluni ilinniartunngorsinnaanermut piumasaqaataasunik naammassinnissimanermi qinnuteqartut kikkut ilinniartunngorsinnaanerat, qinnuteqartullu ilaannut aammattaaq qaqugukkulluunniit inissaqassuseq apeqqutaassaaq. Tamanna pillugu § 5, imm.1, naggammut kingullermut aamma § 9, imm. 2-mut oqaaseqaatit innersuunneqarput.

Imm. 1-imut

Najugaqartussaataitaanermut piumasaqaat malittarisassatoqqanut sanilliullugu nutaajuvoq. Piumasaqaat inatsisit malillugit ilinniartunngorsinnaanermut atatinneqassaaq § 8, imm. 1-imi piumasaqaatit aalajangersarneqartut naammassisimagaanni.

Najugaqartussaataitaanermut piumasaqaat maleruagassaq malillugu qinnuteqarnerup nalaani piffissamat atatinneqassaaq. Inuup aalajangersimasumik najugaqarfeqarnerata nalilerneqarnissaa aalajangersaavigineqarsinnaaneralu inuit allattorsimaffiannut maleruagassiat tunngavigalugit aalajangiunneqartussaavoq.

Imm. 2-mut

Aalajangersakkami siunertarineqarpoq ilinniarnerop Nunatsinni najugaqarsimasunut ammanissaa. Oqaasertaliussat nassatarivaat taamaallaat paaqqutarinninninnermut tunngasunut naleqqiullugu Kalaallit Nunaanni oqartussaasut akuunissaat piumasarineqarmat. Ilinniartut qinnuteqarnerup nalaani nammineq ingerlataminnik Danmarkimi atuarsimappata atuarfiugaluarpata, namminersortumik atuarfiugaluarpata, efterskoliugaluarpata imaluunniit tamakkununga assersuunneqarsinnaasunik atuarsimappata taava aalajangersagaq immikkut akuersisinnaanermut tunngaviutinneqarsinnaavoq.

Imm. 3-mut

Nunarput nunat avannarliit ilinniarnertuunngorniartarneq pillugu isumaqatigiissutaannut akuersinikuuvoq (nunat avannarliit ilinniarnertuunngorniartarneq pillugu ilinniartitsinermut ataqatigiinnerat pillugu isumaqatigiissut 3. november 2004-meersoq (nalinginnaasumik inuutissarsiutinullu ilinniarnertuunngorniartarneq)), tamatumani nalinginnaasumik inatsisiliornikkut aaqqissugaasumik ilinniarnertuunngorniartarnermut aamma inuutissarsiutinut ilinniarnertuunngorniartarnermut nunami innuttaasut assigalugit ilinniartunngorsinnaatitaanermik nunat avannarliit pisussaaqatigiinnerminnik uppernaasaapput. Ilinniarnertuunngorniartarneq pillugu isumaqatigiissutip eqqanaarpaa nunat akunnerminni ilinniartunik paarlaassisarnerminni akiliisitsinissamut piumasaqarsinnaannginnerat, taamaaliornermimi Nunani Avannarlerni ilinniarnertuunngorniartarlutik ilinniartut nuttarsinnaatitaanerminnut killiliiffigineqannginnissaat qularnaarneqarpoq.

§ 8-mut

Imm. 1-mut

Aalajangersakkami pineqarput qinnuteqartussat amerlanerpaatut naatsorsuutigisat. Qinnuteqartut pineqartut taakku, atuarfimmi ilinniakkaminnik imaluunniit aasigisaanik ilinniartinneqarnerminnik naammasseqqammernertik pissutigalugu naammaginartumillu qaffasissuseqartumik piginnaasaqarsimagunik, ilinniarnertuunngorniartarluni ilinniartitsinermut malinnaanissaminnut piginnaassuseqarnisaat tamatuminngalu naammassinnissinnaanissaat naatsorsuutigisariaqarpoq.

Ukiunut marlunnut killigititaq aalajangerneqarpoq inuusuttut ilinniarnertuunngorniartarluni atuarnermut atualinnginnerminni piareersarnissamut periarfissikkumallugit. Tamanna pisinnaavoq ilinniartitsissutissanut tunngassuteqartunik piginnaassusaannik pitsanngorsaanikkut aamma inuttut piginnaassusaannik ineriartortitsilluni pitsanngorsaanikkut. Taamatut ingerlatsinernut assersuutaasinnaapput efterskolimiinnerit, nunat akornanni paarlaasseqatigiilluni najugaqartitsinerit højskolimiinnerillu. Inuutissarsiutini sulineq aamma inuusuttut ilinniarnertuunngorniartarluni atuarnissaminnut piumassusaannik piginnaassusaannillu annertusaasinnaavoq. Ukiunik marlunnik killeqartitsineq aamma

inuusuttut atuarfinniit piaarnerpaamik ilinniarnertuunngorniarninnut ingerlaqqinniarnerinut kaammattuutaasinnaavoq. Naggasiullugu, ukiunik marlunnik killiliisimaneq paasineqassaaq inuit sivisunerusumik ilinniarninniissimannngitsut ilinniarnertuunngorniarnermik aallartitsinissaminnut ajornartorsiornerusarnerat. Inuit tamakkua taarsiullugu misilitsinnikkut ilinniarnermik aallartitsinissaminnut qinnuteqarsinnaapput.

Ilinniarnertuunngorniarnarfimmi atuarnissamut akuerisaanermi piffissaq paasineqassaaq piffissaq ilinniartup akuerineqarnerminut nalunaarutisiffia.

Oqaasertaliineq ”imaluunniit atuartitsinermik nalinginnaasumik atuarfimmi piumasarineqartartunut nallersuuttumik” ilaatigut atuarfinni namminersortuni aamma efterskoleni atuarnermik paasineqartussaavoq.

Imm. 2-mut

Aalajangersagaq, qinnuteqartut misilitsissutit ilaanni angusarineqartut minnerpaaffissaannik imaluunniit karakterini angusareqquneqartunik naammassinnissimannngitsunik ilinniartunngortitsisinnaanermik siunertaqarpoq. Oqaasertaliunneqartuni ”ikittunnguit”-mi siunertarineqarpoq ersersissallugu immikkut akuersisoqarsinnaassasoq, misilitsissutit sinnerini amerlanerusuni karakterimigut nalilerneqarnermigullu piumasaqaataasunik naammassinnissimasoq. Tamatumunnga atatillugu rektori nammineersinnaatinneqarpoq, ataatsimut isiginnilluni naliliisinnaanissaa siunertaralugu. Taamaattumik rektorip ataatsimut naliliinermini naatsorsuutigisariaqarpai karakteriliunneqartut aamma misilitsissutit amerlassusaat, taakkunanilu tunngavigisariaqarlugit piumasaqaataasut suut naammassineqarsimannnginnerat aamma piumasaqaataasut suut naammassineqarsimanerat.

Imm. 3-mut

Aalajangersagaq tunngatinneqarpoq ilinniartunut atuarfiup avataani ilinniartinneqarsimasunut soorlu efterskoleni imaluunniit atuarfinni namminersortuni, aamma tunngatinneqarpoq ilinniartunut nunani allaneersunut, nunat akornanni isumaqatigiissutinik Nunatsinni atuutsinneqartunik tunngaveqartumik Nunatsinni ilinniartunngortinneqartartut assigalugit ilinniartunngortinneqarsinnaasunut.

Imm. 4-mut

Nunanit allaniit qinnuteqartut paasineqassapput qinnuteqartut najugaqartussaannermut piumasaqaatinik § 7-imiittunik naammassinnissimannngitsut. Tamakkua Danmarkimiit qinnuteqartuusinnaapput. Pissusissamisoorlumik ilinniartut tamakkua atuarfimmi atuarnermik nalaanni kalaallisut ilinniartinneqarsimannngimmata, kalaallillu oqaasii meeqqat atuarfianni 10. klassimi inaarutaasumik pinngitsoorani misilitsissutissanut killiffimmilu karakterinut ilaammata, ilinniartitsissutini tamani E-mik angusaqarsimanissamik aamma 10. klassimi karakterini tamani E-mik angusaqarsimanissamut piumasaqaataasup sanioqqunneqarnissaa pillugu maleruagassiortoqartariaqarnera pisariaqarsinnaavoq. Pingaarnerpaavoq, ilinniartut

tamakkua ilinniartunngornissaminnut piumasaqaateqarsinnaaneranni, Nunatsinniit qinnuteqartutut piginnaasaqartiginerminnik takutitsisinnaappata.

§ 9-mut

Imm. 1-imut

Qinnuteqartut ukioq ataaseq atuartaasimasut tamatumalu kingorna meeqqat atuarfianni ukioq kingulleq atuartut killiffiata assinganik misilitsissimasut (Meeqqat atuarfianni inaarutaasumik misilitsinneq – FA) killiffimmi karakterilerneqarneq ajorput, aalajangersimasumik qulequtsiillutik suliaqartaratik, taamaallaallu kalaallit, danskit tuluillu oqaasiinik, matematikkimi fysikimilu misilitsittarlutik. Taamaammat taakku § 8, imm. 1 naapertorlugu imaluunniit § 8, imm. 2 naapertorlugu immikkut akuerineqarlutik ilinniartunngorsinnaannngillat, misilitsinnerlu aqutigalugu ilinniartunngorniartariaqarlutik. Tamannattaq atuuppoq qinnuteqartunut AEU-mik taaneqartartumi ilinniartitaasimasunut. Ilinniakkani taakkunani ilinniakkatigut killiffik FA-miit appasinneruvoq, taamaallaallu kalaallit, qallunaat tuluillu oqaasii matematikkilu atuartitsissutaasarlutik.

Kikkulluunniit taamatut piumasaqartut, qinnuteqartut § 8, imm. 1-imi pineqartut kisimik pinnatik, ilinniartunngorniarnermi misilitsissinnaapput.

Misilitsinneq Naalakkersuisunit suliakkiissutigineqarlunilu nalilerneqassaaq. Tamatuma nassataraa Naalakkersuisut suliaassiisutit suliarinissaannut, misilitsinnerit aaqqissuunnissaannut, ingerlannissaannut misilitsinnerillu nalilernissaannut akisussaallutillu ingerlatsisuussaammata. Misilitsinnerup qitiusumi suliarineqarlunilu nalilerneqarnissaannut tunngaviuvoq kissaatigineqarmat, qinnuteqartut misilitsikkumasut tamarmik assigiimmik tunngaveqartumik oqartussaasumillu ataatsimit nalilerneqarnissaat. Naatsorsuutigineqarpoq misilitsinneq pillugu erseqqinnerusunik malittarisassaliortoqassasoq, Naalakkersuisut siunnersuummi § 14 tunngavigalugu ilinniartunngortarneq pillugu nalunaarusiariumaagaanni.

Misilitsinnermi siunertarineqarpoq takutissallugu misilitsinnikkut § 8-mi ilinniartunngortinneqartutulli eqqanaarneqassasoq qinnuteqartup imatut piginnaasaqartiginissaa ilinniartitsinnermut malinnaasinnaassalluni aamma ilinniartitsinnermik naammassinnissinnaassalluni. Taamaakkaluartoq tamatumuunakkut pineqanngilaq ilinniarnep piffissami aalajangersimasumi naammassineqarsinnaaneranut naatsorsuutiginninneq.

Imm. 2-mut

Aalajangersagaq tusarniaareernerup kingorna ikkunneqarpoq, siunissami qinnuteqartut qassit misilitsereernerup kingorna imaluunniit immikkut akuerineqarlutik ilinniartunngornissamut piumasaqaatinik naammassinnittassanersut nalorninartorpallaartoq nassuerutigalugu.

Aalajangersakkap siunertaraa malittarisassiussallugu, qinnuteqartut misilitsinnermi angusisut aamma qinnuteqartut immikkut akueralugit ilinniartunngortikkumasat pillugit kina aalajangiisuussanersoq, qanorlu tunngaveqarluni tamatumani toqqaaneq pisassanersoq.

Aalajangersakkami aalajangersarneqarpoq toqqaaneq pisassasoq rektorip qinnuteqartut ilinniarnertuunngorniaryluni ilinniakkamik naammassinnissinnissamut periarfissaannik tamakkiisumik naliliinera tunuliaqutaralugu. Tamatumani ilaatinneqassapput qinnuteqartup ilinniakkatigut piginnaasai, meeqqat atuarfianni karakterit ilinniartunngorniarylunilu misilitsinnermi angusaasut toqqammavigalugit, aammattaarli pissutsit naapertuuttut allat pingaartinneqarsinnaapput, tamatumunnga ilanngullugit ilinniakkatigut sulinikkullu misilittagaasinnaasut. Ataatsimoortumik naliliisoqarnissaa imaappoq, rektorip qinnuteqartut ataasiakkaat nalilersussagai, piginnaasaasa ataatsimut nalilernerat tunuliaqutaralugu ilutigisaanillu qinnuteqartut ataasiakkaat imminnut naleqqiullugit nalilersussallugit.

Naggatip kingulliup siunertaraa, qinnuteqartut piginnaaneqartut sapinngisamik amerlanerpaat ilinniartunngortinneqarnissaat, inissat tamarmiusut pitsaanerpaamik atorluarnerisigut.

§ 10-mut

Ilinniartut ilinniarnertuunngorniarnermikk unitsitsisimareerluni ingerlaqqinnissaminut periarfissai aalajangersakkami eqqartorneqarput. Imm. 1-imi pineqarput unitsitsineq tunngaviummik ilinniareernerup kingornatigut, aamma imm. 2-mi eqqartorneqarput 1. imaluunniit 2. G-p kingornatigut unitsitsinerit. Aalajangersakkami aalajangerneqarpoq ilinniartut ingerlaqqissinnaanerminnut eqqanaarunneqarmata uninngagallarneq ukiut marluk sinnerlugit sivilissuseqarsimanngippat, tamannalu rektorip isumaqatigereerneratigut pisimappat.

Unitsitsereernerup kingornatigut ingerlaqqissinnaaneq pillugu maleruagassiani atuuttuni aalajangersagaqanngilaq.

Maleruagassiani siunertarineqarpoq sivikinnerusumik rektorimik isumaqatigiissuteqarnikkut unikkallarsimanermi ingerlaqqissinnaaneq pisinnaasoq.

Ilinniartitaaneq ukiunik marlunnik sivilissuserusumik qimassimasimagaanni ilinniarnertuunngorniarnermik nangitsisinnaanissaq periarfissaqanngilaq. Tamanna tunngaveqartinneqarpoq ilinniartup taamaattoqarneratigut ilinniarnertuunngorniarnermut atassuteqarunnaarsimaneranik, taamaalilluni ilinniarnermik nangitsisinnaanera naatsorsuutigineqarani.

Unitsitsineq pillugu rektorimik isumaqateqartariaqarnermut pissutaavoq, unitsitsineq allanngortinneqarsinnaanngitsutut isigineqarmat, taamaattumillu unitsitsinerit tamarmik ilinniartup rektorillu akornanni oqallisigineqartariaqarmata, taamaaliornermi rektorip

ilinniartuq isumasioqatigalugu nalilersinnaammagu piffissami tamatumani ilinniartup unitsitsinissaa ilumoortumik aalajangernerunersoq. Taamaaliortoqarnerani apeqqaassapput ilinniartut avatangiisaanni piffissami tamatumani susoqarnera aamma ilinniartup unitsitsereernermi kingorna qanoq iliuseqarumanera.

Tamatuma saniatigut aalajangersakkami piginnaatitsineqarpoq ilinniartup ilinniarfimminut utersinnaanissaanik imaluunniit ilinniarfimmi allami ilinniarnerninik nangitsitsinnaanissaanik.

§ 11-mut

Aalajangersakkami pineqarput ilinniartup ilinniarnertuunngorniartarfinnut sorlermut ilinniartunngortinneqarnissaanut tunngassuteqartut. Maleruagassiani atuuttuni tamanna pillugu aalajangersagaqanngilaq.

Imm. 1-mut

Aalajangersakkami aalajangerneqarpoq ilinniartunngortinneqarneq tunngaviusumik pisassasoq kommunimi ilinniartup qinnuteqarnerata nalaani aalajangersimasumik angerlarsimaffiata ilinniarnertuunngorniartarfiani (kommune angerlarsimaffik). Taamaaliornermi naatsorsuutigineqarpoq inatsisip atuutilersinneqarnerata nalaani kommunini sisamaasuni tamani ilinniarnertuunngorniartarfinnik pilersitsisimareernissaq. Maannakkut ilinniarnertuunngorniartarfeqarpoq Nuummi (GU), Qaqortumi (GU aamma hhx), Sisimiuni (htx) aamma Aasianni (GU), taamaattumillu kommunit tamarmiusut ilinniarnertuunngorniartarfeqareerput. Utaqqiisaagallartumik ukiullu atuarfiup 2010/2011-ip aallartinnerani nalinginnaasumik ilinniarnertuunngorniartarfik Sanaartornermik Ilinniarfimmi Sisimiuniittumi pilersinneqarallarpoq.

Tunngaviusumik ilinniartunngortitsisarneq aalajangersarneqarpoq ilinniartut agguataartarnerat angerlarsimaffimmiit angerlarsimaffimmullu angalanermi aningaasartuutitigut oqinnerpaajoqqullugu. Tamatuma saniatigut pissusissamisoorsorineqarpoq ilinniartut sapinngisamik sumiiffimmi najugaqarfimminnut ajornannginnerpaamik ilinniarnermik nalaani attaveqarsinnaanerat anguniarlugu, tamatumunnga ilanngullugit sumiiffimmi atuaqatigisanut attaveqarsinnaanermut periarfissat. Sumiiffimmik taasineq tamatumuunakkut paasineqassaaq kommunerisap killeqarfia. Maannamut inissiisarnermi iliuitsit aamma taamatut aallaaveqartinneqarlutik atuutsinneqarput.

Imm. 2-mut

Ilimagineqarpoq ilinniarfiit maanna inuussutissarsiutitigut ilinniarnertuunngorniartarnermik neqerooruteqartartut Sisimiuni (Htx) Qaqortumilu (Hhx), ilinniarnertuunngorniartarnermut atatillugu teknikkikkut niunernikkullu sammiviit neqeroorutiguartassagaat, illutatigut sinaakkutit, atortut ilinniartitsisullu anguniakkamut naleqqussakkat pigereeramikkit. Sammiviit taamaattut ilinniarnertuunngorniartarfinni allani neqeroorutigineqarnissaat

ilimagineqanngimmat, ilinniartullu sammivinni taakkunani ilinniarumasut ilinniarfinnut allanut nuunnissaat siunertamut naapertuutinngimmat, imm. 1-imi aalajangersakkap pingaernerup sanioqqunnissaa siunertamut naapertuuttutut isigineqarpoq, qinnuteqartunut ilinniarnertuunngorniarfinni teknikkikkut niuernikkulluunniit sammivinnik neqerooruteqartuni ilinniartunngorumasunut atatillugu.

Imm. 3-mut innersuussinerup nassataaa, Naalakkersuisut aalajangiussinnaammassuk, qinnuteqartut ilinniarnertuunngorniarfinni teknikkikkut niuernikkulluunniit sammivinnik neqerooruteqartuni ilinniartunngorumasut inissaq pissutigalugu ilinniarnertuunngorniarfinni allani ilinniartunngortinnissaat.

Imm. 3-mut

Aalajangersakkami imm. 1-imi aamma 2-mi aallaaviusunik marlutigut sanioqqutsisinnaanermut Naalakkersuisut periarfissineqarput.

Siullermik tunngavigineqassaaq inissaqartitsinermut tunngassuteqartut. Inissaqartitsiniarnermik taakkartorneqartut paasineqassapput inigisatigut sinaakkusersuutit, tamatumunnga ilanngullugit ilinniartitsinermi init aamma ilinniartunut inigitittakkat amerlassusaat aammali ilinniartitsisussaqaarniarneq. Taamaaliordermi eqqanaarniarneqarsinnaavoq ilinniarnertuunngorniarfiit pisinnaassuseqarnerannik tamakkiisumik iluaquteqarniarsinnaaneq, ilinniarnertuunngorniarfiit ilaat naatsorsuutigineqanngitsumik qinnuteqartukinnerussappata ilaalli naatsorsuutigineqanngitsumittaaq qinnuteqartoqarnerussappata. Aalajangersagaq aammattaaq § 9, imm. 2-mi naggammi kingullermi aalajangersakkamut sanilliullugu isiginiarneqassaaq, tassani aalajangerneqarmat qinnuteqartut rektorip toqqartuereerneratigut ilinniarnertuunngorniarfimmi ilinniartunngunngitsoortut, ilinniarnertuunngorniarfimmi allami inissaqassuseq apeqqutaatillugu ilinniartunngornissamik neqeroorfigineqassasut.

Aappassaattut ilinniartitsissutissanut imaluunniit inunnut tunngassuteqartunik qinnuteqartut akornanni pissuteqartoqarsinnaavoq sanioqqutsisinnaanissamut aallaaviusussanik. Assersuutigalugu tamakku pissuteqarsinnaapput ilinniarnertuunngorniartup ilaqaasa kommunimi allami najugaqarnerinik imaluunniit qinnuteqarnerup nalaani qinnuteqartoq aalajangersimappat aalajangersimasumik sammivilimmik, kommunerisami ilinniarnertuunngorniarfimmi neqeroorutigineqanngitsumik, ilinniarnertuunngorniarumalluni. Imaassinnaavoq aamma ilinniartoq atuarfimmini angerlarsimaffimminiluunniit imatut ajornartorsiuteqartigisinnaasoq kommunimi angerlarsimaffimmini ilinniarnertuunngorniarnerminik naammassinnissinnaanani.

Imm. 4-mut

Aalajangersakkami siunertarineqarpoq Naalakkersuisut tamanna pillugu maleruagassiornikkut ilinniarnertuunngorniarfinni imm. 3 naapertorlugu ilinniartunngortitsisarneq assigalugu,

aalajangersimasunik sammiveqarluni ingerlatsinernik aalajangersimasunik neqerooruteqartarnissaq eqqarsaatigalugu maleruagassiornissamut periarfissinneqarnissaat.

§ 12-mut

Maleruagassani atuuttuni aalajangersagaqanngilaq ilinniartut, ilinniarnertuunngorniarfeqarfiunngitsuni najugaqartut ilinniartunut inissiani assigisaanniluunniit inissaminnik neqeroorfigineqarnissaannik, kisiannili periaatsit taamaaliorfiupput, taamaattumillu aalajangersagaq periaatsinik naqissusiineruvoq.

Imm. 1-mut

Oqaasertaliinermi ”ilinniartunut inissiani assigisaanniluunniit” pineqarpoq ilinniartunut inissiat assigisaanilluunniit inissaqartitsineq. Periarfissat apeqqutaallutik inissiaasinnaavoq imaluunniit namminersorlutik iniuteqartuni inimik attartornerusinnaavoq.

Imm. 2-mut

Nutaatut aalajangersarneqarpoq ilinniarfiup pisussaaffeqarnera ilinniartut ataasiakkaat ilinniartuni inissiani assigisaanniluunniit qanoq ingerlanerinek nakkutiginninnissamut. Tamatumani siunertaavoq inuusuttut qanoq ingerlanerinek nakkutiginninnikkut periarfissiuinissaq inuusuttut ilinniartitsinermut malinnaalluarnerunissaasa tamatumalu kingunerisaanik ilinniartitsinermik naammassinnissinnaanerit periarfissiorneqarsinnaammat. Tamanna pisariaqarpoq ilaatigut ilinniartut ukiukitsuunerat misilittagakitsuunerallu pissutigalugit. Ilinniarnertuunngorniarfinni ilinniartut ilinnialersartut amerlanertigut inuusuttuusarput 18-it inorlugit ukiullit taamaattumillu angajoqqaaminnit akisussaaffigineqartussaallutik, tamannalu pissutigalugu ilinniarnerisa nalaanni ilinniarfiup akisussaaffigilersarpari. Taamaattumik atuarfiup ilinniartut inooqatigiinnikkut atugassaat nakkutigisussaavai aamma ilinniartut ilinniartoqatiminnut pissusilersornerat.

§ 13-imut

Maleruagassani atuuttuni aalajangersagaqartoqanngilaq nerisaqartitsinissamut imaluunniit nerisarnermik aaqqissuussinissamut, kisiannili taamaattunik aaqqissuussinerit ingerlanneqarput.

Neqeroorutit eqqartorneqartut neqeroorutaapput ilinniartut piumagunik atorsinnaasaat. Neqeroortarnermut tunngaviuvoq ilinniartut ukiukitsuunerat aammalu immaqa nerisassiornermut misilittagaqanngilluinnarnerat.

Oqaasertaliinermi ”nerisaqartitsineq imaluunniit nerisaqarnissamut aaqqissuussineq”-mi isumagineqarput aaqqissuussinerit ilinniartut nerisaqarsinnaanerannut, nerisassiornermut ikiorserneqarsinnaanerannik imaluunniit nerisassaminnik pisisinnaanerannik.

Ineqarnermut nerisaqarnermullu akiliisoqartarnissaa maannamut akit aningaasanut inatsimmi aalajangersarneqartut tunngavigalugit pisarpoq. Inatsisunik Atuutsitsinermit Allaffiup najoqqutassiaasa nutaat kingunerannik kissaatigineqarpoq akit aalajangiunneri siunissami pineqartumut inatsisiliornermi sapinngisamik pisassasut. Tamanna tunuliaqutaralugu siunertamut naapertuuttutut isigineqarpoq Naalackersuisut ilinniartunik inissianik atuinermut assigisaanullu aamma nerisaqarnermut nerisaqartitsinerimulluunniit akinik aalajangersaasarnissamut pisussaaffilernissaat.

§ 14-imut

Aalajangersakkami naalackersuisut piginnaatinneqarput aalajangersagaq tunngavigalugu ilinniartunngortitsisinnaanermut maleruagassiornissamut assersuutigalugu maleruagassat sutigut atuutsinneqassanersut. Aalajangersagaq tunngavigalugu ilinniartunngortitsisinnaanermut aalajangersakkanik maleruagassiortoqarsinnaanngilaq tamatumani maleruagassat tamakkiisut §§ 8 aamma 9-mi piummata, taamaallaat pineqarsinnaapput immikkut aaqqissuussamik ingerlatsinerit aamma immikkut aaqqissuussamik ilinniartitsinerit. Taamaakkaluartoq assersuusiornermi oqaatigineqartut § 9, imm. 1-imi taaneqartut ilinniartunngorniarnermut misilitsinneq maleruagassiuunneqarsinnaavoq.

Aammattaaq Naalackersuisut § 14 tunngavigalugu ilinniartut inaanni assigisaannilu nerisaqarneq nerisaqarnermillu aaqqissuussinerit pillugit erseqqinnerusunik malittarisassiorsinnaapput. Tassuunakkut ajornarunnaassaaq ilinniartut inaanni tamani aalajangersimasunik nerisaqarnermik aaqqissuussisoqarnissaa pillugu malittarisassaliornissaaq, sinaakkusiussat pingaarnersut iluini ilinniarfiit naapertuunnerpaanik namminneq aaqqissuussisinnaanngortillugit.

Kapitali 3-mut

§ 15-imut

Aalajangersakkap imm. 1-iani aalajangerneqarput ilinniartitaanerup annertunerusutigut ilusaa ataatsimoorussamik ingerlatsinertalik kingornatigullu aalajangersimasumik sammiveqartumik ilinniartitaanermik ingerlatsinertalik, aamma imm. 2-mi aalajangersarneqarput ilinniartitaanermi ilinniartitsissutit assigiinngitsunik ajornassusillit suunersut ajornassutsillu imminnut naleqqersuunneqarnerat.

Ilusilersugaanerup siunnersuutigineqarneranut tunuliaqutaasut pillugit nalinginnaasumik oqaaseqaatit innersuussutigineqarput.

Imm. 1-imut

Aalajangersakkami aalajangerneqarput ilinniartitaanerup sannaataatsimoorussamik ingerlatsinertut ilinniartup nammineq toqqagaanik sammivimmik aalajangersimasumik sammiveqartumik kinguneqartitaq aamma ingerlanerit tamakku ilinniartitaanermi qanoq inississorneqarneri tamakkualu sivilissusaannik aalajangersakkat immikkoortunullu aalajangersimasunik amerlassusilinnut agguarneqarneri.

Maleruagassani atuuttuni immikkoortunut agguaanissamut aalajangersagartoqanngilaq. Immikkoortunut agguaneq nalinginnaasumik ilinniaqqiffiusuni atorneqartarpoq. Immikkoortunut agguaanerup eqqunneqarnera ilusiliinerup kingunerisaatut isigineqassaaq, tassami ilinniakkamut tunngaviumik ingerlatsineq aalajangersimasumik sivilissuseqarmat immikkoortutut nalinginnaasutut sivilissuseqarluni.

Imm. 2-mut

Aalajangersakkami aalajangerneqarput immikkoortut sorliit piffissami sorlermi pineqarnerisut. Taamaaliorneq ilinniartitaanerup ukiuata aallartinneqarneranut naggateqartinneqarneranullu pituttugaavoq maannakkullu pissutsinut atuuttunut naapertuulluni. Ilinniartitaanerup ukiuata aallartittarnera § 17 imm. 1-imi aalajangersagaavoq 1. august aallartittussatut. Ilinniartitaanermi ukiup naanera ullussamigut aalajangersagaanngilaq kisianni § 17 imm. 1 naapertorlugu ukioq atuarfiusoq ulluni 180-iniit 220-nut ingerlanneqartussaavoq sapaatip-akunnerani ulluni tallimani arfinilinniluunniit, taamaattumik nalinginnaasumik ukioq atuarfiusoq qaammammi junimi naasarpoq.

Imm. 3-mut

Maannamut pissusiusut atuuttut naapertorlugit pissusissamisoortinneqarpoq inatsimmi aalajangersassallugu 1., - 2.- aamma 3. G qanoq paasisariaqarnerisut.

Imm. 4-mut

Nutaajuvoq immikkuualuttutigut aalajangersarneqarmat, ilinniartitaanermi ilinniartitsissutissat suunersut qanorlu ajornassutsimikkut inississorneqarsimanersut, ajornassutsillu imminnut sanilliusorneqarnerat erseqqissarneqarpoq.

Ilinniarnertuunngorniarnermi ajornassutsinik inississuisimanerit aalajangersakkami ingerlateqqinneqarput. Taamatut inississuineq Danmarkimi aamma atuuppoq. Ilinniartitaanermi ilinniartitsissutissat aalajangersimasunik ajornassusilersorneqarnerisigut Danmarkimi ilinniarnertuunngorniartarnermut nallersuussisinnaaneq Danmarkimi inississuinerup issuarneqarneratigut ajornanginnerusumik eqqanaarneqarsinnaavoq, taamaaliornermilu Danmarkimi ilinniaqqinnissamut nallersuuttunik piginnaassuseqarnissamut piumasaqaataasut tunngavissinneqarput.

Ilinniartitsissutissani ataasiakkaani ajornassusilersuinerit eqqanaartussaavaat, nalinginnaasumik ilinniartut ilinniartitsissutissanik piginnaasatik soqutigisatillu naapertorlugit toqqartuisinnaanissaat.

§ 16-imut

Aalajangersakkami aalajangerneqarput piffissap ilinniartitsinermut atugassap sinaakkusersorneqarnissaa, ilinniartitsinerup tamarmiusup qanoq sivilissuseqarnissaa aamma ilinniartitsinerup ukiuani sapaatip-akunneranut agguarneqarnissaa aamma sapaatip-akunnerani ilinniartitsinerup qanoq agguanneqarnissaa. Aalajangersakkani atuuttuni tamakkununga tunngasunik aalajangersagaqanngilaq. ”Ilinniartitsinerup ukiua” aamma ”sapaatip-akunneranut ilinniartitsineq” pillugit paasissutissanut § 17, imm. 1. innersuussutigineqarpoq.

Imm. 1-imut

Aalajangersakkat atuuttut naapertorlugit piffissaq ilinniartitsiviususaaq sapaatip-akunneranut piffissartinneqartut aalajangersarneqarpoq. Tamatuma kingunerivaa ilinniartitsinerit nalunaaquttap akunnikkaartuni pikkorissarnerit, napparsimaneq allalluunniit pequtigalugit ilinniartitsiviunngitsoortut annaaneqartarnerat, nalunaaquttap akunneri ilinniartitsiviunngitsoortut piffissami sapaatip akunnerani tamatumani taarserneqanngikkaangata.

Siunnersuummi piffissaq ilinniartitsivissaaq ukiumut aalajangersarneqarpoq, taamaaliornikkut ilinniartitsisut ilinniartitsinissaminnik ukiumut tamarmut piareersaasiorsinnaanngorlugit. Ilinniartitsinermut piffissarititaasup sapaatip akunnikkaarneraniit ukiumut allanngortinneqarnerani eqqanaarneqartussaavoq ilinniartitsisut ilinniartitsinerminnik piareersarnissamut pisariaqartitat naapertorlugit periarfissinneqarnissaat. Aammali tamatumuunakkut ilinniartut ilinniartitsivigineqarnissaminnik piffissami tamarmiusumi ilinniartinneqarnissaat eqqanaarneqassaaq.

Piffissap ilinniartitsivissap minutsini 45-kkaartuniit 60 minutsikkaartunngortinneqarnera ukiumut piffissamik aalajangersimasumik ilinniartitsivissaaqalernerup kinguneraa.

Ilinniartitsinerup nalunaaquttap akunnikkaartunngortinneqarnerata ilinniartitsinerup taamatorluinnaq piffissalersorneqarluni ingerlanneqartarnissaa kingunerissanngilaq. Ilinniarfiit namminersuutigalugu ilinniartitsinermilu periaatsit perorsaanerlu tunngavigalugit piffissamik namminersorlutik agguasinnaatitaapput sivilissusilersuisinnaatitaallutillu.

Imm. 2-mut

Piffissap ilinniartitsiviususaaq sivilissusissaata aalajangerneqarnerata ilanngunneqarneranut pissutaavoq ilinniartut ilinniartitaanerminni pissarsiassaasa nalunaaquttap akunnerinik pisariaqartitanik piffissaqartitaanissaat, tamatumani piffissaqartitaaneq ilinniarnerminni ingerlavissaminnik qanoq qinersisimanerini aamma ilinniartitsissutissani toqqagassani toqqagaqarsimanerannik aallaaveqassaaq.

Imm. 3-mut

Aalajangersakkami siunertarineqarpoq ilinniartut ilinniartitsinermut ukiumut tamarmut agguagaasumut malinnaasinnaanissaminut periarfissinneqarnissaat. Taamaattumik rektorip aalajangersinnaangilaa ilinniartitsisup qaammatini marlussunni peqanngierarluni soraarummiinngitsiarnermi qaammatini marlussuni pimoorussamik ilinniartitsisinnaanera. Ilinniartitsineq assigiiartumik piffissalersorneqassaaq, taamaaliornermi ilinniartitsissutissani ilinniartitsineq ukiup atuarfiusup ingerlaneranut assigiiartumik piffissalersorlugu inississorneqartussaavoq. Aalajangersakkami aamma siunertarineqarpoq ilinniartut sapinngisamik ulluinnarni ingerlanissaminik piareersaasinnaanissaat, tamatumani eqqarsaatigalugit ilinniartit, ilinniagasserineq aamma sunngiffimmi aallutassat.

§ 17-imut

Maleruagassiani atuuttuni tassunga assingusunik maleruagassaqaanngilaq. Atuarfik pillugu peqqussummi aalajangersakkat assingusut pilersinneqarnikuupput.

Imm. 1-imut

Siullertut aalajangersakkami aalajangerneqarpoq ukiup ilinniartitsiviusup aallartiffissaa. Tamatumani ilinniartitsinerup kingusinnerulaartukkut aallartinneqarnissaa ajornartinneqanngilaq, tamannalu atorneqartarpoq.

Aappaattut aalajangersakkami aalajangerneqarpoq ukiup atuartitsiviusup ulluni 180-iniit 220-nut ingerlanneqarnissaa, tamannalu ullumikkut atorneqarpoq. Ullunut ilinniartitsiviusunut maannamutut ullut soraarummeerfiit ilaassapput.

Eqqaaneqassaaq tusarniaanermi akissutit tignerisa kingorna nalileeqqereernikkut ullut ilinniartitsiviit allanngortinneqarmata 200-240-niit 180-220-nut.

Kingullertut aalajangersakkami aalajangerneqarpoq ullut ilinniartitsiviusut sapaatip akunnerani ullunut tallimanut arfinilinnulluunniit agguarneqarsinnaasut, tamannalu sapaatip akunneranik ilinniartitsiviusumik taaneqartarpoq. Nalinginnaasumik paasinnitarneq naapertorlugu sapaatip akunnerani ullut nalinginnaasut paasineqartarput ataasinngornermiit tallimanngornermut arfininngornerli taamatuttaaq sapaatip akunnerisa ulluisa nalinginnaasut ilagigaa. Aalajangersakkap aallaavittut kingunerissavaa ukiumi atuartitsiviusumi tamarmi ulluni tallimani, ataasinngornermiit tallimanngornermut imaluunniit arfinilinni, ataasinngornermiit arfininngornermut, ilinniartitsisoqartarnissaa.

Imm. 2-mut

Nalinginnaavoq sapaatit akunnerini atuartitsivissani ulluni tallimani atuartitsinissaq toqqarneqartarluni, taamaattumik imm. 2-mi aalajangersakkami atuarfiit sapaatip akunneranut ulluni tallimani atuartitsisartut periarfissinneqarput eqaannerusumik ukiumik atuarfiusumik piareersartarsinnaanermiinnut ilaatigut avataaniit ilinniartitsisunik aggeritissarnermik atuinikkut, immikkut aqqissukkanik ilinniartunut pikkorissaasarnermikkut aamma

ilinniartitsisunut pikkorissartitsisarnermi assigisaannilu. Oqaaseqatigiinni kingullerni ilinniartut angajoqqaallu piareersarnissamut periarfissinneqarnissaat eqqarsaatigineqarput.

Imm. 3-mut

Siunnersuummi ukiumik atuarfiusumik sumiiffimmi pisariaqartitat periarfissallu naapertorlugit eqaannerusumik piareersarsinnaanissamik anguniagaq naapertorlugu atuarfintut ataasiakkaanut, ukiup atuarfiusup, sinaakkusiussat iluanni, sapaatit akunnerinut 36-nut 40-nulluunniit agguarneqarnissaa, aalajangersagassanngortinneqarpoq. Taamatut killeqartitsineq ullunut atuarfiusussanut imm. 1-imi taakkartorneqartunut atatinneqartutut isigineqartariaqarpoq.

Imm. 4-mut aamma 5-imut

Nutaatut aalajangersakkami aalajangerneqarpoq ilinniarnertuunngorniartit ukiup ilinniartitsiviusup aallartinnerani ullunik sulinngiffeqarfissanik pilersarusiortarnissaat. Tamatumani tunngavigineqarput ilinniartut angajoqqaallu sulinngiffeqarnissaminut piareersarsinnaanissaat aammali ilinniartit piareersarsinnaanissaat. Naalakkersuisut ullut sulinngiffissat pillugit sinaakkusersuisinnaanermut piginnaatinneqarnerat tunngavigalugu Naalakkersuisut ullunik sulinngiffissanik aalajangersaasinnaalissapput aamma misilitsinnissat eqqarsaatigalugit, ilinniarnertuunngorniartit tamanut atuuttussamik, aasami atuannigiffissap ullumik aallartiffissaanik aalajangersaasinnaatitaassapput. Ilinniartit sulinngiffissat pilersarusiaat sinaakkusiussat tamakku iluaniissapput.

§ 18-imut

Siullertut aalajangersakkami aalajangerneqarpoq, tunngaviusumik ilinniartitsineq aaqqissuunneqassasoq atuarfimmi atuartitsinermik nangitsinertut. Tamatumani siunertarineqarpoq, atuarfiup naggataata ilinniarnertuunngorniarternullu aallaqqaataata annertuumik qunneqartutut ilinniartunit misigineqarsinnaanissaa pinngitsoortinniarneqarnera, ilinniartitaanermik ingerlatsinerup ataqatigiissuunissaa ilanngullugu.

Tunngaviusumik ingerlatsitsinissap ilinniarnertuunngorniarternermut ilisaritsissutaaneranut ilaatigut ersiutaapput tunngaviusumik ilinniartitaanermi ilinniartitsissutissat katiterneqarnerat, tamannalu § 20-imi takuneqarsinnaavoq. Tamatumani ilaatigut takuneqarsinnaavoq ilinniartitsissutissat ilinniariaatsinut kulturimillu paasinninnermut tunngassuteqartut tunngaviusumik ingerlatsinermi inissinneqarsimmamata.

§ 19-imut

Nalunaaquttap akunnerisa amerlassusaat aalajangersarneqarpoq ilinniartitsinerup immikkoortuani siullermi ilinniartitsissutissat amerlassusaannut naatsorsuutigalugit ilinniarterup sivilissusissaanut agguaqatigiissitsinikkut. Ilinniartitsissutissanut ataasiakkaanut nalunaaquttap akunnerinik atugassiineq pissaaq § 21-mi aalajangersakkatut

Naalakkersuisut ilikkagassatut pilersaarusiaat malillugu. Tassunga eqqaaneqassaaq tusarniaareernerup kingorna nalileeqqittoqarneratigut nalunaaquttap akunnerisa amerlassusissaat 480-iniit 425-nut ikilisinneqarmata.

§ 20-mut

Imm. 1-mut

Tunnngaviusumik ilinniartitsinermi ilinniartitsissutissanik toqqagassaqaangilaq, pinngitsooranilu ilinniartitsissutissat ingerlanneqassasut ilinniartunut tamanut malinnaaffigineqartussanngorlugit. Ilinniartitsissutissat imminnut ataqatigiissuunissaat isumaqarpoq, imminnut ikorfartoqatigiinnissaat, tamatumani eqqarsaatigalugit piffissap tullerriaartumik ingerlanerani ataqatigiissakkamik ersersitsinissaat. Ilinniartitsissutissani ataasiakkaani ilisarititsinerup ilinniartitsissutissanik allanik ilinniartitsineq ikorfartortussaavaa.

Imm. 2-mut

Ilinniartitsissutissat kalaallit oqaasii, qallunaat oqaasii, tuluit oqaasii, matematik aamma timersorneq ullumikkut ilinniarnertuunngorniarfinni ilinniartitsissutissatut naluneqanngillat. Tamakkua saniatigut siunnersuummi makkuninnga nutaanik ilinniartitsissutinik pilersitsisoqarpoq: *science, ilinniartitsissutit kulturimut tunngasut, ilinniarnermilu periutsit.*

Ilinniartitsissuummi sciencemi siunertarinearpoq maannamut ilinniartitsissutit arlariisillugit pinngortitamut tunngassuteqartunik ilinniartitsissutit siunertamut tulluuttumik ataatsimoortumillu pinngortitamut tunngassuteqartunik taarserneqarnissaat, tamatumani tunngavilerniarneqarpoq ilinniartitsissutissani ataasiakkaani sulisinnaaneq B-mik aamma C-mik ajornassuseqartitat uumasulerinermi, nunalerinermi fysikimilu. Ilinniartitsissut Science arlaannaaniluunniit C-mik naleqarsinnaanngilaq. Ilinniartitsissutip iluaqutissatut atorneqarsinnaanissaa eqqarsaataaneruvoq, taamaattutullu ilinniartunut paasisutissanik katersinermut aamma pinngortitamut tunngassuteqartunik isiginninnermut periutsinut sungiusaataaassaaq. Tamatumunnga ilanngullugu ilinniartitsissutip ilinniartut pinngortitalerinermut nalunngisassanik paasisassinniartussaavai aamma paasisassinniartussaallugit pinngortitalerinermut eqqarsariaatsinik tunngaviusunik pinngortitalerinerullu sannaanik.

Ilinniarnermi periutsit pillugit ilinniartitsissutissaq taamatut atserneqarsimavoq ilinniarneq pillugu paasinnittarnermut nalinginnaasumut Danmarkimi ilinniarnertuunngorniarfinni ingerlanneqartartumut paarlaakkumanagu, pingaartinneqarneruppullu ilisimatusariaatsit tunngaviusumik ilinniartuni qaammaanneqarnissaat.

Ilinniarnermut periutsit ilinniartitsissutaavoq ilinniartut ilinniarnertuunngorniarnermi ilinniartitsissutissat pillugit nalunaatsumik namminersortumillu sulianut isiginninnissaannut sakkuusussaaq. Ilinniartitsissutip ilinniartut nutaat sungiusassavai ilinniarnermut

tunngassuteqartumik periuseqarnissamut ilinniarnep sinnerani atorneqarsinnaasunik tunngavigineqarsinnaasunillu. Taamatut ilinniartitsissuteqarnissamut pisariaqartitsisoqarsimavoq ilinniartut amerlasuut maannamut ilinniarnertuunngorniartinni suleriaatsinik pitsaasunik ilinniarisaatsinillu naammagartunik pissarsinngitsoortarmata, taamatut ingerlaavartumik ilikkarniarnemillu qitiutitsisumik ilinniartitsissummik sammisaqartoqarneq ajormat.

Ilinniartitsissutini nutaanerpaavoq kulturinut tunngasut. Ilinniartitsissut kulturinut tunngasooq ilinniartitsissutaavoq ilinniartut namminneq oqaatsiminnut aamma kulturiminnut, kulturinut arlaqartunut oqaatsinullu arlaqartunut avatangiisigisaminnut isiginninnissaminnut sakkugisinnaasaat (kulturit akimorlugit). Oqaatsit kulturilu tamani naammattuugassaapput tamakkunungalu paasinnissinnaanerup pilersittarppa tunngavissaq eqqarsarnikkut pisunut ilinniartitsissutinullu assigiinngitsunut paasinninniutaasinnasoq aammali ilinniartitsissutini assigiinngitsuni imarisaasunut. Taamatut paasinninnermi ilinniartup nalunngilikkani ilinniarnermi sinneranut iluaqutigisnaavai aamma siunissami ilinniaqarup ingerlanissaani. Nalunangitsumik taamatut ilinniartitsissummik atorfissaqartitsisoqarpoq ilinniartut maannamut ilinniarnertuunngorniartartut ilinniartoqatiminnut ilinniartitsisunullu atassuteqariaatsinik assigiinngitsunik pigisaqalernissartik amigaatigisarmassuk, oqaatsinik sakkoqarnerup aamma kultureqarnerup pingaassusaannik atuisariaqarnermikkut paasinnissimanninnermikkut. Ilinniartitsissummi sammineqartussaapput kulturit qanoq paasisariaqarnersoq, sanarfineqartarnersoq, ingerlateqqinneqartarnersoq qanorlu allanngoriartortarnersoq. Ilinniartitsissutit aamma nukittorsarniartussaavai ilinniartut namminneq kulturimikkut kinaassuseqarnermikkut ilisimaarinninnerat, tamatumalu saniatigut ersersinneqartarput tunngaviusumik eqqarsartaatsit nalunngisassallu, ilinniartullu tamakkuninnga tunngaveqarnermikki kulturit akimorlugit itinerusumik paasiniaasnaapput sanilliussuisinnaallutillu.

§ 21-mut

Maannamut iliuusaasut ilinniartitsissutissanut ataasiakkaanut anguniagassat, imarisaasut annertussusissallu ajornassutsini assigiinngitsuni, aalajangersarneqassapput nalunaarutitut ilusiliinikkut. Oqariartaatsit atorneqartut naapertorlugit tamakku ilikkagassatut pilersaarutini taaneqartarput. Ikkagassatut pilersaarutini assersuutigalugu aalajangersarneqartarput eqaatsumik nikerartitamillu ilinniartitseriaaseqarnissaq, taamaaliornermi ilinniartoq qitiutinneqartarmat ilinniartullu ataasiakkaat ilikkarniarnep ikiorserneqartarmat. Tamatumasaniatigut ilinniartitsinermut pilersaarutit eqqanaarniartussaavaat ilinniartitsissutini iliutsit ajornassutsillu assigiiarnerusut, taamaaliornermilu ilinniartitsiviit sumiinnerat apeqqutaajunnaartarpoq, ilinniartitsissutit anguniagassartaannut, imarisaannut annertussusaannullu.

Iikkagassatut pilersaarutini aamma aalajangersarneqarsinnaapput maleruagassiat annertunerpaatigut ilinniartitsissutissani kalaallit kulturiannik ilinniartullu kalaaliussutsimikkut misilittagarisaannik taputartuussisut.

§ 22-mut

Ilinniarnermi sammivissamut toqqaanermut tamatumanilu siunertaqarneq pillugit tamanna pillugu nalinginnaasumik oqaaseqaatit innersuussutigineqassapput.

Ilinniartitsissutissani itisilerineq isumaqarpoq, ilinniartup sammivittut toqqakkamigut aamma ilinniartitsissutissani toqqakkamigut ilinniartitsissutini aalajangersimasuni itinerusumik samminnisinnaanera aamma ilinniartitsissutit sammiviinut. Ilinniartitsissutit nukittorsarneqarnerat pivoq ilinniartitsissutit ajornassusilersornerisigut.

§ 23-mut

Tiimit amerlassusissaattut ungaluliussat aalajangerneqarput, ilinniakkatut sammivinni ataasiakkaani ilinniartitsissutit qassit qanorlu killiffeqarlutillu tiimeqartut minnerpaaffissaattut annerpaaffissaattullu ilimagisaasut aallaavigalugit.

§ 24-mut

Imm. 1-mut

Tamanna isigineqassaaq tunngaviusumik ilinniartitsinermut naleqqiullugu tamatumanimi ilinniartitsissutissat tamarmik pinngitsoorani ingerlatassaammata.

Imm. 2-mut

Piumasaqaataasumut peqqutaavoq ilinniartitaanerup qaffasissutsimigut, Danmarkimi ilinniaqqiffissanut ilinniarsinnaanermut piginnaassuseqarnissamik piumasaqaateqarnertut.

§ 25-mut

Imm. 1-imut

Taamaattoqarneratigut eqqanaarneqassaaq, ilinniarnertuunngorniartarnerup Danmarkimi ilinniarnertuunngorniartarnertulli qaffasissuseqarnissaa, taamaattutullu Danmarkimi ilinniaqqiffissanut piginnaassuseqarnermik piumasaqaataasunut naammassinnissimanissaa. Tassunga atatillugu ilisimatitsissutigineqassaaq, ilinniakkatut sammivik, taamaallaat marlunnik killiffilinnik A-miittunik ilinniagassartalik Danmarkimi ingerlaqqiffiusumik ilinniakkat ilarpassuini ilinnialernissamut naammangimmat. Taamaakkaluartoq ilinniartitsissutissat sorliit ilinniartitaanerni pinngitsoorani ingerlanneqassanersut aamma qanoq ajornassuseqassanersut imm. 2-mi aalajangersakkanut naleqqiullugit isigineqartussaapput tamatumanimi ilanngullugit pinngitsoorani ilinniartitsissutissat

sammivinni assigiinngitsuni tamani sumik sammiveqarnermik aallaaveqarnikkut ajornassusissaat ilinniartitsissutissallu suuneri aalajangersarneqartarmata. Taamaalilluni aamma ilimagineqarpoq ilinniakkatut sammiviit amerlanerpaartaat killiffik A-miittunik marlunnik amerlanernik ilinniartitsissutitaqassasut.

Ilinniartut ataasiakkaat ilinniarnermi suliaasa GU-mi annertuumik allaatigisassaq taarserpaa.

Imm. 2-mut

Aalajangersakkami taamaallaat aalajangerneqarpoq ilassutitut pinngitsoorani ilinniartitsissutissaqarnera, aalajangersarneqanngilarli ilinniartitsissutit sammivinni ataasiakkaani suunersut qanorlu ajornassuseqassanersut. Tamakkua ilinniarfinni ataasiakkaani ilinniartitaanerup sammiviinik aalajangersimasunik ingerlatalinni aalajangersarneqassapput, Naalakkersuisut § 29 imm. 3 tungavigalugu sinaakutissatut aalajangersarsimasaat naapertorlugit.

§ 26-mut

Toqqagassatut ilinniartitsissutissat sammivinnut ilinniartitsivinni taamaallaat neqeroortigineqartussaapput tungaviumik ingerlatsinermiunngitsoq.

Toqqagassatut ilinniagassat siunertaraat ilinniartut ilinniartitsissutissanik soqutigisaminnik toqqaasinnaansaat, tamatumani ilinniaqqinnissaminnut iluaqutigisinnaasaminnik, tassami ilinniaqqiffinni assigiinngitsuni ilinniartitsissutissat aalajangersimasut aalajangersimasumillu ajornassuseqartut piginnaaneqarfiginissaat piumasaqaataasarmat. Ilinniaqqinnissaq eqqarsaatigalugu eqqortunik toqqagassatut ilinniartitsissutissanik ilinniartup toqqaaneratigut ilinniarnertuunngorniarnep naammassereerneratigut ilassutitut ilinniagassanik ingerlatsisariaqartarnek pinngitsoorneqarsinnaasarpoq.

Imm. 1-mut

Aalajangersakkami eqqanaarneqarpoq, ilinniartut tamarmik ilinniarnertuunngorniarnarfinni sorlermiluunniit ilinniaraluarunik, ilinniartitsissutissanik assigiinngitsunik ajornassuseqartunik immaqalu ungasianiit ilinniartinneqarnikkut imaluunniit katiterinikkut iluarsaassanik toqqagassaqarnissaat. Ilinniarnermi sammivissamik toqqaanerup saniatigut ilinniartut periarfissinneqarluarput ilinniarnerminnik imatut katiterinissamut, soqutigisatik piginnaasatigullu aalluarsinnaassallugit.

Imm. 2-mut

Tamatumunnga pissutaavoq tuluit oqaasii minnerpaamik B-mik ajornassusillit ilinniaqqiffinni piginnaaneqarfigissallugit piumasaqaataasarmata. Ilinniartut tuluit oqaasiinik tamanik ajornassusilinnik ilinniartitaanissamut neqeroortigineqartussaapput, taamaaliornermi ilinniartitsineq taamaattoq ungasianiit ilinniartitaanertut malinnaavigisariaqarnagu, ilinniarnertuunngorniarnarfiup taamatut neqeroortiqannginnera pissutigalugu.

Imm. 3-mut

Piginnaatitsissutip ilaatigut Naalakkersuisut periarfissippai, ilinniarfiit tamarmik imaluunniit ilinniarfiit aalajangersimasut aalajangersimasunik toqqagassatut ilinniagassanik aalajangersimasunik ajornassuseqartunik neqerooruteqarnissaq pilersitsinissarlu pillugit maleruagassiornissamut. Assersuutigalugu aamma maleruagassaasinnaapput ilinniartitsisut sunik piginnaasaqarnissaannut, toqqagassatut ilinniartitsissutissat aalajangersimasunik ajornassusillit neqeroorutiginerini pilersinneqarnerinilu. Aamma tassaasinnaapput ilinniartitsissutit toqqagassat neqeroorutaasut pilersinneqarneri, holdit annertussusissaat ilanngullugit, piumasaqaatitaat pillugit malittarisassat.

§ 27-mut

Aalajangersagaq tunngaviusumik ilinniartitaaneq pillugu, tak. § 21, aalajangersakkamut naapertuuppoq. Taamaattumik oqaaseqaatinut tamatumunnga tunngasunut innersuussisoqarpoq.

§ 28-mut

Aalajangersakkami pineqarpoq ilinniakkatut sammivinni ataasiakkaani ilinniartunngorneq. Ilinniarnertuunngorniarfiit ataasiakkaat ilinniakkatut sammiviit assigiinngitsut neqeroorutigimmatigit ilinniakkatut sammivimmik toqqaaneq pisut ilaanni aamma atuarfimmut allamut nuunnermik kinguneqarsinnaavoq.

Ilinniartut tunngaviusumik atuarnertik apeqqutaatinnagu ilinniakkatut sammivimmi kissaatigisaminni ilinniartunngorsinnaanerit ilinniakkatut sammivimmi ilinniartunngorsinnaaneq pillugu aalajangersakkani qulliunerusumik aallaavigineqarpoq. Ilinniarnertuunngorniarfiilli tamarmik ilinniakkatut sammiviit assigiit neqeroorutigiumangimmatigit, kissaatigineqartoq akuerineqarpat atuarfimmut allamut nuunnissaq pisut ilaanni pisariaqarsinnaavoq. Isumalluutit pissutigalugit aammattaaq ilinniakkatut sammivimmut qinnuteqartut tamarmik tamatigit tiguneqarsinnaanngillat. Taamaammat taamatut pisoqarnerani qanoq iliortoqarnissaa pillugu malittarisassanik aalajangersaasoqarpoq.

Ilinniartut ilinniarnertuunngorniarfimmi sorlermi ilinnialernerat apeqqutaatinnagu ilinniakkatut sammivinnik assigiinngitsunik toqqaasinnaanissaannik kissaateqarneq aalajangersakkani aammattaaq aallaaviuvoq, ilinniartut taamaalillutik aallaviusumik assigiimmik periarfissaqarniassammata.

Imm. 1-imut

Imm. 3-miit 6-imut allassimasutut, ilinniartup ilinniakkatut sammivittut kissaatigisami ilinniarnertuunngorniarfissatullu kissaatigisamini ilinniagaqalersinnaaneq qulakkeersinnaanngimmagu aalajangersakkami aalajangersarneqarpoq ilinniartup ilinniakkatut savimmik toqqaanermi ilinniakkatut sammiviit ilinniarnertuunngorniarfiillu sorliit ilinniarfigissallugit kissaatigisani tulleriinnilersorlugit allassavai. Taamaalilluni ilinniartup ilinniakkatut sammiviit ilinniarnertuunngorniarfiillu arlallit pingaarneniit tulleriaarlugit allattariaqassavai.

Imm. 2-mut

Ilinniakkatut sammivimmi ilinnialernermut aallaavik tassaavoq ilinniartup ilinniakkatut sammivittut ilinnialernissamik kissaatigisaani sapinngisamik ilinnialernissaa.

Imm. 3-mut

Aalajangersagaq taanna isumalluutit pillugit isumaliutersuuteqarnermik tunngaveqarpoq, tassa ilinniartup ilinniarnertuunngorniarfimmi aallartiffimminiiginnarnissaa akikinnerussammat.

Imm. 4-mut

Aalajangersagaq taanna isumalluutit pillugit isumaliutersuuteqarnermik tunngaveqarpoq, tassa ilinniartup ilinniarnertuunngorniarfimmi allami ilinniakkatut savimmik ilinniarnissaa nammineq kommunerisami ilinniarnertuunngorniarfimmiinneranit akikinnerussammat.

Imm. 5-imut

Taamatut pisoqarnerani ilinniartuq aallaaviusumik, soorlu imm. 2-mi allaqqasoq, ilinniarnertuunngorniarfimmi ilinniartup ilinniarfissatut kissaatigisaani ilinniakkatut sammivimmi ilinniartunngussaaq.

Imm. 6-imut

Oqaatsimi ”amerlassusii killilerlugit ilinniartut amerlinerat” imatut paasineqassaaq atuarfiup ilinniartorisinnaasaasa amerlassusii annikitsumik qaangerlugit. Sumiiffimmi pissutsit apeqqutaatillugit tassaasinnaapput ilinniartuq ataatsimiit ilinniartunut qulinut.

§ 29-mut

Ilinniarnertuunngorniarfiit neqeroorutaat ilinniakkatullu sammisat pilersinneqarneri aalajangersakkami eqqartorneqarput. Ilinniakkatut sammiviup neqeroorutigineqarnera isumaqanngilaq aamma pilersinneqassasoq, tassa ilinniakkatut sammivimmut naammattunik qinnuteqartoqarnerisooq pilersinneqarnissaanillu Naalakkersuisut akuersinersut tassani apeqqutaammat.

Imm. 1-imut

Aallaaviuvoq ilinniakkatut sammiviit suut neqeroorutigerusunerlugit ilinniarnertuunngorniarfiit ataasiakkaat namminneq aalajangissagaat.

Imm. 2-mut

Isumalluutunik pingaarnertut isiginninneq aalajangersakkamut tunngaviuvoq, tassa ilinniakkatut sammiviit annikitsuinnarmik ilinniagarineqartut sumiiffinni assigiinngitsuni pilersinnissaat pissusissamisuumngitsuusinnaammat, taamaattoqassapat atuaqatigiiaani amerlanerusuni atuaqatigiinnik ikittuinnarnik pilersitsisoqassammat.

Ilinniarnertuunngorniarfiup ilinniakkatut sammivimmik aalajangersimasumik neqerooruteqarnissaanik akuerineqannginneranut pissutsit immikkut ittut tassaasinnaapput ilinniakkatut sammiviup neqeroorutiginnissaanut atuarfiup Naalakkersuisut naliliinerat malillugu naammattunik isumalluuteqannginnera.

Imm. 3-mut

Aalajangersakkami siunertaavoq ilinniarnertuunngorniarfiit ilinniakkatut sammivinnik pilersitsinerannut malittarisassanik aalajangersaanikkut pingaarnernik sinaakkutunik Naalakkersuisut aalajangersaanissamut periarfissaqarnissaat. Tamassumunnga pissutaasinnaavoq ilinniakkatut sammivinnik ilinniartut amerlanerit ilinniagarissallugit kissaatigisaannik atuarfiit neqerooruteqarnissaasa qulakkeerneqarnissaanik kissaateqarneq. Aammattaaq malittarisassiuunneqarsinnaassaaq, ilinniakkatut sammiviit akuerineqarsinnaanersut, sumiiffimmi allami ilinniakkatut sammivittut taaguuteqarnissaat piumasaqaatigalugu.

§ 30-mut

Imm. 1-imut

Nammineq piumassutsimik ilinniartitsineq assersuutigalugu tassaasinnaavoq ilinniagassanik ilinniarneqareersimasunik ilinniartitsineq. Ilinniartut ilinniakkamik paasinninnissamik ajornartorsiuteqartut taamaalillutik ilinniakkamik uteqqiinissamut periarfissaqassapput. Nammineq piumassutsimik ilinniartitsineq aamma tassaasinnaavoq qulequttanik ilinniartitsinermi nalinginnaasumi ilaasunik ilinniartitsineq. Taamaammat neqeroorut ilinniartunut ilinniakkamik paasinninnissamik ajornartorsiuteqartunut ilinniartunullu ilinniartitsissutini assigiinngitsuni allatut isiginnilerumallutik immikkut ilinniartinneqarnissamik kissaateqartunut ilinniartitsinertut isigineqarsinnaavoq.

Nammineq piumassuseralugu ilinniartitsinerummat pissusissamisoortut isigineqarpoq erseqqissassallugu qulequttat ilinniartitsissutigineqartut ilinniartitsissummi pineqartumi misilitsinnermut ilaatinneqarsinnaanngitsut.

Imm. 2-mut

Piffissap ilinniartitsiviusup avataani sammisaqarnernut aalajangersagaq tunngavoq. Rektori atuarfimmi qulliunerusumik akisussaavoq, taamaammallu rektorip akuersinissaa taamaallaat ilimagineqarsinnaavoq ingerlatat avatangiisini toqqissisimanartuni ingerlanneqarsinnaappata, tassunga ilanngullugu ingerlataqarnermi nakkutilliisoqarnera.

§ 31-mut

Imm. 1-imut

Kalaallit Nunaani ilinniarnertuunngorniarfinni ilinniartitsineq pillugu malittarisassani maannakkut atuuttuni ilinniartitsineri oqaatsit pillugit malittarisassanik aalajangersaasoqarnikuunngilaq. Kalaallisut qallunaatullu ilinniartitsisoqartarmat naggat siulleq periutsimik atuutilersitsineruvoq.

Nangitsilluni ilinniartitsineri Kalaallit Nunaannilu ilinniarnertuunngorniarfianni ilinniartitsineri qallunaat oqaasii maannamut pingaernerupput. Oqaatsit atorineqartut pillugit periuseq ilinniartunut kalaallisut oqaasilinnut ajornartorsiutaanikuuvoq sulilu ajornartorsiutaalluni, taakkulu qallunaat oqaasiinik oqaatsit appaattut allamiullu oqaasiattut pisinnaasaqarlutik oqaatsit ilitsoqqussat aallaavigalugit akuttunngitsumik ilinniartinneqartarput. Tamanna ilinniakkamik unitsitsinerimik, ilinniarnermi ajornartorsiuteqarnermik ilinniartitsinerimillu amigartumik pissarsiaqarnermik kinguneqartarpoq. Taamaammat siunertaavoq ilinniarnertuunngorniarfinni ilinniartitsineri kalaallit oqaasii annertunerusumik atorlugit ilinniartitsisarneq atuutilersikkiartuaarneqassasoq.

Ilinniartitsineri atortut amerlanerit taamaallaat qallunaatuujuneri aammalu siunissami sivisuumi taamaattoqarnissaa nassuerutigalugu ilinniartitsineri qallunaat oqaasii sulit atorineqarsinnaassapput. Taamaaliornikkut ilinniartitsissutini ilinniartut pisariaqartitaat ilikkagaqarnissamullu pisariaqartitaat malinneqassapput.

Siunertaanngilaq ilinniartitsineri oqaatsit marluk tamakkiisumik atorineqassasut, kisiannili pisariaqartitanut, periarfissanut siunertamullu naleqqussarneqassallutik. Tamanna isumaqarpoq assersuutigalugu pisariaqartitsisoqalerpat ilikkagaqarnissamullu periarfissaqalerpat oqaatsit aappaat ikiuutaassasut, assersuutigalugu allaaserisat oqaasertaani, suliassat oqaasertalersornerini, oqaatsit marluk atorineqassallutik imaluunniit ilinniartut iluminni sulinerminni oqallinnerminnilu kalaallit/qallunaat oqaasiisa atornissaannut periarfissaqassallutik.

Naggatit aappaanni siunertaavoq erseqqissassallugu, tuluit oqaasii oqaatsillu allat naapertuuffiatigut imaluunniit pisariaqarfiatigut ilinniartitsineri oqaatsinut ilaatinneqarsinnaasut, soorlu oqaatsinik ilinniartitsineri. Oqaatigineqassaarli ilinniartitsineq oqaatsit aappaannut allallu oqaasiinut naleqqussarneqassasoq. Tuluit allallu oqaasiisa atorineqarneranni atortut ilinniartitsineri oqaatsit ilanngunneqarnerattut isigineqassaaq.

Imm. 2-mut

Oqaatsinut immikkoortunut, oqaatsit naanilersornerinut, oqaaseqatigiinnik nalilersuinermut, uniffilersuinermut, utertaarinermut il.il. ilinniartut meeqqat atuarfianni ilikkagaannut tunngatillugu ilinniartup oqaatsitigut pisinnaasaata misilittagaasalu annertusarnerisigut ilinniartuq ilinniartitsinermi qitiuvoq. Oqaasilerinermi ataatsimoorullugu oqariartaatsit ilinniartitsinermi atorneqassapput, taamaalilluni kalaallit, qallunaat tuluillu oqaasiinik ilinniartitsinerit erseqqarissumik imminnut atanissaasa qulakkeerneqarnissaanut tapersiissallutik.

§ 32-mut

Ilinniarnertuunngorniartfinni ilinniartitsissutit amerlanerit kalaallit ilinniartut ilitsoqqussaralugu oqaasii atorlugit ilinniartitsissutigineqarneq ajorput. Tassani ilinniartitsisup oqaatsinik paasisimasaqarnissaa pisariaqarpoq. Tamassuma kinguneraa ilinniarnertuunngorniartfinni ilinniartitsisut tamarmik annertunerusumik annikinnerusumilluunniit oqaatsinik ilinniartitsisusariaqarnerat, aamma ilinniartitsissutini inuiqatigiinnik aamma pinngortitamik ilisimatusarnermi. Tamanna oqaatsit aappaannik ilinniartitseriaatsimik paasisimasaqarnissamik ilinniartitsisullu ilinniartitsinermik ilisimasaqarnissaanik pisariaqartitsiviuvoq, taamaalilluni tiimini ilinniartitsiviusuni tamani ilinniartitsissutini ilinniakkat oqaatsitigut suliarneqarnissaat inissaqartinneqassalluni.

Assersuutigalugu ilinniartut oqaasiinnartigut qallunaatut attaveqarnerminni eqqarsarlutik nutserillutillu unillatsiarnissaat ilinniartitsisup akuerisariaqarpaa ilinniartullu oqaatsit ilinniakkat imaannik ilitsoqqussatik atorlugit annertuumik nassuiaasittarlugit oqallitsillugillu. Ilinniarnertuunngorniartfimmi ilinniartitsisut tamarmik aamma ilinniartut ilinniakkaminni qallunaatut oqaatsit nalunngisaasa annertusarnissaat suliniutigissallugu ilimasariaqarpaat, ilinniartitsisut aammattaaq assilisanut ilinniagassanullu tunniunneqartunut immikkut nalunaarsukkanik akuttunngitsumik suliaqartariaqarput.

§ 33-mut

Imm. 1-imut

Ilinniartitsinermi atugassatut atuagarsornerup pingaartinneqarnissaa pillugu malittarisassani maannakkut atuuttuni tamanut tunngasunik aalajangersagaqanngilaq. Kisiannili Htx pillugu malittarisassani aalajangersarneqarnikuuvoq ilinniartitsinermi atuagarsorneq sullivillu atorneqassasut. Aammattaaq Htx pillugu aalajangersakkani aalajangersarneqarpoq ilinniartitsineq ilinniartitsissutini atuagarsorneq, periutsinik aammalu inuussutissarsiornermi pissutsinik tunngaveqassasoq.

Ilinniartitsinermi atuagarsornerup pingaarnerutillugu atorneqarnissaa isumaqarpoq atuagarsorneq kisiat aqqutigiginagu ilisimasaqalernissaq siunertaralugu ilinniartitsissutini

qulequttanik ilinniartuq ilinniartinneqassasoq. Ilinniagaqarneq ilinniartitsinermi immikkoortut atorneqarsinnaasut ilanngullugit iliuuseqarsinnaanermut aamma tunngassuteqassaaq.

Imm. 2-mut

GU pillugu nalunaarummi ilinniartitsissutitut ilanngussatut aalajangersarneqarpoq ilinniartitsissutini tamani ilinniartitsinermi IT ilanngunneqassaaq.

Ilinniartitsissutini tamani ilinniartitsinermi IT atorneqarnissaa piumasagaat ilaatigut ilinniartut ilikkagaqartarnerat annertusarniarlugu IT-p atortutut pingaaruteqassusianik takutitsisutut isigineqassaaq. Tulliullugu siunertaavoq IT-p atorneqarnissaa pillugu piumasagaat aamma isumaqarpoq ilinniartut atuinerikkut IT-p atornissaa ilinniartaraat sungiuttarlugu.

IT-p atorneqarnissaa pillugu piumasagaat annertunerusumik nassuiarneqanngilaq. Taamaammat ilinniartitsisut nammineerlutik nalilersussavaat ilinniartitsinerminni IT qanoq pitsaanerpaamik ilanngutissanerlugu.

Imm. 3-mut

Malittarisassat atuuttut malillugit GU-mi ilinniartitsinermi ilinniariaatsit sungiusarnerat aamma ataavartumik ilanngunneqartassasut.

Ilinniarnermi periutsit ilinniartut tunngaviumik atuarneminni ilinniartitsissummi ilinniartitsineq pillugu ilikkagaasa ataavartumik sungiusarnermikkut annertusarnissaasa qulakkeerneqarnerannut taperseeqataassapput. Ilinniarnermi periutsumik sungiusarneq taamaalilluni ilinniartut ilinniarnertuunngorniarfimmi ilinniakkanik sammisaqarnerminnut ilinniaqqinnerminni aamma atorsinnaasatik ilisimallugit nammineerlutillu isummernissaannut ataavartumik ikiuutaassaaq.

§ 34-mut

Ilinniarnermi takusassarsiorneq, paasisassarsiorneq il.il. maannakkutut imatut paasineqassaaq ilinniartut ilinniartoqatigiillutik ullumi ataatsimi amerlanernilluunniit angalanerat. Paasisassarsiornerit piffissami sivikitsumi ingerlanneqarsinnaapput. Ilinniarnertuunngorniarfiup avataani nunami namminerminni allaniluunniit ilinniartitsineq pineqarpoq.

§ 35-mut

Ungasissumiit ilinniartitsineq ilinniartunut assigiinngitsunik pissuteqarlutik ilinniartitsinerminni nalinginnaasumik aaqqissuussami malinnaasinnaangitsunut neqeroorutaasinnaavoq tulluortoq. Ungasissumiit ilinniartitsineq ilinniartunut ataasiakkaanut imaluunniit ilinniartoqatigiinnut immikkut piunassuseqartunut ilinniartitsinermut nalinginnaasumut tapiutaasinnaavoq. Assersuutigalugu eqqarsaatigineqarsinnaavoq ungasissumiit ilinniartut

avataaneersut ilinniakkani ataasiakkaani toqqakkani ilinniartitsinissamik
neqeroorfigineqarsinnaapput imaluunniit ungasissumiit ilinniartut
ilinniarnertuunngorniarfimmiittut ilinniakkani qaffasissuni nammineq atuarfigisami
neqeroorutigineqanngitsunik ilinniartinneqarnissamik neqeroorfigineqarsinaallutik.

Imm. 2-mut

Ilinniartup pisussaaffigaa ilinniartup ilinniarnertuunngorniarfimmi ilinniarnarata
aaqqissuunnissaanik sapinngisamik ikiussallugu, taamaalilluni pisariaqanngitsunik
kinguarsaanani tamanna ingerlanneqarsinnaaniassammat.

Imm. 3-mut

Ungasianiit ilinniartitsineq pillugu annertunerusumik malittarisassat ilaatigut tassaasinnaapput
ungasianiit ilinniartitsinermut nalunaarnissamut tunngatillugu allaffissornikkut pissutsit
immikkut itlut.

§ 36-mut

Imm. 1-imut

Namminersorlutik Oqartussat United World College-mut tamanna pillugu isumaqatigiissutaat
aqqutigalugu kalaallit ilinniarnertuunngorniarfimmi ilinniartut 1. G-mik
naammassinnissimasut marluk ukiut tamaasa Norgemi Canadamilu United World College-p
ilinniarnertuunngorniarfiini ilinniarnerminnik naammassinnissamut periarfissillugit. Atuarfiit
nunat tamat akornanni ilinniarnertuunngorniarfinni ilinniarnarit, International Baccalaureat
(IB) neqeroorutigaat, taannalu nunat tamat akornanni akuerisaavoq Kalaallillu Nunaanni ,
Qallunaat Nunaanni nunanilu allani ingerlaqqilluni ilinniartinnut isissutaasinnaalluni.

Oqaaseqatigiinni "ilinniartitsinerup ilaa" erseqqissarneqarpoq ilinniarnertuunngorniarfimmi
ilinniarnarup tamarmi nunani allani ingerlannissaa pineqanngitsoq. Taamaattoqarpat
ilinniarnertuunngorniarfimmi ilinniarnarup inatsimmi uani ilaanngilaq. Ilinniarnarup ilaa
ilinniarnarit immikkoortitaarneranni ukiut marluk tikillugit allanngorsinnaavoq.

Nunani allani ilinniartinnut ilinniartuusinnaanermut piumasaqaataavoq aaqqissuussinerussaaq
immikkut ittoq siumut pilersaaruseriigaq Naalakkarsuisut akuerisaat. United World College-
p ilinniarnertuunngorniarfiani ilinniarnarit oqaatigineqareersut eqqarsaatigalugit taakku
aaqqissuussinermik immikkut ittumik akuerisaasumik taamaattumik takutitsipput. Ilinniarnarup
siumut pilersaaruseriigaareerpoq, imatut paasillugu aaqqissuussinerup iligigaa, ilinniartunullu
ataasiakkaanut ilinniarnarup soorunami siumut pilersaaruseriigaanngilaq, tassa aaqqissuussinerni
taamaattuni peqataaneq tassunga qinnuteqartut tamarmik akornanni toqqaaneq
tunngaviusarmat.

Nunami allamiinneq siumut pilersaaruseriilerlugu immikkut aaqqissuussinerunissaa pillugu
piumasaqaat ilinniarnarup ilinniartumut siunertaanngitsumik kinguneqannginnissaata

qulakkeerneqarnissaanik kisaateqarneq tunngavigalugu isigineqassaaq. taamaalilluni tamanut tunngatillugu qulakkeerneqassaaq ilinniarneq Kalaallit Nunaanni ilinniarnertuunngorniarfinni ilinniarnermut tunngatillugu pisinnaasaqarfiulissasoq, ilinniarnerrullu ilinniarneq tamaat isigalugu ilinniarnernut qaffasinnerusunut atatillugu ilinniagaqarsinnaannginneq kingunerissanngikkaa.

Immikkoortumi kingullermi aalajangersarneqarpoq tunngaviusumik ilinniarneq nunani allani ingerlanneqarsinnaanngitsoq. Tamassumunnga tunngavilersuutaavoq tunngaviusumik ilinniarnernup ilinniartup ilinniarnertuunngorniarfimmi ilinniakkaminik naammassinninnissaanut naammattumik tunngaviunissaanut pisariaqartutut isigineqarnera.

Imm. 2-mut.

Ajornartorsiutit siumut naatsorsuutigineqanngitsut kingunerisinnaavaat ilinniarnertuunngorniarfimmi ilinniarnernup nunani allani naammassineqarsinnaannginnera. Ilinniarfigisami pissutsinut ajornartorsiutilluunniit siumut naatsorsuutigineqanngitsut allat kingunerisinnaavaat ilinniarnissap pilersaarutaasup ingerlanneqarsinnaannginnera. Aamma tassaasinnaapput pissutsit ilinniartunut ataasiakkaanut tunngasut. Ilinniarfik pisussaavoq ilinniartup ilinniarnertuunngorniarfimmi ilinniarnissaata aaqqissuunnissaanik ilinniartoq sapinngisamik ikiussallugu. Pisut ilaanni ilinniarnertuunngorniarfimmi ilinniartup ilinniarfigisaani ilinniartoq ingerlaqqissinnaavoq. Pisuni allani ilinniarnertuunngorniarfimmu allamut ilinniartoq nuussinnaavoq, taamaalilluni nunami allami ilinniarfimmi ilinniarnissamik kisaateqarnermi tunngavilersuutit malinneqassallutik.

§ 37-mut

§ 33, imm. 1-mi aalajangersakkani pineqarput ilinniartitsinerup ingerlanneqarnissaanut atatillugu suleriaatsit, § 37-imili pineqarput ilinniartitsinerup pilersaarusiornissaanut ilinniartitsinermi tunngaviit. Ilinniartitsinerup pilersaarusiornissaanut ilinniartitsinermi tunngavinni isiginiarneqarpoq ilinniartunut ataasiakkaanut tunngatillugu ilinniartitsinerup ataavartumik pilersaarusiornissaa, ilinniartitsinermilu anguniakkat ataatsimut isigalugit ilinniakkanilu ataasiakkaani piviusunngortinnissaat.

Ilinniartut tamaasa unammilligassaqaletillugit ilinniartullu tamaasa peqataatilerlugit Ilinniartitsinerup aaqqissuunnissaanik piumasaqaat kinguneqarpoq ilinniartut ataasiakkaat immikkut kulturikkut ilinniakkatigullu pisinnaasaat aallaavigalugit ilinniartitsisup ilinniartitsinini pilersaarusiussagaa aammalu ilinniartut tamaasa ilinniartitsinerup imminnut tunngatinneqartut misigitilerlugit.

Tassa ilinniartitsinerup allanngorartuunissaa pineqarpoq. Allanngorartumik ilinniartitsinermi ilinniartut assersuutigalugu sammisamik assigiimmik suliaqarsinnaapput, kisiannili ilinniagaq assigiinngitsunik suliaralugu. Taamaammat pingaartuuvoq ilinniartut misilittagaannik kulturikkut tunuliaqutaannik ilinniarnermi atortutut ilinniartitsisup atuinissaa. Kisiannili

aamma piviusuviuvoq atuatigiinni ilinniartut assigiinngitsunik oqaasillit ilinniartitsinnissaat immikkut unammilligassaqaqfeqartoq. Uani ilinniartut kulturikkut tunuliaqutaat kisiat ilinniartitsisup isiginiassanngilaa, kisiannili aamma ilinniartut ataasiakkaat ilinniariaasiat ineriartorsimanerallu, minnerunngitsumillu ilinniartut ataasiakkaat oqaatsinik assigiinngitsunik ilikkagaqarnissaat eqqarsaatigissallugu.

Ilinniartitsinerup imatut aaqqissuunnissaanut ilinniartut suleriaatsit assigiinngiaartut nutaaliorfiusullu ilinniartut ilinniakkani tamani misigisaqartinnissaannik piumasaqaat, tassunga ilanngullugu ilinniakkani taaguutit pinngortarneri, ilinniartitsinerup assigiinngiaartuunissaanik piumasaqaammut ilassutaasutut isigineqassaaq.

Suleriaatsit assigiinngiaartuunissaannik piumasaqaammut tunngaviuvoq suleriaatsit assigiinngiaartuunissaat ilinniartut ataasiakkaat ilinniagaqarnerminni kajumissuseqarnissaat ilikkagaqarnernissaallu. Taamaammat ilinniakkani ataasiakkaani ilinniartitseriaatsip ataasiinnaap aalajangersimasup atorneqannginnissaa ilinniartitsisut ataasiakkaat qulakkiissavaat.

Suleriaatsit siuariartuutaanissaanut piumasaqaammut tunngaviuvoq ilinniarnarnerup kajumissaataanisaa siuariartuutaanissaallu, ilinniartut ilinniakkami ilinniagaqarnermi ilisimasaasa ingerlaavartumik ineriartornerat ilutigalugu aammalu suleriaatsit unammilligassaqaqarnerujartuinnarnerat aqqutigalugu annertunerujartortumik unammilligassaqaqaleriartornissaat.

Oqaatsinik pilersitsisarnerup siuariartuutaanissaanut piumasaqaat tunngaveqarpoq ilinniartut ilinniagaqarnerminni ilisimasaasa ineriartornissaanut piumasaqaataammat ilinniakkami oqaatsinik pilersitsisarnerisa ingerlaavartumik ineriartornissaat piumasaqaataammat. Ilinniarneq tamaat isigalugu ilinniakkanilu ataasiakkaani anguniakkat anguneqarnissaanut piumasaqaammut atatillugu piumasaqaat isigineqassaaq.

Ilinniartitsinerup imatut aaqqissuunnissaanut piumasaqaat ilinniartitsinermi anguniakkat ataatsimut isigalugit ilinniakkanilu ataasiakkaani anguneqarlutik tunngaveqarpoq ilinniartitsisoq tamatigut ilinniakkami anguniarneqartunut ilinniakkanullu ataasiakkaanut tunngatillugu ilinniartut ataasiakkaat ineriartornissaat ilinniartitsisup tamatigut isiginiagaqarnissaanik. Tamanna isumaqarpoq ilinniartitsinissamut pilersaarutini anguniakkatut aalajangikkat ilinniartut tamarmik angussagaat ilinniartitsisup qulakkiissagaa.

§ 38-mut

Imm. 1-imut

Aalajangersakkami oqaasertaq isumaqarpoq rektorip nalilersussagaa ilinniartitsisut sorliit ilinniartitsisoqatigiinni ilaassanersut.

Imm. 2-mut

Ilinniartitsisoqatigiit suliassaat aalajangersakkami aalajangerneqarput. Tassani ersippoq suliassat perorsaannermut ilinniarnermullu taakkunungalugu allaffissornermi suliassaanut atasut.

Klassimi kulturi klassimilu atugarissaarneq takussutissaavoq ilinniartut peqatigiinnermi ilaasutut misiginerannut, tassani toqqissisimallutik misigalutik. Tamanna ilinniakkani ineriartornermut tunngaviliivoq.

Ilinniartitsisoqatigiit perorsaannermi ilinniakkanilu suliassat ikorfartuutaasut tassaagajussapput, tassani klassip suliassat allaganngorlugit tunniussassaat, ataatsimoorullugu oqaasilerinermik ilinniartitsineq, IT-mik ilisaritsineq il.il. imatut ataqatigiissarneqassallutik ilinniartut pitsaanerpaamik pissarsillutik. Perorsaannermi suleqatigiinneq, tassani klassip ilinniartitsisuisa suliniutit ataqatigiissassallugit, taamaalilluni klassimi ilinniakkani piffissat ilaanni perorsaanerit perorsaannermilu suliniuteqarfiit assigiit atorineqassallutik, ilinniartullu ilinniarnertuutut nammineertutut iliuuseqarnermik ilikkagaqarnerannut ikiuutaassallutik. Perorsaannermi suliniuteqarfiit assersuutigalugu tassaasinnaapput atuarnermut pilersaarutit, allattuariaaseq, oqalussinnaaneq, ilinniakkanik saqqummiineq il.il.

Ilinniartitsisoqatigiit suliassaat meeqqat atuarfianni klassimi ilinniartitsisut suliassat ilaatigut assersuunnarsinnaapput.

Allaffissornermi suliassat ilinniartitsisoqatigiit pillugit anguniakkanut tunngasut assersuutigalugu tassaasinnaapput ilinniartut atugarissaarnerannik nalilersuineq, suleqatigiit ataatsimiinneri klassimilu ilinniartitsisunik allanik ataatsimeeqateqarnerit.

Imm. 3-mut

Klassimi ilitersuisup suliassaasa ilaat ilinniartitsisoqatigiinni ilinniartitsisut ataasiakkaat ilinniartitsisoqatigiillu suliassaat ilaatigut assigaat. Ilinniarnermi ilitersuisup ilinniartitsisoqatigiillu immikkoortuni taakkunani suliaminnik ataqatigiissaarinnissaat taamaammat pingaaruteqarpoq.

Ikorfartuisoqartitsilluni aaqqissuussinernik pilersinnernut peqataasussaataaneq, ilinniartut ilinniakkaminni inunnillu attaveqartarnermi ineriartornerisa nukittorsarnissaannik kissaateqarnermik tunngaveqarpoq.

Imm. 4-mut

Ilinniartut ataasiakkaat ilikkagaqarnissaannik sulinermi ilinniartitsisoqatigiit qitiusumik inissisimapput. Rektori taamaammat aalajangersinnaavoq ilinniartitsisoqatigiit ilinniartunik ataasiakkaanik nalilersuilluni ilinniartitsisoqatigiit oqaloqateqartassasut, ineriartornermilu anguniakkat ingerlatiinnarneqarnissaannik taakku ikiorlugit.

Rektorip aammattaaq aalajangersinnaavaa ilinniartitsisoqatigiiaat, ilinniartitsisut arlariisillugit ingerlatsinernik inerisaassasut, tassuunakkut ilinniartitsissutit akornanni sunneqatigiilluarneq pilersinneqaqqullugu, ilinniartut ilikkariartornissamut kaumissusiannik annertusaallunilu siuarsaasussamik.

Imm. 5-imut

Rektorip pisortatut pisinnaatitaaffimmi nalinginnaasut ilaattut ilinniartitsisoqatigiit atuunnerini ilinniartitsisut taarsersinnaavai. Ilinniartitsisoqatigiinni ilinniartitsisoq ilinniartitsisoqatini suleqatigisinnaasorinngippagit, tamanna nalinginnaasumik malunniutissaaq ilinniartitsisoqatigiit ingerlanerliornerisigut, taamaammallu rektori ilinniartitsisup qinnuigippani taarsernissaanut periarfissaqartariaqarpoq. Kisianni ilinniartitsisut ataasiakkaat ilinniartitsisoqatigiinni sulinissap pinngitsoornissaa pisinnaatitaaffiginngilaat. Aamma rektorip ersarissumik nalileereernermigut nammineerluni ilinniartitsisoqatigiinni ilinniartitsisoq taarsersinnaavaa. Tamatumunnga ilaatigut pissutaasinnaavoq klassip ilinniartulluunniit ataasiakkaat toqqissisimanissaat.

§ 39-mut

Imm. 1-imut

Ilinniartunut ataasiakkaanut tapersiinissaq, siunnersuinissaq ilitsersuinissarlu pineqarnera aalajangersarneqarpoq.

Ilinniakkap sammivissaanik toqqaaneq ilitsersuinermi siulliullugu neqeroorutaavoq. Ilitsersuineq taanna ilinniakkat sammiviinut neqeroorutigineqartunut tunngatillugu ilinniartut ataasiakkaat kissaataannik ilinniartullu nalinginnaasumik inissisimaneranik nalilersuinermik aallaaveqarpoq, tassunga ilanngullugit ilinniartumut inuttut pissutsit. Kingulleq taaneqartoq tassaasinnaavoq inuttut immikkut pissutsit, assersuutigalugu ilaqutarinnermi pissutsit.

Ilinniakkanik toqqarneqarsinnaasunik toqqaanissaq ilitsersuinermi neqerooruteqarneq tulliullugu imaqassaaq. Taakku tassaasinnaapput ilinniakkap sammivissaanut ilinniarnerrullu kingusinnerusukkut ingerlanneqarneranut atassuteqartut. Ilinniakkanik toqqarneqarsinnaasunik toqqaaneq, tassunga ilanngullugu ilinniakkap qutsissusianik toqqaaneq, ilinniaqqinnissamut periarfissanut kissaatinullu pingaaruteqarsinnaasorujussuummat ilinniartup toqqarnissaanut pitsaanerpaamik toqqamaviliinissaq uani aamma pingaaruteqarpoq.

Ilinniakkamik naammassinninnissaq ilitsersuinermi neqeroorummut aamma ilaassaaq. Ilitsersuinermi neqeroorummi tassani ilaapput ilinniartunut ilinniarnerrup aallartinnerani ilisarititsineq aammalu ilinniakkap naammassinissaanut ilinniartut periarfissaasa ikorfartornissaat siunertaralugu ilinniarnerrup nalaani ilitsersuinermi neqeroorutit. Ilitsersuineq imaqassaaq ilinniartumut ilinniakkanut atatillugu pissutsit ilinniartullu inuttut atugarisai isiginiarneqassapput. Inuttut pissutsini siunnersuinermik ilitsersuinermi neqeroorutit aamma

imaqassapput, imatut paasillugu, inuttut pissutsinik siunnersuinissamik ilinniartut neqeroorfigineqassasut, tassani assersuutigalugu, tarneq pillugu ilisimatuunut, nakorsamut, psykologimut innersuussineq aamma ilanngunneqarsinnaallutik.

Ilinniakkat, inuttut atukkatigut inuttulluunniit ilinniartup ilinniarnermi ajornartorsiutai oqaloqatigiissutigissallugit ilinniartoq periarfissaqarpoq. Ilinniarnertuunngorniarni ilinniartitsisut ilinniartunillu ilitsersuisartut ilitsersuineri siuttuussapput, assersuutigaluguli meeqqat atuarfiini ilinniartitsisunik siunnersuisartunik, ilitsersuisartunik allanik avataaneersunik ingerlaqqillunilu ilinniarni suleqateqarneq ilinniartut pitsaanerpaamik ilitsersorneqarnissaasa qulakkeernissaanut pingaaruteqarpoq.

Naggasiullugu ilitsersuinissamut neqeroorutip imarissavai ilinniagaqarnissamik inuussutissarsiummillu toqqaanissamik ilitsersuineq siunnersuinerlu. Taamaaliornikkut ilitsersuinissamik neqeroorut assigiinngitsutigut ingerlanneqartarpoq, ilisarititsineri ilitsersuineri, naammassinnissamik ilitsersuineri naggataatigullu ingerlaqqinnissamut siunnersuineri. Ilinniagassamik inuussutissarsiummillu toqqaanissaq pillugu ilitsersuineri siunnersuineri ilitsersuineri allatuullu ilinniakkani pisinnaasut nalilersorneranni ajornanngitsunut inassutigiuminartunullu sanilliullugu ilinniartut ataasiakkaat namminneq kissaatigisaat aallaavigineqassapput.

Ilitsersuinissamik neqeroorut immikkoortoq kingulleq malillugu tamakkiisumik ilaannakortumiluunniit skema malillugu piffissap ilinniartitsiviusup avataani ingerlanneqarsinnaavoq. Apeqqutit ajornartorsiutilluunniit pinngoraangata ilinniartut ilitsersorneqarnissamik pisut ilaanni pisariaqartitsisinnaanerit tamassumunnga tunngaviuvoq. Aammattaaq atuarfimi suliaasanut allanut naleqqunnerusumik ilitsersuinissamik neqeroorutit aaqqissuunnissaanut ilinniarnertuunngorniarni taamaaliornikkut periarfissinneqarput.

Imm. 2-mut

Ilinniakkat pillugit ilitsersuineq ilinniartut ilinniakkani pisinnaasaat aallaavigalugit ilinniartullu ilinniagaqqaqinnissamik kissaatigisaanut sanilliullugit ilinniakkat pillugit ilinniakkani ataasiakkaani ingerlanneqartarpoq. Ilinniakkani anguniarneqartut angunissaat siunertaralugu ingerlanneqarnissaasuni immikkut ittuni periarfissat ilitsersuineri aamma ilaapput.

Ilinniarnermi periutsinut tunngasut aaqqissuussamik ilitsersuineri ilaapput.

Ilinniartitsissutigineqartut ataasiakkaat ilinniartitsissutigineqartullu assigiinngitsut imminnut ataqatiginnerat pillugu ilitsersuineq isumaqarpoq ilinniartitsissutinik katiterineq ilitsersuineri aamma ilanngunneqassasoq.

Ilitsersuineq taanna piffissap ilinniartitsiviup ilaatut ingerlanneqassaaq. Ilinniartut peqataanissaannik qulakkeerinninnissamik kissaateqarneq tamatumunnga tunngaviuvoq.

Ilitsersuineq qanoq aaqqissuunneqassanersoq rektori nammineerluni aalajangiissaaq. Ilinniartut kikkut ilitsersuinermik suliaqassanersut aalajangiinnermut ilaapput aammattaaq ilitsersuinerup qanoq ingerlanneqarnissaa sunillu imaqarnissaa pillugu najoqqutassiat ilanngunneqarsinnaapput. Tamanna rektorip nalinginnaasumik aqutsinermi pisinnaatitaaffigaa.

Imm. 3-mut

Klassinik ataasiakkaanik ilinniartullu nukittuffiinik sanngiiffinillu rektorip sukumiisumik ilisimasaqalernissaanut aalajangersagaq qulakkeeqataassaaq taakkulu tunngavigalugit iliuuseqassalluni.

Imm. 4-mut

Ilinniartut ilinniarnerminnik naammassinninnissaasa annertusarneqarnissaannik imm. 1 aamma 2 malillugit ilitsersuinissamut neqeroorutit siunertaqarmata, siunnersuinermi ilitsersuinermilu ilinniartut peqataasussaatitaanerit erseqqissassallugu naleqquttut isigineqarpoq.

Imm. 5-imut

Tapersersuineq, siunnersuineq ilitsersuinerlu pillugit malittarisassiorsinnaanermik pisinnaatitsissut ilaatigut pivisunngortinneqassaaq ilitsersuinissamut neqeroorutit ataasiakkaat aaqqissuunnissaannut ilitsersuisullu pisinnaasaannik piumasaqaatit pillugit inatsimmi allassimasut annertussaata imarisaallu pillugit malittarisassiornikkut.

§ 40-mut

Peqataannginnissaaq imatut paasineqassaaq ilinniartitsinermi ilinniartitsissutinilu misilitsinnermi peqataannginnissamik akuerineqarneq.

Imm. 1-imut

Aalajangersagaq tunngaveqarpoq ilinniartoq ilinniarnermik aallartinnermini ilinniakkamik imaluunniit ilinniarnertuunngorniarfimmi qaffasinnerusumi naammassinnereersimanera pissutigalugu ilinniartitsinermik malinnaanissamik ilinniakkamilu pineqartumi misilitsinnissamik pisariaqartitsinnginera.

GU pillugu malittarisassani atuuttuni taamaallaat ilinniagaqarnerup aallartinneranut atatillugu peqataannginnissamik akuersisoqarsinnaavoq. Ilinniarnerup ingerlanerani kingusinnerusukkut aamma peqataannginnissamik akuersisinnaaneq aalajangersakkap oqaasertalersornera periarfissiiuvoq.

Imm. 2-mut

Ilinniartitsissutini aalajangersimasuni tamakkiisumik peqataannginnissamik akuersisarneq imm. 1-imi aalajangersakkami pineqartoq ilaannakortumik peqataannginnissamik akuersisarneq aalajangersakkami tassani pineqarpoq, imatut paasillugu ilinniartitsineq misilitsinnerluunni ilinniagaqarneq sioqqullugu ingerlanneqarsimasup ilinniagaqanerulluunniit ilaatut naammassineqarsimasup ilinniagaqarnermi ilinniartitsinerup ilaa taarsersinnaagaa.

Taarsiussineq isumaqarpoq ilinniakkap aalajangersimasup ilinniartitsissut aalajangersagaq taarseraa.

Imm. 3-mut

Ilinniarnertuunngorniarfiammi ilinniarnerp aalajangersakkami eqaatsumik aaqqissuunneqarsinnaatinneqalerpoq. Ilinniartoq assersuutigalugu ilinniartitsissutini arlalinni peqataannginnissamik akuerineqarsimappat ilinniarnep sivikillineqarluarsinnaavoq, ilinniartoq taamaalilluni semesterimi ataatsimi tiimini ikittuinnarni peqataassalluni. Eqaatsumik aaqqissuussinikkut ilinniartut ilinniarnertuunngorniarfimmi ilinniarnerminnik sivikillitsinissaat imaluunniit ilinniartitsissutigineqartussatut piumasaqaataasut saniatigut allanik ilinniarnissamut periarfissinneqassapput.

Imm. 4-mut

Ilinniartup ilinniartitsinermi peqataasinnaanermik imaluunniit ilinniartitsissummi peqataannginnissamik akuersiiffigineqartumik taarsiisumi misilitsinnissamik aalajangersagaq ajornartitsinngilaq, ilinniartorli tamassuminnga piumasaqaateqarsinnaanngilaq. Isumalluutinik isiginninniarneq aalajangersakkamut tunngaviuvoq.

Imm. 5-imut

Ilinniartitsissutit suut sivikillisaaffigineqarsinnaasunik toqqaaneq imm. 1-imi piumasaqaatit mianeralugit pissaaq. Ilinniartitsissutit sivikillisaaffiusut misilitsinnermut ilanngunneqarsinnaaneranik aalajangersaanermi ilaatigut ilanngunneqarsinnaapput ilinniartitsissutit qanoq amerlatigisut sivikillisaaffiusinnaanerisa amerlanerpaaffiuliunneqassanersut karakterillu pillugit piumasaqaataasinnaasut.

§ 41-mut

Ilinniartut ilinniakkani pisinnaasaannik piumasaqaatinik ilinniartitsissutigineqartullu agguataarneri pillugu aalajangersakkanik malittarisassat ilaatigut imaqarsinnaapput.

§ 42-mut

Imm. 1-imut

Ilinniartut napparsimaruluttut innarluuteqartunilluunniit nappaataannut innarluutaannulluunniit naleqqussarlugit ilinniarnertuunngorniarfimmi ilinniartitsinermik malinnaanissamut neqeroorfigineqassapput. Ilinniartut taakku ilinniarnersa sivitsornissaa tamassuma pisariaqarlersissinnaavaa.

Ilinniartut ilinniarnertuunngorniarfimmi ilinniarnermik naammassinnissinnaasut naliliiffigineqarnertik tungavigalugu ilinniartut ilinniarnermik naammassinninnissaat qulakkeerniarlugu ilinniartuunerup nalaani ilinniakkani ajornartorsiutit iliuuseqarfigineqassapput. Taamaalilluni ilinniartut ilaat ilinniarnermik naammassinnissamut isumalluutinik amerlanerusunik atuissapput. Taamaammat tulluurtut isigineqarpoq taamatut pisoqartillugu ilinniarnerp sivitsornissaanik rektorip periarfissinneqarnissaa.

Ilinniarnerp sivitsorneratigut ilinniarnerp naammassineqarnissaanut rektorip ilinniartoq atortunik isumalluutinillu pisariaqartunik tunisinnaavaa.

Imm. 2-mut

Aalajangersakkami siunertaavoq ilinniartut napparsimanertik pissutigalugu ilinniartitsinermik nalinginnaasumik malinnaasinnaangikkallartut ilinniarnerminnik pisariaqanngitsumik sivitsuiffigineqannginnissaat. Oqaaseqatigiinni ”periarfissaqarnera naapertorlugu” oqaatigineqarpoq periarfissaqarnera naapertorlugu taamatut ilinniartitsineq neqeroorutigineqassasoq. Tassani pingaarutaagajuttoq tassaavoq tassunga ilinniartitsisussanik pisariaqartunik pissarsisoqarsinnaanersoq. Ilinniartoq napparsimanermi nalaani ilinniarnertuunngorniarfilimmiippat napparsimanermi nalinginnaasumik ilinniartitsisoqarsinnaavoq, ilinniartorli allamiippat tamanna qulakkeeruminaassalluni.

Imm. 3-mut

Ilinniartoq innarluutilik timersornermik ilinniartitsinermi aallaaviusumik aamma peqataasinnaavoq. Innarluutit ilaasa, tassunga ilanngullugit niut taliillu kipinikut, timip ilaa nukillaarnikoq il.il. peqataanissaq soorunami ajornakusoortissavaat, tassa timi atorlugu soorunami timersortoqartarmat. Taamaammat taamaatoqartillugu ilinniartup timersornermik ilinniartitsinermi peqataannginnissaa pissusissamisoortut isigineqarpoq.

Imm. 4-mut

Pisinnaatitsineq pillugu aalajangersagaq GU-mi ilinniartut pillugit malittarisassanit atuuttunit ingerlatiinnarneqarpoq.

§ 43-mut

Imm. 1-imut

Immikkut ilinniartitsineq perorsaanimilu immikkut ikiorsiisarneq pillugu malittarisassanik atuuttunik aalajangersagaq aallaaveqarpoq, pissusissamisoortutulli isigineqarpoq erseqqissassallugu perorsaanermi ikiorfartuutaasumik immikkut ingerlatat pineqartut.

Meeqqat atuarfinni immikkut atuartitsisarnermut peroorsaanermilu ikiorsiisarnernut allanut sanilliullugu assigiinngiaartuunissaa uani aamma anguniarneqarpoq.

GU pillugu malittarisassat atuuttut malillugit pisusaaffeqarnek allanut sanilliunneqassaaq, tassa ilinniartitsineq ikiorsiinerluunniit taamaattoq pisariaqartittat malillugit ingerlanneqartussaammat. Aalajangersagaq malillugu pisusaaffeqarnek allanut sanilliunneqassanngilaq, tassa immikkut perorsaanermi ikorfartuutaasumik ingerlatat qanoq annertutigisumik ingerlanneqassanersut aalajangersarneqanngimmat.

Imm. 2-mut

Immikkut perorsaanermi ikorfartuutaasumik ingerlatat ingerlanneqarnissaannik nalilersuinermi pisariaqartittat taakku ingerlanneqarnissaanni periarfissanut sanilliullugu ilinniartup pisariaqartitai pingaartinneqassapput. Immikkut ilisimasallit tamanna pillugu oqaaseqaatigisaat tungavigalugit pisariaqartittat nalilersorneqassapput. Inuit immikkut ilisimasallit tassaasinnaapput nakorsa, psykologi imaluunniit ilinniartup pisariaqartitaasa nalilersornissaannut immikkut ilisimasallit allat.

Pisariaqartittat ingerlanneqarnissaannut periarfissat ilinniarnertuunngorniarni assigiinngitsuni nikerarsinnaapput, tassa suliamik ingerlatsisinnaasut sumiiffinni ataasiakkaani pissarsiarineqarsinnaasut apeqqutaasorujussuummata.

Ilinniartuq tassungalu ilinniartitsisoqatigiit oqaloqatigereerlugit ingerlatat aallartinneqarnissaannut tungaviuvoq ingerlatat ilinniartitsinermit nalinginnaasumut tulluarsarneqarnissaasa qulakkeerneqarnissaanik kissaateqarnek.

Ilinniartuq angajoqqaanit oqartussaaffigineqarpat angajoqqaatut oqartussaasut suleqatigalugit aallartitsinissaq angajoqqaatut oqartussaasuunerup kinguneranik pissuteqarpoq aammalu ilinniartuup angerlarsimaffiullu suleqatigiinnerisa annertusarniarneqarnerata ilagissallugu.

Imm. 3-mut

Immikkut ilisimasallit oqaaseqartinneqarneri, ilinniartitsisoqatigiit angajoqqaatullu oqartussaassuseqartut peqataatinneqarnerat aammalu immikkut perorsaanermi ikorfartuutaasumik ingerlatat suut neqeroorutigineqassanersut pillugit suleriaatsit pillugit malittarisassiornermut pisinnaatitsissut assersuutigalugu atorneqarsinnaavoq.

Kapitali 4-mut

Nalilersuisarneq uppernarsaasiortarnerlu pillugit aalajangersakkat kapitalimi katersorneqarput. Ingerlatitseqqinneq annertusaanerlu pineqarput, tassa GU aamma inuussutissarsiutinut ilinniarnertuunngorniarni ilinniarnertit pillugit malittarisassani atuuttuni nalilersuisarneq pillugu aalajangersagaqarmat, tassunga ingerlaavartumik nalilersuisarneq, misilitsittarneq, soraarummeerneq soraarummeernermullu uppernarsaatit.

§ 44-mut

Imm. 1-imut

Nutaatut aalajangersaasoqarpoq ingerlaavartumik nalilersuisarnermi ilinniartup nammineq nalilersuina ilanngunneqassasoq. Tamanna imm. 2-mut sanilliullugu isigineqassaaq, tassani pineqarpoq ingerlaavartumik nalilersuisarnerq paasissutissanik sunik pissarsiviussanersoq ingerlaavartumillu nalilersuisarnermi suna siunertaanersoq. Taamaalilluni ilinniartup nammineq ilinniarnerninik nammineq annertunerusumik akisussaaffeqarnissaa nalilersuariaatsimi taamaattumik pisariaqarpoq. Anguniakkanik piviusorsiorturnik aalajangiinissamat ilinniartoq ikiorneqassaaq. Anguniakkat anguneqarnerinut imaluunniit ilinniartup maannamat angusaasa iluarsivigineqarnissaannut nalilersuineq sakkutut atorneqassaaq.

Imm. 2-mut

Aalajangersakkami ersippoq ingerlaavartumik nalilersuisarnerq imminnut atasunik arlalinnik siunertaqartoq taakkulu ilinniartumut namminermut tunngapput, ilinniartup ingerlaqqinnissaanik ilitsersuinissamat ilinniarfimmi ilinniartitsisut atugassattut, ilinniartoq ilinniartitsinernik naammattumik pissarsiaqarsimaneranik rektorip nalilersuineranut atugassatut.

Ilinniartitsisut suleqatigalugit ilinniartup nammineq anguniagassatut aalajangigaasa uuttortuarnissaannut nalilersuisarnerup qulakkeertassavaa. Piffissallu siviisuallaaq ingerlatinnagu ilinniartup taamaalilluni imminut piumasarisani inaarutaasumillu anguniakkani taamaalilluni aqqiivigisinnaavai. Taamaalilluni ilinniartup ilinniarnertuunngorniarfimmiinnermini ilinniakkamini siuariartornissaanut nalilersuineq ikiuutaassaaq, ilinniartoq taamaalilluni pitsaanerpaanik angusaqarsinnaalerluni.

Imm. 3-mut

Assersuutigalugu ilinniartut siuariartornerannik nalilersuineranut aqqissuussamik atorneqarnissaa pillugu aalajangersaanikkut pisinnaatitsineq pillugu malittarisassiornikkut aalajangersagaq piviusunngortinneqarsinnaavoq.

§ 45-mut

Imm. 1

Aalajangersakkami ilinniartup ilinniarnernini pissarsiai pillugit angerlarsimaffimmut nalunaaruteqartarnerq pillugu malittarisassat atuuttut tunngaviupput. Siunertamat naapertuuttutut isigineqarpoq ilisimatitsineq angajoqqaanut taarsiullugu angajoqqaatut oqartussaasunut pisassasoq erseqqissassallugu. Tamatuma tunuliaqutaa pillugu nalinginnaasumik oqaaseqaatit innersuunneqarput.

Aallaavittut angajoqqaat tamarmik angajoqqaatut oqartussaasuupput, nammineersinnaanermik inatsit naapertorlugu angajoqqaat ataatsimoorussamik angajoqqaatut oqartussaassuseqarmata, meeqqap inunngornerani katissimagunik kingusinnerusukkulluunniit katikkunik. Kisianni ataatsimoorussamik angajoqqaatut oqartussaassuseqarneq aappariikkunnaarnermi, averusernermi, avinnermi toqukkullu qimagunnermi atorunnaarsinnaavoq. Taamaalilluni angajoqqaatut oqartussaasoq ataasiinnaappat, taanna kisimi nalunaarfigineqassaaq, tassami taanna kisimi meeqqamp isumassornissaanut meeqqamullu tunngatillugu inuttut pissutsit pillugit aalajangiinissamut pisussaaffeqarpoq.

Aammattaaq kissaatiginarsinnaavoq ilinniartunut angajoqqaatut oqartussaassuseqarfigineqanngitsunut atatillugu ilinniartup angerlarsimaffianut nalunaartoqartarnissaa. Taama pisoqassappat taamaaliornissaaq ilinniartup akuereqqartariaqarpaa..

Imm. 2-mut

Assersuutigalugu angajoqqaatut oqartussaassuseqartut qanoq akulikitsigisumik ilisimatinneqartarnissaat ilisimatitsinerullu isikkussaa imarisaalu pillugit malittarisassiornikkut aalajangersagaq piviusunngortinneqarsinnaavoq.

§ 46-mut

Imm. 1-imut

Malittarisassanut atuuttunut sanilliullugu aalajangersakkami erseqqissarneqarpoq inaarutaasumik nalilersuineq tamarmiusuni eksameneqarnikkut, ilinniarnertuunngorniartut eksameneqarnertut taaneqartartukkut, pisassasoq.

Imm. 1-imi aalajangersakkami taamaallaat aalajangerneqarpoq ilinniarnertuunngorniarluni soraarummeernermit ilaasut oqaluttarissanik aamma/imaluunniit allattarissanik misilitsinnerit aalajangersimasunik amerlassusillit Naalakkersuisunit aalajangerneqartut kiisalu ilinniartut ataasiakkaat ilinniarnermi suliaat ataaseq. Taamaalilluni soraarummeernermit misilitsinnerit qassiussanersut maannakutut nalunaarusiornikkut aalajangersarneqartarnissaat naleqquttutut isigineqarpoq.

Ilinniartitsissutini kalaallisut aamma qallunaatut allattarissatigut misilitsittoqarnissaanut tunngaviuvoq ilinniartitsissutit taakku pingaarnarpaatut isigineqarneri. Ilinniartitsissutini allani allattarissatigut aamma misilitsinnissaaq taakkunanilu ilinniartitsissutinilu allani oqaluttarissatigut misilitsittarnissamik Naalakkersuisut aalajangiisinnaanerannut tamanna akornutaanngilaq.

Imm. 2-mut

Ilinniartitsisuni ataasiakkaani soraarummeernikkut ilinniarnertuunngorniarluni soraarummeersinnaaneq maannakutut aamma periarfissaavoq. Taamaaliornikkut ilinniartut

ataasiakkaat nammineq pisinnaasatik aallaavigalugit piffissami ukiunit pingasunit sivikinnerusumik sivilisnerusumiluunniit tamarmiusumik ilinniarnertuunngorniarfimmi ilinniarnissartik namminneq aaqqissorsinnaavaat.

Imm. 3-mut

Imminut ilinniartinneq qanoq paasineqassanersoq § 54, imm. 2-mi takuneqarsinnaavoq, taamaammallu aalajangersakkami tassunga innersuussisoqarpoq.

Assersuutigalugu militsinnissamat nalunaarneq, ilinniartitsissutigineqartussat imarisaasa nalunaarutiginerani aammalu misilitsinneq pillugit malittarisassiornikkut aalajangersagaq piviusunngortinneqarsinnaavoq.

§ 47-mut

Imm. 1-imut

Science-p ilaatinneqannginneranut pissutaavoq science tassaamat ilinniartitsissummi pinngortitamik ilisimatusarnermi periutsimut tamanut ilisaritsineq, ilinniartitsissutinik ataasiakkaanik toqqaanikkut kingusinnerusukkut soraarummeerutaasussaq. Ilinniarnermi periutsit ilaatinneqannginnerannut pissutaavoq, ilinniartitsissut ilinniartitsissutinut atortulersorfiusunik taaneqarsinnaasunut ilaamat, siunetarialugulu ilinniartut nutaat ilinniarnermut naapertuuttunik periutsinik suleriaatsinillu ilinniartinnissaat, ilinniarnertuunngorniarnermik sinnerani ilinniaqqinnerminnilu atorsinnaasaannik.

Aammattaaq erseqissarneqarpoq misilitsinnerit ilinniartitsissutinik arlalinnik misilitsinnerusinnaasut. Tamanna isumaqarpoq militsinneq ilinniartitsissutinit marlunnit amerlanerusunilluunniit immikkoortunik imaqarsinnaasoq. Tamassumunnga tunngaviuvoq ilinniartitsineq ilinniartitsissutinit assigiinngitsuneersuunerunera. taamaamat ilinniartitsissutit arlallit atorlugit misilitsinnermi ilinniartitsissutit, atuagarsornerit periutsillu assigiinngitsut ataqatigiinnerisa takutinnissaannut ilinniartut periarfissinneqassapput.

Imm. 2-mut

Qitiusumiit suliakkiissutit imatut paasineqassapput allattarissatigut suliassat tamanut assigiittut. Ilinniarfinni tamani piffissami assigiimmi suliassat suliarineqartarnissaat suliassanut taakkununga piffissamik Naalakkersuisut aalajangiisarnissaannut tunngaviuvoq.

Imm. 3-mut

GU pillugu malittarisassani atuuttuni Ilinniartitaanermut Ministeriap ukiut tamaasa aalajangertarpaa ilinniartitsissutit suut misilitsiffiussanersut. Aammattaaq aalajangerneqarpoq klassit qaffasissusianni ilinniartup ilinniartitsissummik ilinniartitsinermik naammassinniffiani misilitsissasoq, 3. G-milu ilinniartut tamarmik qallunaatut kalaallisullu aamma ilinniartitsissutini ilinniartup malinnaanissamik qinigaani allattarissatigut misilitsissapput. Ilinniarnertuunngorniarfinni ilinniarneq pillugu malittarisassani aalajangerneqarpoq

soraarummeernerit sorliit ilinniarnepur ingerlanerani qaqugukkut ilinniartut soraarummeerfigissaneraat.

Ilinniartitsissutini sorlarni ilinniartut ataasiakkaat misilitsissanersut ukiut tamaasa aalajangersakkami Naalakkersuisut aalajangiisussanngortinneqarput. Klassimi 1. G ataatsimi ilinniartut ilinniartitsissutinik assigiinngitsunik qinigaqarsinnaammata ilinniartut taamaalillutik affaat ilinniartitsissummi ataatsimi misilitsissinnaapput affaallu ilinniartitsissummi allami misilitsillutik.

§ 48-mut

Misiliteriaaseq apeqqutaatinnagu ilinniartut ataasiakkaarlutik nalilerneqarnissaat isumaqarpoq ilinniartut pisuni tamani ataasiakkaarlutik naliliiffigineqassasut. Ilinniartoqatigiit suliaat tunngavigalugu soraarummeernermi tamanna aamma atuuppoq.

§ 49-mut

Imm. 1-imut

Aalajangersagaq § 62, imm. 3-mut atatillugu isigineqassaaq, tassani aalajangersarneqarpoq ilinniarnertuunngorniarfimmi ilinniartitsinermi ilinniakkanut, perorsaanermut allaffissornermullu rektori Naalakkersuisunut akisussaaffeqartoq.

Oqaasertaq ”misilitsinneq” isumaqarpoq misilitsinnissanut taakkulu aalajangersakkat atuuttut malillugit ingerlanneqarnissaannut rektori akisussaasuusoq.

Oqaasertaq ”upernarsaasioorneq” isumaqarpoq upernarsaasioornissamut upernarsaatillu tamanna pillugu aalajangersakkat atuuttut malillugit oqaasertalersornissaannut rektori akisussaasuusoq.

Imm. 2-mut

”Soraarummeernermi angusineq” imatut paasineqassaaq ilinniarnertuunngorniarfinni ilinniarnepur assigiinngitsut tamarmik. Tassa ukiuni pingasuni ilinniarnertuunngorniarfimmi ilinniarnepur, ilinniarnertuunngorniarfimmi immikkut ittumik ilinniarnepur Kalaallit Nunaanni Danmarkimilu sivikitsumik akunnattumillu sivisussusilimmik ilinniaqqinnernut, ilinniarnepur immikkut aaqqissugaasunut aammalu ilinniartitsissutini ataasiakkaani ilinniartutut soraarummeernissamut ingerlaqqissutaasinnaasoq.

Imm. 3-mut

”Nalinginnaasumik” oqaasertaliunneratigut pineqarpoq soraarummeernermit upernarsaat immikkut pisoqartillugu aalajangersakkami pineqartunik tamanik imaqartanngimmat. Tamanna assersuutigalugu atuussinnaavoq namminneq ilinniartunut, soraarummeernerminnut upernarsaammi ukiumoortumik karakterilerneqartanngitsunut.

Imm. 4-mut

Aalajangersakkap kinguneraa ilinniartut ilinniarnertuunngorniarfimmi ilinniartitsutinik naammassiffiini imaluunniit soraarummeernatik taamatinnerini tamatigut uppersaasiortoqartassamat.

§ 50-imut

Inaarutaasumik nalilersuineq uppersaasiorterlu pillugit aalajangersakkami Naalackersuisut annertunerusunik malittarisassioortussanngortinneqarput. Inaarutaasumik nalilersuineq uppersaallu pillugit malittarisassat sunik imaqaassanersut aalajangersakkami tamakkiisumik allaaserinnittoqanngilaq.

§ 51-imut

Nalilersuineq qanoq ingerlanneqassanersoq nalilersueriaatsillu ataasiakkaat sunik takutitsissanersut aalajangersakkami aalajangerneqarpoq. Ingerlaavartumik nalilersuisarneq inaarutaasumillu nalilersuineq aalajangersakkami pineqarput.

Imm. 1-imut

Aalajangersakkami aalajangerneqarpoq ilinniartut ataasiakkaat ilinniakkani pisinnaasai qanoq nalilersorneqassanersut. Karakteriliinerit oqaaseqaatillu ilanngullugit nalilersueriaatsit assigiinngitsut atorlugit tamassuma pinissaa takuneqarsinnaavoq. Nalunaajaatini oqaaseqaateqarnerit atorneqartarmata GU pillugu malittarisassanik ingerlatitseqqiineq pineqarpoq.

Imm. 2-mut

Angusanut tunngatillugu karakteriliineq tassaavoq ilinniartitsissummi pineqartumi ilinniartup ilinniarnep ingerlanerani piffissami aalajangersimasumi ilisimaligassaattut pisinnaaligassaattullu ilimagineqartussat aalajangersakkat tunngavigalugit ilinniartitsissummi ilinniartup killiffianut sanilliussilluni pissusiviit tunngavigalugit ilinniartumik nalilersuineq. Uuttuut Greenlandic Grading System (Uuttuut GGS) tunngavigalugu angusanut tunngatillugu karakterit ullumikkut nalunaarutigineqartarput.

Imm. 3-mut

Ilinniartup iluani misilitsinnermi karakterit tassaapput suliamut aalajangersimasumut sanilliussilluni ilinniartup angusassaattut ilimagineqartunut pissusiviit tunngavigalugit piumasaqaatinut sanilliullugu ilinniartup killiffianik nalilersuineq.

Imm. 4-mut

Oqaasiinnartigut allattariarsornikkullu oqaaseqaatit kisimik imaluunniit angusanut tunngatillugu karakterinut imaluunniit misilitsinnermi karakterinut ilassutitut atorneqarsinnaapput.

Imm. 5-imut

Assersuutigalugu nalilersueriaatsit qanoq akulikitsigisumik atorneqartarnissaat, ilusissaat imassaallu, tassunga ilanngullugu assersuutigalugu karakterit tullerriaarnerat sorliit atorneqassanersut pillugit aalajangersakkami pisinnaatitsissut atorlugu malittarisassiortoqarsinnaavoq.

§ 52

Suliassat suliniutillu imikkut pingaaruteqassusiat pissutigerpjarlugu immikkut naliliiffigineqarnissaannik kissaateqarnermik aalajangersagaq tunngaveqarpoq. § 44, imm. 3-p aamma § 50-ip nassatarisaannik ingerlaavartumik naliliisarneq inaaruitaasumillu naliliineq pillugit malittarisassanik erseqqinnerusunik aalajangersaasoqassaaq. Tassunga atatillugu naatsorsuutigineqarpoq suliassiissutit aalajangersimasumillu qulequtsiilluni suliat suut suliatut annertunnerusutut naatsorsuutigineqassanersut ersarinnerusumik killilersorneqarumaartut.

§ 53-imut

Imm. 1-imut

Ingerlaqqinnissamut piumasaqaatit atuuttut aalajangersakkami atorunnaarsinneqarput, taamaalilluni ilinniartup klassimut tullermut nuussinnaaneranut maannamut ilinniarneq ataatsimut isigalugu naammattumik pissarsiaqarfisimanissaa piumasaqaataalluni.

Ilinniartut pimoorussilluarnissaasa qulakkeerneqarnissaa sulinerullu qulakkeerinniffigineqarnissaa aalajangersakkami siunertaavoq.

Aalajangersakkami immikkoortut aappaanni aalajangerneqarpoq, klassimut tullermut nuunnissamik akuersinnginnermut ilinniartup semesterimi killiffimmi imaluunniit maannamut ilinniarnermi agguaqatigiissillugu karakteriissa angusinissamik killigititami appasinnerunerat pisariaqartumik piumasaqataassasoq naammannanili. Taamaalilluni nuunnissamik akuersinngittoqarsinnaanngilaq ilinniartup maannamut ilinniarnermi angusat tunngavigalugit karakteriisa angusinissamut killigititaq equutippassuk. Karakterit appasinneruppata rektori nalilersuinissamik pisussaaffeqarpoq. Rektorip nalilersuinermini ilinniartup ilinniartitsinermik maannamut naammaginangitsumik pisariaqarsimane tassungalugu pissutaasut aallaavigissavai, tassanilu nalilersorlugu ilinniagaqarneq ilinniartup naammassisinnaaneraa. Rektorip nalilersuinermini tassani ilanngullugu nalilersussavaa ilinniartitsissutigineqartut pillugit immikkut ikiorsiinikkut immikkullu ilitsersuinikkut ilinniartup ilinniagaqarneq naammassisinnaaneraa.

Imm. 2-mut

Assersuutigalugu ilinniartup ilinniarnermik ingerlatitseqqinnissaanut periarfissat tassunga ilanngullugit tapersiissutit immikkut ittut pillugit ilinniartunik taakkulu angjoqqaavinik ilitersuisarneq pillugu malittarisassiornikkut pisinnaatitsinermik aalajangersagaq atorpeqarsinnaavoq. Ilinniarnermik ingerlatitseqqinnissamut periarfissanik allanik naleqquttunik tassunga ilanngullugu ilinniakkamut allamut nuussinaneq imaluunniit ilinniarnissamut inuussutissarsiutinillu ilisarititsinermik ilitersuinerit pillugit malittarisassiornikkut aalajangersagaq aamma atorpeqarsinnaavoq.

§ 54-imut

Imm. 1-imut

Ilinniarnerup kissaatigineqartut pissarsiffigineqarnissaa suliamillu ingerlatsinerup qulakkeerinniffigineqarnissaa ilinniarnermi pinngitsoorani takkuttussaanermut tunngaviuvoq. Pinngitsooruni takkuttussaatitanerup malinneqarnera ilinniarnertuunngorniarfimmi ilinniarnerup naammassinissaanut taassumalu kingorna ilinniagaqarnissamut tunngavittut ilinniartut imminnut aqussinnaaneranun sakkutut aamma isigineqassaaq.

Ilinniartitsinermi peqataavinnissaq pillugu piumasaqaat ilaatigut isumaqarpoq, allattarissanik suliakkiutigineqartunik imaasa annertussusaat kisiat pinnagu aammali pitsaassusissaat pillugu piumasaqaatit aalajangersarneqartut naammassillugit ilinniartut tunniussisussaataanerat.

Imm. 2-mut

Imminut ilinniartittut ilinniarnerup GU-mi ilinniartut naammassinnissamik periarfissaannik pioreersunik aalajangersagaq ingerlatitseqqiivoq, imminullu ilinniartinnermut nassuiaat atuuttoq aalajangersakkami aamma ingerlateqqinneqarpoq.

Nutaatut erseqqissarneqarpoq, imminut ilinniartittut ilinniarnermik naammassinnissamik kissaateqarneq ilinniarnerup aallartitsineranut imaluunniit ilinniarnerup ingerlaneranut atatillugu saqqummiunneqarsinnaasoq.

Imm. 3-mut

Ilinniartup takkuttannginneranut rektorip akuliunnissamut pisussaaffeqarnerani aalajangersakkami erseqqarissumik oqaatigineqarpoq. Tassani siunertaavoq ilinniartup ilinniagaqarneranik tapersiinnissaq. Taamaatiinnartarnerup pinngitsoortinnissaa siunertaralugu sapinggisamik siusissukku akuliunnissaq tassani siunertaavoq. Ilinniartut qanoq annertutigisumik takkutinnitsoortarnerani akuliunnissamut taamaalilluni aalajangiisuussanngilaq. Ilinniartup takkutinnitsooqqittaqqinnissaata kingunerisinnaasaanik kisiannili aamma atuarfiup immikkut tapersiinnissamut periarfissaanik ilinniartup tassunga peqatigitillugu ilisimatinneqarnissaa akuliunnissami piumasaqaataavoq.

§ 55-imut

Ilinniarnermut ileqqorissaarnissamullu malittarisassat pillugit GU pillugu malittarisassani atuuttuni aalajangersaasoqanngilaq. Inuutissarsiutinik ilinniarnertuunngorniarfinni ilinniagaqarnernut aalajangersarneqarpoq ilinniarnermut ileqqorissaarnissamullu malittarisassanik ilinniarfik aalajangersaasinnaasoq.

Imm. 1-imut

Takunissamik pisussaaffeqarneq pillugu pissutsit pillugit malittarisassanik aammalu ilinniartitsinermit peqataavinnissaq kiisalu ilinniartut ilinniarfimmi pissusilersornissaat pillugit pissutsit pillugit malittarisassat ilinniarnermut ileqqorissaarnissamullu ilinniarfiup malittarisassaani ilaasinnaapput.

Sumiiffimmi pissutsit malillugit ilinniarfiup ilinniarnermut ileqqorissaarnissamullu malittarisassaasa naleqqussarnissaannut rektori periarfissaqarpoq. Imaassinnaavoq ilinniartut takkutinngitsoortarnerisa ataatsimut isigalugu annikillisinneqarnissaanut ilinniarfiit ataasiakkaat misilittagaqartut.

Ilinniarfiup ilinniarnermut ileqqorissaarnissamullu malittarisassaasa imaannik ilinniartut naggatit aappaat malillugu ilisimatineqassapput, ilinniartut taamaalillutik taamaalillutik malittarisassat unioqquatinneqarneranni kingunerisinnaaasaanik ilisimanninniassammata.

Naggatit pingajuat malillugu ilinniarnermut ileqqorissaarnermullu malittarisassat Naalackersuisunut ilisimatitsissutitut aamma nassiunneqassapput. Ilinniarfiit ataasiakkaat ilinniarnermut ileqqorissaarnissamullu malittarisassaasa sinaakkutit inatsisitigut nalunaarutikkullu aalajangersakkat iluaniinnerat Naalackersuisut taamaalillutik qulakkiissavaat. Ilinniarfiit ataasiakkaat ilinniarnermut ileqqorissaarnissamullu malittarisassaata naalackersuisoqarfiup taamaalilluni aamma takusinnaassavaa, tamannalu taamaatiinnartarnerit annikillisinneqarnissaannut il.il. atuarfiit suliniutaasa nalilersornissaannut tunngatillugu iluaqutaasinnaavoq.

Imm. 2-mut

Unioqquitsinerit uparuarneqarnissaat tassani piumasaqaataavoq. Unioqquitsinerit ataasiakkaat annertussusiannik nalilersuineq aammalu unioqquitsinermit pissutsit allat unioqquitsinerit iliuuseqarfigineqarnissaannut apeqqutaavoq.

Imm. 3-mut

Malittarisassat Naalackersuisut aalajangersagaat assersuutigalugu tassaasinnaapput rektorip iliuuseqarsinnaaneranut pisinnaatitsissut sumiiffimmi ilinniarnermut ileqqorissaarnermullu malittarisassani qanoq piviusunngortinneqarsinnaanersoq. Taamaalilluni iliuuseqarsinnaanermut periarfissat assigiinngitsut malittarisassanut ilanngunneqassapput, tassunga ilanngullugu ilinniartup piffissami sivikitsumi ilinniartitsinermit mattunneqarnera kiisalu immikkut pisoqartillugu nalilersuivinnerlu malillugu ilinniartup klassimut tullermut

nuussinnaaneranik itigartitsineq. Soraarsitsisoqarput ilinniartut ataasiakkaat maannakkut imminut ilinniartittutut misilitsissinnaapput.

Kapitali 6-imut

§ 56-imut

Toqqissisimasumik atugaqarnissamut tunngatillugu ilinniartut ataasiakkaat toqqissisimasumik atugaqarnissaat klassillu toqqissisimasumik atugaqarnissaa ilinniartitsisup suliarissavaa. Ilinniartut ilinniarnermi avatangiisaasa sapinngisamik pitsaasuunissaannik ilinniartitsisut akisussaaffeqarnerat tamassuma qulakkeeqataaffigitissavaa. Assersuutigalugu ilinniartut akornanni isumaqatigiinnginneq pissutigalugu klassimi eqqissiviilliornissaq ilinniartitsisup akuersaassanngilaa. Tassunga taarsiullugu ajornartorsiutit aqqiissutissaannik ilinniartitsisoq nassaarniassaaq, taamaalilluni ilinniarnermi avatangiisit toqqissisimanaqqilersissallugit.

§ 57-imut

Imm. 1-imut

Ilinniartitsissutinik pisinnaasaqarnissaat pillugu piunasaqaatinik aalajangersimasunik aammalu perorsaanermi pisinnaasaqarnissaq pillugu piunasaqaatinik ilinniartitsisut eqqortitsinissaat pillugu piunasaqaatinik maannamut atuuttunik aalajangersakkami ingerlatitseqqiisoqarpoq.

Kalaallit Ilinniartut Danmarkimi ilinniaqqissinnaanerata ingerlateqqiinnarneqassappat Kalaallit Nunaanni ilinniarnertuunngorniarni ilinniartitsinerup pitsaassutsimigut Danmarkimi ilinniarnertuunngorniarni ilinniartitsinerut sanilliunneqarsinnaanera tunngavigalugu ilinniartitsinermi pisinnaasat pillugit piunasaqaat aamma isigineqassaaq. Ilinniartitsissutini perorsaanermilu pisinnaasnik piunasaqaatinik aalajangersaanermi ilinniartitsisut naammattumik qaffasissusilimmik pisinnaasaqarnerat qulakkeerneqartariaqarpoq.

Imm. 2-mut

Imm. 1-imi ilinniartitsissutitigut perorsaanikkullu pisinnaasaqarnissamut tunngatillugu §§ 58 aamma 59 innersuunneqarput, tassani pissutsit pineqartut pillugit erseqqinnerusumik aalajangersaasoqarluni. Taamaammatt aamma erseqqinnerusumik aalajangersaanissamut pisussaaffik isiginiarneqassaaq tassaasoq aalajangersakkanut pineqartunut tunngatillugu ilassutaasunik malittarisassaliornissap pisariaqartinneqarnerata ersiutaa.

Aalajangersakkamut ilaatigut tunngaviuvoq ilinniartitsisunik ilinniakkanik perorsaanermillu piunasarineqartutut pisinnaasaqartunik atorfinitsitsinissap ajornakusoorsinnaanerata ilisimaneqarnera, taamaammallu piunasaqaatit ilaasa suli atuutinnginnissaat pissusissamisoorinnaalluni.

Malittarisassanut taakkununga ilaatigut ilaasinnaapput ilinniakkat § 58-imi allaaserineqartut saniatigut ilinniagaqarnikkut inuutissarsiornikkulluunniit pissarsiarineqarsimasut pillugit aalajangersakkat. Malittarisassat assersuutigalugu tassaasinnaapput, ilinniakkat suut suliallu suut ilinniakkatigut pisinnaasartutut isigineqarnissamut tunngaviusinnaanersut pillugit aalajangersakkat.

Aamma ilaasinnaapput pædagogikum pillugu malittarisassat, perorsaanikkut ilinniakkat allat tamakkiisumik ilaannakortumilluunniit akuerineqarsinnaanerat ilanngullugu. Ilaatigut aalajangersarneqarsinnaaputtaaq ilinniakkap anguniagai imarisaalu pillugit malittarisassat ersarinnerusut, tamatumunnga ilanngullugit anguniakkat, sinakkutissat, ilusiliusaaq, aaqqissugaaneq, ilinniakkap aaqqisugaanera, misilitsinneq nalilerneqarnerlu. Kiisalu aalajangersarneqarsinnaapput piffissamik sivikillisaanneqarsinnaaneq maalaarnissamullu periarfissat.

Aammattaaq malittarisassiuunneqarsinnaavoq, inuit piumasaqaatinik §§ 58-59-imiittunik eqquutitsinngitsut qaqugukkut ilinniartitsinermit pisinnaasaqartutut akuerineqarsinnaanersut. Piumasaqaat tassaasinnaavoq kingusinnerusukkut ilinniartitsinermit pisinnaasanik piumasaqaatit eqqortinnissaat siunertaralugu immikkut pisinnaasanik qaffasaanermit peqataanissamut piumasaqaatit.

Inuit pisinnaasanik piumasaqaatinik eqqortitsinngitsut piffissaq atorfeqarnissaat pillugu imm. 3 aalajangersakkamik ilaneqarpoq. Imm. 3-mut tunngatillugu inunnut aalajangersumik atorfimmi atorfinnissamik kissaateqartoqartunut aalajangersagaq taanna tunngatinneqarpoq.

Imm. 3-mut

Sulisussarsiorluni allagartaliinikkut allatigulluunniit ilinniartitsissummi pineqartumi inunnik ilinniartitsinermit pisinnaasaqartumik ilinniartitsisussarsisoqarsinnaanngippat ilinniartitsisunik piffissami killilikkami atorfinitsitsinissaq pisariaqarsinnaavoq. Assersuutigalugu oqaatigineqarsinnaavoq kalaallisut ilinniartitsinermit ilinniartitsisoqartoq ilinniartitsinermit pisinnaasat pillugit piumasaqaatinik eqqortitsinngitsunik. Aammattaaq ilinniartitsisut perorsaanermit ilinniartut ilinniartitsisinnaanermit suli pisinnaasaqanngitsut ilinniartitsisinnaanerat akuersissutigineqarsinnaasariaqarpoq.

Aalajangersakkap periarfissippaa atorfinitsitsigallarsinnaaneq pillugu malittarisassanik aalajangersaanissaq. Taamaalilluni malittarisassiuunneqarsinnaavoq, assersuutigalugu inuit meeqqat atuarfianni ilinniartitsisutut ilinniarsimasut allatulluunniit perorsaanikkut ilinniagaqartut ilinniakkatigut pisinnaatitsilerfiusumik inuutissarsiummik suliaqarnermit malitseqartitsisimasut, piffissami killilimmi atorfinitsinneqarsinnaasut. Inuit meeqqat tuarfianni ilinniartitsisutut ilinniarsimasut allatulluunniit perorsaanikkut ilinniagaqartut ilinniakkatigut pisinnaatitsilerfiusumik inuutissarsiummik suliaqarnermit malitseqartitsisimasut nalinginnaasutut isigineqarsinnaapput, kisianni aamma inuit allatut ilinniakkamikkut pisinnaasaqartut erseqqissumik nalileereernikkut pineqarsinnaapput.

Tamatumani assersuutigalugu eqqumiitsuliornikkut ilinniartitsissutitut tunngatillugu ilaatinneqarsinnaapput qinnuteqartut eqqumiitsuliornermik ilinniagaqartut allatulluunniit pilersitsiffiusumik ilinniagaqartut. Eqqumiitsuliornikkut ilinniartitsissutitut isigineqarput ilinniartitsissutit, ilikkagassatut anguniakkaminni immikkut eqqumiitsuliornermut sammisut. Taakku assersuutigalugu tassaasinnaapput nipilersonreq, assinik eqqumiitsuliorneq, drama aamma ilusilersuineq. Ilinniartitsissutini ataasiakkaani ilikkagassatut pilersaarutit pillugit nalunaarummi aalajangersarneqassaaq ilinniartitsissutit suut eqqumiitsuliornikkut ilinniartitsissutitut isigineqassanersut.

Aalajangersagaq tunngavigalugu aammattaaq aalajangersaasoqarsinnaavoq, inuit suli kandidatitut soraarummiinngitsut – suli ilinniarnertuunngorniarfimmi ilinniartitsissutini specialiliunngitsut ilanngullugit – ilinniartitsisutut atorfinitsinneqarsinnaasut. Aamma ilinniartitsisutut atorfiit sinaakkuserneqarsinnaapput. Ilinniartitsisutut atoprfinitsinneqarnermi nalinginnaasumik piumasaqaatigineqartarpoq ilinniakkap naammassinissaa.

§ 58-imut

Imm. 1-imut

Kandidatitut soraarummeernermi angusisimanissamik ilinniarnertuunngorniarfimmi ilinniarnermi ilinniartitsisutini ataaseq arlallilluunniit ilanngullugit piumasaqaat ilinniartitsissutini pisinnaasat qaffasissuunissaannik kissaateqarnermik tunngaveqarpoq.

Ilinniarnertuunngorniarfinni ilinniartitsissutini arlalinni ilinniartitsissutini marluusuni saniatigut ilinniagaqarsimanissamik piumasaqaat ilinniarnertuunngorniarfinni ilinniarnermi ilinniartitsissutini pineqartuni ilinniartitsisut naammattumik qaffasissusilimmik ilinniartitsissummi pisinnaasaqarnissaasa qulakkeerneqarnissaanik tunngaveqarpoq.

Imm. 2-mut

Ilinniartitsisut universitetimi kandidatitut soraarummeernermiit allaanerusumik ilinniagaqartut allamik ilinniagaqarnermi ilinniartitsissummi pisinnaasaqalersut ammaassiffigineqarnissaat aalajangersakkami siunertaavoq. Taamatut ilinniagaqarneq assersuutigalugu tassaasinnaavoq handelshøjskolemi imaluunniit ingeniørinngorniarfimmi imaluunniit universitetitimi kandidatitut soraarummeerluni ilinniagaqarneq.

Atorfik ilinniartitsissummi pisinnaasaqarfiulersoq assersuutigalugu tassaasinnaavoq ilinniarnermi allami imaluunniit ilinniartitsinermik pikkorissartitsinermillu neqerooruteqartartumi allami ilinniartitsinermik misilittagaqarneq. Aamma tassaasinnaavoq ilinniartitsissummi pineqartup ilinniartitsivigisassaani sulisimaneq, assersuutigalugu eqqumiitsuliornermi.

Imm. 3-mut

Ilinniarnertuunngorniarfinni ilinniartitsinermi inuussutissarsiutini misilittagaqarnissaq pillugu malittarisassani piumasaqaat aalajangersakkami ingerlateqqinneqarpoq. Piffissami aalajangersimasumi inuussutissarsiutini misilittagaqarnissamik piumasaqaateqarnissaq pisariaqartutut isigineqanngilaq.

Ilinniartitsissutit inuussutissarsiutinut sammisut imatut paasineqassapput ilinniartitsissutit ilinniarnermut pilersaarummi inuussutissarsiutit pillugit immikkut imaqartut. Assersuutigalugu tassaasinnaapput ilinniartitsissutit arlallit Hhx-imi aamma Htx-imi ullumikkut ilaatinneqartut. Ilinniartitsissutit inuussutissarsiutinut sammisut suunersut ilinniartitsissutit ataasiakkaat pillugit ilinniarnissamut pilersaarutit pillugit nalunaarutikkut aalajangersarneqassapput.

Imm. 4-mut

Ilinniartitsissummi pisinnaasaqarnermik akuersinissamik rektorip pisinnaatinneqarnera rektorip sulinermi pissusissamisoortut akisussaaffigaa, takuuk siunnersuummi § 62, imm. 2.

Ilnniarfimmi atorfininnermut atatillugu ilinniartitsissummi pisinnaasanik akuersineq isumaqarpoq atorfininnermut atatillugu rektorip tamassuminnga aalajangiinera. Inuit ilnniarfimmi ilinniartitsisutut atorfinnut qinnuteqarnissamik isumaliuteqartut ilinniartitsissummi pisinnaasaqalernissamik periarfissaat pillugit atorfinitsitsisoqavitsinnagu rektorip oqaaseqaateqarnissaanik tamanna isumaqanngilaq.

§ 59-imut

Imm. 1-imut

Perorsaanermi pisinnaasaqalernissamut piumasaqaatit perorsaanermik ilinniarnerp naammassineqarsimanissaa pillugu piumasaqaatit maannamut atuuttut aalajangersakkami ingerlateqqinneqarput.

Ilinniartitsisunik nutaanik atorfinitsitsineq imatut paasineqassaaq ilinniartitsisut taamaallaat ilinniartitsissummi pisinnaasaqartut, takuuk § 58, imm. 1-imiit 4-mut. Taamaalilluni ilinniartitsisunut piffissami killilimmi atorfeqartunut suliami pisinnaasaqanngitsunut tunngatillugu perorsaanermik ilinniagaqarsimanissaaq piumasaqaataanngilaq, takuuk § 58, imm. 5.

Imm. 2-mut

Taamaalilluni perorsaанermik ilinniаgaqarnissami siunertaavoq ilinniartitsisut nutaat atorfinitsinneqartut ilinniartitsisunngorniarfimmi ilinniartunut ilinniartitsinerми ilinniartitsisunut piumasaqaatinik eqqortitsisinnaajumallutik sorarsaanermi annertuumik tunuliaquteqassasut. Tassunga peqatigitillugu ilinniartitsisup naleqartitsinerми tunngavinnik, pissusilersorluarnertut isigineqartunik, anguniakkanik aammalu ilinniarnertuunngorniarfimmi ilinniarnermi pisinnaasat pillugit piumasaqaatinik tunngaviusunik isummernissaanut perorsaанermik ilinniаgaqarneq tapersiissaaq, taamaalillunilu ilinniarnertuunngorniarfiup ilinniartittut ineriartornerani inuiaqatigiinnillu avatangiisiniittunik suleqateqarnerми peqataavissalluni.

Imm. 3-mut

Perorsaанermi pisinnaasanik piumasarineqartunik ilinniartitsisup sukkanerpaamik pisinnaasaqalernissaa piffissamik piumasaqaateqarnermut tunngaviuvoq tassungalu peqatigitillugu ilinniарnerup naammaginartumik aaqqissuunneqarnissaanut naammattumik sivissusilimmik piffissaliisoqarluni, tassani ilinniарnerup naammassineranut atatillugu ilinniartitsisoq ilinniарfimmi ilinniartitsisutut aamma atorneqarsinnaassalluni.

Naggatit aappaanni aalajangersakkamut tunngaviuvoq atorfinereernerмиit ukiut marluk ingerlanneranni perorsaанermik ilinniарnerup naammassineqarsinnaannginneranut pissutissaqartoqarsinnaanera. Inuttut pissutsit immikkut ittut pineqassapput. Assersuutigalugu piffissami sivisuumi napparsimasoqarsinnaavoq, erninermut atatillugu sulingiffeqartoqarsinnaalluni aammalu ilinniartitsisup ilaqutaani qaninnerni pissutsit pissutaasinnaallutik. Pingaarutilimmik ilinniарfiup isumassorneqarnissaa tassaasinnaavoq, ilinniartitsisut amerlavallaat pædagogikummit peqataanerisa nassatarippassuk ilinniarnertuunngorniarfimmi ilinniartitsinerup isumannaatsumik ingerlanneqarsinnaajunnaарnera.

§ 60-imut

Imm. 1-imut

Aalajangersakkami aalajangersarneqarpoq ilinniartitsinerми pisinnaasat pillugit Naalakkersuisut uppersaatiniк tunniussisartut. Perorsaанermut pisinnaasat pinnagit ilinniartitsinerми pisinnaasat pillugit uppersaatiniк tunniussisoqartarneranut pissutaavoq ilinniartitsisup perorsaанermik ilinniарneq naammassereeraangamiuk suliami pisinnaasaqalertarnera, tamannalu tassaavoq ilinniartitsinerми pisinnaasaqarneq.

Imm. 2-mut

Aalajangersakkamut tunngaviuvoq ilinniartitsissutiniк pisinnaasalinnik atorfinitsissinnaanerup kissaatiginarsinnaanera, tassunga ilanngullugu aamma Danmarkimut atatillugu, assersuutigalugu oqaatsiniк ilinniartitsissutiniк imaluunniit eqqumiitsuliornerми ilinniartitsissutiniк ilinniartitsinermut. Ilinniartitsinerмик pisinnaasaqarnerмик akuersisoqassанersoq nalilersuivinnikkut pissaaq.

§ 61-imut

Tassani tunngaviuvoq ilinniartitsisut suliamik ingerlatsineranni qaffasissutsip ingerlatiinnarneqarnissaa suliamilu ineriartormik malinnaanissaat.

Neqeroorutini taamaattuni peqataasinnaanermut pisinnaatitaaffiup kinguneraa ilinniaqqinnissamik neqeroorutini taamaattuni neqeroorfigineqarnissamik piunasaqarsinnaanerit taakkunanilu peqataanissamik sulingiffeqarsinnaanermik piunasaqarsinnaallutik.

Ilinniaqqinnissamik neqeroorutit ilisimatusarnermik tunngaveqartussaanerit isumaqarpoq, neqeroorutit atuagarsornerit periutsillu akuerisaasut atorlugit qaffasissutsimikkut qaffasissuusussaanerit.

Ilinniartitsisut ilinniaqqinnerat siunertanut arlalinnut iluaqutaasinnaavoq. Tassaasinnaapput ilinniartitsisut pisinnaasaasa qaffassarneqarput pigineqaannarnerallu, suliami perorsaanermilu, ilinniartitsissut ingerlaannarnerat, ilinniartitsisut inaanni ineriartorneq, ilinniartitsissutit ineriartornerat aammalu qinnuteqarsinnaasut amerlinerat. Ilinniartitsisunut ataasiakkaanut aamma tassaasinnaapput pikkorissarnerit inuttut ineriartuutaasut.

Ilinniartitsisut ilinniaqqinnerat assersuutigalugu tassaasinnaapput oqaatsit aappaat atorlugit perorsaaneq, kulturit akornanni attaveqartarneq aamma perorsaanermi-didaktikimi periutsit.

Aalajangersakkami aalajangersarneqanngilaq ilinniartitsisut qanoq annertutigisumik ilisimatusarnerit tunngavigalugit ilinniaqqinnissamut neqeroorutini peqataasassasut. Rektori tassaassaaq ilinniartitsisut ulluinnarni pisortaanut ilinniartitsisut ilinniaqqinnernik neqeroorutinit peqataanissaannut tunngatillugu aalajangiisartoq. Aalajangiineq pisassaaq peqataanermut aningaasatigut inissisimanerup nalilernerat, peqataanerup ilinniarnertuunngorniarfiup ingerlatsineranut qanoq inissinneqarsinnaaneranut sanilliullugu.

Aalajangersakkap akornusinngilaa, rektorip aqutsisutut nalinginnaasumik oqartussaaffimmi ilaatut, ilinniartitsisut ilinniaqqinnernut naapertuuttunut ilisimatusarnermik tunngaviligaanngitsunut peqataanissaannut pisussaaffiliisinnaanera.

Kapitali 7-imut

Kapitalimi tunngaviupput rektorip akisussaaffianut, pisinnaatitaaffiinnut aamma suliaasaanut aamma pisinnaasariaqagaatut piunasaqaatinut tunngatillugu GU-mut aalajangersakkat. Nutaatut aalajangersarneqarpoq rektorip pisortanik ilinniartitseqqinninnernut ilisimatusarnermik tunngavilinnut peqataanissamut pisinnaatitaallunilu pisussaataaaffeqarnera.

§ 62-imut

Imm. 1-imut

GU pillugu malittarisassanut atuuttunut sanilliullugu aalajangersakkami erseqqissarneqarpoq perorsaanermi allaffissornermilu suliaassanik ilinniarfimmi rektori sulisunik aqutsisusooq agguaasarlunilu.

Ilinniarfimmi sulisut tassaapput ilinniartitsisut allaffimmiullu.

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, 19. maj 2010-meersoq naapertorlugu Kalaallit Nunaanni qitiusumik ilinniarfiit tassaapput suliffeqarfiit namminersortut pisortat pigisaat, siulersuisunit, suliffissaqartitsiffiit kattuffiinit toqqagaasunit aqunneqartut. Siulersuisut qitiusumik ilinniarfiit qullersaraat ilinniarfiullu ingerlatsineranut akisussaallutik. Siulersuisut ilinniarfiup pisortaa atorfinitsillugulu soraarsittarpaat, taannalu ilinniartitsinikkut perorsaanikkullu ulluinnarni akisussaavoq, ilinniarfiullu ulluinnarni allaffissorinikkut aningaasaqarnikkullu ingerlannera isumagisaralugu. Taamaammat pisariaqartinneqarpoq aalajangersassallugu ilinniarfinni akuerisaasuni, qitiusumik ilinniarfiit ilanngullugit, rektorip suliaasa ilinniarfiup pisortaanit imaluunniit tamanna siunertaralugu atorfinitsitamit ilinniarnertuunngorniarnermik aqutsisumit isumagineqarnissaat.

Imm. 2-mut

Aalajangersagaq malittarisassanik GU-mut maannamut atuuttunik ingerlatitseqqiineruvoq. Naggat kingulleq ilanngunneqarpoq ilinniarfinnut akuerisaasunut tunngatillugu aqutsinermut malittarisassat ataqqiumallugit.

Imm. 3-mut

Aalajangersagaq GU pillugu malittarisassanut atuuttunut sanilliullugu annertusineqarpoq erseqqissarneqarlunilu. Rektorip Naalackersuisunut akisussaaffeqarnera tassaavoq ilinniarfimmi tamarmiusumi ingerlatsineq.

Rektorip maannakkutut Naalackersuisunit atorfinitsinneqartarnera soraarsitaasarneralu nutaatut aalajangersarneqarpoq. Naggat kingulleq ilanngunneqarpoq ilinniarfinnut akuerisaasunut tunngatillugu aqutsinermut malittarisassat ataqqiumallugit.

Imm. 4-mut

Aalajangersagaq nutaajuvoq kisiannili maannamut periutsinik inatsisinnngortitsinerulluni. Naggat kingulleq ilanngunneqarpoq ilinniarfinnut akuerisaasunut tunngatillugu aqutsinermut malittarisassat ataqqiumallugit.

Imm. 5-imut

GU-mi periutsinik maannamut atuuttunik inatsisinnngortitsineruvoq.

Aalajangersakkami piumasaqaataavoq ilinniartimmi ilinniartut pillugit aalajangersimasunik aalajangiinissamut pisinnaatitsissut inatsimmi uani aalajangersakkani inatsisilluunniit uuma kingunerisaanik malittarisassani killilerneqarsinnaasoq.

§ 63-imut

Imm. 1-imut

GU-mi rektorip ilinniagaqarnermi pisinaasaasut piumasaqaatit atuuttut aalajangersakkami ingerlateqqinneqarput. §§ 58-59-imut innersuussineq isumaqarpoq ilinniartitsinermi perorsaanermilu pisinnaasanut tunngatillugu ilinniartitsisunut piumasaqaatit assingi rektorimut atuuttut. Tamassumunnga tunngaviuvoq ilinniartimmi ilinniartitsinermi suliamut, misilitsinnernut soraarummeernernullu rektorip akissussaanera eqqarsaatigalugu rektorip suliami perorsaanermilu pisinnaasai ilinniartitsisutut annertussuseqartariaqarmat, taamaalilluni ilinniartitsisut ilinniartitsissutinik naammaginantumik ilinniartitsinerannik naliliinissamut rektori periarfissaqassalluni.

§ 78-imut innersuussineq ilanngunneqarpoq ersersikkumallugu, rektorit inatsisip atuutilinnginnerani atorfinitsitat pisinnaasariaqagaat pillugit ikaarsaariarnermi aalajangersagaliortoqartoq.

Nutaatut aalajangersarneqarpoq rektori aqutsinermik aamma pisinnaasaqassasoq. Rektorip aqutsinermik suliaqarnerata erseqqissarneqarneratut tamanna isigineqassaaq. Aqutsinermi pisinnaasat pisortatut ilinniartimmi imaluunniit aqutsisutut misilittagaqarnikkut. Pissarsiarineqarsimassapput. Naalakkersuisut atorfinitsitsisartutut rektorit atorfimmut qinnuteqartut pisariaqartunik pisinnaasaqarnerisut nalilersuisarput.

§ 64-imut

Aalajangersagaq nutaajuvoq. Ilinniartitsisunut atuuttut assigalugit ilisimatusarneq tunngavigalugu ilinniaqqinnissanut neqeroorutini peqataanissamut pisinnaatitaaffeqarneq pisussaaffeqarnerlu aalajangersarneqarpoq. Rektori eqqarsaatigalugu tassaasinnaapput pisortanut ilinniaqqinnissamut neqeroorutit, tassa rektori pisortaammat pisinnaasanik ingerlaavartumik qaffassaanissaq pisariaqartinneqarsinnaammat. Kisiannili rektorip suliami perorsaanermilu pisinnaasai annertusarneqartariaqarsinnaapput.

Ilinniaqqinnissamut neqeroorutinut taamaattunut neqeroorfigineqarnissamik rektorip piumasaqarsinnaanera neqeroorutini taamaattuni peqataasinnaanermut pisinnaatitaaffiup kingeraa, taakkunanilu peqataanissami sulinnigiffeqarnissamik piumasaqaateqarsinnaalluni.

Ilisimatusarneq tunngavigalugu neqeroorutit pineqarnerat isumaqarpoq atuagarsornerit periutsillu akuerisaasut tunngavigalugit neqeroorutit suliamut tunngatillugu qaffasissuussasut.

Aalajangersakkami aalajangerneqanngilaq, qanoq annertutigisumik rektori ilinniaqqinninnernut ilisimatusarnermik tunngavilinnut peqataanissaminut pisussaaffeqarlunilu pisinnaatitaaffeqarnersoq. Atorfinititsisartutut oqartussaasup rektorip ilinniaqqinnernut peqataanissaanut tunngasut aalajangissavai. Aalajangiinermi tunngaviussapput peqataanermut aningaasaqarnikkut piumasaqaatit peqataanerup ilinniarnertuunngorniarfiup ingerlatsineranut qanoq naleqqussarsinnaatigineranut sanilliullugu.

Aalajangersakkap akornusinnigilaa, atorfinititsisartutut oqartussaasup aqutsisutut nalinginnaasumik oqartussaaffimmi ilaatut, rektorip ilinniaqqinnernut naapertuuttunut ilisimatusarnermik tunngaviligaanngitsunut peqataanissaanut pisussaaffiliisinaanera.

Kapitali 8-mut

Ilinniartitsisut siunnersuisoqatigiiffii aamma ilinniartut siunnersuisoqatigiiffii pillugit malitarsissat kapitalimi ingerlateqqinneqarput, kisiannili ilinniartitsisut ataatsimoorullugulu ataatsimiititaliat pillugit maannamut malitarsissat ingerlateqqinneqaratik.

§ 65-imut

Imm. 1-imut

Malitarsissanut maannamut atuuttunut naleqqiullugu erseqqissarneqarpoq siunnersuinerit pissutsinut suliamut aammalu perorsaanermt allaffissornermillu tunngasuussammata.

Imm. 2-mut

Ilinniartitsisut siunnersuisoqatigiivi qanoq katitigaassanersut aalajangersakkami aalajangersarneqarpoq.

Ilinniarnertuunngorniarfiit ilaata siunnersuutip tusarniaassutiginerani siunnersuuteqarnera tunuliaqutaralugu siunertamut naapertuuttutut isigineqarpoq, ilinniartitsisut namminneq aalajangertarpassuk, ilinniartitsisut siunnersuisartoqatigiivi maannamutut tassaassanersut ilinniarnertuunngorniarfimmi ilinniartitsisut tamarmik imaluunniit ilinniartitsisut akornanni sinniisissatut toqqakkat.

Ilinniartitsisunik qinikkanik sinniisoqarnissaq aalajangiunneqarpiat isumaqarpoq siunnersuisoqatigiit rektorimut tunngatillugu takutissagaat ilinniartitsisoqatigiit assigiinngitsut siunnersuisoqatigiit sinniisuuffigigaat, assersuutigalugu ilinniartitsisut ilinniartitsissutini assigiinngitsuni ilinniartitsisut, ilinniartitsisut assigiinngitsunik ukioqartut, suaassuseq ilanngunneqarsinnaallutillu peqatigiit allat.

Ilinniartitsisut ilinniartitsisunut tamarmiusut taarsiullugu ilinniartitsisut siunnersuisoqatigiiffianni ilinniartitsisoqatigiinnit assigiinngiiaartunit sinniisoqarnissaanik aalajangerunnarnerata pissutsit tigussaasut allaffissornermullu tunngasut tunuliaqutarisinnavai.

Aammattaaq naggat kingulleq ilanngunneqarpoq tusarniaanermi akissutit tunuliaqutaralugit. Malinnaasutut peqataasinnaaneq aqquutigalugu ilinniartitsisut ilinniartullu siunnersuisartoqatigiivisa suleqatigiinnerunissaat periarfissinneqarpoq. Ilinniartut siunnersuisoqatigiivisa namminneq aalajangissavaat, periarfissaq atorumanerlugu.

Imm. 3-mut

Aalajangersagaq isumaqarpoq inissititerarneq, ataatsimiigiaqqusineq, aalajangiisinnaassuseqarneq, taasinermi malittarisassat, imaqarniliornermik pissutsillu allat suleriaatsini nalinginnaasumik aalajangersarneqartartut pillugit ilinniartitsisut siunnersuisoqatigiivi namminneq malittarisassiortassasut.

Imm. 4-mut

Aalajangersakkami naggatip siulliup takutippaa ilinniartitsisut siunnersuisoqatigiiffianni sulinermi ilinniartitsisut peqataanissamik kissaateqartut tassunga piffissaqartinneqassasut. Tassungali peqatigitillugu naggatit aappaanni aalajangersarneqarpoq sulineq imatut aaqqissuunneqassasoq ilinniartitsisut siunnersuisoqatigiiffianni ilaasortap ilinniartitsineq pilersaarusiordfigineqareersimasoq sapinngisamik ingerlatissagaa. Tamanna isumaqarpoq ilinniartitsisut siunnersuisoqatigiiffianni sulineq imatut aaqqissuunniarneqartariaqartoq siunnersuisoqatigiinni ilaasortat amerlanerpaat ilinniartitsinerup pilersaarusiordfigineqareersimasup avataani peqataatissinnaalersillugit.

Imm. 5-imut

Pisinnaatitsinermut aalajangersagaq ilinniartitsisut siunnersuisoqatigiiffianni ingerlatsineq pillugu sinnaakkutaasunik aalajangersaanikkut atorneqassaaq.

§ 66-imut

Imm. 1-imut

Malittarisassanut maanna atuuttunut naleqqiullugfu erseqqissarneqarpoq siunnersuisutut inissisimaneq tassaassammat pissutsinut ilinniartunut tunngasunut naleqqiullugu siunnersuineq.

Imm. 2-mut

Ilinniartut siunnersuisoqatigiivi qanoq katitigaassanersut aalajangersakkami aalajangersarneqarpoq. Ilinniartoqatigiinnut assigiinngiiaartunut sinniisussatut tassunga qinigaanerup oqaatigineqarnera isumaqarpoq siunnersuisoqatigiit rektorimut tunngatillugu

takutissagaat ilinniartut assigiinngitsut siunnersuisoqatigiit sinniisuuffigigaat, tassunga ilanngullugu ilinniartoqatigiit ilinniakkat sammiviinit assigiinngiaartuneersut, klassit tulleriaarneranni qaffasissutsinit assigiinngitsuneersuussasut ilanngunneqarsinnaallutillu peqatigiit allat. Tamanna aamma isumaqarpoq ilinniartut siunnersoqatigiivini ilinniarfimmi iliniartut tamarmiunngitsut ilaasortaasut.

Ilinniartunut tamarmiusunut taarsiullugu ilinniartut siunnersuisoqatigiiffianni ilinniartoqatigiinnit assigiinngiaartunit sinniisoqarnissaa pissusivinnik allaffissornermilu pissutsinik tunngaveqarpoq, taassumalu saniatigut ilinniartut kikkut tamarmik oqartussaanerannik ilisimasaqalernissaannut ilaasutut isigineqassaaq.

Naggat kingulleq ilanngunneqarpoq tusarniaanermi akissutit tunuliaqutaralugit. Malinnaasutut peqataasinnaaneq aqputigalugu ilinniartitsisut ilinniartullu siunnersuisartoqatigiivisa suleqatigiinnerunissaat periarfissinneqarpoq. Ilinniartitsisut siunnersuisoqatigiivisa namminneq aalajangissavaat, periarfissaq atorumanerlugu.

Imm. 3-mut

Aalajangersagaq isumaqarpoq inissitsiterarneq, ataatsimiigiaqqusineq, aalajangiisinnaassuseqarneq, taasinermi malittarisassat, imaqarniliornermik pissutsillu allat suleriaatsini nalinginnaasumik aalajangersarneqartartut pillugit ilinniartut siunnersuisoqatigiivi namminneq malittarisassiortassasut.

Imm. 4-mut

Ilinniartut siunnersuisoqatigiivisa atuuffiat tassaavoq siunnersuineq ilaatigullu ilinniarfimmik ingerlatsinermut tapersiinissaq. Ilinniartut namminneq soqutiginninnerannik tunngaveqarmat ilinniartut siunnersuisoqatigiivisa sulineranni peqataaneq akissarsiaqaataassanngilaq. Tamanna aammattaaq ilinniartitsisut ilinniartut siunnersuisartoqatigiivini malinnaatitaannut atuuppoq, tassami pineqartoq ilinniartitsisut siunnersuisartoqatigiivinit aallartitatut peqataavoq, ilinniartitsisullu siunnersuisartoqatigiivini peqataaneq § 65, imm. 4 naapertorlugu piffissamut ilinniartitsisup ilinniartitsiffianut ilaasutut isigineqarpoq.

Imm. 5-imut

Tamanna isumaqarpoq ilinniartut siunnersuisoqatigiiffianni sulineq imatut aaqqissuunniarneqartariaqartoq siunnersuisoqatigiinni ilaasortat amerlanerpaat siunnersuisartoqatigiit ataatsimiinnerini ilinniartitsinerup pilersaarusiortigineqareersimasup avataani peqataatissinnaalersillugit.

Naggatit aappaanni aalajangersakkami oqariartuutigineqarpoq, ilinniartut siunnersuisartoqatigiivini peqataaneq, qaqutigoortumik ilinniartitsinerup pilersaarusiorkkap avataanut inissinneqarsinnaanngitsoq, ilinniartitsinermut peqataanngitsoornertut isigineqassanngitsoq, taamaammallu ilinniartoq peqataanissaminut tunngatillugu atuanngitsoorsinnaasoq.

Imm. 6-imut

Piginnaatitsineq ilinniartut siunnersuisartoqatigiivisa sulinerannut sinaakkutissanik aalajangersaanermut atorneqarsinnaavoq.

Kapitali 9-mut

Pitsaasumik ineriartortitsineq, angusanik nalilersuisarneq elektroniskilu atorlugu attaveqartarneq pillugit aalajangersaaneq nutaajupput.

§ 67-imut

Imm. 1-imut

Ilinniartitaanermut ministeri taarserlugu aalajangersagaq malillugu Naalakkersuisut maannakkut akisussaanerisa saniatigut erseqqissarneqarpoq akisussaaneq misilitsinnernut aamma atuuttoq, aalajangersagarlu malittarisassanik atuuttunik ingerlatitseqqinneruvoq.

Pisunik akuliuffigineqartariaqarsorinartunik Naalakkersuisunut paasissutissiisoqaraangat Naalakkersuisut nakkutilliinerat nammineq suliniuteqarnikkut ingerlanneqartassaaq. Maalaaruteqartoqarsimanera piumasaqaatitut pisariaqanngilaq naammaannaniluunniit.

Imm. 2-mut

Aalajangersagaq nutaajuvoq

Ingerlaavartumik pitsaassutsumik ineriartortitsinissap angusanillu naliliisarnerup qulakkeerneqarnissaannik Naalakkersuisut pisussaaffeqarnerat, ilinniartitsineq, misilitsitarneq soraarummeernerlu pillugit Naalakkersuisut akisussaaffiisa ilaatut isigineqassaaq, takuuk imm. 1

Nalilersueriaatsit nutaaliat ilinniarnertuunngorniarfinni perorsaanermi periutsinut ilanngunneqarnissaat aalajangersakkami ilaatigut qulakkeerneqassaaq. Ilinniartitseriaatsit tamarmik nalilersueriaatsimut ilaanerqarnissaannik aalajangersagaq aammattaaq periarfissiiuvoq, assersuutigalugu ilinniartitsisut ilinniartitseriaasiat, suleriaatsit pisinnaasallu. Nalilersueriaatsinik ineriartortitsineq ineriartortitsineq ilinniartitsinermi pitsaassutsumik aamma qulakkeerineqaataasinnaavoq.

Imm. 3-mut

Perorsaaneq allaffissornerlu pillugit aalajangersakkami ilitsersuinissamik pisinnaatitsineq ilinniarnertuunngorniarfiit ilinniartitaanermut naalakkersuisoqarfiup ataani suleqarfiunerisa rektorillu Naalakkersuisunit atorfinitsinneqartarnerata pissusissamisoortumik kinguneraa. Rektori Naalakkersuisunit maannamut aamma atorfinitsinneqartarnikuuvoq, taassumalu kinguneranik allaffissornermi pissutsit pillugit ilinniartitaanermut naalakkersuisoqarfiup

ataaniilluni, rektorilu perorsaanermi pissutsit pillugit ilinniartitaanermut ministereqarfiup ataaniilluni. Ilinniarfinnut akuerisaasunut immikkut ittunik aqutsinermi malittarisassaqaqmat, pisariaqartutut isigineqarpoq, peqqusinerup ilinniarfiup psiortaanut taama pisoqartillugu tunniunneqarnissaa.

§ 68-imut

Imm. 1-imut

GU pillugu malittarisassanik atuuttunik aalajangersagaq tunngaveqarpoq, kisiannili pissutsinut taakkununga tunngatillugu annertusaaneqarluni erseqqissaasoqarlunilu. Taamaalilluni maannakut erseqqissarneqarpoq paasissutissat ilinniarnernut, ilinniartunut sulisunullu tunngasinnaasut. Aammattaaq erseqqissaalluni aalajangersarneqarpoq paasissutissanik pissarsiniarneq nakkutilliineq naatsorsueqqissaarinerlu siunertaralugit pissasoq.

Nakkutilliinermut imaluunniit naatsorsueqqissaarinermut ilinniarneq, ilinniartut sulisulluunniit pillugit ingerlanneqarnerannut paasissutissat pisariaqarnerisut Naalakkersuisut naliliinerat apeqqaavoq. Paasissutissat suliarineranni nassiunnerannilu isumalluutit tamarmiusut imminnut naapertuunnersut taamatut nalilersuinermi isiginiarneqassaaq, taamaalilluni ilinniarsiit pisariaqanngitsumik suliakkerneqassanatik.

Imm. 2-mut

Aalajangersagaq nutaajuvoq

Aalajangersakkami immikkoortumi siullermi siunertaavoq ilinniarnertuunngorniarsiit Naalakkersuisullu akornanni attaveqarnermi elektroniskip atorneqarneranut erseqqarissumik pisinnaatitsinissaq. Tamanna aqutsivimmi nalinginnaasumik digitaliseeriinermut atatillugu isigineqassaaq.

Aalajangersakkami pisinnaatitsinermi aalajangersakkami pissutsit taaneqartut saniatigut aamma digitalinngorlugu atsiortarnerup atorneqartarnera pillugu piumasaqaatinik aamma aalajangersaasoqarsinnaavoq.

Aalajangersakkammi immikkoortut aappaanni taamaallaat pineqarput elektroniske atorlugu attaveqartarnermut atatillugu piumasaqaatini nakkutilliinermilu iliutsit.

§ 69-imut

Imm. 1-imut

Rektorip aalajangiinerinik naammagittaalliuteqarsinnaanermut periarfissat atuuttut aalajangersakkami ingerlateqqinneqarput. Ilinniarnertuunngorniarsiimmi ilinniarnermi

ilinniartitsissutit imarisaat Namminersorlutik Oqartussat maannakkut akisussaaffigimmatigit rektorip aalajangiineri tamarmik maannakkut Naalakkersuisunut naammagittaalliutigineqassaput.

Erseqqissarneqarpoq maalaaruteqarsinnaatitaasunut ilaasut tassaasut ilinniartut aamma ilinniarnertuunngorniarumallutik qinnuteqartut. Qinnuteqartunut tunngatillugu maalaaruteqarsinnaaneq immikkut soqutiginaateqassaaq § 8, imm. 1, nr. 2 aamma 3-mi ilinniartunngornissamut piumasaqaatit sanioqqunneqarnissaat pillugu rektorip aalajangiisarnerinut naleqqiullugu kiisalu ilinniartunngorsinnaaneq pillugu § 9, imm. 2 naapertorlugu rektorip aalajangiinerinut naleqqiullugu.

Naammagittaalliteqarsinnaaneq pillugu annertunerusunik malittarisassiornissamut nutaatut Naalakkersuisut pisinnaatinneqarput. Assersuutigalugu ilusissaannut piumasaqaatinik suliarinninnermilu pissutsit pillugit aalajangersakkanik taakku imaqarsinnaapput.

Naammagittaalliteqarsinnaaneq naammagittaalliutinik aalajangiisartut naammagittaalliunik suliamut atatillugu immikkoortut pingasut suliarisinnaavaat, tassa inatsiseqarnikkut apeqqutit, naleqquttuunera pillugu apeqqut pissusiviillu.

Inatsiseqarnikkut apeqqutit ilaatigut tassaasinnaapput suliarinnittarneq pillugu inatsisip malinneqarsimanera, malittarisassamik aalajangiinermut tunngaviumik nassuiaaneq, aqutsinermi inatsisitigut tunngaviit, pissutsit imminnut naapertuunnerannik periutsit il.il. aammalu inatsisilerinermi apeqqutit nalinnginnaasut (assersuutigalugu qanoq aalajangiisoqarnissaa pillugu pituttuutaasumik siumut nalunaaruteqarneq pillugu inatsisilerinermi tunngaviit allassimanngitsut).

Pissutsit aalajangersimasut pilugit maalaaruteqartarneq pillugu immikkut aalajangersaasoqarsinnaavoq, tassunga ilanngullugit ilinniarnermik aallartissinnaaneq, ingerlaavartumik inaarutaasumillu nalilersuineq uppenarsaasiornerlu aammalu klassimut tullermut nuussinnaanissamik itigartitsineq, takukkit siunnersuummi § 14, § 44, imm. 3, § 50 aamma § 53, imm. 2.

Imm. 2-mut

Tamanna pillugu malittarisassat maannamut atuuttut aalajangersakkami ingerlateqqinneqarput.

Angajoqqaatut oqartussaasut suliap inerneranik annertuumik, pingaaruteqartumik aamma soqutiginninnissaannik ilimagisaqarnermik aalajangersagaq tunngaveqarpoq.

Kapitali 10-mut

§ 70-imut

Nr. 1-imut

Aalajangersakkami siunertaavoq paasissutissiissutit ilitersuutillu pisariaqartut suliarineqarnissaasa qulakkeerneqarnissaat, taamaalilluni ilinniarnertuunngorniarfinni ilinniarnissamut qinnuteqarsinnaasut ilinniarnertuunngorniarfimmi ilinniagaqalernissamik qinnuteqassanerlutik paasisaqarluarsimallutik aalajangiisarniassammata aammalu ilinniarneq sunik imaqarnerseqq sumullu atorineqarsinnaanersaq.

Atortut suliarineqarnissaat pissarsiarineqarsinnaanerilu Naalakkersuisut akisussaaffigaat.

Nr. 2-mut

Soraarummeerutissat akuerineqarneqartarneri aammalu Kalaallit Nunaanni ilinniarnertuunngorniarfinni ilinniarnertit ineriartortinneqarnissaat immikkut pingaartillugu suliaasat pillugit Ilinniartitaanermut Ministeriaqarfiup aamma Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup akornanni suleqatigiinnissamik isumaqatigiissut malillugu Kalaallit Nunaanni Danmarkimilu ilinniartitsissutinut siunnersortit peqataasarput. Sulianut ineriartortitsinermilu apeqqutit pillugit Kalaallit Nunaanni Danmarkimilu ilinniartitsissutinut siunnersortit attaveqatigiittarput.

UVM-imi ilinniartitsissutinut siunnersortit Kalaallit Nunaanni ilinniarnertuunngorniarfinni ilinniarnertit ineriartortinneqarnissaat pillugu annertunerusumik isumaqatigiissut malillugu ikiuuttarput, tassunga ilanngullugu Kalaallit Nunaanni ilinniartitsisut suliamik perorsaanermillu pisinnaasaat aammalu ilinniarnertit pitsaasusiisa qulakkeerneqarnissaat pillugu. Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup tamanna pillugu qinnuiginninneratigut UVM-imi ilinniartitsissutinut siunnersortit Kalaallit Nunaanni ilinniartitsissutinik siunnersuisarnermi ikiuussinnaapput.

Piumasaqaataavoq ilinniartitsissutinut siunnersuisoqarfik immikkoortuni pingaarnerni tamanna siunissami annertusarneqassasoq, ilinniartitsissutinullu siunnersortit taakku Qallunaat Nunaanni ilinniartitsissutinik siunnersuisartunut pingaarnertut attaveqaataassasut ilinniartitsissutinilu immikkoortut ataasiakkaat sullittassagaat.

Nr. 3-mut

Ilinniartitsinermi atortunik ineriartortitsinissap isumaginissaanik Naalakkersuisut pisussaaffeqarnerisa kinguneraa ilinniartitsinermi atortut avataaneersut ilinniarnertuunngorniarfinni ilinniarnerni iluaqutaasumik atorineqarsinnaasut saniatigut ilinniartitsinermi atortut Kalaallit Nunaanni ilinniarnertuunngorniarfinni ilinniarnertut tunngatinneqartut ineriartortinnissaannik aamma pisussaaffeqartoqassaaq.

Nr. 4-mut

Aalajangersagaq ilinniartitsisut rektorillu ilisimatusarneq tunngavigalugu ilinniaqqinnissanut neqeroorutini peqataannissaannut pisinnaatitaaffii pisussaataitaaffiilu pillugit siunnersuummi § 61-imut aamma § 64-imut atatillugu isigineqassaaq.

Kalaallit Nunaanni Danmarkimilu ilinniarnertuunngorniartfinni iliniartitsisut Ilinniartitaanermut Ministeriaqarfiup aamma Kultureqarnermut, Ilinniartitaanermut, Ilisimatusarnermut Ilageeqarnermullu akornanni suleqatigiinnissamik isumaqatigiissutaat malillugu nunani pineqartunik assigiinnik atugassaqarluni sulianik perorsaanermillu ilinniaqqinnerni ineriartortitsiviusuni peqataanissamut periarfissaqarput.

Nr. 5-imut

Aalajangersagaq siunnersuummi § 67, imm. 2-mut atatillugu isigineqassaaq, taassumalu kingorna ilinniarnertuunngorniartfinni ataasiakkaani ilinniarnermut ilinniartitsinermullu atatillugu ataavartumik pitsaassutsimik ineriartortitsinissaq Naalakkersuisut qulakkiissavaat.

Aalajangersakkami siunertaavoq ingerlaavartumik pitsaassutsimik ineriartortitsinerup angusanillu nalilersuisarnerup ilinniarnertuunngorniartfinni ataasiakkaani ingerlanneqartut perorsaanermik ilisimatusarnermit ineriartortitsinermillu suliaqarnermit ikorfartorneqarnissaasa qulakkeerneqarnissaa, ilinniarnertuunngorniartfiillu ingerlatsinerannik tamarmik tamarmiusumik aamma nalilersuisoqartassasoq.

Nr. 6-imut

Pissusissamisoorutut pisariaqartutullu isigineqarpoq misilitsinnernik soraarummeertarnernillu aaqqissuisarnermik akisussaanermut atatillugu Ilinniartitaanermut Ministeriaqarfiup maannamut akisussaaffia Naalakkersuisut siunissami akisussaaffigissagaat. Akisussaaffeqarneq ilaatigut kinguneqarpoq Naalakkersuisut soraarummeernissanik pilersaarusiussasut, misilitsinnernut ilinniartitaanermut naalakkersuisoqarfimmit suliakkiissutigineqartunut ullunik piffissanillu aalajangiisassasut, soraarummeernerit il.il. aaqqissuunnissaannut atugassanik ilinniartfiit nalunaaruteqartarnissaanni piffissaliissasut, censorinik toqqaassasut, suliassat pillugit kommissioniliussasut.

Kapitali 11-mut

§ 71-imut

Aningaasalersuisarneq pillugu malittarisassat maannamut atuuttut aalajangersakkami ingerlateqqinneqarput.

§ 72-imut

Imm. 1-imut

Ilinniartitsinermut aallaavigalugu akiliisoqartannginnissaa aammalu ilinniarnermi atortut ilinniarnermut pisariaqartut ilinniartunut akiliisitsisoqarani aallaavigalugu aamma atugassanngortinneqartarnissaat pillugit malittarisassat maannamut atuuttut aalajangersakkami ingerlateqqinneqarput.

Imm. 2-mut

Ilinniartitsinermut ilaatillugu takusassarsiornerit, paasisassarsiorluni angalanerit il.il. peqataanermi ilinniartut akiliisinneqartarnissaat pillugu maannamut periusaasoq aalajangersakkami ingerlateqqinneqarpoq. Naggatit aappaanni aalajangerneqarpoq peqataanermi akiliisarnermi taamaallaat pineqartut angalanermut ineqarnermullu aningaasartuutit, nerisaqarnek pissutsillu allat ilinniartitsinermut imaluunniit ilinniartitsisut peqataanerannut tunngasuunngitsut.

Naggatit pingajuanni maannamut periusaasumik inatsimmut ilanngussisoqarpoq.

Imm. 3-mut

Ilinniartut 18-it inorlugit ukiullit eqqarsaatigalugit angajoqqaanit pilersorneqartussaataapput, tamannalu ilaatigut isumaqarpoq nerisaqarnissaat angajoqqaat isumagissagaat. Ilinniartut 18-inik ukiullit angajulliuneruulluunniit nerisaqarnissaminnut nammineq akisussaasuupput. Tamanna aallaavigalugu pissusissamisoortutut isigineqarpoq ilinniarnermi takusassarsiornerit, paasisassarsiorluni angalanerit il.il. nerisaqarnermut annikitsuinnarmik akiliiffiusartuni (50 kr.) ilinniartut tamarmik peqataanissaat piumasqaataasinnaasoq, taamaammallu aalajangersakkami aalajangerneqarpoq taamatut pisoqarnerani ilinniartut pinngitsoorani takkuttussaataaneq pillugu malittarisassat malissagaat.

Peqataaneq pinngitsoorani takkunnissaq pillugu malittarisassanut ilaammat peqataasoq peqataanermut akiliuteqanngitsoq peqataanngitsoortinneqarsinnaanngilaq.

Imm. 4-mut

Aalajangersagaq nutaajuvoq.

Ilinniarnermi takusassarsiornerit, paasisassarsiorluni angalanerit il.il. nerisaqarnek imaluunniit annikitsuinnarmik akiliuteqarluni akiliuteqarnek (50 kr.) pinnagit peqataanermut akiliuteqarnek pineqarmat ilinniartut tamarmik peqataanissaat piumasarineqarsinnaanngilaq, taamaammallu aalajangersakkami aalajangerneqarpoq peqataanissaq ilinniartut ataasiakkaat namminnek aalajangersinnaagaat. Tamanna isumaqarpoq peqataaneq pinngitsoorani takkuttussaataaneq pillugu malittarisassanut ilaanngitsoq.

Tassunga taarsiullugu ilinniartitsineq ilinniartitsinernik assigiinngitsunik imaqarsinnaavoq. Assersuutigalugu tassaasinnaapput ilinniarnernit immikkut aqqissuussat.

Imm. 5-imut

Aalajangersagaq nutaajuvoq.

Immikkut aaqqissuussineq, ilinniartup nammineq kissaatigisaa, pineqarmat, siunertamut naapertuuttut isigineqarpoq, ilinniartup nammineq angalaneranut, nammineq najugaqarneranut nerisaqarneranullu atatillugu akiileeqqusinissaq malittarisassatigut tunngavississallugu.

Imm. 6-imut

Ilinniarnermi atortunik aalajangersimasunik ilinniartut namminneq akiliinissaat pillugu malittarisassiortoqarsinnaavoq, tassunga ilanngullugit lommeregneri, ordbogit, fotokopit ilinniartitsissutinilu atuakkat ataasiakkaat ilinniartumut naleqartuartsat. Tassunga tunngatillugu maluginiarneqassaaq qarasaasiat angallattakkat atuartsinermi atortunut ilaasutut isigineqanngimmata.

Imm. 7-imut

Kalaallit Nunaanni Ilinniarnertuunngorniarfimmi ilinniartut pillugit Namminnersornerullutik Oqartussat nalunaarutaanni nr. 21, 5. august 1992-imeersumi §§ 7 aamma 8-mi imminut ilinniartittut ilinniartitsissutinilu ataasiakkaani peqataasut akiliuteqartarnissaat pillugit aalajangersagaqarpoq. Nalunaarutaat nr. 28, 27. juni 1994-imeersoq aqutugalugu nalunaarut allanngortinneqarpoq, ilinniartitsissutini ataasiakkaani ilinniartut akiliuteqartarnissaat atorunnaarsinneqarluni. Siunertamut naapertuuttut isigineqarpoq akiliuteqaretitsisarnissap malittarisassiuunnissaanut periarfissap ingerlateqqinnissaa.

Kapitali 12-imut

§ 73-imut

Imm. 1-imut

Atuuffiani malittarisassanut atuuttunut tunngatillugu perorsaanermi ineriartortitsilluni suliaqarneq ilanngullugu aalajangersagaq annertusineqarpoq. Tamassumunnga pissutaavoq perorsaanermi ineriartortitsinermik suliaqarnermut inatsisip siunertaanngitsumik ajoqutaannginnissaa.

Misileraalluni sulineq aamma perorsaanermik ineriartortitsilluni sulineq tassaasinnaapput allaffisornermut, aaqqissuussaannermut imaluunniit perorsaanermut tunngasut.

Ilinniartut illersorneqarnissaat immikkoortut aappaanni siunertaavoq. Taamaalilluni misileraalluni sulinerup siuarsarnissaa aammalu perorsaanermik ineriartortitsilluni sulineq siunertaralugit inatsisip atuutitinninnissaa ilinniartunut eqqorneqartunut ajortumik kinguneqannginnissaa qulakkeerneqassaaq. Siunertat taamaattut siuarsarniarlugit inatsisip atuutitinninnissaanut ilinniartut akuersisinnaanerit immikkut pingaaruteqanngilaq, tassa

ilinniartut ilinniarnermik naammassinninnissamut pisinnaatitaaffitik
taamaatiinnarsinnaanngimmatigit.

Imm. 2-mut

Aalajangersagaq assersuutigalugu atorneqarsinnaavoq, ilinniarfiup kukkuluttornera pissutigalugu aatsaat 3. G-p naanerani paasineqarpat, ilinniartup misilitsinnerit pisariaqartut misilitsissutigisimangikkai.

Kapitali 13-imut

§ 74-imut

Imm. 1-imut

Ukiup atuarfiusup aallartinnerani inatsisip atuutilernissaa qinerneqarpoq, siunnersuummilu § 17, imm. 1 malillugu tassaavoq 1. august. Piffissatut atuutilerfissaattut siunnersuuteqarnikkut allaffissornikkut najoqqutassat inatsimmi allassimasut suliarinissaannut naammattumik piffissaqassaaq. Atuutilerfissaattut piffissaliinermi aamma siunertaavoq ilinniartitsinerup nutaap ilisimatitsissutigineqarnissaanut ilitsersuinissamullu aammalu ilinniarnernup atuutilernissaanik pilersaarusiornermut aaqissuussinermullu pisariaqartumik piffissaliinissaaq.

Imm. 3 innersuussutigalugu siunertaavoq atuutilersitsinissap piffissaani pissuserineqartartup atuutinngissaata ilisimatitsissutigineqarnissaa.

Imm. 2-mut

Inatsisip piffissaq atortuulerfissaa aalajangersakkami aalajangerneqarpoq. Takuneqarsinnaavoq piffissaq atortuulerfissaa piffissap atuutilerfissaata assigigaa. Piffissami inatsisip atuutilerfissaani ilinniartunut GU-mi imaluunniit inuussutissarsiutinut ilinniarnertuunngorniarfinni ilinniarnernik aallartitsisimasunut § 76-imi ikaarsaariarnermut aalajangersakkamut atatillugu aalajangersagaq isigineqassaaq.

Imm. 3-mut

Aalajangersakkami siunertaavoq augustimi 2012-imi ilinniarnernup aallartinnerani ilinniartunngortitsinerup ilinniartunngortitsineq pillugu inatsimmi malittarisassat malillugit pinissaata qulakkeerneqarnissaa.

§ 75-imut

Namminersorlutik Oqartussanut atatillugu pissutsit assigiinngitsut pillugit inatsimmi nr. 474. 12. juni 2009-meersumi § 7, imm. 1-ikkut Kalaallit Nunaanni ilinniarnertuunngorniarfinni ilinniarnernit pillugit inatsit nr. 1393, 27. december 2008-meersoq atorunnaarsinneqarpoq. § 7, imm. 2-mi aalajangersarneqarpoq najoqqutassiat inatsimmi uani pisinnaatitsissut malillugu

suliarineqartut pisortanit oqartussaasunit atorunnaarsinneqarnissaata tungaanut atuutiinnassasut.

§ 7, imm.2-mut oqaaseqaatini allassimavoq aalajangersakkap kingunerigaa pisinnatitsineq pillugu inatsimmi imm. 1-imi taaneqartumi pisinnaatitsissut naapertorlugu inatsisartut peqqussutaat suliarineqartoq pisortanit oqartussanit atorunnaarsinneqarnissaata tungaanut atuutiinnassasoq, tassanilu aamma atuuttoq inatsisartut peqqussutaat pisortanit oqartussanit allanngortinneqarsinnaasoq atuutiinnassallunilu. Aammattaaq allaqqavoq immikkoortuni pisinnaatitsissut pillugu inatsisip atorunnaarnissaanik siunnersuuteqarfiusuni inatsiseqannginnissaa tamassuma qulakkeertikkaa.

Kisiannili inatsisartut peqqusiortoqanngilaq imaluunniit ilinniarnertuunngorniarfinni ilinniarnert pillugit inatsimmi nr. 1393 27. december 2008-meersumi pisinnaatitsissut malillugu allanik malittarisassiortoqarani, tamannalu nutarterilluni suliap ingerlanneqartup naammassineqarnissaata utaqqimaarneqarneranik pissuteqarpoq. Aalajangersakkami oqaasertat malillugit ilinniarnertuunngorniarfiit pillugit inatsisaaruttutut isineqarsinnaapput. Oqaaseqaatit malillugit tamassuma pinissaa pinngitsoortinniarneqarmat § 7, imm. 2-mi aalajangersakkat tamanna naapertorlugu paasineqarput. Taamaaliluni ilinniarnertuunngorniarfinni ilinniarnert pillugit inatsimmi nr. 1393, 27. december 2008-meersumi aalajangersakkat atuutiinnartut aalajangersagaq isigineqarpoq. Taamaalilluni ilinniarnertuunngorniarfiit pillugit peqqussutit nalunaarutillu peqqussut malillugu suliarineqartut inatsisartut peqqussutaata aammalu Namminersornerullutik Oqartussat malittarisasa atorunnaarsinneqarnissaasa tungaanut § 7-imi aalajangersakkat atuutiinnarnissaannik inatsit imaqarpoq. Tamassumunngalumi peqatigitillugu malittarisassat taakku malillugit allaffissornikkut aqutsisoqarpoq.

Itisileriumasunut nalinginnaasumik oqaaseqaatini imm. 1b-mi Nunatsinni ilinniarnertuunngorniarernerup ineriartornerata oqaluttuassartaa, innersuunneqarpoq.

Ilinniarnertuunngorniarfinni ilinniarneq pillugu Inatsisartut inatsisaata piffissamit atuutilerfianit atortuulersinneqarneraniit ilinniarnertuunngorniarfinnut inatsisitigut sinaakkusiisussaammat aammalu Inatsisartut inatsisaanni pisinnaatitsissut malillugu allaffissornikkut najoqqutassiat pisariaqartut suliarineqartussaammata aalajangersakkami siunnersuutigineqarpoq Namminersorlutik Oqartussanut atatillugu pissutsit assigiinngitsut pillugit inatsimmi nr. 474, 12. juni 2009-meersumi malittarisassat ingerlatiinneqartut inatsisip atuutilernerani atorunnaassasut.

§ 76-imut

Imm. 1-imut

Aalajangersakkami siunertaavoq ilinniartut inatsisip atuutilernerani ilinniarnertuunngorniarfimmi ilinniarnermik ingerlatsisut malittarisassat maannamut atuuttut

ilinniarnerminnik naammassinissaasa qulakkeerneqarnissaa. Inatsisip atuutilinnginnerani Ilinniarnermik aallartitsisut kingulliit 2011-mi ilinniarnermik aallartitsissapput, taamaammallu ilinniarnertuunngorniarfini ukiuni pingasuni ilinniartoqartarmat kingusinnerpaamik ukiut pingasut qaangiunneranni soraarummeertoqarsinnaassaaq.

Ilinniarnernerup qaqugukkut aallartinneqarnera apeqquataatinnagu ilinniarnermut ileqqorissaarnermullu malittarisassat assigiit atuarfimmi ilinniartunut tamarmiusunut atuunnissaasa naleqquttutut isigineqarneranik immikkoortoq kingulleq tunngaveqarpoq. Takkutinngitsoortarneq klassimullu tullermut nuuttarneq pillugu malittarisassani atuutitinneqartussaannngitsunut tunngaviuvoq ilinniartut ilinniarnermik ingerlatsinerminni takkutinnngitsoortarneq klassimullu tullermut nuuttarneq pillugu malittarisassanik allannngortitanik malinninnissaat ilinniartut pisinnaatitaaffiunut akiliunnertut isigineqarsinnaammat.

Imm. 2-mut

Ilinniarnermik ingerlatsereersut ilinniagaqalernermik aallartitsinerminni malittarisassat malillugit ilinniarnertuunngorniarfimmi ilinniarnermi ilinniartitsinerup tunngaviusumik ingerlanneqarnissaanik ilinniartut tunngavissaqartumik ilimasuuteqarnerat aalajangersakkami tunngaviuvoq.

Imm. 3-mut

Ikaarsaariarneq pillugu aalajangersakkanik atuutitinnnginnertut aalajangersagaq isigineqassaaq, taamaammallu aamma immikkorluinnaq pisuni nalilersuereernikkut taamaallaat atorineqarsinnaalluni.

Ikaarsaariarneq pillugu malittarisassap piffissap atuuffissaata taamaalilluni qulakkeertissavaa ilinniartut malittarisassat maannamut atuuttut malillugit misilitsittut soraarummeernermut uppernarsaammik aamma pinissaat, tassanilu malittarisassat maannamut taamaallaat atuuttut malillugit misilitsittoqassaaq.

Atuutitinnnginnissamik aalajangersagaq assersuutigalugu atorineqarsinnaavoq ilinniartup inuttut pissutsit pissutigalugit, tassunga ilanngullugu sivisuumik napparsimaneq, ilinniarnernerup naammassinissaanut ukiut pingasut sinnerlugit atuisariaqarsimanera imaluunniit soraarummeernernik ilinniartitsissutinik ataasiakkaanik soraarummeernernik katitigaanera pineqarpat.

§ 77-imut

Pisinnaasariaqartutigut piumasaqaatit kingumoortumik atuuttut aalajangiunneqarsinnaanngimmata, pisariaqartinneqarpoq aalajangersassallugu, ilinniartitsisut inatsisip atuutilerana sioqqullugu atorfinitsinneqartut, pisinnaasariaqartutigut piumasaqaatit inatsisip atuutilernerata tungaanut atuuttut eqqortissagaat.

§ 78-imut

Pisinnaasariaqartutigut piunasaqaatit kingumoortumik atuuttut aalajangiunneqarsinnaanngimmata, pisariaqartinneqarpoq aalajangersassallugu rektorit inatsisip atuutilerana sioqqullugu atorfinitsinneqartut, pisinnaasariaqartutigut piunasaqaatit inatsisip atuutilerana tungaanut atuuttut eqqortissagaat.